

**INSTITUTIONES
JURIS CANONICI
IN TRES PARTES,
AC IN SEX
TOMOS...**



BIBLIOTECA NAZ.
Vittorio Emanuele III

XVI

C

18

NAPOLI

XVI C 18

1
**INSTITUTIONES
JURIS CANONICI**

IN TRES PARTES,
AC IN SEX TOMOS DISTRIBUTÆ

*Quibus vetus & nova Ecclesiae disciplina
& mutationum causae enarrantur*

A

XVI c 18

DOMINICO CAVALLARIO

JURIS CANONICI ET CIVILIS PROFESSORE
CONSCRIPTAE

*In hac nova Panormitana Editione
accessit*

JUS SICULUM ECCLESIASTICUM

SINGULIS QUIBUSQUE JURIS CANONICI
TRACTATIBUS ADCOMMODATUM.

TOMUS IV.



PANORMI, TYPIS REGIIS, MDCCLXXXVIII.

* ~ * * ~ * * ~ * * ~ * * ~ *
CUM APPROBAT.

**SUMPTIBUS FRANCISCI, ET ROSARII ABBATE
FRATRUM.**

*Nulli sacerdotum liceat sacros canones
ignorare.*

Coelestinus Papa ep. III, cap. 1.

*Canones Nicaeni spiritu Dei conditi &
totius mundi reverentia consecrati.*

Leo M. ep. LXXXIV.

INDEX

CAPITUM ET DOCTRINARUM.

SECUNDAE PARTIS.



CAP. XXVI.

D *E sponsalibus.* pag. 1.

Definitio sponsaliorum :

Sponsalia de praesenti & de futuro :

Qualitates consensus sponsalitii .

Sponsalia sub conditione .

Qui sponsalia contrahunt .

Sponsalium benedictio .

Sponsalitiaë largitates , & anulus pro-
nubus .

Osculum sponsalitium .

Obligatio ex sponsalibus .

Qui sponsalia dissolvuntur :

Additio Juris Siculi .

CAP. XXVII. De matrimonio . 16.

Matrimonium a Deo institutum .

Fines matrimonii .

Vagae conjunctiones obstant generationi .

Additio Juris Siculi .

De

✠ IV ✠

Definitio matrimonii .

Matrimonium etiam sacramentum ,

Matrimonii species .

Sacramenti matrimonii materia & forma .

Minister sacramenti matrimonii .

Matrimonium consensu contrahitur .

Qui error vitiat matrimonium .

An metus vitiet matrimonium .

Consensus patris an necessarius in nuptiis filiorum .

Additio Juris Siculi .

Matrimonium sub conditione .

Sollemnitas nuptiarum apud gentes .

Additio Juris Siculi .

Matrimonia contrahenda ecclesiae denunciata .

Hierologia in nuptiis christianorum olim recepta .

Quando jure civili hierologia nuptiis accessit .

Ritus civiles in matrimoniis christianorum retenti .

Quae recepta in occidenti clandestina matrimonia .

Forma celebrandi matrimonii ex Concilio Tridentino .

Additio Juris Siculi .

Qualitates Parochi & testium .

Quibus diebus matrimonium non celebratur .

Preparatio ad sacramentum matrimonii .

Effectus matrimonii .

Coelibatus apud christianos status perfectior matrimonio .

Qua-

Qualis sit obligatio ad contrahendum matrimonium .

Quid matrimonium conscientiae, & quatenus concedendum .

CAP. XXVIII. *De iis , qui nuptias contrahere vetantur .* pag. 59.

Quid impedimentum dirimens , quid impediens .

Jus principum constituendi impedimenta dirimentia .

An ejus juris usum principes retineant .

Additio Juris Siculi .

Ecclesia etiam constituit impedimenta dirimentia .

Impuberes inhabiles ad nuptias .

Impotentes inhabiles ad nuptias .

Computatio graduum civilis & canonica .

Qui & quando recepta canonica computatio .

Jure naturae & civili quae nuptiae incestae inter cognatos .

Jure canonico olim nuptiae etiam septimo gradu vetitae .

Inde prohibitio ad quartum gradum restricta .

Civilis cognatio etiam nuptias nullas facit .

Cognatio spiritualis nuptias dirimit .

Quid adfinitas , ejusque natura .

Prohibitio nuptiarum inter adfines .

Publica honestas etiam nuptias nullas facit .

Inhabiles ad novas nuptias conjugati .

Nuptiae inter servos jamdiu receptae .

❖ VI ❖

*Raptus quando nuptias nullas facit .
Adulteri quibus casibus inhabiles ad nup-
tias .*

*Etiam homicidium aliquando nuptias nul-
las facit .*

*Inter fideles & infideles nuptiae non sunt .
Votum sollemne castitatis nuptias dirimit .
Et sacer ordo .*

*Impedimenta impediencia ex nova disci-
plina .*

*Olim plura alia impedimenta impediencia .
Additio Juris Siculi .*

CAP. XXIX. *De relaxandis matrimonii im-
pedimentis .* pag 100.

*Impedimenta matrimonii olim principes
relexabant .*

*Quae potestas inde transit ad ecclesiam .
Rarior ex mente ecclesiae impedimento-
rum relaxatio .*

*Ex causa & gratis relaxanda impedi-
menta .*

*Quibus relaxationes impedimentorum com-
mittuntur .*

CAP. XXX. *De divortis .* 107.

Definitio divortii .

Matrimonium jure naturae individuum .

Divortia apud gentes recepta .

Matrimonium jure evangelico individuum .

Notio fornicationis .

*Multi olim docebant , nec per fornicatio-
nem nuptias solvi .*

*Contra alii per adulterium nuptias solve-
bant .*

Etiam ob alias causas olim nuptiae solutae

Le-

✠ VII ✠

Leges christianorum principum de divortis .

Latinae ecclesiae de divortis firmata doctrina .

Matrimonium legitimum quando solvitur .

Matrimonium ratum solvitur monastica professione .

Consummato matrimonio quis effectus voti castitatis .

Variis causis conjuges toro & habitatione separantur .

Additio Juris Siculi .

CAP. XXXI. De secundis nuptiis . pag. 128.

An polygamia juri naturali adversetur .

Polygamia Christi lege interdicta .

Secundae nuptiae christianis licitae .

Secundae nuptiae patribus invisae .

Benedictio secundarum nuptiarum .

Poenae secundarum nuptiarum intra annum luctus sublatae .

CAP. XXXII. De sacrosanctis ecclesiis , & altaribus . 137.

Quo sensu ecclesia hoc loco accipitur .

Varia ecclesiarum nomina .

Primo saeculo christiani non habebant ecclesias .

Eas vero secundo & tertio saeculo habebant .

Ecclesiae auctae & splendiores factae .

Ecclesiae varii generis .

Minores ecclesiae seu privativa oratoria .

Cappellae Regiae .

Additio Juris Siculi .

Novae ecclesiae aedificatio .

Ad-

❖ VIII ❖

Additio Juris Siculi .

Forma & situs ecclesiarum .

Ecclesiae narthex .

Ecclesiae navis ejusque usus .

Pars ecclesiae sacratior sanctuarium .

Altaria in medio sanctuario .

Numerus altarium .

Altaria mobilia .

Sedes episcopi & presbyterorum in interiore bema-
tis parte .

Ecclesiae atrium .

Ecclesiae exedrae .

Cura diaconici cujus erat .

Ecclesiarum partes in nova disciplina .

Consecrationis ecclesiae minister episcopus .

Ritus , quibus ecclesia consecratur .

Actus profani procul ab ecclesia .

Quando imagines & statuae sanctorum in
ecclesiis receptae .

Sacrae imagines & picturae inserviunt in-
stitutioni .

Cultus sacrarum imaginum .

Ecclesiae consecratio non repetenda .

Polluta ecclesia reconciliatur .

Reparatio ecclesiarum .

Additio Juris Siculi .

CAP. XXXIII. De asylo ecclesiarum pag. 178.

Asyla apud Graecos , romanos , & Judeos .

Qui in ecclesiis asylum invaluit .

Cujus potestatis est asyli in ecclesiis con-
stitutio .

Jure Romano qui asy-
lis excluduntur .

Episcoporum desideria de asyli amplitu-
dine .

In Occidente mediis saeculis asyla amplissima.

Rei asylo dejecti jure decretalium.

Loca asyli.

Quomodo rei ad asylum confugere debent:

Poenae in violatores asylorum.

De Judice in causa asyli & reorum abductione.

Bulla Gregorii XIV. non recepta.

Nova forma abducendi reos ab asylo apud nos.

Et forma judicii in causa asyli.

Quae crimina apud nos asylo exclusa.

Loca, quae asylum non praestant.

Additio Juris Siculi.

CAP. XXXIV. De sepulturis.

pag. 203.

Sepultura apud gentes recepta.

Varii sepeliendi modi.

Christiani humatione usi.

Sepultura apud romanos extra civitates.

Etiam christianorum sepulcra extra urbes.

Qui invaluit in ecclesiis sepultura.

Cemeteria loca sepeliendis christianis adiecta.

Christiani in loco profano non sepeliendi.

Sepultura ecclesiastica pars christianae communionis.

Christiani in propria paroecia sepeliendi.

Nisi habeant majorum sepulcrum.

Aut nisi sepulturam sibi selegerint.

Esequiae fiunt in paroecia alibi sepulto cadavere.

Vetitae pro exequiis & sepultura exactio-

Ob.



Oblationes pro defunctis receptae .
Oblationes pro defunctis in consuetudinem
versae .
Quae sit quarta funeraria .
Quibus denegatur ecclesiastica sepultura .
Additio Juris Siculi .

CAP. XXXV. de Monasteriis. 226.

Monasteria primum in solitudinibus con-
stituta .

Inde etiam in urbibus .

Monasteria non aedificanda sine Episcopi
consensu .

Observanda in novi monasterii concessione.
Forma monasterii .

Monasteria episcopo subiecta , nisi exemta
sint .

CAP. XXXVI. De hospitalibus pag. 234.

Variae hospitalium species .

Origo hospitalium apud cristianos .

Observationes de hospitalibus in specie di-
ctis .

Antiquiora hospitalia ferme destructa .

Hospitalia vel religiosa vel profana sunt .

Olim hospitalia omnia episcopis subiecta .

At inde multa exemta sunt .

Decreta conciliorum de potestate episcopi
in hospitalia .

Jus nostrum recentius pactis conventis in-
ductum .

Officialis hospitalium saepe clerici .

Multa hospitalia a regularibus admini-
strata .

Qui in hospitalibus sacra administrant .

Officiales quotannis reddere debent ratio-
nes . Qui

❖ XI ❖

Qui in hospitalia excipiendi .

CAP. XXXVII. De Divino officio :	251.
CAP. XXXVIII. De dierum festorum cele-	
bratione .	268.
CAP. XXXIX. De jejuniis .	273.




INSTITUTIONES JURIS CANONICI.

PARS II.

CAPUT XXVI.

De sponsalibus.

Definitio sponsaliorum.

§. I.  PONSALIA antiquis Romanorum & aliarum gentium moribus, quos christiani retinuerunt, nuptiis praemitti solent, idque ut cautius & ordinatius matrimonium ineatur, & christiani ad sacramenti gratiam se disponant.

Sunt sponsalia proprie sic dicta *futurarum nuptiarum promissio*, ut Nicolaus I. definivit (a), seu, ut habet Florentinus jurisconsultus, *mentio & repromissio futurarum nuptiarum* (b). Dicta autem sunt Romanis sponsalia a spondendo, quia moris fuit veteribus *stipulari & spondere sibi uxores futuras*, quod Ulpianus (c) testatur, exstantque passim apud comicos talium stipulationum exempla, quae Briffonius (d) collegit. Hinc a sponsione, quae interrogationi respondebat, *sponsaliorum*, ut & *sponsi* & *sponsae* appellentur.

A

pel-

(a) *Can. III. C. 30. q. 5.* (b) *L. I. D. de sponsat.*

(c) *L. II. D. eod.* (d) *Briffon. de rit. nuptiar.*

pellationes ortae sunt. Temporis lapsu sollemnitatis stipulationis in sponsalibus apud Romanos parum frequentata est (fortasse quod ex sponso nullam dabant actionem), atque ita, antiquis nominibus retentis, ea passim solo consensu contracta sunt, quod jus exhibent jurisconsulti, quorum fragmenta in digestis prostant (a). Inde receptum inter absentes per nuntium, aut epistolam sponsalia contrahi (b). Cui juri adhaesit ecclesia, quae semper docuit, etiam mero consensu perfici sponsalia.

Sponsalia de praesenti & de futuro.

§. II. Unius generis sponsalia, quae futurarum nuptiarum pactiōnem continerent, Romani adgnoverunt: idque pluribus probat Boëthmerus (c) contra Henricum de Coccei, Ulricum Huberum, aliosque, qui, etsi non eadem ratione, sponsalia de praesenti apud Romanos obtinuisse sentiunt. At apud scholasticos & canonistas sponsalia vel sunt *de futuro*, vel *de praesenti*, quorum illa sunt futurarum nuptiarum promissio, haec vero in praesens matrimonium consensus, ac proinde sunt ipsum matrimonium ratum, quod appellant. Inducta videtur distinctio ista ab antiquis scholasticis & canonistis, ut ambiguitatem, quae in vocibus *sponsaliorum* & *sponsorum* in antiquis monumentis occurrebat, evaderent. Scilicet in fragmentis patrum *sponsaliorum* & *nuptiarum*, item *sponsorum* & *con-*

(a) L. IV. VII. & XI. eod. (b) L. IV. §. 1. & L. V. & XVIII. eod. (c) Boëhm. jur. eccles. lib. IV. tit. 1. §. 3. & seqq.

conjugum voces confunduntur & alternant (a). Quae loquendi ratio ex usu scripturarum perfecta est, *Recordare consuetudinis scripturarum*, inquit Hieronymus (b), *quod sponsi viri, & sponsae vocentur uxores*. Hinc in ecclesiasticis monumentis sive genuinis sive supposititiis saepe desponsationi vis matrimonii tribuitur (c), modo sponsalia & matrimonium tamquam diversa proponuntur (d). Ad tollendam igitur vocum ambiguitatem & ad concordiam veterum monumentorum scholastici in saeculo distinctionibus affueto sponsalia aut de praesenti, aut de futuro esse dixerunt; atque ita ubi patres desponsationi effectus veri matrimonii tribuere videntur, id de sponsalibus de praesenti; ubi vero negant sponsalia esse matrimonium, de sponsalibus de futuro interpretati sunt. Inventae distinctioni vim addiderunt pontifices, qui in responsis suis desponsationem praesentem a futura distinguunt (e). Interim jure concilii Tridentini nulla amplius videntur esse sponsalia de praesenti; etenim eo jure non admittuntur matrimonia clandestina, & ubi sponsi coram parcho seu alio sacerdote de ipsius parochi, seu ordinarii licentia, & duobus vel tribus testibus in nuptias praesentes consentiunt, matrimonium, non sponsalia de praesenti dicimus.

A 2

Qua.

(a) *Can. VI, IX. & XII, C. 27. q. 2.* (b) *Hieronym., in Matth. cap. I.* (c) *Can. XI, XIV. & XV, eod.* (d) *Can. XVIII, XXXIV. & XXXIV. eod.*

(e) *Cap. XI. ex. de praesumpt., cap. XXII. ex. de sponsalib.*

§. III. Consensus autem, quo sponsalia contrahuntur, utrinque per verba aut alia manifesta signa exprimi debet, & quidem ex certa scientia & libera voluntate. Omnia humana negotia ex certa scientia & libertate proficisci debent; at in sponsalibus & matrimoniis, quae animos potius quam corpora confociant, clario-ri scientia & majori libertate opus est. Quapropter vitiantur sponsalia nulliusque effectus sunt, errore interveniente circa ea, quae ad sponsaliorum essentiam pertinent; veluti si in persona contrahendum erratum sit, aut si ad matrimonium habilis putetur, qui re vera inhabilis est: & vi injusta metuque, qui, ut dici solet, *in constantem virum cadit*, etiamsi a ter-tio illatus fuerit (a), & iuramentum accesserit (b), modo vis in finem contraendi sponsalia facta sit (c). Sane qui errant circa sponsalio-rum naturam, consentire non intelliguntur. Et quamvis qui coacti agunt, etiam consentiant: tamen quia liber consensus, qualem sponsalia requirunt, deficit, & praeterea quia cogenti jus non est alterius promissionem acceptare; per vim contracta sponsalia nullam vim habent. Et hinc jure Romano cautum est, ut feminae, quae cum magistratibus provinciarum durante eorum imperio sponsalia contraxerant, finito im- perii anno a fide data possent resilire; quod fe-
mi-

(a) *Cap. XI. ex. de sponsat. impub.* (b) *Cap. II. ex. de eo, qui duxit in matrim.* (c) *Confer. Gon- zalez ad cap. XV. ex. de spons. n. 4.*

minae tanta sponsi potestate percussae non omnino sponte pactionem de futuro conjungio fecisse viderentur (a). Ceterum sponsalia errore, dolo, metuve nulla inde possunt convalescere, si errore, dolove detecto, metuve deposito rata habeantur.

Sponsalia sub conditione.

§. IV. Quemadmodum vero ceteri contractus, ita etiam sponsalia sub conditione contrahi possunt, titulusque ea de re in decretalibus prostat. Conditione quae negotiis adiiciuntur, vel *possibiles & honestae* sunt, vel *impossibiles & turpes*. Certi juris est, sponsalibus, non secus ac ceteris negotiis, condiciones possibiles & honestas adiici posse, veluti si tantum pecuniae dotis nomine intuleris (b), vel si pater, aut avus, aut alius sponsalibus consenserit (c). Quoniam vero condiciones ab incerto eventu negotia, quibus adiiciuntur, suspendunt; hinc sub talibus conditionibus inita sponsalia, non aliam obligationem inducunt, quam ut eventus conditionis expectetur (d); interim vero sponsi ad nuptias celebrandas non tenentur. Impleta vero conditione sponsalia purifiunt, & ad nuptias contrahendas obligare incipiunt: quae eadem obligatio eis accedit, ubi ille, in cujus gratiam conditio adjecta est, eam expresse vel factis ipsis remittat (e). Verum si
spon-

(a) *L. I. C. Th. si provinciae rector.* (b) *Cap. III. ex. de conditionib. adposit.* (c) *Cap. V. ex. eod.*

(d) *Cap. III. V. ex. de condit. adposit.* (e) *Cap. VI. ex. eod.*

sponsalibus conditiones impossibiles adiiciantur, ea nulla sunt ex defectu consensus (a): qui enim sub impossibilibus conditionibus paciscuntur, non consentunt consentire (b): idemque jus est de conditionibus turpibus, quae per legem etiam reputantur impossibiles. *Quae facta*, inquit graviter Papinianus (c), *laedunt pietatem, existimationem & verecundiam nostram, & (ut generaliter dixerim) contra bonos mores fiunt, nec facere nos posse credendum est.*

Qui sponsalia contrahunt.

§. V. Quoniam vero sponsalia per consensum in futuras nuptias contrahuntur, recte ea contrahunt omnes, qui in futuras nuptias possunt consentire. Hinc sponsalia contrahere vetantur furiosi, mentecapti, infantes (d); nec porro rara sunt sponsalia eorum, qui nuptias inter se contrahere vetantur (e), veluti inter proximos cognatos & affines. Contra impuberes sive patres sive filii familias, quod in futuras nuptias possunt consentire, & Romanis legibus & sacris canonibus sponsalia recte contrahunt, modo sint infantia maiores, hoc est si septem annis minores non sint (f); hac enim aetate ex sententia Stoicorum, quam jurisconsulti & inde pontifices suam fecerunt, homines incipiunt intelligere.

Ita

(a) Confer. Zoësius in tit. decretal. de conditionib. apposit. num. XXII. (b) L. XXXI. D. de O. & A.

(c) L. XV. D. de conditionib. instit. (d) L. VIII. & XIV. §. 9 D. de sponsalib. (e) L. XV. & seqq. eod. (f) L. XIV. D. de sponsal. , cap. IV. & XIII. ex. desponsat. imuber.

Ita aetas sponſalibus neceſſaria non lege , ſed natura potius definitur . Quoniam vero lubricum & fragile eſt impuberum conſilium , adveniente pubertate a ſponſalibus poſſunt reſilire (a) : atque adeo ſi pubes cum impubere ſponſalia contrahat , non aequo jure utrinque conſiſtunt , pubes enim a fide data non poteſt reſilire , bene vero impubes (b) . Ut vero rata & legitima ſint ſponſalia filiorum familias , parentes etiam debent conſentire , aut ſaltem non diſſentire , quod & naturae redolet honeſtatem , & utroque jure conſecratum eſt (c) . Et bene habet , quod plerique theologorum tenent , & late Franciſcus Muſcettula & doctiſſimus Mazochius probant , nulla eſſe etiam jure canonico ſponſalia a filiis familias invitis parentibus contracta , modo iſti cum ratione diſſentiant (d) . Ipſi quoque patres familias filiorumque impuberum puberumve nomine etiam futuras nuptias paciſcuntur , paſtoque parentum ſtare tenentur filii , ſi expreſſe vel tacite conſenſerint (e) : etſi jure Ramano tum filia familias a patre ejus nomine ſponſalia contrahenti poterat diſſentire , ſi indignum moribus vel turpem ſponſum ei pater elegiſſet (f) . Quod

A 2

ſi

(a) *Cap. VIII. ex. eod.* (b) *Cap. VII. ex. eod.*

(c) *L. VII. §. 1. D. de ſponſalib. , conc. Carthag. IV. can. 13. , can. 1. & III C. 30. q. 5.* (d) *Muſcettula diſſ. de ſponſalib. & matrim. filiorum fam. dub IV. n. 145. & ſeqq. , Mazoch. in mantiſſa ad cit. Muſcett. diſſert.* (e) *L. XIII. D. de ſponſalib. , Ivo Carnotensis ep. LXIX. , cap. un. §. ult. de ſponſalibus in 6.* (f) *L. VII. D. de ſponſalib.*

si parentes non jure a sponsalibus filiorum dissentiant, filii contra eorum morositatem judicis auxilium implorabunt.

Sponsalium benedictio.

§. VI. Quamvis autem sponsalia nudo partium consensu contrahantur; tamen multis sollemnibus & ritibus, veluti sacerdotali benedictione, osculo, arris & juramento confirmari consueverunt: quin adhibiti testes sunt & instrumenta confecta, ut ea jam contracta fuisse constaret. Et quod spectat ad sacerdotalem benedictionem, inde usque a primis saeculis mos fuit christianis matrimonium, quod contrahere intendebant, episcopo & toti ecclesiae manifestare, idque ut nuptias in domino contraherent, & ne illicitae inter christianos conjunctiones fierent: quod Ignatius martyr & Tertullianus (a) tradunt. Denuntiata ecclesiae sponsalia episcopi sollemni benedictione confirmabant, idque aperte ex Siricio pontifice constat, qui ex ea benedictione, infert, sacrilegium esse sponsalia violari. *Illa benedictio*, sunt Siricii verba (b), *quam nupturae sacerdos imponit, apud fideles cujusdam sacrilecii instar est, si ulla transgressione violetur.* Et Augustinus teste Possidio (c) ex sententia Ambrosii dicebat, sacerdotem sponsalibus christianorum vocatum interesse, *ut vel eorum jam pacta & placita firmarentur, vel benedicerentur.* Ex antiquis moribus sacerdotali benedictione sponsa-

(a) Ignat. Martyr. ep. ad Polycarp. n. V., Tertull. de pudic. cap. IV. (b) Siric. ep. I. ad Himer. Tarrac. cap. IV. (c) Possid. vit. August. cap. XXVII.

lia in ecclesiis Orientalibus adhuc confirmantur; sed in ecclesiis Latinis a multis saeculis desit ista sponsaliorum benedictio; & hinc sponsalia juramento confirmari coeperunt, quae disciplina saeculis XII. & sequentibus praesertim vigeat. Ceterum etsi apud Latinos non amplius usurpetur sponsaliorum benedictio, tamen in plerisque locis in loco sacro & coram paracho contrahi solent: quod locorum canones & rituales libri inculcant.

Sponsalitiae largitates & anulus pronubus.

§. VII. Confirmari quoque consueverunt sponsalia muneribus, quae ut plurimum sponsus sponsae, raro haec illi mittere solebat. Vocantur hujusmodi munera *donationes sponsalitiae*, *arrae* & *pignora*, quoniam eorum datione & receptione sponsalia firmabantur, & veluti loco pignoris erant, quo ad nuptias celebrandas se adstrictos sponsi demonstrarent. Inter sponsalia pignora maxime eminebat anulus, quem tamquam mutuae pactionis signum ac testimonium sponsus sponsae dare consuevit, eumque a nuptiarum caerimonia *pronubum* Tertullianus (a) appellavit. Erat autem anulus pronubus innocens caerimonia a Romanis jam ante christianam religionem adhibita, & a Judaeis quodammodo etiam probata, quod Seldenus (b) observat. Usus anulorum receptissimus erat apud Romanos, at non ornatus causa, sed in signandi usum, quod ex Atejo Capitone Macrobius scribit (c), & Briff. *Inst. jur. can. T. IV.* B fo-

(a) *Tertull. apol. cap. VI.* (b) *Seldenus uxor Heb. lib. II. cap. 14. & 15.* (c) *Macrobius lib. VII. c. 13.*

sonius (a) observat. Hinc anulis signa erant inscripta. Et si anuli in pactionibus loco pignoris & arrae dari consueverint, id factum videtur, quia anuli semper erant ad manus. Et conveniebat quidem in pignus sponsaliorum anulum dari, ut ita indicaretur custodia rei domesticæ, quæ uxori erat demandata, in quem finem claves novæ nuptæ tradi solitas Festus testatur. Sane tradit Clemens Alexandrinus dari consuevisse anulum uxori non ornatus gratia, sed ut obsignaret, quæ domi erant (b). Obsignari enim solitas arcas penurias, ne a servis surriperentur, ex Plinio Baronius (c) observat. Itaque anuli datio signum erat futuri promissi matrimonii, ejusque datione sponsam sponsus sibi oppignorabat, eoque pignore eorum corda jungebantur. Inde christiani in anulis signum fidei quod mutui amoris & concordiae symbolum habebatur, insculpere solebant: & inde factum, vulgo etiam ab antiquis creditum est, ut manus sinistrae digito, qui minimo vicinus est, anulis inferatur, quia in eo vena quædam, ut fertur, inquit Isidorus (d), sanguis ad cor usque perveniat. Erat autem Plinii ætate ex ferro (e) & quidem sine gemma pronubus anulus: sed secundo ecclesiæ sæculo jam aureus factus erat: quod ex Clemente Alexandrino & Tertulliano constat (f).

Oscu-

-
- (a) Briffon. ad L. Juliam de adulteriis. (b) Clemens Alexandr. paedag. lib. III. cap. 11. (c) Baron. ad an. LVII. (d) Isidor. lib. II. de offic. cap. XIX. (e) Plinius lib. XXXIII. hist. natur. cap. 1. (f) Clemens Alexand. loc. cit., Tertull. apol. c. VI.

Osculum sponsalitium.

§. VIII. Porro sponsalia confirmari consueverunt per osculum, quod vir sibi desponsae mulieri impingebat. Usus osculi in matrimoniis etiam apud ethnicos cognitus erat, teste Tertuliano (a); at potiori ratione illud in sponsalibus suis christiani usurparunt. Nempe apud christianos nihil osculo sanctius & usitatus: eo se in orationibus & sacra synaxi in signum mutuae caritatis & foederis complectebantur: nec aliter quam osculi impressione se invicem salutabant. Itaque antiquorum christianorum ingenium & eorundem castum amorem osculum sponsalitium redolebat. Sed non omnia sponsalia per osculum contrahebantur: distinguit enim Constantinus M. inter sponsalia per osculum, & ea quae sine osculo contracta erant (b). In Occidente simul atque pristina simplicitas in malitiam degenerare coepit, osculum sponsalitium sensim defuevit; rara enim ejus in mediorum saeculorum monumentis exstant exempla (c). Sed in Oriente hanc osculi sollemnitatem Alexius Comnenus restituit, vel potius confirmavit (d). Et hinc sponsalia in imperio Graeco duplicis generis fuerunt; alia enim per sacras preces, osculum & arras firmabantur, quae indissolubilia erant, quippe quia per osculum aliquid de virginitate delibari omnis antiquitas intellexit; alia vero non

B 2

adeo

(a) *Tertull. de veland. virginib. cap. XI.* (b) *L. V. C. Th. de sponsal., L. XVI. C. de donat. ante nupt.*

(c) *Confer. Cangius v. osculum.* (d) *Ap. Matthaeum Blastar. in syntagm. alphab. cap. XV.*

adeo strictae erant obligationis, utpote secundum leges nudo consensu contracta: quae duo sponsaliorum apud Graecos genera ex Balsamone (a) feliciter Mazochius (b) eruit: Perseverat adhuc in his moribus Graeca ecclesia antiquorum rituum tenacissima, ubi sponsalia indissolubilia paullo ante matrimonii celebrationem interponuntur.

Obligatio ex sponsalibus.

§. IX. Sponsalibus jure contractis, utrinque ex naturali ratione ad nuptias contrahendas oritur obligatio. Sed jure Romano ex sponsu actio efficax ad nuptias contrahendas non datur: nuptiis enim, quae potius animos quam corpora debent illigare, adversari videbantur coactiones; & praeterea ubi divortiorum licentia recepta erat, sponsaliorum firmitas nulla esse poterat: adeo ut *contra bonos mores* viderentur poenae, ex conventionem sponsalibus additae (c). Sed apud christianos inde usque ab initio nihil sanctius fide data, ac ita sua vis sponsalibus constitit, praesertim si per osculum & sacerdotalem benedictionem contracta essent. Hinc Siricius papa *sacrilegii instar* esse ait, desponsam puellam alteri nubere, idque quia data benedictio violetur (d). Itaque Illiberitani patres triennali poenitentiae subiciunt siue parentes siue sponso, qui sponsaliorum fidem fregissent (e). Et synodus Trullana adulterii crimen agnoscit, si de-

(a) Balsamon in can. Trull. XCVIII. (b) Mazoch. diatriba in can. Illiberit. LIV. (c) L.CXXXIV. D. de V. O. (d) Siric. papa ep. I. ad Himer. cap. 4. (d) Conc. Illiber. can. LIV.

desponsa puella alteri nubat (a) : quod de sponsalibus osculo & arris firmatis accipiendum esse Balsamon tradit (c), & fuse Mazochius (b) illustrat. Ex qua christianorum disciplina christiani imperatores quadrupli ejus, quod arrarum nomine datum erat, & inde in sponsis aetate majoribus dupli poena sponsalium obligationem munierunt (d). Stat adhuc in Oriente tanta sponsaliorum vis, quod osculum & arrae fidei datae accedant; verum in Occidente ubi osculum & benedictio usurpari desierunt, adhuc multa est sponsaliorum obligatio, praesertim quando juramentum fidei datae accessit; at certe non tanta, qua sponsis invitae nuptiae obtrudi valeant; quae sententia societati matrimoniali magis videtur convenire. Sane ubi sponsi fidem etiam jurejurando firmatam nolint implere, potius monentur, quam coguntur, quod Lucius III. rescripsit, & quidem ea summa ratione, quod coacta matrimonia solent malum finem habere (e). Et si Alexander III. etiam *ecclesiastica censura compellendum* invitum sponsum respondit ad implenda sponsalia jurejurando firmata (f); id ea exceptione dixit, *nisi rationalis causa exstiterit*: & in hoc negotio, ubi

coa-

(a) *Conc. Trullan. can. XCVIII.* (b) *Balsamon. in cit. can. Trullan.* (c) *Mazoch. diatr. in can. LIV. Illiber. addita dissertationi Muscetulae de sponsalib. & matrim. filiorum fam.* (d) *L. VI. C. Th. de sponsalib., L. V. C. de sponsalib.* (e) *Cap. XVII. ex. de sponsalib. Confer. Franc. Florens in caus. XXVII. quaeft. 2.* (f) *Cap. IX. ex. eod.*

coactiones fini videntur adversari, vel levissima causa rationabilis videtur, quod more suo Mazochius (a) observat. Ceterum ubi adjuncta aliud suadent, puta si per osculum pudicitia delibata sit, vel si sponsa deflorata; omnino ad nuptias sponsus cogi debet, pertinetque profecto ad magistratus officium, vi armata refractarios ad nuptias compellere.

Quæ sponsalia dissolvuntur.

§. X. Pluribus autem modis sponsalia, quantumvis rite contracta, dissolvuntur; nec enim indissolubili vinculo adstringunt, quemadmodum matrimonium. In primis dissolvuntur mutuo partium consensu, etiamsi jurejurandi religione contracta sint, quia jusjurandum ipsam naturam contractus non immutat (b); nisi impuberes sint, qui sibi mutuo futuras nuptias promiserunt, nam propter ætatis & consilii infirmitatem ante pubertatem a fide data resilire non permittuntur (c). II. per matrimonium, quod sponсорum alter injuria quidem sed valide cum alia muliere contrahit, ita nempe ut relictus omnino a fide data liberetur, foedifragus vero non teneatur quousque duret matrimonium. III. per ordinis sacri susceptionem (d), & per ingressum in religionem ejusve professionem; jure enim canonico ubi quis ad Deum se convertit, paene omnia alia vincula solvuntur. Sed quousque religionis emittatur professio, conversi ob-

li-

(a) Mazoch. not. XXXIV. in Muscettul. (b) Cap. II. ex. de sponsalib. (c) Cap. VIII. ex. de desponsat. impuber. (d) Cap. un. de voto in 6.

ligatio potius in suspenso est, quam solvitur; relictus vero ab initio liberatur. IV. solvuntur sponsalia sequenti alterius fornicatione, idque in solius innocentis favorem (a), & constanti & insigni alterius infirmitate, aut deformitate, quae supervenit, veluti si mulier leprosa fiat, aut paralytica, vel oculos aut nasum amittat, seu quidquam aliud ei turpius advenerit. Omnibus nempe pactioibus natura sua inest conditio *rebus ita stantibus*: multo magis id valere debet in sponsalibus, quae mutuo amore sustentur. Sed non omnis superveniens mutatio sponsalia dissolvit, sed tantum ea, quae si praevisa fuisset, sponsalia omnino contracta non essent. Solvuntur V. sponsalia per profectionem alterutrius ad longinqua sine alterius consensu, respectu tamen partis relictæ (b).

✠ *Ex Constitutionibus Regni sponsalia ita necessaria visa fuerunt simul cum cæteris Juris Canonici publicis sollemnitatibus, ut iisdem deficientibus matrimonium clandestinum dictum fuerit; nec filii ex eo orti legitimi successores haberentur, imo doctem mulieres amitterent, exceptis viduis quæ ad celebrationem sponsalium, & publicam sacerdotalem benedictionem recipiendam haud obstringebantur: ita sanxit rex Rogerius lib. 3. const. Regni Siciliæ Tit. 22. de Matrimoniis contrahendis ubi hæc:*
„ Sancimus lege præsentis volentibus omnibus con-
„ trahere matrimonium necessitatem imponi univer-
„ sis hominibus regni nostri, & nobilibus maxime
„ post

(a) Cap. XXV. ex. de jurejur. (b) Cap. V. ex. de sponsalib.

„ post sponsalia celebrata sollemnitate debita , &
 „ sacerdotali praemissa benedictione matrimonium
 „ sollemniter , & publice celebrari . Alioquin no-
 „ verint amodo monentes contra nostrum rega-
 „ le edictum neque ex testamento neque ab in-
 „ testato se abituros hæredes legitimos ex Clan-
 „ destino matrimonio , & illicito ad nostram san-
 „ ctionem procreatos : Mulieres etiam dotes aliis
 „ nubentibus legitime debitas non habere . Rigo-
 „ rem cuius sanctionis remittimus viduis volenti-
 „ bus ducere virum . „

Etas in iis, qui sponsalia contrahunt necessaria jure Siculo est ea, que ad cæteros contractus ineundos requiritur , adeoque patet pupillos pupillasve absque auctoritate tutorum contrahere non posse , ut habetur ex Cap. 72. Caroli 2. Quo melius quam legibus romanis infirmæ & imprudenti ætati consultum , & provisum , ait Franciscus Testa in notis ad hoc capitulum . Romanis enim legibus , ut minores nuptias contraherent curatoris vel propinquorum auctoritas & judicium minime requirebatur l. 1. & 2. Cod. de nuptiis .

C A P U T XXVIII.

De matrimonio .

Matrimonium a Deo institutum .

§. 1. **S**anctum matrimonii foedus a Deo ipso ad humani generis propagationem institutum est . Etenim humanum genus a Deo conditum ex conditoris intentione non unius ætatis spatio , sed potius in longum ævum ,
 que-

quemadmodum & cetera animantia, existere oportebat. Hinc quoniam homines morti erant obnoxii, Deus ut nova semper prole fatidam-
na repararet, medium instituit ad hominum
perennem generationem (a). Poterat quidem
Deus semper ex limo terrae homines creare,
at pro sapientia sua melius esse vidit, vim ge-
nerationis hominibus ipsis tribuere; sic enim ho-
minum propagatio reliquorum animantium etiam
plantarum generationi conveniebat: & vita ho-
minum socialis & mutua inter eos amicitia ea-
ratione fortius fovebatur. Hinc homines, non
secus ac reliqua animantia & plantae ipsae, ma-
res & feminae creati, hinc membra in maribus
& feminis ad generationem apta, hinc mutuus
& vehemens utriusque sexus inter se amor, hinc
liberorum appetitus. Non ergo tantum bonae,
sed etiam necessariae ex creatoris intentione
nuptiae sunt. Et errarunt profecto Democri-
tus & Epicurus, qui matrimonium reprobabant,
ut sollicitudinum & tristitiae fontem uberrimum:
ut & Stoici, qui veluti rem indifferentem nu-
ptias traducebant. Multo magis errarunt post
evangelii lumen multi haeretici, qui nuptias
veluti corruptionem & stuprum dictitabant, quo
nomine celebres fuerunt Encratitae & Mani-
chaei, qui feminam a Deo malo conditam do-
cebant; atque adeo qui se nuptiis copularer
opus malum perficere (b). Paullo modestius,
Inst. jur. can. T. IV, C sed

(a) Confer. Pufendorf. de jure nat. & gent. lib. VI.
cap. 1. §. 2. (b) Clemens Alexandr. Strom. III.
cap. 9., Epiphan. haer. XLV. §. 2.

sed nihilo minus falso, docebant Hieracitae & Eustathiani nuptias in veteri testamento licitas fuisse, sed post Christi adventum reiiciendas, utpote quibuscum regnum coeleste obtineri nequeat (a). Etenim Christus tantum abest, ut nuptias reprobarit, ut potius eas nova cumularit benedictione.

Fines matrimonii.

§. II. Plures autem ex ipsius naturae scitis sunt matrimonii fines. Praecipuus est liberorum procreatio; quo spectant instrumenta generationis, quibus mas & femina donantur, mutuus inter conjuges amor, & ex ipsa corporum conjunctione promanans voluptas. *Pro-pagatio liberorum*, inquit Augustinus (b), *prima est & naturalis causa nuptiarum*. Alter aequè principalis matrimonii finis est liberorum educatio: parum enim certe est filios genuisse, nisi etiam educantur: natura infantes recens nati sibi non sufficiunt; & deinde dum adolefcunt, longa & studiosa institutione indigent. Hinc tener amor parentibus erga filios suos inditus, ut scirent, se ad eos educandos teneri; idque etiam bruta natura ipsa impellente faciunt (c). Est & tertius nuptiarum finis ex prioribus proficiscens, ut conjuges in totius vitae necessitatibus se mutuo adjuvent: quem finem etiam expressit Deus, quando Evam crea-

(a) *Epiphan. haer. LXVII. §. 1. Confer. Bingham. orig. eccles. lib. XXII. cap. 1. §. 5. seqq.* (b) *August. lib. 1 de adulter. conjung.* (c) *Confer. Heinec. elem. jur. nat. lib. II. cap. 2. §. 27.*

turus dixit, *faciamus ei adjutorium simile sibi (a)*. Sed quando nulla subest spes humani generis propagandi, solius adjutorii gratia contrahere matrimonium, fortasse naturae instituto non convenit; in hac enim specie adjutorium istud potius oneri, quam subsidio videtur esse. Quæ quum ita sint, extra naturae fines est, instrumentis generationis uti non ad hominum propagationem, aut solius explendae libidinis causa nuptias contrahere (b): voluptas enim in nuptiis potius generationi interservit, quam veluti finis principalis spectari potest. Et si apostolus vult, ut qui coelibes esse non possunt, nuptiis illigentur, ut τὸ πρὸς ὄρεσιν ἡσυχία extingatur (c); non permittit quidem ut ob solam voluptatem nuptiae contrahantur; sed potius ut servientes humani generis propagationi, consequenter etiam libidines extinguant: quo sensu locuti videntur Chrysostomus (d) alique ex veteribus, qui etiam ad extinguendam libidinem nuptias institutas adfirmant.

Vagae conjunctiones obstant generationi.

§. III. Quando autem ad filiorum generationem & educationem & ad mutuum viri & mulieris auxilium nuptiae institutae sunt; profecto ordine quodam firmisque legibus contrahendae sunt, ut vagis conjunctionibus eliminatis, & proles humana feliciter proveniat, & civitates beatius stent. Sane more brutorum hominum

C 2

ge-


(a) *Genes. II. 18.* (b) *Confer. Pufendorf. de jure nat. & gent. lib. VI. cap. 1. §. 4.* (c) *1. Cor. VII. 9.*

(d) *Chrysost. de virginit. cap. XIX.*

generatio & educatio inter vagas incertasque conjunctiones recte non procedit. Brutorum femellae certam stabilemque gignendi servant rationem, quam nulla ratione turbant: brutorum filii non adeo longa & studiosa cura indigent; cui officio plerumque sola mater sufficit. At in hominibus fere omnia contraria. Mulieres constantem generandi rationem non servant, eamque pudore, odiis, formae conservandae studio saepe restringunt. Concubitus incerti non multum ad generationem, nihil verò ad educationem proficiunt. Pater enim utpote incertus quì alet, quos suos filios esse nescit? Et mater, cui in hac specie tantum onus incumberet, pudore, legibus civitatis, naturali imbecillitate veluti naturam exuet & educationem derelinquit (a). Ad haec familiae, quarum foedere civitates coalescunt, ubi per vagas & incertas commissiones homines progignuntur, nulla sunt. Et certe confusio potius quam civitas videri poterat uxorum communio, quam Aethiopes Garamantici, Britanni, Heliopolitae aliaeque barbarae gentes induxerunt (b). Solinus siquidem lasciviam Garamantum describens adfirmat, inter eos nullum filium agnoscere, nec patrem revereri (c). Quod si Platoni etiam communio uxorum in republica sua placuerit, id ei tamquam crimen ab ethnicis philosophis & a patribus ecclesiae intenditur, nisi forte ita com-

(a) Confer. Montesquieu *l'esprit de loix* lib. XXII. chap. 1. 2. (b) Confer. Pufendorf. loc. cit. §. 15. (c) Solin. cap. XXX.

communio illa cum Clemente Alexandrino accipi debeat, quasi Plato dixerit, nondum nuptas mulieres esse communes eorum, qui essent petaturi, non postquam nupfissent (a).

 *Hac de re summo opere commendanda Regni nostri prudens legislatio qua ab anno 1515 effrons turpium mulierum libido, quae corporum suorum lucrum facientes vagis conjunctionibus sacrosanctas matrimonii leges violabant, gravissimis poenis cohibita est. Confer pragmaticam sanctionem Lib. 3. Tit. 84. de Lenonibus qua pœna truncationis nasci indicitur lenis sollicitantibus pudicitias uxorum, filiarum, sororum ac quarumlibet virginum vel aliarum honestarum mulierum, quas vir bonus aliquis intra domus suæ septa tenere noscitur; quæ vero suasionibus animos mulierum sui juris existentium ad fornicandum allexerint legitima probatione convictæ prima vice pœna fustigationis ac signationis in fronte, deinde pœna truncationis nasci puniuntur; quamvis tit. 85. sequenti eadem pœna a Rogerio Rege indicta matribus publice suas filias prostituentibus mitigetur respectu earum quæ consensientes filias quas propter inopiam nedum matrimonio jungere sed etiam alere non possunt alterius voluptatibus exponunt.*

Verum cum harum legum robur annorum lapsu aliquantulum remissum esset nova sanctione die 10. Martii an. 1773. antiquæ constitutiones Rogerii, & Friderici renovantur, ac nonnulla præscribuntur ad vagos concubitus extirpandos:
ac

(a) *Clemens Alexandr. Strom. III. cap. 2.*

ac 1. ut post angelicam salutationem nulli turpium mulierum liceat per vias publicas deambulare, aut publicis in locis etiam sub prætestu ul-
 ti- etum emendicandi permanere poena fustigationis transgressoribus indicta; imò ei quæ sub viri habitu alienæ pudicitiae insidiatur poena triennalis carceris adjungitur; quod extensum est ad viros qui vi, ac dolis mulieres seducunt 2. ut viri qui cum hisce mulieribus post salutationem angelicam deprehensi fuerint triennali exilio puniantur. 3. meretricibus publicis extra civium habitationem permanere jubetur.

Definitio matrimonii.

§. IV. Nuptiae five matrimonium ex creatoris institutione videntur esse societas individua, quam masculus & femina procreandae & educandae sobolis & mutui praesidii gratia ineunt. Etenim ubi Deo placuit, ut humanum genus ex semine ab ipsis hominibus propagaretur; hominem masculum & feminam creavit, benedixitque illis, ut crescerent & multiplicarentur (a). Feminam autem non ex limo terrae Deus condidit, sed ex una ipsius Adae costa (b), ut & viro adjutorio, & duo in una carne essent. Itaque inter primos homines arctissima & individua consuetudo instituta est, & ad filiorum generationem & educationem & ad mutuum praesidium. Et inde futuris nuptiis data lex: quod enim femina caro & os de carne & ossibus viri esset, divino instinctu Adam dixit, *quam ob rem relinquet homo patrem suum.*

8

(a) Genes. 1. 27. seq. (b) Genes. 11. 24.

& matrem. & adhaerebit uxori suae; & erunt duo in carne una (a). Hinc non recte Grotius conjugium naturaliter esse ait talem cohabitationem maris cum femina, quae feminam, constituat quasi sub oculis & custodia maris, cui cohabitationi accessit fides, qua se femina mari obstringit (b). Potius enim individua vitae, consuetudine & mutuo adjutorio, quam cohabitatione, quae feminam sub custodia viri constituat, nuptiae aestimandae sunt. Ceterum, Grotius eam conjugii descriptionem commentus est, ne natura matrimonii polygamiae adversari videretur.

Matrimonium etiam sacramentum.

§. V. Natura & origine sua matrimonium, contractus est, quem gentes omnes sollemni & religioso ritu & divinis auspiciis captis contrahere consueverunt; religione enim videbatur consecrandum negotium illud, unde status civitatum pendebat. Sed apud christianos nuptiae praeterquam quod contractus naturam retinuerint, etiam sacramenti religione consecratae sunt quae est ecclesiae doctrina. Duplici autem ratione nuptiae ex christiana doctrina sacramenti religionem censentur, & quod rem arcanam, unitatem nempe Christum inter & ecclesiam significant: & quod gratiam in conjugatos effundant. Et quidem nuptiis exprimi conjunctionem inter Christum & ecclesiam ipse apostolus docuit; matrimonium enim *μυστήριον πάρα* sacramentum magnum

(a) Genes. II. 24. (b) Grotius de I. B. ac P. lib. II, cap. 5. §. 8.

gnum dixit, sed in Christo & in ecclesia (a): eo-
que praesertim nomine patres sacramenti nomine
nuptias condecorant. Quo sensu matrimonium
a prima institutione sacramentum fuit, quod Leo
M. (b) docet, & Jo. Launojus (c) pluribus ad-
struit. Porro fidelium matrimonium etiam eo sen-
su sacramentum est, quod sub signo sensibili
gratiam effundit, per quam conjuges coelesti be-
nedictione augentur, quidquid lutei nuptiis in-
est, purificatur, & vires dantur ad fovendam
individuum totius vitae conjunctionem & libero-
rum educationem. Unde sufficiam, inquit Ter-
tullianus (d), ad enarrandam tantam felicitatem
matrimonii, quod ecclesia conciliat & confirmat
oblatio & obsignatum angeli renuntiant. Et Am-
brosius matrimonium velamine sacerdotali & bene-
dictione sanctificari adfirmat (e). Paulinus etiam
docet, conjuges prece sanctificari (f). Et ut alios
mittam Chrysostomus adfirmat, precibus & bene-
dictionibus conjugium constringi, ut amor sponsi
augeatur, & puellae continentia crescat (g). Ita-
que ex christiana doctrina matrimonium sacra-
mentum est, quo non solum conjunctio inter
Christum & ecclesiam significatur, sed etiam gra-
tia confertur ad familiae onera sustinenda.

Matrimonii species

§. VI. Passim theologi nostri matrimonium di-

vi-

(a) *Ad Ephes. V. 32.* (b) *Leo M. ep. XCII. ad Rustic. Narbonens.* (c) *Launojus de regia in matrim. potest. par. I. art. 2. cap. 11.* (d) *Tertull. lib. II ad uxorem cap. ult.* (e) *Ambros. ep. LXX.* (f) *Paulin. in epital.* (g) *Chrysost. hom. XLVIII. in Genes.*

vidunt in *legitimum ratum*, & *consummatum*. Legitimum secundum leges gentium contrahitur, non autem in fide Christi, qualia sunt infidelium & Judaeorum matrimonia. Ratum, quod etiam *initiatum* dicitur, est ab ecclesia adprobatum, & a fidelibus ex regulis christianae religionis contrahitur, sed nondum corporum conjunctione in usum deductum est, significatque Dei cum anima iusti conjunctionem per caritatem. Consummatum vero est matrimonium, si corporum conjunctio accedat, exprimitque praeterea conjunctionis Christi cum ecclesia sacramentum (a), cujus sacramenti ratione *perfectum & consummatum* dicitur; nam ratione contractus, aut alterius sacramenti, quod gratiam effundit, etiam ratum matrimonium perfectum est. Hoc sensu rata & consummata matrimonia in genuinis veterum patrum operibus vix occurrunt: hi enim generatim adserunt, matrimonium conjunctionis Christi cum ecclesia esse sacramentum. Fortasse primus Gratianus hanc distinctionem invenit, ut quae retulerat veterum monumenta, in concordiam reduceret. Sane in monumentis per Gratianum relatis modo dicitur, neutrum ex conjugibus sine alterius venia posse continentiam profiteri (b), modo etiam sine alterius consensu posse conjugem converti (c): & praeterea conjugium modo separabile (d), modo individuum exhibetur. Haec omnia distinctione adhibita.

Instit. jur. can. T. IV. D con-

(a) *Cap. V. ex. de bigam. non ordinand.* (b) *Can. XXIII. & seq. C. 27. q. 2.* (c) *Can. XXVII. seq. eod.*
 (d) *Can. XXIX. eod.*

conciliari posse putavit Gratianus, ut nempe quae de non separando conjugio loquebantur monumenta, de *perfecto & consummato*: quae vero separabile conjugium indicabant, de *initiato* nec in usum corporum deducto intelligerentur (a). Et quamvis sub nomine Augustini & Leonis M. fragmenta tetulerit, quae imperfecta habere videntur matrimonia, ubi corporum commissio nulla fuerit (b); tamen fragmenta ista vel spuria sunt vel interpolata; quod Romani correctores & Stephanus Baluzius observant.

Sacramenti matrimonii materia & forma.

§. VII. Quod vero spectat ad elementum & verba, quibus matrimonii sacramentum coalescit, theologi disputant, ecclesia filet. Eorum multi ipsos contrahentes materiam, & verba, quae consensum exprimunt, formam esse contendunt. Alii verba ipsa, seu consensum mutuum verbis aut signis expressum materiam & formam diversa ratione faciunt; materiam, quatenus determinatur, formam quatenus determinant, cui opinioni B. Thomas (c) patrocinari videtur. Sed verior videtur sententia illa, quae ipsum matrimonii civilem contractum elementum matrimonii facit, benedictionem vero sacerdotis formam: quod theologi primi subsellii Melchior Canus, Estius, Drouvenus alique docent. Sane id est sacramenti elementum, quod, verbo accedente, fit

(a) *Gratian. ad calcem can. XXXIX.* (b) *Can. XVI. & seq. eod.* (c) *S. Thomas in IV. sententiar. dist. 26. q. 2. art. 1.*

fit sacramentum : contractus autem matrimonii per sacerdotalem benedictionem sacramenti naturam induit : constans enim est patrum sententia , nuptias per benedictionem sanctificari . Transversos in hac causa scholasticos egit utriusque , juris sententia , matrimonium consensu perfici : atque ita materiam & formam sacramenti in ipsis contrahentibus quaesiverunt . Sed facile erat observare , consensu contractum matrimonii perfici , non vero sacramentum ; tum enim ex sententia veterum patrum nuptiae gratia & coelestibus benedictionibus implentur , si eas sacerdotes benedicant .

Minister sacramenti matrimonii :

§. VIII. Porro non secus de elemento & verbis , ita , quod consequens erat , de matrimonii ministro inter theologos non convenit . Scholastici pro maxima parte docent , ipsos contrahentes sacramenti ministros esse . Contra theologorum gravissimi Melchior Canus , Estius , Tornellius , N. Alexander aliique sacramenti matrimonii ministrum sacerdotem esse contendunt . Quae sententia omnino praeferenda est . Et sane ille jure dici potest hujus sacramenti minister , cujus solius est eam nubentibus benedictionem impendere , unde necessario gratia sacramenti derivatur . Soli autem sacerdotes a prima ecclesiae aetate sacra benedictione nuptias inter Graecos & Latinos consecrarunt (a) , eaque benedictione

D 2

spon-

(a) *Tertull. lib. II. ad uxor. cap. ult. , conc. Carthag. IV. can. 13. can. II. C. 30. q. 5. , Balsamon & Photii nomo-can. tit. XIII. can. 2.*

sponsi sanctificati sunt (a). Et inde est illa matrimonii definitio paucis a Basilio comprehensa, *jugum quod per benedictionem subitur* (b). Multa quoque paradoxa enarrat Estius, quae ex opposita sententia sequuntur, ut quod sacramenti matrimonii minister non sit unus, sed duo; non ordinati sed laici, vir & mulier: quod iidem suscipientes & conferentes: quod forma consistat etiam sine verbis; nam nutu aliove signo expressus consensus ad matrimonium sufficit: quod nullam contineat sacram caerimoniam & hujus generis alia. Sententia, quae ipsos contrahentes ministros matrimonii facit, ab eodem fonte videtur derivata, quo sententia quae in ipsis contrahentibus materiam & formam sacramenti posuit: a legum nempe & canonum doctrina, quae habet, nuptias consensu perfici. At etiam hac in re scholastici contractum & matrimonii sacramentum miscuerunt: constat contractus consensu, at sacramentum per hierologiam perficitur: eaque deficiente nuptiae, etsi inter christianos contractae, legitimae, non sacrae videntur esse.

Matrimonium consensu contrahitur.

§. IX. Jam vero causa efficiens contractus matrimonii est mutus contrahentium consensus, quo verbis aut signis declarant, se in individuum vitae consuetudinem consentire: in quam sententiam & leges civiles & canones consentiunt (c). Est namque matrimonium societas
& so-

(a) *Ambros. ep. LXX., Chrysost. hom. XLVIII. in Genes.* (b) *Basil. hom. VII. in hexaëmer.* (c) *L. XXX D. de req. jur., can. 1. & H. C. 27. q. 2., cap. XIII. seq. ex de sponsalib.*

& societates consensu contrahuntur. Hinc ut matrimonium perfectum sit, necesse non est, ut corpora misceantur; sit etiam matrimonium consensu animorum, non corporum. Et si in jure Romano nuptiae dicuntur *virī & mulieris conjunctio* (a), id minus proprie dictum videtur; & conjunctio illa potius est consensus ad inducendam conjunctionem, quo sensu effectus pro causa sumitur, quod Gerardus Noodt observat (b). Hinc illa Ulpiani doctrina, qui absens accepit uxorem, si rediens antequam uxorem domum ducat, perierit, ab uxore lugendus est (c). Inde etiam potest evenire, ut aliqua virgo & *dotem, & de dote habeat actionem*, quod Paulus tradit (d). Et profecto errat Gratianus, qui ad matrimonii naturam etiam corporum conjunctionem & usum credit necessarium (e). Consensus autem iste, quo nuptiae perficiuntur, finem habet corporum conjunctionem & liberorum procreationem: qua ratione Romani tabulis nuptialibus inferebant, se liberorum quaerendorum gratia nuptias inire, ut Augustinus testatur (f). Quod si inter B. Mariam virginem & S. Joseph. verum conjugium fuit, etsi illa in corporum conjunctionem non consenserit; virginitatis enim votum semper servavit; nodus hic theologos exercet; quorum aliqui adfirmant, B. Virginem consensisse in sui corporis traditionem, non vero in actum conjug-

ga-

(a) *Pr. tit. inst. de patria potest.* (b) *Noodt in tit. DD. de ritu nupt.* (c) *L. VI. D. de ritu nuptiar.*
 (d) *L. VII. D. eod.* (e) *Grat. ad can. XVIII. C.*
 27. q. 2. (f) *Aug. serm. CCXLIV.*

galem, quod Deo revelante praesciverat, virum suum ad corporum conjunctionem non venturum (a). Ceterum etiam vicaria alterius opera edi potest in nuptias consensus, modo ad id speciale mandatum detur, procurator datus per se mandatum impleat, & mandans tempore contracti matrimonii in consensu perseveret (b).

Qui error vitiat matrimonium.

§. X. Quoniam vero consensus contrahentium in primis nuptias facit, ubi amborum aut unius consensus deficit, nuptiae nullae sunt. Itaque si per errorem matrimonium contrahatur, nullum est, quod qui errant, non consentiunt (c). Etenim qui errant, rem concipiunt ab objecto discrepantem, ac ita dici non potest, errantes consentire. Sed distinguere oportet, an error sit circa personas contrahentium, an circa qualitates. Etenim si contrahentes in persona ipsa errent, puta si Maevius cum Caja contrahere intendens, per errorem aliam ducat; omnino nullae sunt nuptiae, etsi errore perseverante corporum conjunctio facta fuerit. Sed si tantum in qualitatibus personae erretur, puta si quae pulchra, aut dives putetur, inde deformis, aut pauper inveniat; matrimonium non vitatur: talis enim vere in personam consentit: nisi error qualitatis, inquit S. Thomas, *redundet in personam*, hoc est si contrahens ita adhaesit illi qualitati, ut si haec

(a) Confer. Drouven. de re sacram. lib. IX. q. i. §. 3. (b) Cap. ult. de procuratorib. in 6. (c) L. LV. D. de obligatione & act.

haec abesset, matrimonium non contraxisset, veluti si principis offeratur filia, tamquam primogenita & heres regni, quae talis non est (a). At quoniam matrimonium est individuum & maximi momenti negotium, non facile praesumendum, contrahentes accidentalibus qualitatibus adhaerere. Ceterum consensus etiam praesumptus errori superveniens nuptias irritas convalidat: & reipsa ex sequente consensu valere coeperunt nuptiae, quas Jacob Rachelem ducere intendens, per errorem cum Lia contraxit (b).

An metus vitiet matrimonium?

§. XI. Porro non est in nuptias consensus, atque ideo nullae nuptiae, si ex vi metuque, gravi exterius illato contrahantur. Metus est instantis vel futuri periculi causa mentis trepidatio, crescitque prout periculum, quod timeatur, gravius & praesentius est, & prout variant personarum qualitates; non enim omnium una est animi constantia pro ratione aetatis, sexus, valetudinis. Quando metus intrinsecus & ex animi affectibus nascitur, homines libere agere censentur; at si metus ab homine extrinsecus inferatur, quamvis non omnino consensum tollat (atque ideo qui per metum scelera admittunt, scelerati censentur); tamen, coactus iste consensus ex gravi metu extortus non videtur sufficere ad negotia contrahenda, saltem ea quae ex bona fide descendunt (c): etenim qui ex tali metu contrahit, profecto non

(a) *S. Thomas in IV. sentent. dist. 30. q. 1. art. 2.*

(b) *Genes. XXIX. 28.* (c) *L. CXVI. D. de reg. jur.*

non contraxisset, si metus abfuisset. Multo minus valent matrimonia per metum, qui exterius infertur, inita; etenim matrimonio directe metus adversatur; est enim societas, quae mutuo amore & caritate coalescit, & potius animos, quam corpora conjungit. Sed metus debet esse gravis & non vani hominis, quo aliquis ducat uxorem, quam si sui arbitrii esset, non duxisset: nam qui levi metu ad nuptias animum adiiciunt, utpote qui non adeo adversante animo sunt, non sunt audiendi (a). Nihil vero interest, utrum metus ab altero contrahentium, an a patre, an ab alio inferatur (b); semper enim nullae sunt nuptiae, modo directe in finem contrahendi matrimonii inferatur (c), & qui metum infert, id nullo jure faciat: nam si quis metu poenarum a magistratu cogitur mulierem, quam violavit, uxorem ducere, matrimonium subsistit: magistratus enim jure cogit: & actio imperio ejus, cui cogendi jus est, suscepta, agenti imputatur. Quod si filius reverentia erga patrem ductus, sed nullis minis aut verberibus, contrahat, nuptiae valent: non enim id improbant boni mores (d).

*Consensus patris an necessarius in
nuptiis filiorum?*

§. XII. Praeter conjugum consensum ubi filii familias nuptias ineunt, etiam parentum, sub quo-

(a) *Cap. XXVIII. ex. de sponsalib.* (b) *Cap. XI. ex. de desponsat. impub.* (c) *Confer. Gonzalez in cap. XV. ex. de sponsalib. n. 4.* (d) *Confer. Gerard. Noodt in tit. DD. de ritu nuptiar.*

quorum potestate sunt, consensus requiritur: quod jus natura ipsa duce omnes peraeque-
gentes servarunt (a), in primis Romani, apud
quos invito patrefamilias a filiis contractae nu-
ptiae prorsus irritae & nullius effectus erant (b).
Ecclesia in imperio nata leges civiles secuta est
praesertim in causa honesta, ubi ipsa natura
suadet, ut sine parentum consensu filii matri-
monia non contrahant. *Nec in terris*, inquit
Tertullianus (c), *fili sine consensu patrum rite*
& jure nubunt. Et Basilus (d), *quae sine iis,*
qui habent potestatem, fiunt matrimonia, sunt
fornicationes: spectatque hic Basilii canon non-
minus filios, quam servos. Similiter synodus
Aurelianensis IV. *matrimonium contra volunta-*
tem parentum impie copulari decernit (e). Et
ut multa alia mittam, Nicolaus papa, *foedera-*
quoque consensu eorum, qui haec contrahunt, &
eorum, in quorum potestate sunt, celebrantur (f).
In ecclesia hoc jus usque ad saeculum XII. ste-
tit, quod Jueninus (g) probat. Inde sub prae-
textu libertatis matrimonii nova invaluit doctri-
na, quae peccare graviter filios asserit, ubi si-
ne parentum suorum consensu nuptias, prae-
Inst. jur. can. T. IV. E ser-


(a) Confer. Mazochius in *dissert. Muscettulae de sponsalib. & matrim. filiorum fam. not. XVII.* (b) *Pr. tit. instit. de nuptiis, L. II. D. de rit. nupt., L. XII. C. de nuptiis.* (c) *Tertull. ad uxor. lib. II. cap. 9.* (d) *Basilus ep. can. ad Amphilocho. can. XLII.* (e) *Conc. Aurelian. IV. can. XXII.* (f) *Can. II. C. 20. q. 5.* (g) *Juenin. de sacram. diff. X. q. 5. cap. 3. art. 1.*

fertim indignas, ineunt; at ita contractas validas habet: quae doctrina in praxim deducta est. Sed libertas matrimonii potius in eo consistere videtur, ut infirmum filiorum consilium, ratione patris regatur, quam ut filii pro libidine & licentia sua nuptias ineant: etenim quo magis cum ratione homines operantur, eo majori libertate utuntur. Inde Tridentini patres professi sunt, ecclesiam omni tempore detestatam esse & prohibuisse matrimonia filiorumfamilias invititis parentibus contracta; sed ea non irritarunt, quin firma reliquerunt (a). Hinc canon minus quam perfectus videri potest eo sensu, quod matrimonia filiorumfamilias invititis patribus contracta vetat, sed contracta non rescindit. Itaque tristis & inauspicata matrimonii libertas apud catholicos viget. At in Gallia regum edictis matrimonia filiorumfamilias invititis parentibus inita habentur *invalidè contracta*: quod alii de solis civilibus effectibus interpretantur (b), alii vero ita accipiunt, ut omnino contractus nullus & irritus sit (c). Et multarum gentium legibus parentes filios suos talia matrimonia contrahentes exheredes scribere possunt.

Quod

(a) *Trid. sess. XXIV. de ref. matrim. cap. 1.*

(b) *Conf. N. Alexander lib. II. theol. dogm. & moral. de matrim. cap. 12. art. 3.* (c) *M. de Lamignon de M. Talon ap. M. le Vayer de Boutigny de l'autorité des Rois touchant l'administration de l'église tom. II. p. 188. seqq.*

 *Quod Carolus II. Austriacus cap. 72. edixerat neminem scilicet subditorum nuptias contrahere posse cum minori absque consensu tutoris curatorisve, & duorum cognatorum in gradu proximiorum sub pœna capitis, bonorumque confiscationis, nova pragmatica sanctione Regis Ferdinandi III. an. 1771. (quam adeas Tom. 4. pragm. lib. 11. de rebus sacris, & eccles. tit. de Parochis prag. 2.) aliquantulum reformatum, ac longe melius publicæ tranquillitati provisum est. In ea siquidem vetatur filios familias cujuscunque conditionis sive sub patria potestate constitutos, sive emancipatos sine parentum, vel eorum qui parentum vicem gerunt, jusque patriæ potestatis exercent consensu, nuptias contrahere posse; cujus quidem consensus publicum documentum in scriptis Parocho debent exhibere. Qui contra hanc legem matrimonium contraxerint impune exheredes scribi posse, ac mulieres dote privari decernitur. Quin imo Regni magistratibus a limine judicii repellere jubetur filias quæ paragium adversus parentes exposcunt, quoties isti probent illas matrimonium absque eorum consensu iniisse; quod tunc locum habet ubi Pater, vel avus ob Patris defectum ante matrimonii celebrationem aut statim ejusdem habita scientia cædulam filiæ coram loci magistratu inscribat, qua se ad paragii solutionem minime adstrictum dicat ob nuptias contra suum propositum celebratas.*

Ne vero parentes legitimo hoc jure divinis humanisque legibus concesso abutentes imprudenti, intempestivoque dissensu filiorum matrimonia perturbent ab onere paterni consensus exposcendi eadem regia constitutio excipit m. asculos, qui vi-

gesimum quintum, ac feminas qui trigefimum ætatis annum attigerint modo honestis personis parisque conditionis nubant. Ac ipse sapientissimus rex suprema auctoritate paterni consensus defectum supplere pollicetur, quoties id subditorum tranquillitas exposulare videbitur. Hac lege sub die 10. Aprilis an. 1771. populis publicata Archiepiscopus Panormitanus, ac Vicarius Capitularis Messanensis nonnulla proposuerunt dubia authentica principis interpretatione definienda. Quærebant itaque primo num in viduarum matrimoniis quæ municipali lege a patriæ potestatis vinculo liberantur necessarius esset parentum consensus? secundo: Qui veniant nomine Parentum? Tertio quid agendum si parentes scribere nesciant? Quarto vel si pater absens erit? Quinto an hoc casu sufficiat Matris consensus?

Ad hæc omnia illustranda idem Monarcha die 26. Octobris ejusdem anni 1771. declaravit: Primo; Necessitatem paterni consensus viduitate non abrogari. Secundo nomine parentum venire Patrem sponsi, ac sponsæ, & ob hujus defectum ascendentes ulteriores, haud vero requiri Matris consensum, licet hujus oppositio admittatur si rationi conformis ab ipso principe videbitur. Tertiò Parentes scribere nescientes per acta publici Notarii consensum præstare debere. Quarto; Patrem non existimandum absentem si intra Regnum sit, vel extra, dummodo ire, ac redire solitus sit, vel redditui proximus, Quinto si Pater vere absens est, nec de redditu sperare licet, Matris consensus haud necessarius nec aliorum cognatorum, sed tantum eorum admittenda oppositio si ita decere existimabitur. ☞

Ma-

§. XIII. Consensus autem, quo nuptiae contrahuntur, purus esse debet; & si sub vera conditione exprimat, nuptiae statim contractae non videntur. Vera conditio in futurum concipitur, & ab incerto futuro eventu actum suspendit; & quae in praeteritum aut praesens tempus concipitur, *figuram non vim conditionis continet*, ut Proculi verba usurpem (a). Si itaque matrimonium sub vera & possibili conditione contrahatur, suspenditur matrimonialis consensus, & propterea nisi existente aut remissa conditione nuptiae contractae non censentur (b); existente autem aut remissa conditione novus consensus non videtur necessarius (c). Quod si sub conditione in praesens aut praeteritum tempus concepta matrimonium ineatur, veluti *contrahe tecum, si es virgo*, statim aut verum, aut nullum est; quae enim per rerum naturam certa sunt, non morantur obligationem, licet apud nos incerta sint (d). Verum si conditio addatur, quae turpis aut impossibilis sit, nullum esse matrimonium Gregorius IX definit, si adjecta conditio sit contra substantiam matrimonii, veluti *contrahe tecum, si generationem evites*, aut donec inveniam aliam honore vel facultatibus digniorem; valere vero sub quacumque alia turpi, vel impossibili conditione.

(a) L. LXIX. D. de hered. instituend. (b) Cap. III. ex. de conditionib. adposit. (c) Conf. 3. N. ALEXAND. loc. cit. lib. II. cap. 2. reg. 16. (d) §. V. in f. cital. de verb. obligat.

tione, idque quod favore matrimonii hujusmodi conditiones pro non adjectis reputantur (a). Sed sapientiores interpretes hanc doctrinam potius de modis & conditionibus resolutivis, ut appellantur, quibus non impleto modo adjecto matrimonium resolvatur, quam de veris conditionibus, accipiunt (b). Quo posito doctrina pontificis clara est. Etenim qui in modum finis contrarium consentiunt, non videntur consentire: consentiunt vero qui sub quocumque alio turpi modo contrahunt, veluti si quis dicat, contraho tecum si in furtis admittendis mihi opem praestes. Et quoniam nuptiae apud christianos, utpote individuae, resolvi non possunt, adjectus turpis modus naturae matrimonii non contrarius pro non adjecto habetur. Ceterum moribus praesentibus conditionata matrimonia admitti non solent.

Sollemnitas nuptiarum apud gentes.

§. XIV. Haecenus de consensu matrimoniali, videndum nunc qua forma edi oporteat, ut nuptiae legitimae & sacrae sint. Interest reipublicae nuptias palam & sollemniter contrahi, ut constet inter cohabitantes virum & mulierem matrimonium esse contractum, ut omnis vagae libidinis suspicio evitetur, & familiarum status firmior evadat, & liberi in spem patriae adolescant. Hinc gentes omnes in primis Iudaei, Graeci & Romani matrimonia publicis & sollemnibus ritibus contrahi voluerunt. Specia-

(a) *Cap. ult. de conditionib. adposit.* (b) *Gonzalez in cit. cap. ult. num. 7.*

clatim Romani tribus sollemnibus modis nuptias contrahebant, farre, coëmtione, usu, quos ritus Raevardus, Briffonius, Sigonius, Heineccius aliique illustrent. Nova quoque nupta in domum viri sollemniter deducebatur: & uterque conjux coronis & fertis redimiri solebant. Tribus his modis contractis nuptiis mulier in manum viri transibat, eique filiafamilias fiebat, eratque inter eos omnis humani & divini juris communicatio. Ubi vero mulieres in manum viri transire nolebant, aliis legitimis modis nuptiae contrahebantur: etenim sufficebat, consensum in nuptias declarari coram testibus, siue intervenirent tabulae nuptiales, siue sine scriptis ea testatio fieret (a). Quin etiam facto ipso demonstrabatur consensus in nuptias, maritali nempe honore & affectione per cohabitationem inter pares, quod Papinianus (b) testatur. Confarreatae nuptiae sub initium imperii non amplius in usu erant (c); sed diutius coëmtio & usus perseverarunt: etsi aetate jurisconsultorum, quorum fragmenta in pandectis supersunt, parum usurpari solerent: & ferre aliis legitimis modis consensus in nuptias edebatur. Immo Justinianus eo rem deduxit, ut exceptis *maximis dignitatibus*, ceteri omnes possent vel cum dotalibus tabulis, vel sine eis ex solo affectu ducere uxores (d): in qua consi-

(a) L. IV. D. de pignorib. , L. VI. D. de his qui sunt sui vel alien. jur. (b) L. XXXI. D. de donationib. Confer. Gerard. Noodt. in tit. DD. de ritu nuptiar. (c) Confer. Heinec. antiq. Roman. lib. I. tit. 10. §. 9. (d) Novell. XXII. cap. 3.

stitutione civilem prudentiam viri docti desiderant :

¶ *Novellæ justinianæ nævum cognovit rex noster Rogerius primus hujus nominis , qui ut incommoda ex illa lege emanantia submoveret provide edixit const. sancimus lib. 3. const. Regni Sic. Tit. 22 de Matrimoniis contrahendis , matrimonia post contracta sponsalia fieri debere debita sollemnitate , & sacerdotali benedictione interveniente , pœna exclusionis à successione respectu filiorum , & privationis dotis respectu mulierum indicta .* ¶

Matrimonia contrahenda ecclesiae denuntiata :

§. XV. Nec minus ecclesia ritus suos præscripsit, quibus ex religionis suae principiis christiani nuptias contraherent. Erant autem sollemnia christianorum vel civilia vel religiosa: etenim quum christiani essent cives, certe omnes ritus civiles, qui incolumi religione retineri poterant, servabant. Inter christianos ritus in primis id fuit, nuptias contrahendas ecclesiae denuntiare, ut si qua subessent impedimenta innotescerent, & matrimonia christiano homini indigna evitarentur. Publica ista denuntiatio *bannum* dicta est; quæ vox Gallorum propria ut plurimum publica edita significat; quod Cujacius & Cangiùs observant (a). Inde usque a primis sæculis christiani apud ecclesiam profiteri nuptias consueverunt, quod Tertullianus (b) testatur. Et in capitula-

ri-

(a) Cujac. in cap. XXVII. ex. de sponsalibus, Cangiùs in glossar. med. & infimæ Latinitat. v. *bannum*: (b) Tertull. de pudicitia cap. IV.

ribus regum Francorum edicitur, ut ante nuptias conveniatur sacerdos, qui in ecclesia unum cum populo inquirat, an aliquod impedimentum subest (a). Inde in tanta saeculi IX. & sequentium confusione matrimonii denuntiationes omissae sunt, easque paucae tantum ecclesiae vel retinuerunt, vel de novo instituerunt, in primis ecclesia Gallicana, unde ad ceteras ecclesias dimanasse Cujacius & Filesacus (b) docent. Et sane concilium Lateranense sub Innocentio III. consuetudinem specialem quorundam locorum ad alia generaliter extendit, cavitque, ut matrimonia contrahenda per presbyteros in ecclesia denuntientur competenti spatio dicto, ut intra illud, qui voluerit & potuerit, compareat, & legitimum impedimentum opponat (c) sed denuntiatio ista ad matrimonii vim non pertinebat, valida enim quamvis illicita jure decretalium, erant clam contracta matrimonia.

Hierologia in nuptiis christianorum olim recepta.

XVI. Praecipuus autem & maxime facer christianorum ritus fuit, ut nuptiae coram ecclesia precibus sacerdotum benediceretur: qui ritus vel a primis saeculis obtinuit: quod Jac. Gothofredus, Binghamus & Henricus Cristianus Bochmannus (d) pluribus probant. Et sane Tertullianus

F

nus

(a) Capit. reg. Francor. lib. VIII. cap. 179.

(b) Cujac. loc. cit., Filesac. de orig. parochiar. cap. ult. (c) Cap. III. ex. de clandest. desponsat.

(d) Jac. Gothofr. in L. III. C. Th. de nuptiis, Bingham. orig. ecclesiast. lib. XXII. cap. 4. §. 1., Hochmann. tract. de benedict. nuptiar.

nus (a) expresse testatur, christianorum matrimonia ecclesiam conciliare, confirmare oblationem & obsequiare benedictionem. Similiter Ambrosius (b), conjugium velamine sacerdotali & benedictione sanctificari oportere adfirmat. Et patres concilii IV. Carthaginienſis edicunt, ut sponsus & sponsa quum benedicendi sint a sacerdote, a parentibus suis vel paranympis offerantur (c). Chrysostomus quoque docet, ad nuptias sacerdotes vocari, & precibus & benedictionibus concordiam conjugii confirmandi (d). Haec & alia multa praxim christianorum benedicendi nuptias demonstrant: & profecto Boëhmerus (e) vim antiquis monumentis infert, dum ea, quae de benedictione nuptiarum habent, ad sponsalium benedictionem trahere aut alias elevare studet. Benedictio autem nuptiarum a sacerdote de more ceterarum benedictionem per manus impositionem facta videtur: idque constat ex Clemente Alexandrino, qui de muliere nubente alienis capillis ornata ita fatur: cui manum imponit presbyter? Cui autem benedicet? non mulieri, quae est ornata, sed alienis capillis, & per istos alij capiti (f). Usurpabatur etiam inter Judaeos sollemnis nuptiarum benedictio: unde fortasse in christianos derivata, est & majori religione consecrata; etenim per benedictionem nuptiis christianorum sanctitas & vis

sa-

(a) Tertull. ad uxor. lib. II. cap. 9. (b) Ambros. ep. LXX. (c) Conc. Carthag. IV. can. 13.

(d) Chrysost. hom. XLVIII. in Genes. (e) Boëhmer. jur. eccles. lib. IV. tit. 3. (f) Clemens Alexandr. paedag. lib. III. cap. 11.

sacramenti conciliatur. Fiebat autem nuptiarum benedictio sollemniter & coram ecclesia & inter missarum sollemnia, idque Tertullianus indicat, dum ait, matrimonium oblatione confirmari.

Quando jure civili hierologia nuptiis accessit.

§. XVII. Sollemnis & publica nuptiarum benedictio apud antiquos christianos recepta, diu sola religione stetit; nec jure civili christianorum principum ad vim contractus matrimonii pertinuit. Probabant profecto christiani imperatores, per hierologiam nuptias fidelium celebrari; at interim legitima habebant matrimonia ex forma legum civilium contracta. Existimant quidem Dionysius Gothofredus & Franc. Hotomanus (a) etiam jure civili adhiberi hierologiam debuisse, eo quod Justinianus ad vim matrimonii *festivitatem & vota nuptiarum* requirat (b); at phrasae istae admodum ambiguae sunt, & potius actum quemlibet, quo nuptiae celebrari consueverant, denotare videntur (c). Hinc praesertim saeculis quinto & sexto non videntur defuisse christiani parum religiosi, qui, maxime, ubi non ex sententia ecclesiae nuptias contrahebant, benedictionem omitterent, contenti legitimas, etsi non sacras, nuptias contraxisse: cui omissioni favisse videtur Justinianus, qui exceptis *maximis dignitatibus*, permisit, ut reliqui omnes ex solo affectu sine dotalibus tabulis nuptias inirent (d). Sed tandem antiqua & christi-

F 2

stia-

(a) *Dionys. Gothofr. in l. XX. C. de nupt.*, Hotoman. *quaest. illustr. quaest. XXV.* (b) *L. XXIV. C. de nup.* (c) *Selden. ux. hebr. lib. II. cap. 29.*

(d) *Novel. XXII. cup. 3.*

stiana nuptiarum benedictio in legem civilem abiit: & ita nec legitima esse coeperunt matrimonia, nisi coram ecclesia sacerdotum precibus consecrarentur: quod jus in Occidente Carolus M., in Oriente Leo sapiens statuerunt (e). Hoc jure per Occidentem statuto prodiisse videtur decretalis Evaristo tributa, quae ad vim matrimonii praeter alia requirit, ut sponsa sacerdotaliter, ut mos est, cum precibus & oblationibus a sacerdote benedicatur (a). Et apud nos Rogerius I. rex proscriptis nuptiis clandestinis tantum matrimonia legitima dixit, quae palam & sacerdotali benedictione celebrantur (b).

*Ritus civiles in matrimoniis christiano-
rum retenti.*

§. XVIII. Praeter sacerdotalem nuptiarum benedictionem ritus civiles christiani retinuerunt, eosque sanctitatis religione consecrarunt, ut factum est in aliis ritibus, quos vel a Judaeis vel ab ethnicis hauserunt. In primis (I) in nuptiarum celebratione uterque conjux velo obnuebantur. Sollemnis erat Judaeorum & Romanorum mos velo obnubendi sponfam, quando ad virum ducebatur: ex qua caerimonia nomen nuptiarum factum est: nubere enim & obnubere Romanis velare & operire significabat (c): at apud christianos uterque conjux a sacerdote velo operiebatur (d). Velamen istud purpureum

(e) *Cap. reg. Franc. lib. VII. cap. 363.*, Leo Sapiens novel. LXXXIX. (a) *Can. I. C. 30. q. 5.*

(b) *Consl. sancimus de matrim. contrah.* (c) *Confer. Rosin. antiquitat. Roman. lib. V. cap. 37.*

(d) *Paulinus in epithal.*, *Can. III. C. 30. q. 5.*

videtur fuisse, illud enim Ambrosius (a) *flammeum nuptiale* appellat: eoque significabatur, pudorem utrique conjugum, non soli mulieri, convenire. Porro (II) sacro ritu nuptiarum finito, conjuges mox discessuri coronis & fertis redimiri solebant, quibus significabatur strenue adhuc contra omnem impudicitiam decertasse: quod Chrysostomus docet (b). Erat haec etiam civilis caerimonia, quam aetate Tertulliani non videntur christiani usurpasse: reddens enim rationem Septimius (c), cur christiani cum ethnicis matrimonio non jungerentur, eam arcessit a coronis, quibus conjuges apud ethnicos cingebantur, & ita ab idololatria incipiebant. At inde in utraque ecclesia coronarum usus tamquam innocens & mystica caerimonia receptus est (d). Et demum (III) sequebatur deductio sponsae in viri domum, quae inter innocentiae gaudia & populi confluentis acclamationes peragi solebat: nec injuria credebatur modestum habere epithalamium, vel convivium, quod ex christianis regulis ageretur (e). Velatio autem & coronatio tantum in primis nuptiis locum habebant, iisque secundae nuptiae non donabantur. In Occidente jamdiu conjuges velari & coronari desierunt: tantumque velandi caerimonia in nuptiis spiritualibus virginum cum

Chri-

(a) *Ambros. de virginib. cap. XV.* (b) *Chrysost. hom. IX. in 1. ad Timoth.* (c) *Tertull. de coron. milit. cap. XIII.* (d) *Confer. Bingham. orig. ecclesiast. lib. XXII. cap. 4. §. 6.* (e) *Conc. Laodicen. can. LIII.*

Christo domino usurpatur. Sed inter Graecos adhuc conjuges solent coronari (a).

Qui recepta in Occidente clandestina matrimonia.

§. XIX. Per sacros canones inducta & inde per leges civiles constabilita publica benedictio in ecclesia Graeca, quae antiquorum rituum tenacissima fuit, deinceps continuavit; at in Occidente remissior disciplina invaluit, quae tenebat quidem matrimonia coram ecclesia & sacerdotali benedictione esse celebranda; verum simul valida, etsi illicita, reputabat matrimonia clandestina, quae sine hierologia clam ceteris omnibus ipsi sponsi contraxissent (b). Sane jure decretalium sponsalia transibant in matrimonium non solum palam declarato consensu & sacerdotis benedictione; verum etiam per corporum conjunctionem inter sponsores animo maritali habitam (c), & per mutuum consensum de praesenti clam editum (d). Invaluerunt hi degeneres mores ex mala accepta sententia legum & canonum, per consensum nuptias contrahi: non animadvertentes scilicet saeculi XII theologi, consensum, quem leges & canones requirebant, legitimum, hoc est sollempni ratione per leges inducta, expressum esse oportere, inde concluderunt, etiam consensu clam edito consistere matrimonia (e). Interim ubi matri-
re-

(a) Confer. Carden. *histoire de mariage chap. II. art. 3.* (b) Confer. Gratian. *ad calc. can. IX. C. 30. q. 5.*

(c) Cap. XXX. *ex. de sponsalib.* (d) Cap. I. *ex. de clandest. desponsat.* (e) Confer. Franc. Florens *in cit. Gratiani quaest.*

monia clandestina legitime non probabantur, ecclesia conjuges ad cohabitationem non coge-
bat (a). Quod si ipsi conjuges clam contractas
nuptias inde ecclesiae manifestarent, eae ratae
censebantur, tamquam si ab initio in conspectu
ecclesiae contractae essent, quod Alexander III.
rescripsit (b). Magno autem incommodo & rei-
publicae & ecclesiae erant clandestina matrimo-
nia: filiorum & familiarum status incertus erat;
& mariti suarum uxorum pertaesi, eas impune
dimittebant, & novis contractis nuptiis, inter
stupra & adulteria transigebant vitam.

*Forma celebrandi matrimonii ex concilio
Tridentino.*

§. XX. Sed tandem ecclesia Occidentalis ma-
trimonia clandestina irrita fecit: quod jus in-
comitiis Tridentinis conditum est. Itaque de-
cretum, antequam matrimonium contrahatur,
ter a proprio contrahentium parochis tribus con-
tinuis festis diebus in ecclesia inter missarum sol-
lemnia publice denuntiari inter quos matrimo-
nium sit contrahendum, nisi aliter ordinarius
ex justis causis denuntiationes omittendas cen-
suerit: matrimonium vero ipsum inde contrahi
coram parochis, vel alio sacerdote de ipsius pa-
rochi seu ordinarii venia, & duobus vel tribus
testibus, & aliter contractum omnino nullum
& irritum esse: demum a proprio parochis be-
nedicendum (c). Quo decreto etiam contra-
ctui

(a) Cap. II. ex. de clandest. desponsat. (b) Cap.
II. ex. de clandest. desponsat. (c) Trid. sess. XXIV,
de ref. matrim. cap. 1.

Etui civili forma data est, idque & ex disciplina a multis saeculis in Occidente recepta, qua ecclesia etiam de contractu & matrimonii vinculo edicebat, & ex consensu christianorum principum, qui vel per legatos suos vel postmodum huic decreto consenserunt. Nihil autem definierunt patres, utrum benedictio ad matrimonii vim pertineat; at in compertis videri debet, per benedictionem sacramenti rationem nuptiis conciliari, quando constanti patrum traditione constat, per benedictionem nuptias gratia impleri. Celebrari debent hac sollemni formula matrimonia, ubi decretum Tridentinum receptum est: nam ubi reformatio Tridentina recepta non est, adhuc matrimonia clandestina tolerantur, nisi per publicas leges sollemnitas publica matrimonii statuta sit: quod factum in Gallia, ubi etsi reformatio Tridentina recepta non est; tamen edicto Blesensi in generalibus regni comitiis a rege edito sollemnitas celebrandi matrimonii parum a Tridentina differens statuta est; ad jus enim regum credebant Galliae reges spectare formam contractui matrimonii dicere.

Apud nos recepta quidem est reformatio Tridentina quoad matrimonia celebranda, ut scilicet sine Parochi, & duorum testium presentia matrimonium contractum nullum, ac irritum omnino sit. At cum solius trinae denunciationis defectus, si coram Parocho consensus prestetur, illicitum, non irritum faceret matrimonium, ac non deessent, qui animo parum religioso spreta illa trina denunciatione, Ecclesiarum pastores repente aggredierentur, aliud clandestinorum matrimoniorum genus exortum

tum est ; quod publicis legibus vindicari publica salus suavit. Hinc Ferdinandus III. feliciter regnans pragmaticali statuto an. 1767. sancivit , primo ut stante validitate matrimonii sponsus clandestine nubens damnetur ad triremes per quinquennium si ignobilis , vel in castro si nobilis , sponsa itidem in castro detineatur per idem tempus si ignobilis , in reclusorio autem extra patriam si nobilis : secundo ut tale facinus perpetrantes a legitimis successione arcerentur , & exheredari legitime possint : tertio ut testes voluntarii eadem pœna carceris , qua contrahentes plectantur : & quarto quod fiscus possit pro hujusmodi pœnarum executione principaliter agere . ☞

Qualitates parochi & testium .

§. XXI. Parochus autem , coram quo ex Tridentini decreti forma matrimonium christianorum oportet celebrari , est ille , in cujus paroecia contrahentes vere commorantur , etsi eo loci perpetuo habitare non intendunt : quo sensu qui student in academiis , eum parochum in causa matrimonii proprium habent , in cujus paroecia tempore studiorum morantur . Et si contrahentes sint duarum paroeciarum , non duo parochi matrimonio assistent , sed unus sive viri sive mulieris (a) : propriusque parochus recte etiam in aliena paroecia matrimonio assistet . Sed in multis ecclesiis consuetudo habet , ut potius coram parochō mulieris , quam viri matrimonia celebrentur . Milites autem ibi habi-

Inst.jur.can.T.IV. G ta-

(a) *Sacra congreg. ap. Fagnan. ad cap. quod nobis ex. de clandest. desponsat.*

tare in causa matrimonii intelliguntur, ubi stationis aut praesidii causa commorantur; ac ita coram ejus loci parcho matrimonia celebrabunt, nisi privilegio datum sit, ut capellani castrenses censeantur proprii militum parochi (a). Apud nos autem milites, qui in regio palatio & viridario, aut *Darsena*, aut in castris clausis & omnibus locis capellano majori subjectis commorantur, tantum coram parcho regio justas nuptias contrahunt: ceteri vero coram loci parcho cum capellani militaris interventu (b). Quod vero spectat ad vagantes, Tridentini patres recte monent, ne illorum matrimonia facile recipiantur nec parochi locorum possunt eorum matrimoniis interesse, nisi prius diligenti facta inquisitione & venia ab ordinario habita (c). Testes autem ad matrimonii vim necessarii, cujuscumque generis & qualitatis sint, sufficiunt, modo rationis compotes sint, & quod agitur, possint intelligere: non enim de eorum qualitate patres quidquam edixerunt. Et quoniam ad vim matrimonii tantum parochi & testium praesentiam, non vero aliquod ministerium patres requirunt; hinc valet matrimonium, saltem ut contractus, coram parcho & testibus invitis etiam sine hierologia initum, modo parochus adhibitus

(a) *Confer. Espen. par. II. tit. 12. cap. 5. n. 15. seq.* (b) *Bulla Benedicti XIV. convenit super jurisd. & facultatibus capellani majoris regni Neapolit.* (c) *Trident. sess. XXIV. de ref. matrim. cap. 7.*

tus fuerit, & de matrimonio contrahendo certior factus sit (a).

Quibus diebus matrimonium non celebratur.

§. XXII. Jam vero non in omnibus diebus nuptiarum sollemnia licet celebrare. Romanis multi dies inauspicati & infausti nuptiis credebantur, quales calendæ, nonæ, idus & novarum calendarum posteri omnes dies, integer Majus mensis & dies Februarii, quibus parentalia fiebant (b). Etiam apud christianos multis diebus nuptiæ celebrari vetitæ sunt, quod nuptiarum sollemnitas cum officiis religionis non bene conveniat; qui dies hodie *tempus clausum* solent appellari. Vetantur in primis nuptiæ integra quadragesima, idque in concilio Laodiceno cautum est (c): poenitentiae enim tempus aptum non erat nuptiarum pompis & deliciis. Et in concilio Aquisgranensi anno 1000cxxxvi. habito nuptiarum celebratio diebus dominicis interdicta est *pro reverentia tantæ sollemnitatis* (d). Et in canone quodam sub nomine concilii Ilerdensis apud Gratianum prohibentur nuptiæ a septuagesima usque in octavas paschæ, tribus hebdomadis ante festum S. Joannis Baptistæ & ab adventu domini usque ad epiphaniam (e): sed canon iste est suppositus (f), eoque expressa

G 2

di-

(a) Confer. N. Alexander theol. dogm. & moral. lib. II. de matrim. cap. 2. art. 2. reg. 19. (b) Confer. Brissonius de ritu nuptiar. (c) Conc. Laodic. can. LIII. (d) Conc. Aquisgr. can. XXXVIII.

(e) Can. X. C. 33. q. 4. (f) Bingh. orig. eccles. lib. XXII. cap. 2. §. 14.

disciplina fortasse saeculo XI. invaluit . Ideo vero tribus hebdomadis ante festum S. Joannis Baptistae etiam nuptiarum celebratio interdicta est , quod ante hoc festum species quaedam quadragesimae varia pro varietate ecclesiarum celebrari consueverat , de qua Filescius tractat (a). Tandem Tridentini patres tempus clausum contraxerunt ; statuerunt enim ut ab adventu domini usque in diem epiphaniae , & a feria quarta cinerum usque ad octavam paschatis inclusive sollemnia nuptiarum non celebrentur (b).

Praeparatio ad sacramentum matrimonii .

§. XXIII. Pertinet autem ad christiani hominis officium , ut paratus & ex regulis sanctae religionis nuptias contrahat . Christiani animum ad nuptias debent adiicere *non victi libidine , sed ducti pietate* ; ut nempe individuum vitae sociam habeant , cum qua inter domus sollicitudines possint Deo servire , filios procreare , procreatos recte instituere , & Christo lucrari . Intentionis puritate imitentur veteris testamenti justos , *qui non propter hoc saeculum , sed propter Christum conjuges , & propter Christum patres fuerunt* , ut Augustinus (c) loquitur : Non enim felicitas est habere filios , sed habere bonos . Licet quidem christiano homini in contrahendis nuptiis nobilitatis , divitiarum , pulchritudinis rationem habere ; sed nefas profecto est , ex iis solis nuptias inire . Itaque qui matrimonium contra-

here

(a) *Filescius de quadrag. christiana* . (b) *Trid. ses. XXIV. de ref. matrim. cap. 10.* (c) *August. de bono conjugali cap. ult.*

here intendit, ante omnia Dei voluntatem precibus exquirat, serioque expendat ejus, cum qua contrahere intendit, qualitates, ut se & in civitate & in domino pari jungere possit. Contractis vero sponsalibus uterque sponsus poenitentia, orationibus, confessione sacramentali & eucharistiae sacramento se disponat ad nuptias earumque benedictionem (a): Deus enim tantum eos conjuges gratia & donis suis implet, qui sancto consilio & puro corde copulantur. Et demum religiosum & pium est, ut pro benedictionis & sacramenti reverentia tantisper conjuges corporum conjunctione non utantur: quod in veteri disciplina patres Carthaginienses statuerunt (b). Mediis autem saeculis ejus abstinentiae ratione turpis quaestus invaluit; nam, in quibusdam ecclesiis presbyteri obtentu servandae disciplinae pecunias exigebant, ut maturius usum conjugii indulgerent, quod Chardonius observat (c).

Effectus matrimonii.

§. XXIV. Plures autem justarum nuptiarum effectus sunt, qui vel ex ipsa conjugii natura, vel ex civili jure, vel sacramenti religione dimanant. In primis per matrimonium conjuges fiunt duo in carne una, & alter in alterius corpus jus acquirit: debentque propterea sibi invicem mutuam quodammodo servitutem ad liberos procreandos & incontinentiae remedium,

ut

(a) *Trid. sess. XXIV. de ref. matrim. cap. 1.*

(b) *Can. V. C. 30. q. 5.* (c) *Chardon. histoire de mariage chap. II. art. 3.*

ut etsi alteri perpetua continentia placeat, nisi ex alterius consensu id praestare non possit (a). Liberi quoque nascuntur legitimi & in patris potestate, si vel maxime matrimonium nullum est, bona tamen fide & publice initum (b), errore etiam juris interveniente (c). Porro per matrimonii sacramentum conjugibus gratia confertur, qua mutuus eorum amor adjuvatur, fides matrimonii sustinetur & familiae onera evadunt leviora. Sane patres passim docent per sacerdotalem benedictionem nuptias sanctificari (d). Et in specie Chrysostomus adfirmat, sacerdotum precibus & benedictionibus concordiam conjugii constringi, amorem sponsi augeri & puellae continentiam crescere, & ab ea familia omnes diaboli insidias fugari (e). Hinc merito se imparem putabat Tertullianus ad enarrandam ejus conjugii felicitatem, *quod ecclesia conciliat & confirmat oblatio, & obsignat benedictio, angeli renuntiant, pater ratum habet* (f).

Coelibatus apud christianos status perfectior matrimonio.

§. XXV. Jam vero nuptiae quidem bonae sunt, utpote quae Deum habent auctorem, & humani generis propagationem spectant; at in christiana religione iis virginitas & impollutus coelibatus, tanquam majus bonum, praeferuntur

(a) *August. de bono conjug. cap. VI.* (b) *Cap. II. & XI. ex. qui filii sint legitimi.* (c) *L. LVII. §. 1. D. de ritu nuptiar.* (d) *Ambros. ep. LXX.*

(e) *Chrysost. hom. XLVIII. in Genes.* (f) *Tertull. ad uxor. lib. II. cap. 9.*

tur. Et erravit profecto Jovinianus, qui nuptias ita laudabat, ut eas virginitati aut continentiae vel anteponeret vel aequaret: quem errorem Lutherani & Calviniani innovarunt. Sane apostolus edixit, bene quidem eum facere, qui virginem suam matrimonio jungit, melius vero qui non jungit (a). Et deinde christiana religio tendit ad spem futurorum; & quo magis a terrenis homines soluti sunt, eo melius caelestibus vacabunt (b). His accedit consensus veterum patrum, in primis Tertulliani, Cypriani & Fulgentii, qui coelibes fere ipsis angelis veluti exaequant (c). Nec dicant homines profani, virginitatem repugnare ipsi hominum naturae, impetu & organis ad generationem donatae: nam concupiscentia carnis potius ex peccato, quam ex natura est (d): nec qui organis ad generationem donantur, omnes jure naturae tenentur ea organa in usum deducere, nisi commoda occasio ad nuptias se offerat, & qui spiritualium amore tenentur, nullam sibi commodam occasionem ad nuptias arbitrantur. Illud interim verissimum est, coelibatum non nisi excellentibus animis convenire (e), nec ad tantum virtutis apicem sine gratiae dono homines posse contendere. Quo autem

(a) 1. ad Cor. VII. 38. (b) 1. ad Cor. VII. 32. seqq. (c) Tertull. ad uxorem lib. I., Cyprian. lib. de habitu virginum, Fulgent. epist. III. ad Proban cap. 10. (d) Confer. Druven. de re sacram. lib. IX. q. 2. cap. 2. (e) Gregorius papa III. can. XVIII. C. 32. quaeft. 7.

tem omnibus liberum esset bonis meliora praeferre, christiani principes poenas coelibatus abrogarunt (a): qua in re non videntur male reipublicae consuluisse: etenim ubi aliae rationes & physicae & morales in republica promovent civium multitudinem, impollutus non multorum coelibatus tantum abest, ut civium numerosae proli obsit, ut potius toti civitati ad aliorum institutionem utilis esse possit.

Qualis sit obligatio ad contrahendum matrimonium.

§. XXVI. Satis aucto humano genere non omnes ad generationem habiles jure naturae ad nuptias ineundas obligantur, modo qui duxerint abstinere, impollute abstineant: quod pluribus probat Pufendorffius (b): non desunt enim, qui ferundo familiae & educationis filiorum oneri impares sunt, alii vero, qui coelibes utiliores ceteris hominibus esse possunt. Interim apud gentes in primis eas, quae ad belli gloriam vel opes quam maximas comparandas adspirabant, nuptiae praemiis & honoribus promotae & inculcatae, & coelibatus poenis & ignominiae obnoxius: spectabat enim ad civitatum finem civium augere multitudinem: quod Persarum, Graecorum, Romanorum aliarumque gentium institutis Hienecius (c) probat. Immo Judaei ex principiis religionis suae liberorum multitudini

(a) *L. I. C. de infirm. poen. coelib.* (b) *Pufendorff. de jur. nat. & gent. lib. VI. cap. 1. §. 7.*

(c) *Heinec. ad L. Juliam & Papiam lib. I. cap. 2.*

favebant, eorumque numerum reputabant benedictionem. Praesertim hoc nomine inclaru-
runt Romani, qui indi usque ab urbis exordio
curarunt, ut civitas civium numero efflueret:
quo spectavit lex Julia Papia Poppaea *de ma-
ritandis ordinibus*, quae praemiis nuptias & li-
berorum numerum promovit, poenis obstrinxit
coelibatum & orbitatem, tantumque cives ad
nuptias ineundas non coëgit. Ubi vigeant hu-
jus generis civilia instituta, tenebantur cives ad
nuptias contrahendas, nisi praemiis nuptiarum
carere & poenas coelibatus subire vellent: nec
enim coactio ad matrimonium directa erat,
quae nuptiarum indoli videtur adversari. Ve-
rum apud christianos obligatio ad nuptias con-
trahendas singulos non adstringit: quin potius
qui dono coelibatus donantur, melius faciunt,
si procul a nuptiis Deo animum & corpus suum
consecrent. Et merito pro religione sua Con-
stantinus M. poenas coelibatus sustulit; nec per-
misit, ut meliore conditione essent nuptiis ad-
ligati quam qui propter Deum coelibem vitam
elegissent (a); quo jure deinceps christiani sem-
per usi sunt.

*Quid matrimonium conscientiae, & qua-
tenus concedendum.*

§. XXVII. Quaeres fortasse, utrum *matri-
monia conscientiae*, ut appellantur, legitima sint,
& permitti debeant? Matrimonii conscientiae
nomine venit apud catholicos conjugium, quod
Inst. jur. can. T. IV. H ex

(a) *L. 1. C. de infirm. poen. coelib.*, *Sozom. lib. I.*
cap. 9.

ex indulgentia omiſſis denuntiationibus coram, parochō & duobus fidis teſtibus clam omnibus aliis contrahitur ea mente, ut aliis non manifeſtetur: fortasſe quod alterius conjugis dignitatis intereſt occultum eſſe. Hoc matrimonium utpote ex forma eccleſiaſtica initum clandeſtini vitio non cenſetur laborare: at multis incommodis obruitur. Uxoris & liberorum ſtatus non adeo certus eſt, praefertim ſi parochus & teſtes mortui ſint; filii non recte inſtitui & educari poſſunt; in canonum fraudem conjugati beneficium eccleſiaſticum, quo incapaces ſunt, ſaepe retinebunt; & filiifamilias invitis parentibus indignas nuptias contrahent. Quare Benedictus XIV. edita decretali tantum ex legitima & gravi cauſſa & perſonarum qualitate inſpecta conſcientiae matrimonium ab epifcopo permitti voluit, eique ad incommoda evitanda certam formam dedit (a). Nempe miniſter ab epifcopo deputari debet alterius contrahentium parochus, qui pro prudentia ſua par tanto muneri videatur, & ex gravi cauſſa alius ſacerdos doctrina & ſanctitate inſignis: qui antequam matrimonium contrahatur, deſponſos admoneat, quae ſint eorum erga filios naſcituſos officia. Porro duo libri conſciendi ſunt, qui bene clauſi & obſignati in curia epifcopali aſſerventur, in quorum uno deſcribantur ejuſmodi matrimonia, altero filiorum baptiſmata: uterque liber non eſt aperiendus, niſi alia id genus matrimonia & baptiſmata deſcri-

(a) *Benedict. XIV. bul. fatis vobis XXXV. tom. I. bullar.*

scribenda sint, aut si iustitiae administrandae necessitas urgeat, ut si ii, quorum interest, documenta petant, nec aliae suppetant probationes. Nati quoque filii a patre, aut, eo mortuo, a matre spatio triginta dierum a nativitate episcopo denuntiandi sunt, alias silentii fides rumpitur, & matrimonium publicatur, ne arcani fides servata aliis damno sit. Haec est summa decretalis, quae regia auctoritate apud nos publicata est, modo his matrimoniis, quod spectat ad effectus civiles, regiae potestatis jura non laedantur.

C A P U T XXVIII.

De iis, qui nuptias contrahere vetantur.

Quid impedimentum dirimens, quid impediens.

§. I. **N**ON omnes inter se inire possunt nuptias; matrimonium enim a natura ad hominum propagationem institutum certis regulis regitur, quae inter quasdam personas illud omnino nullum faciunt, & reipsa contractum, tamquam initio nullum, dirimunt; aut tantum impediunt, quo minus contrahatur, sed contractum non solvunt. Hinc matrimonii impedimenta duplicis generis exorta, *dirimentia* nempe & *impedientia*, ut appellantur. Impedimenti dirimentis nomine passim intelligunt quidquid matrimonium jure nullum reddit: quo sensu errorem circa personam alterius contrahentis, metum gravem & proprii parochi ac testium absentiam inter impedimenta dirimentia recensent. Nos vero

strictius impedimentum dirimens accipimus, id nempe quo homines inhabiles ad nuptias redduntur, easque, etsi velint, contrahere nequeunt, quales profecto non sunt, qui errant, & qui metu contrahunt, & qui clam paracho ac testibus nuptias attentant: hi enim ad matrimonium contrahendum inhabiles non sunt: & si nullum est eorum matrimonium, id fit, quia errantes & metu coacti illud contrahere nolunt clam vero contrahentes legitimam formam non servant. Similiter impedimenta nobis sunt, quae ratione qualitatis personae adhaerentis nuptias illicitas tantum faciunt, sed contractas non solvunt. Satis ampla est haec tractatio, eamque, qua late patet, pertractare instituti nostri ratio non permittit: quare tantum ea, quae praesentis usus sunt, proponemus, ita tamen ut singula a suis initiis & rationibus deriventur.

*Jus principum constituendi impedimenta
dirimentia.*

§. II. Proveniunt autem omnia matrimonii impedimenta aut jure naturae, aut jure divino, quod dicunt *positivum*, aut legibus principum, aut sacris canonibus. Est enim matrimonium non tantum naturae institutum, verum etiam contractus civilis & christianum sacramentum. Et quod spectat ad leges civiles, in compertis est, summis imperantibus jus esse, quo homines ad nuptias inhabiles prorsus reddant. Civilis potestas eo spectat, ut civitas tranquilla & beata consistat. Hinc civilis potestas pro potestate sua dirigit contractus omnes, ut ad civitatis bonum tendant, & praesertim matrimonia

nia, quae civitatis fundamentum sunt. Certe summi imperantes inter ethnicos omni tempore nuptiarum curam habuerunt, & multis legibus edixerunt, quatenus cives eas contrahere oporteret. Eodem prorsus jure donantur christiani principes; inest enim summo imperio potestas in omnes contractus: nec religio sacramenti nuptiis addita humanum contractum immutavit; quin potius ut idoneam materiam supponit. Quia in re theologi ferme omnes in primis B. Thomas, Ambrosius, Catharinus, Petrus Soto, Thomas Sanchez, Genetus aliique conveniunt: qui omnes docent, inesse civili imperio potestatem ad dirigendum contractum matrimonii, & impedimenta quae illud dirimant, statuenda (a). Et re ipsa christiani imperatores & deinceps reliqui reges legibus suis varia nuptiarum impedimenta dirimentia constituerunt; gradus cognationis & adfinitatis, in quibus matrimonium contrahi non posset, finierunt; rescriptis suis interdicta matrimonia contrahi permiserunt (b), & totius contractus curam ad se pertinere professi sunt. Hinc & communi theologorum sententiae & universae antiquitati adversatur Basilii Pontius (c), qui docet, Christum, quando matrimonium ad sacramenti dignitatem evexit, jus omne principibus ademisse.

An

(a) Confer. Launojus de regia in matrim. potest. par. I. art. 1. (b) L. un. C. si nuptiae ex rescripto petantur. (c) Pontius lib. VI. de matrim. cap. 2.

An ejus juris usum principes retineant?

§. III. Ceterum in eo inter nostros theologos non convenit, utrum christiani principes retineant adhuc usum potestatis, qua impedimenta matrimonium dirimentia statuunt. Post Petrum Soto (a) contendit Gerbesius (b) doctor Sorbonicus, ex pietate & religione, atque adeo principum cessione solam ecclesiam statuere impedimenta, quibus matrimonia dirimantur. Contra alii in primis Petrus Ledesma, Eligius Bassaeus, Guillelmus Estius, Thomas Sanchez (c) aliique adfirmant, ecclesiam auctoritate sua id jus, abrogata principum potestate, sibi vindicasse & reservasse. Et demum post multos alios theologos Jo. Launojus docet (d), nec principes unquam abjecisse potestatem & usum institutorum impedimentorum, quibus matrimonia dirimantur, nec jure illo umquam ab ecclesia fuisse privatos. Quod ad me attinet, lubens agnosco, christianos principes numquam expresso aliquo edicto usum regiae potestatis in matrimonium abjecisse (usum inquam, nam ipsa potestas indivulsa cohaeret summo imperio); nec per ecclesiam aliquo decreto usu suae potestatis fuisse privatos: nulla enim exsint talis cessionis aut

(a) *Petrus Soto lect. IV. de matrimonio.* (b) *Gerbes. in tract. de potest. eccles. & princip. super imped. matrim. Gallice edito.* (c) *Ledesma theol. moral. cap. XI., Bassaeus in floribus theol. moral., Estius in lib. IV. sentent. dist. 34. §. 1., Th. Sanchez lib. VII. de matrim. disp. 3.* (d) *Launojus de regia in matrim. potest. part. I. art. 2.*

aut reservationis monumenta: quae enim adferuntur pro abrogata principibus potestate in matrimonium, id non asserunt, quod Launojus pluribus probat (a). Et deinde quæ poterat ecclesia usu regiae potestatis in matrimonii contractum principes spoliare, quando potestas ecclesiastica tota spiritualis est? Porro S. Thomas de civili potestate in matrimonium ita loquitur, quasi ejus usus staret adhuc penes principes; inquit enim in libris contra gentes (b), *matrimonium in quantum ordinatur ad bonum politicum, subiacet ordinationi legis civilis*. quod idem plures alii aperte profitentur. Et quamvis idem S. Thomas alibi doceat (c) *prohibitionem legis humanae non sufficere ad impedimenta matrimonii, nisi interveniret ecclesiae auctoritas hoc idem prohibentis*; tamen potior esse debet doctrina, quam senior factus & eruditior in summa contra gentes proponit. Interim a multis saeculis rariora coeperunt esse principum edicta, quae de vinculo matrimonii statuant, sive quod ii religioni sibi ducerent ea de re, quae magnum erat in ecclesia sacramentum, leges ferre, sive quod sua interesse viderent, cum episcopis non disceptare. Hinc factum, ut posteriori aetate quibusdam matrimoniis, quae ecclesia rata habet, aliqui principes effectus civiles denegarint; & absurdum videri potest, id in ecclesia esse sacramentum, quod in civitate illegitimum censetur.

Quæ

(a) Launojus loc. cit. cap. 3. & seqq. (b) S. Thomas lib. IV. contra gentes cap. 78. (c) S. Thomas in IV. dist. 42. art. 2. ad 4.

Quæ Siciliae Reges circa nuptiarum impedimenta legibus suis constituerunt, & quibus matrimoniis effectus civiles denegarunt in calce hujus capituli adnotantur.

Ecclesia etiam constituit impedimenta dirimentia.

§. IV. Potestate quoque dirigendi & ordinandi matrimonii, ut ad finem religionis tendat, donatur ecclesia: matrimonii enim contractum ad sacramenti dignitatem Christus evexit: & in sacramenta soli ecclesiae potestas competit. Et re ipsa omni tempore ecclesia regulas edidit, ut fideles in domino & forma religionis nuptias inirent. Verum ex sententia Christiani Lupi (a) per plura saecula regulae istae tantum sacramenti religionem, non naturam & vim contractus spectarunt. *posterioribus dumtaxat saeculis, sunt ejus verba, ecclesia fuit nata istam potestatem (statuendi nempe impedimenta dirimentia): hinc antiqui patres & canones raro istorum impedimentorum, utpote ad suam potestatem non spectantium, ex professo meminerunt.* Et constat sane ecclesiae patres adire summos imperantes consuevisse, ubi legem matrimonii vinculum spectantem edendam judicabant; ut exemplo esse possunt concilii Milevitani patres, quos inter magnus Augustinus; hi enim edito canone & poenitentia imposita, *ne dimissus ab uxore, neque dimissa a marito alteri conjugatur, sed ita maneant, aut sibi concilientur, addiderunt, ea de re legem imperialem petendam promulgari (b).* Temporis lapsu sacramentum

ma-

(a) *Christ. Lupus dissert. de Latinor. episcop. & clericor. continentia cap. X. tom. 4. schol. E. V.* (b) *Cod. eccles. Afric. can. CII.*

matrimonii, quod civili contractui innitebatur, principale iudicatum est, & contractum ipsum veluti sibi subiecit: atque ita consuetudine quadam invaluit, ut etiam ecclesia de contractus vinculo ediceret: quod jus saeculo sexto coepit, inde sensim crevit, & saeculo XII per integrum Occidentem receptum erat. Hinc ecclesia civilia matrimonii impedimenta variis modis auxit, temperavit, abrogavit: & hinc causae de vi matrimonii ad ecclesiam delatae. Qua recepta disciplina Gratianus a canone Milevitano detraxit verba *in qua causa legem imperialem petendam promulgari* (a): nec enim alias illum aliis canonibus convenire posse putavit. Et demum juri a multis saeculis recepto convenienter Tridentini patres anathema iis dixerunt, qui negabant, ecclesiam non potuisse impedimenta matrimonium dirimentia constituere (b).

Impuberes inhabiles ad nuptias.

§. V. Jure naturae in primis nuptias non contrahunt impuberes, hoc est, qui tenero adhuc corpore sunt, & impetu ad venerem destituti, sive unus, sive ambo impuberes sint; & reipsa contractae nuptiae nullae sunt. Contrahuntur nuptiae ad genus humanum nova prole locupletandum: atque ideo inepti ad rem uxoriā qui nuptias contrahent? Pro regionum varietate homines citius aut tardius pubescunt. At jure Romano feminae annis duodecim impletis viripotentes sunt, mares vero annis quatuordecim *lusi-jur. can. T. IV.* I- dem

(a) *Can. V. C. 23. q. 7.* (c) *Trid. sess. XXIV. de sacr. matrim. can. 4.*

dem impletis puberes censentur (a): quam aetatem in maribus primis Justinianus certam dixit; nam ante ea de re inter jurisconsultos non conveniebat (b). Primis saeculis de aetate ad nuptias idonea sollicita ecclesia non videtur fuisse, quod cognitio illa ad curam legum civilium spectaret. Inde pontifices sententiam juris civilis admiserunt (c). nisi malitia suppleat aetatem (d), hoc est, nisi natura praecox vim generandi praevertat. Itaque nullae sunt impuberum nuptiae; nisi quis ab aetate legitima parum absit, & ex habitu corporis pubes appareat, cujus rei judicium ad episcopum spectat (e). Quod si puellae etiam duodecim annis minores apud Romanos domum duci consueverint; id non iustas nuptias arguit, sed potius ea ratione factum est, ut rudes & castos mores ad maritum deferrent; nuptiae vero demum legitima aetate censebantur, quod Pomponius docet (f). Et quamvis impuberes post septennium possent praesentibus nuptiis, sed futurae conjunctioni consentire; injustum tamen visum est, valere obligationem, cujus onus non adhuc sentitur. Statim a pubertate iustae quidem sunt nuptiae; at in recte constitutis imperiis & familiae & civitati expedit, ut in maturiorem aetatem differantur. Senum effoetorum, vel juvenis cum anu effoeta tolerantur

(a) *Pr. tit. instit. quibus modis tutela finitur.*

(b) *Ulp. fragm. XI. §. 28.* (c) *Cap. II. X. XI. ex. de desponjat. impub.* (d) *Cap. IX. & XIV. ex eod.*

(e) *Bened. XIV. bul. magnae nobis LI. tom. 2. bul. lar.* (f) *L. IV. D. de ritu nuptiar.*

tur potius, quam probantur matrimonia, eaque *honoraria*, quasi nomine tenus matrimonia, dici posse Pufendorffius (a) observat.

Impotentes inhabiles ad nuptias.

§. VI. Non contrahunt quoque ex naturae institutis nuptias aetate maiores, qui impotentes sunt ad concubitum. Impotentia in aetate maioribus est vel ex vitio naturae & causa intrinseca, vel ex accidenti. Vitio naturae impotentes sunt mares debilis frigidiorisque naturae, & feminae adeo arctae, ut virum pati nequeant, & tales proprie appellantur *frigidi*. Ex accidenti vero frigent mares, quibus exsecta sunt vasa ad concubitum necessaria, quique ope daemonum & incantationibus inepti facti sunt ad rem uxoriā, & hi postremi proprie dicuntur *maleficiati*. Scilicet antiqua sententia est, etiam apud ethnicos recepta, posse venereum impetum incantationibus & susurris magicis infringi, quod Chardonius (b) probat: etsi alioquin dubitandum non videatur, saepe ex naturalibus causis & phantasiae vitio jacere in frigido lecto, qui se maleficiatos putant. Frigida matrimonia jure naturae nulla sunt: siue ambo conjugēs, siue unus tantum frigeat, modo impotentia siue omnimoda, siue tantum respectu praesentis conjugis perpetua sit & immedicabilis (c): idque verum est, etiamsi unius conjugis impotentia alteri cognita sit (d); nullum enim esse potest matrimonium

(a) Pufendorf. de jur. nat. & gent. lib. VI. cap. I. §. 25

(b) Chardon. histoire de mariage chap. XIV.

(c) Cap. IV. & V. ex. de frigid. & malefic. (d) Cit. cap. IV.

nium, ubi concubitus nullus est, nec potest esse. Quapropter si reipsa frigidum matrimonium contractum fuerit, dirimetur, modo conjuges non velint tamquam fratres & sorores cohabitare (a): abrogata enim est disciplina saeculo XII. in ecclesia Romana recepta, quae frigidos conjuges veluti fratres & sorores cohabitare cogebat (b). Ante separationem vero de perpetua impotentia constare debet; idque fit legitimo judicio, in quo etiam partium pudendarum inspectio in decretalibus probatur (c). Et quando impotentia dubia est, triennium continuum a die nuptiarum ad explorandas vires datur: quo exacto si impotentia persistat, conjugium separatur, & potenti seu utrisque, si impotentia est tantum respectu praesentis conjugis, novum matrimonium contrahere conceditur (d). Quod si separato per impotentiam naturalem conjugio impotens aptus fiat, conjugium in integrum restituitur, etsi alter ad novas nuptias convolaverit (e); non vero si impotentia ex maleficio erat (f). Cujus discriminis hanc tradunt rationem, quod sublato naturali vitio conjux etiam priori conjugii aptus habetur, contra incantatus etsi cum aliis rei uxoriae aptus sit, non tamen idem praestare posse creditur cum uxore, cujus causa defixus est. Ab impotentibus distant spadones stricte sic dicti, qui

(a) *Cap. V. ex. eod.* (b) *Cap. III. de frig. & malefic. in 1. compil.* (c) *Cap. VI. & seq. ex. de frig. & malefic.* (d) *Cap. V. & VII. ex. eod.* (e) *Cit. cap. V. & cap. VI. ex. eod.* (f) *Can. ult. C. 23. q. 1. Confer. Franc. Florens in cit. Grat. loc.*

qui ob temporariam causam frigent, eorum enim nuptiae, quod vitium temporarium est, legitimaе sunt, nec separantur. Quid de castratis & eunuchis, qui testes exsectos, vel attritos habent? Jure Romano illegitimae erant castratorum nuptiae, sed contractae non solvebantur - quod Heineccius observat (a). At constitutione Leonis philosophi eorum nuptiae omnino irritae in Oriente factae sunt (b): quod Sixtus V. etiam in Occidente decrevit.

Computatio graduum civilis & canonica.

§. VII. Porro jure naturae in certis gradibus matrimonia verantur inter cognatos & adfines. Cognatio proprie sic dicta est proximitas inter eos, qui per generationem ab uno communi stipite descendunt, sive ex justis nuptiis, sive ex alio licito vel illicito congressu proveniat. Constat autem cognatio lineis, lineae vero gradus habent suos. Linea est series personarum a communi stipite descendentiū: eaque vel recta est, quae genitores & genitos exhibet; vel transversa, in qua ex latere conjuncti continentur: qui si aequo gradu distent a stipite communi, transversa aequalis est; si unus altero remotior sit, inaequalis appellatur. Gradus est distantia cognatorum, quae a communi stipite aestimatur. Jure civili una & perpetua regula in omnibus lineis gradus computantur, *semper generata persona gradum adiicit* (c), seu tot sunt gradus, quot generatio-

(a) Heinec. ad L. Jul. & Papiam lib. II. cap. 3. n. 4.

(b) Novel. XCVIII. (c) §. VII. instit. civil. de gradib. cognator.

tiones. Sic pater & filius uno gradu distant, quia una generatio est; duo fratres in secundo gradu, patruus & nepos in tertio, quia in fratribus a communi stipite duae, in patruo & nepote tres sunt generationes. In linea recta ex civili regula canones gradus metiuntur, nisi quod loco generationum personas usurpant, & ita tot numerant gradus, quot personas una demta, nempe stipite; sed in transversa ab jure civili canones distant: etenim in transversa aequali collaterales eo gradu sunt inter se, quo a stipite communi: sed in inaequali, eo gradu inter se distant, quo remotior a stipite. Valet autem ecclesiastica computatio tantum in matrimoniis: nam in hereditatibus adhuc ex regula civili gradus aestimantur.

Qui & quando recepta canonica computatio.

§. VIII. Per plura saecula ecclesia, utpote in imperio nata, gradus ex civilium legum sententia numerasse videtur: quae Cujacii, Espenii aliorumque virorum doctissimorum opinio est. Sane Ambrosius (a) fratres patruales quarto gradu, & avunculum & neptem tertio gradu inter se sociari adfirmat: quae ipsissima civilis computatio est. Servat adhuc ecclesia Graeca, antiquorum rituum tenacissima, civilem graduum computationem. At ecclesia Latina a multis saeculis in linea transversa diversam computandi rationem usurpat, qua duae generationes ex latere aequales unum gradum conficiunt. Coepit octa-

vo

(a) *Ambros. ep. LX. ad Paternum.*

vo saeculo haec nova computandi methodus (a),
 cique quaedam Gregorii M. verba male intelle-
 cta occasione videntur praebuisse. Gregorius
 nempe *secundam, tertiam & quartam generatio-*
nem memorat, & in secunda generatione patrue-
 les seu consobrinos collocat (b). Arque ita con-
 clusum, patruelles aut consobrinos esse in secundo
 gradu, quae ecclesiastica computatio est. Sed
 Gregorius erat legum civilium observantissimus,
 nec ab earum sententia sine necessitate videtur
 recessisse. Potius videtur in gradibus computan-
 dis truncum in fratribus collocasse, quod mediis
 saeculis multi, in primis Isidorus Hispalensis (c),
 faciebant. Et ita verbis tantum non sententia
 distabat pontifex ab jure civili: nam patruelles,
 qui sunt secundo gradu in fratribus stipite posi-
 to, certe sunt in quarto, si ab avo computatio
 incipiatur. Longo post tempore qui stipitem in avo
 ponebant, fortasse putarunt eadem methodo Grego-
 rium usum, & ita civilem computationem reliquisse,
 & gradus computasse, quasi duae ex latere ge-
 nerationes unum gradum conficerent. Hinc in-
 ducta canonica graduum computandi ratio, quae
 sensim crevit: tandem vero generatim apud La-
 tinos in matrimoniis saeculo XI. recepta est, post-
 quam Petrus Damianus eam contra Ravennates
 jurisconsultos asseruit (d), eamque synodus Ro-
 ma-

(a) *Conc. Wormeritense an. 1000 XLII. can. I.,*
conc. Compendiense circa ann. 1000 LVI. can. I.

(b) *Greg. M. ad August. Anglor. episcopum,*
cap. VI. (c) *Can. I. C. 35. q. 5.* (d) *Petrus Da-*
mian. de parentelae gradibus.

72 INSTITUT. JUR. CAN. PARS II.
mana sub Alexandro II. confirmavit (a).
*Jure naturae & civili quae nuptiae incestae
inter cognatos.*

§. IX. Jam vero in linea recta seu inter generantes & genitos nuptiae omni no incestae & nefariae sunt, quod jus ex lege naturae derivatur: naturalis enim pudor & jura inter cognatos per naturam statuta, quae pugnant cum officiis inter conjuges, tales nuptias contrahere vetant. Et procul dubio per degeneram & ferinam educationem exuisse humanitatem videntur gentes illae, quibus fas erat implere parentem, ut Lucani verbis utar (b), seu quibus licita erant inter parentes & filios matrimonia (c). Romani autem, ut erant honestatis observantissimi, eas nuptias semper veluti jure gentium incestas damnarunt (d). In linea transversa etiam naturalis pudor, sed non tantus, videtur vetare nuptias inter fratres & sorores; etsi apud plerasque gentes fratres sororibus suis conjungerentur & quidem etiam ex principiis religionis. Jure Romano semper inter fratres & sorores nuptiae vetitae sunt: & in linea transversa inaequali nuptiae vetabantur inter patruum, aut avunculum & neptem hujusque filiam, & inter amitam aut materteram & nepotem hujusque filium (e): qui omnes erant loco parentum & liberorum. Nuptiae vero inter patrue-

(a) Can. II. C. 35. q. 5. (b) Lucan. lib. VIII. v. 409. (c) Confer. Grotius de I. B. ac P. lib. II. cap. 5. §. 12. n. 2. seqq. (d) L. ult. D. de ritu nupt. Confer. Gerard. Noodt in cit. tit. DD. (e) §. III. Insti. tit. de nuptiis.

trueles & consobrinos, jure antiquo Romano non vetabantur (a). Primus Theodosius M. nuptia consobrinorum interdixit: *tantum pudori tribuens & continentiae*, inquit de eo Aurelius Victor (b). Sed Arcadius revocata pristini juris auctoritate legem patris sustulit (c): & similiter Justinianus consobrinorum nuptias permisit (d). Et quamquam jus ab Arcadio restitutum & ab Justiniano confirmatum Sirmondus in dubium revocet, & Jo. Launojus Arcadii legem tantum non explodat; tamen verius est, hos imperatores nuptias inter consobrinos restituisse, quod Jac. Gothofredus & Everardus Otto plenissime demonstrant.

Jure canonico olim nuptiae etiam septimo gradu vetitae.

§. X. Quod vero spectat ad ecclesiam, ea in contrahendis matrimoniis & naturae instituta & leges civiles diu secuta est. Ergo in linea recta nuptiae in infinitum inter christianos vetitae sunt. Et ante Theodosium M. nuptiae consobrinorum inter christianos non erant interdictae, quod Augustinus testatur (e). Inde jus Theodosianum semper servavit ecclesia, nihil morata leges Arcadii aut Justiniani, quibus consobrinorum in matrimoniis restituta essent (f). Immo in ecclesiis Occidentis latius extensa est nuptiarum in-

Inst. jur. can. T. IV. K *ter*

(a) *August. lib. XV. de civit. Dei cap. 16. Confer. Christophor. Riccius in vindiciis juris cap. III.*

(b) *Aurel. Victor epitome histor.* (c) *L. XIX, C. de nuptiis* (d) *§. IV. instit. tit. de nuptiis.*

(e) *August. lib. XV. de civit. Dei cap. 16.* (f) *Gregor. M. ad Augustin. Anglor. episcopum cap. VI.*

ter collaterales prohibitio, nempe usque ad septimum gradum: quod jus post saeculum septimum induci coepit. Cavit concilium Romanum anno 1000 sub Gregorio II., ut nullus de propria cognatione uxorem accipiat (a): quod jus ex Levitico repetitum videtur, ubi Deus edicit, *nullus homo ad proximam sanguinis sui accedat, & revelet turpitudinem ejus* (b); jamdiu enim consueverant patres, leges civiles Judaeorum in ecclesiam invehere. Inde solliciti esse coeperunt episcopi, quousque cognatio extenderetur, iisque praesto fuisse videtur Iulius Paulus, qui successionis gradus septem constituit (c). Atque inde receptum, cognationem usque ad septimum gradum extendi, & in eo nuptias etiam ex latere esse interdictas, etsi non in omnibus ecclesiis hujusmodi interdictio servaretur. Quamvis in hoc episcopi veram sententiam jurisconsulti non videntur adsecuti: ille enim septem cognationis gradus constituit, non quod ultra septimum gradum cognatio non extenderetur, sed potius quia *ulterius per rerum naturam nec nomina inveniri, nec vita succedentibus propagari potest* (d); & notum alias est, jure civili etiam ulterius cognationem extendi (e), & adgnatis ultra septimum gradum deferri hereditatem (f).

Inde prohibitio ad quartum gradum restricta.

§. XI. Quo primum tempore prohibitio nuptia-

(a) *Conc. Roman. can. IX.* (b) *Levit. XVIII. v. 6.*

(c) *Paulus lib. IV. sentent. tit. II.* (d) *Paul. loc. cit. §. 8.* (e) *§. VII. instit. civil. de gradib. cognation.*

(f) *§. V. instit. civil. de success. cognator.*

tiarum per canones ad septimum ex latere gradum extensa est, ex sententia juris civilis ecclesia gradus computabat; nam ex gradu civili successionis, quem ad septimum gradum extendi putabat, cognationem metiebatur (a). Inde recepta canonica graduum computatione, & retenta eadem nuptiarum prohibitione: nuptiae inter conjunctos ex latere usque ad decimumquartum gradum ex civili computatione interdictae sunt: quod jus saeculo XII. & in cognatione & in adfinitate receptum fuisse videtur (b). Tam vero patens nuptiarum prohibitio incommodo erat reipublicae & ecclesiae, quod nuptias admodum difficiles reddidisset. Ergo Innocentius III. in concilio generali tam vagam prohibitionem restrinxit, statuitque, ut tantum usque ad quartum consanguinitatis gradum deinceps nuptiae vetarentur (c). Cujus juris hanc rationem dedit, *quia quatuor sunt humores in corpore, qui constant ex quatuor elementis*. Inadaequata profecto ratio: nec novum est, etiam summos jurisconsultos ineptas legum rationes assignare. Certe Julius Paulus (d) rationem reddens, cur partus septimestres maturi essent, id ea ratione dixit evenire, *quia ratio Pythagorei numeri* (nimirum septenarii, qui magnae virtutis habebatur inter Pythagoricos) *hoc videtur admittere*. Et apud Ulpianum ratio, cur caecus a postulando repellatur, haec assignatur, *quod insignia magistratus videre & revereri non*

K 2

pos-

(a) *Can. I.C. 35. q. 2.* (b) *Cap. I. de consanguin. in 1. collect. ap. Ant. August.* (c) *Cap. VII. ex eod.* (d) *Paulus lib. IV. sentent. tit. 9. §. 5.*

possit (a). Nisi summus pontifex subtilius philosophatus sit ex quatuor elementorum doctrina, ex quibus omnia fieri, moveri & tandem mutari veteres credebant: quasi nempe gyro quatuor generationum elementa omnia, unde emergebat cognatio, prorsus evanescerent, & ita cognatio extingueretur.

Civilis cognatio etiam nuptias nullas facit.

§. XII. Praeter cognationem ex sanguine exortam duae aliae cognationis species ad nuptias inhabiles faciunt contrahentes, cognatio nempe *civilis* seu *legalis*, & *spiritualis*. Et quod spectat ad cognationem civilem, ea est ab adoptione, quae apud omnes fere gentes recepta, nullibi tamen tam frequens fuit, quam apud Romanos. Erat adoptio actio legis seu actus legitimus quo qui natura filius non est, in jura filii adsciscitur. Inventa est imitatione naturae ad familias & adgnationes propagandas & sustinendas: filiusque adoptatus jus adgnationis in familia patris adoptantis consequabatur. Hinc adoptati in familiam patris adoptantis transibant, & ita omnibus ejus adgnatis cognati censebantur, quod Julius Paulus (b) tradit. Itaque nefariae visae sunt nuptiae inter adoptantem & filiam adoptatam, & generatim inter omnes, qui in linea recta per adoptionem parentum & liberorum loco essent (c). Item filius naturalis nec sororem adoptivam (d), nec amitam, nec amitam magnam

(a) L. I. §. 5. D. de postulando. (b) L. XXIII. D. de adoptionib. (c) §. I Inst. de nuptiis, L. LV. D. de ritu nupt. (d) §. II. Inst. eod., L. XVII. D. de ritu nup.

gnam adoptivam uxorem ducere potest (a). Sed non eodem modo inter omnes per adoptionem conjunctos nuptiae vetitae sunt: etenim inter eos, qui parentum & liberorum loco in linea recta erant, etiam dissoluta adoptione nuptiae non erant (b): quamvis enim per emancipationem jura omnia adoptionis solverentur; tamen sancta & perpetua esse debet reverentia inter eos, qui semel parentum & liberorum loco fuerunt. Inter eos vero qui per adoptionem ex latere conjunguntur, quousque durat adoptio nuptiae prohibentur, eaque soluta recte contrahi possunt (c). Et quoniam in nuptiis etiam id quod honestum erat, Romani attendebant, eae etiam vetitae sunt inter filium adoptatum & uxorem, aut matrem, aut materteram patris adoptantis (d), etsi hae omnes extra familiam essent, nec adgnatae filio adoptivo. Ex integro impedimentum civilis cognationis ab jure Romano ecclesia recepit, nec in eo aliquid mutavit (e). Et hinc Cujacius adfirmat, civilem fraternitatem etiam hodie dirimens impedimentum constituere, nimirum stante adoptione (f).

Cognatio spiritualis nuptias dirimit.

§. XIII. Cognatio spiritualis est necessitudo inter certas personas ex baptismi & confirmationis datione, aut eorum, qui baptizantur &

con-

(a) Cit. L. XVII. §. 2. (b) Cit. §. 1. Inst., cit. L. LV. pr. (c) Cit. §. 11. Instit., cit. D. LV. §. 1. (d) L. XIV. D. de ritu nuptiar., cit. L. LV. §. 1. (e) Can. VI. C. 30. q. 3., cap. un. ex de cognat. legali. (f) Cujac in tit. decretal. de cognat. legali.

confirmantur, susceptione exorta. Antiqua ex ecclesiae doctrina, qua veluti pater spiritualis censebatur, qui alicui baptismum dederat, aut eum in fide instituerat & de sacro fonte susceperat (a): per baptismum enim homines in novam vitam renascuntur. Sed cognatio ista olim nuptiis non erat impedimento, adeo ut ipsi parentes filios suos de baptismo susciperent (b). Primus Justinianus statuit, ne quis ex baptismo susceptam uxorem duceret; idque quia nihil magis paternam affectionem & nuptiarum prohibitionem posset inducere, quam hujusmodi nexus, quo eorum animae Dei causa copulatae sunt (c). Inde Nicolaus I. exemplo adoptionis spirituales cognationem veluti nuptiarum impedimentum proposuit & inculcavit (d): quae argumentatio fortasse minus recta est: filii enim spirituales in familiam sponsoris non transeunt. Quidquid vero hujus rei sit, saeculo septimo & sequentibus in utraque ecclesia sensim ad alias personas fere ad instar consanguinitatis & adoptionis impedimentum ex spirituali cognatione extensum est: quod sponte sua debuit evenire ex sententia ejus aetatis, qua *spiritualis affinitas corporum conjunctione major* reputabatur: quam rationem Trullani patres & Nicolaus papa proponunt (e). Itaque vetitae sunt nuptiae inter

su-

(a) Origen. ad Rom. XVI. 21., Casil. in const. monast. cap. XX., auctor ecclesiast. hierarch. cap. VII.

(b) August. ep. XCVIII. ad Bonif. Confer. superius dicta cap. VII. §. 13. (c) L. XXVI. C. de nuptiis.

(d) Can. I. C. 30. q. 3. (e) Conc. Trullan. can. LVII. cit. can. I.

suscipientem & susceptam hujusque parentes (a): inter filium naturalem suscipientis & filiam spirituales, quia frater & soror esse videbantur (b): & in multis ecclesiis filii omnes naturales suscipientis etiam cum fratribus & sororibus suscepti jungi matrimonio vetabantur (c), quasi per cognationem spirituales in unam duae familiae compingerentur. Quin si solus maritus ex sacro fonte suscepisset, ejus uxor etiam commater censebatur. Et postquam nuptiae vetitae sunt inter suscipientem & baptizati parentes, canones etiam vetuerunt, ne parentes filios suos de baptismo susciperent (d). Cognatio ista spiritualis etiam ex confirmatione matrimoniis erat impedimento; postquam enim confirmatio seorsim a baptismo dari coepit, etiam proprii sponsores in confirmatione adhibiti sunt. Sic extensa spiritalis cognatio nuptias difficiles reddebat, quin etiam contingebat, ut in casibus vetitis per ignorantiam inirentur. Hinc Tridentini patres impedimentum cognationis spiritualis restrinxerunt, ac ita eam contrahi voluerunt tantum inter suscipientes ac baptizatum ipsum & hujus patrem & matrem, nec non inter baptizantem & baptizatum hujusque patrem & matrem (e): quod jus etiam in confirmatione valere voluerunt.

Quid

(a) *Cit. can. Trull., capitul. reg. Francor. lib. VI. cap. 421. edit. Baluzii.* (b) *Can. I. C. 30. q. 3., can. III. eod.*

(c) *Cap. I. ex. de cognat. spirit.* (d) *Concil. Moguntinum an. 1733. can. LV.* (e) *Trid. sess. XXIV. de ref. matrim. cap. 2.*

Quid adfinitas, ejusque natura.

§. XIV. Haftenus de cognatione, dicendum nunc de adfinitate, quae etiam nuptiis impedimento est, & contractas dissolvit. Jure civili adfinitas est necessitudo inter conjugem unum & alterius cognatos; ita dicta quod duae cognationes diversae per nuptias copulantur, & altera ad alterius finem, qui maritus vel uxor est, accedit (a). Ex nuptiis apud Romanos ortam esse adfinitatem Modestinus docet (b): per nuptias enim vir & mulier veluti unum fiunt; quo fit, ut vinculo isto utrinque cum iis etiam eorum cognati copulentur. Sed jure decretalium adfinitas ex quacumque etiam illicita carnis commissione nascitur (c): atque ita per quamcumque copulam una cognatio ad alterius finem accedit. Quin ex nuptiis exorta adfinitas triplicis generis erat ex triplicibus gradatim contractis nuptiis (d). Etenim primae nuptiae cognatos viri adfines primi generis uxori faciebant, quae est proprie sic dicta adfinitas; inde si superstes vidua ad secundas nuptias transfiret, hic secundus maritus adfins secundi generis cognatis primi viri erat: & demum muliere mortua, si ejus superstes maritus aliam uxorem duceret, haec tertii generis adfins cognatis primi viri censebatur. Adfinitas ex illicita conjunctione Romanis incognita fuit; at secundum adfinitatis genus

(a) *L. IV. §. 3. de gradib. & adfinib.* (b) *Cit. l. IV. §. 3.* (c) *Cap. VIII. & seq. ex. de eo, qui cognovit consanguin.* (d) *Confer. Cujac. ad tit. decretal. de consanguin. & adfinit.*

nus saltem in linea recta apud Romanos etiam obtinuit (a). At jure canonico etiam inter collaterales secundum & tertium genus adfinitatis inductum est, cui adfinitatis extensioni fortasse falsa Fabiani papae decretalis (b) prebuit occasionem. Semel autem contracta adfinitas etiam dissolutis nuptiis perseverat: qua in re novum civile jus & canones conveniunt. Etenim antiquo Romanorum & aliarum gentium jure adfinitas solutis nuptiis solvebatur: quod Reinoldus, Gerardus Noodt & in primis Heineccius probant (c). Quod vero adfines ab adfinibus non generantur, nulli proprie gradus inter eos sunt (d): at exemplo cognationis etiam quasi gradus adfinitatis recepti sunt: & ita quo gradu quis est cognatus viro, eo est adfinis uxori, & contra (e). Quin demonstrandae rei gratia, adfinitatis etiam lineam rectam & transversam distinguunt exemplo cognationis, cujus simulachrum est.

Prohibitio nuptiarum inter adfines.

§. XV. Jure gentium non minus quam civili nuptiae in linea recta adfinitatis in infinitum prohibitaе sunt: est enim quidam naturalis pudor, qui inter focerum & nurum, inter novercam & privignum aliosque adscendentes & descendentes adfines nuptias veter: hi scilicet per

Inst. jur. can. T. IV.

L

ad-

(a) L. XV. D. de ritu nuptiar. (b) Can. III. C. 35. q. 2. & 3. (c) Reinold. variar. cap. XXIV., Noodt. ad tit. DD. de ritu nuptiar., Heinec. ad L. Jul. & Papiam lib. II. cap. 17. (d) L. IV. §. 5. D. de gradib. & adfinib., (e) Can. III. C. 35. q. 2. & 3.

adfinitatem veluti parentes & liberi facti sunt; Hinc Cicero quum socrum genero nupsisse narrasset, subdit (a), *o mulieris scelus incredibile, & praeter hanc unam, in omni vita inauditum!* Et apostolus tale stuprum ne inter gentes quidem nominari ait, ut quis uxorem patris sui habeat (b). Sed inter adfines ex latere jure Romano neque frater uxorem defuncti fratris ducere, nec vicissim foror marito fororis defunctae nubere potest, quoniam per adfinitatem inter se veluti fratres & sorores reputantur (c). primis saeculis etiam in adfinitate civile impedimentum ecclesia secuta videtur; at inde impedimento cognationis ad septimum ex latere gradum extenso: etiam adfinitas usque ad septimum ex latere gradum nuptiis fuit impedimento: quod non secus ac in cognatione difficiles nuptias faciebat, praesertim quando gradus ex canonica regula coeperunt computari. Ergo Innocentius III. in concilio generali abrogatis duabus posterioribus adfinitatis speciebus, nuptias inter adfines ex latere tantum usque ad quartum gradum canonicae computationis fieri interdixit (d). Et inde Tridentini patres adfinitatem ex illegitima conjunctione ad secundum gradum restrinxerunt (e).

Publica honestas etiam nuptias nullas facit.

§. XVI. Quasi adfinitas, seu publica honestas etiam nuptiis impedimento est, earumque contractas dif-

(a) Tull. orat. pro Cluentio cap. VI. (b) 1. ad Cor. V. 1. (c) L. V. VIII. seq. C. de incest. nupt. (d) Cap. VIII. ex. de consang. & adfinit. (e) Trid. sess. XXIV. de ref. matrim. cap. 4.

dissolvit. Nomine publicae honestatis venit proximitas ex sponfalibus & ex matrimonio rato nec consummato contracta. Inhonestum nempe visum est, ut, dissolutis sponfalibus, aut matrimonio rato, cum sponsae aut uxoris consanguineis nuptias contraham. Jure Romano publica honestas inducta erat, sed in sponfalibus tantum inter filium & sponsam patris, & patrem & filii sponsam (a): nec ejus matrem, quam sponsam habui, licebat uxorem ducere (b). Inter has personas omnino nuptiae non consistebant, nec recte post Theophilum, Jac. Gothofredum aliosque summus Mazochius contendit, honestate tenus, non necessitate nuptias vetitas fuisse (c): idque praesertim, quod Tribonianus *rectius & jure facturos* eos ait, qui ab ejusmodi nuptiis abstinuerint (d). Sed *τὸ rectius* idem est ac recte: saepe enim in Latinis monumentis & libris juris comparitiva positive significant, cujus locutionis passim prostant exempla, sed unum tantum addo, quod rem conficere videtur. Eos qui sunt ultra fratres *melius* facere, ait Ulpianus (e), si querela inofficiosi abstineant, quod obtinere spem non habeant; ubi *melius* idem est ac bene. Per plura saecula etiam in publica honestate ecclesia principum leges secuta est: at post saeculum septimum in ecclesia impedimentum hoc ad septimum ex latere gradum extensum est: quod

L 2

jus

(a) L. XII. §. 1. 2. D. de ritu nuptiar. (b) L. XIV. §. 4. eod. (c) Mazoch. diatr. l. in can. LIV. conc. Illiberit. n. 15. addita dissert. Muscettulae.

(d) §. IX. Inst. de nuptiis. (e) L. I. D. de inofficioso.

jus habent falsae decretales (a). Sed post concilium Lateranense sub Innocentio III, quo consanguinitas & affinitas ex latere gradu quarto inclusae sunt, etiam publica honestas eo gradu coerceri coepit. Ex sponsalibus autem nascebatur honestas, si *pura & certa* essent, idest sine conditione & cum determinata persona, licet quavis ratione invalida, modo non essent nulla ex defectu consensus (b). Et tandem jure concilii Tridentini honestas ex sponsalibus quacumque ratione, nullis sublata est, ex validis primum gradum non excedit (c).

Inhabiles ad novas nuptias conjugati.

§. XVII. Inhabiles quoque sunt ad novas nuptias contrahendas, qui adhuc pristino conjugio adligantur: quod *ligaminis* impedimentum solent appellare. Certe rectae rationi & familiis convenientius est, ut una mulier uni tantum viro matrimonio jungatur (d). Et deinde sic institutum a Deo matrimonium est, ut duo sint in carne una (e): quae institutio polygamiae adversatur. Recepta quidem fuit pluralitas uxorum apud plerosque populos in primis Judaeos; & nunc obtinet etiam apud Orientales: quibus moribus receptis unam habenti uxorem alias ducere non est impedimento. Sed apud Romanos polygamia ferme ignota, eoque nomine Romani barbaros deridebant, quod Sallustius (f) testatur. Et ecclesia

(a) *Can. XV. C. 27. q. 2.* (b) *Cap. un. de sponsal. in 6.* (c) *Trid. sess. XXIV. de ref. matrim. cap. 3.*

(d) *Confer. Pufendorf. de jur. nat. & gent. lib. VI. cap. 1. §. 19.* (e) *Genes. II. 24.* (f) *Sallust. de bell. Jug.*

ſua primaevae institutioni innixa polygamiam ſemper damnavit, idque etiam eo nomine quod ſacramentum conjunctionis Chriſtum inter & eccleſiam, quod matrimonio continetur, pluribus acceptis uxoribus nullum eſt. Itaque apud chriſtianos non licet ſecundas nuptias contrahere, niſi ante de conjugis morte certo nuntio conſtet, quod in canonibus Baſilii comprehenſum eſt (a), & a Clemente III. confirmatum (b): atque ita abrogatum eſt jus civile, quo uxori militis, quae poſt quatuor annos nullum ſoſpitatis viri indicium haberet, & de deſiderio ſuo ducem conveniſſet, novas nuptias contrahere licebat (c).

Nuptiae inter ſervos jamdiu receptae.

§. XVIII. Nullae porro ſunt nuptiae, quas liberi cum ſervabus, quas putant eſſe liberas, contrahunt. Jure civili tantum cives Romani juſtas nuptias inibant (d): & ſervi, qui potius res quam homines cenſebantur, nuptias non contrahebant (e), ſed ex conſenſu dominorum ſibi alias conſervas conjungebant: quae ſervorum conjunctiones Romanis *contubernia* dicebantur, erantque conjugia naturalia effectibus civilibus deſtituta. Eccleſia in imperio nata longo tempore inter ſervos, aut inter ſervos & liberos legitimas nuptias non adgnovit, ſed tantum contubernia, matrimonia nempe, quae tantum jure naturali ſuſtinerentur, civilibus effecti-

(a) *Baſil. can. XXXI. & XXXVI.* (b) *Cap. XIX. ex. de ſponſalib.* (c) *L. VII. C. de repudiis.*

(d) *Pr. tit. inſi. de nuptiis, l. III. C. de inceſt. nuptiis.* (e) *L. XIV. §. 3. D. de ritu nuptiar., Vlpian. fragm. tit. V. §. 9.*

ctibus omnino destituta, eaque ex dominorum voluntate contrahi voluit (a), & aliter contracta fornicationis loco antiquis patribus erant (b). Hinc fervorum conjugia ecclesia per hierologiam non consecrabat, etsi de voluntate dominorum celebrarentur: nuptias enim non contubernia ad sacramenti dignitatem Christus elevavit. Sed lapsu temporis contubernia fervorum sensim in rata matrimonia abierunt, & invitis etiam dominis contracta sunt (c): quin etiam admissa sunt legitimae nuptiae hominis liberi cum serva, modo ille conjugis conditionem non ignorasset (d). Contigit tanta mutatio ex principiis christianae religionis, quae habent, apud Deum non esse personarum distinctionem (e). Quamquam haud scio, an verissima aliquin doctrina debuisset adeo extendi, ut civium ordines confunderet. Et ne aliquid matrimoniis fervorum deesset, eis etiam sacerdotalis benedictio accessit: quod in Occidente saeculo XII. inductum videtur (f), qua de re plura Carolus Blascus habet (g). Unum tantum ex antiqua disciplina superest, quod nullum est matrimonium, si quis liber ignorans contrahat cum serva, licet error qualitatis sit: quod jus ex canonibus sub nomine concilii apud Vermeriam Gratianus exsculpsit (h), & inde pontifices secuti sunt (i).

Rap-

(a) *Can. VIII. C. 29. q. 2.* (b) *Basiliius ep. canonic. ad Ampiloch. can. XLII.* (c) *Cap. I. ex. de conjugio servor.* (d) *Can. II. IV. & seq. C. 29. q. 2.*

(e) *Can. I. & H. eod.* (f) *Cit. cap. I. ex.* (g) *Blascus epist. in can. fraternitatis D. 34.* (h) *Grat. ad can. VI. C. 29. q. 2.* (i) *Cap. fin. ex. de conjugio servor.*

Raptus quando nuptias nullas facit.

§. XIX. Item nullum est matrimonium inter raptorem & raptam. Raptus est abductio puellae per vim aut dolum facta, siue ipsa invita sit, siue ipsa consentiat, parentibus invitis: vis enim etiam parentibus fieri intelligitur, dum puellae, quae sub patris potestate sunt, rapiuntur. Primis ecclesiae saeculis videntur constituisse nuptiae inter raptorem & raptam, si haec nulli esset desponsata, & inde ipsa ejusque parentes nuptiis consentirent: quod ex canonibus vulgo dictis apostolicis & Ancyranis constat (c). Inde Justinianus statuit, ne umquam rapta raptori matrimonio jungatur, etsi rapta ejusque parentes consentirent (d): atque ita perpetuo inhabiles ad nuptias inter se contrahendas raptor & rapta facti sunt: quod idem jus regum Francorum capitularia confirmarunt (e). Justum visum est, ei in perpetuum denegare uxorem, quam hostili more & nuptiis adverso sibi coniungere studuit. Hoc jus ecclesia Occidentalis & Orientalis post Justinianum amplexa est, & multis canonibus edixit, ut mulieres raptae nullatenus raptoribus suis nubant, etsi postmodum & ipsae raptae & parentes consentirent (f). Sed saeculo decimo in Occidente hoc impedimentum coepit relaxari, & tandem inter raptorem & raptam concessum fuit matrimonium, si rapta inde raptori consentiret, *si prior dissensio*, inquit Innocentius III. (g),
tran-

(a) Can. apostol. LXVI., conc. Ancyran. can. XI (b) L. un. C. de raptu virgin. (c) Capit. reg. Franc. lib. VI. cap. 69. (d) Can. XI. C. 36. q. 2. (e) Cap. VII. ex. de raptorib.

transeat postmodum in consensum. Civilis potestas eo tempore in Occidente in tot exiguos dominos & dynastas distracta impotens contra raptores evaserat. Quoniam vero quamdiu rapta in potestate raptoris existit, non videtur sponte in nuptias consentire; statuerunt Tridentini patres, tum valere inter raptorem & raptam nuptias, si haec a rapto re separata & in loco tuto & libero constituta illum in virum habere consenserit (a). Itaque ex praesenti disciplina raptor & rapta eo tantum tempore sunt inhabiles ad nuptias, quo rapta apud raptorem moratur.

Adulteri quibus casibus inhabiles ad nuptias.

§. XX. Porro inhabiles ad nuptias inter se contrahendas sunt adulter & adultera, si eorum alter innocentis conjugis vitae insidias paraverit ineundi cum adultero matrimonii causa, vel si post adulterium vivo adhuc alterius conjuge de futuris nuptiis sibi mutuo fidem dederint. Jure Romano inter adulterum & adulteram omnimodo nuptiae interdictae sunt (b). Quod jus per plura saecula servavit ecclesia (c). Ex qua juris civilis & ecclesiae veteris sententia scripsit Augustinus, *marito mortuo, cum quo verum connubium fuit, fieri verum connubium non potest, cum quo prius adulterium fuit* (d): quae verba negatione omissa perpetram apud Gratianum exhibentur (e). Generale jus, quo

(a) *Trid. sess. XXIV. de ref. matrim. cap. 6.* (b) *L. XI. §. 11. & L. XL. D. ad L. Juliam de adulter. novel. CXXXIV.* (c) *Confer. Anton. August. epitom. lib. XXVII. tit. 21.* (d) *August. lib. 1. de nupt. & concupisc. cap. 10.* (e) *Can. II, C. 31. q. 1.*

quo nullae inter adulterum & adulteram erant nuptiae, stetit usque ad Gratianum, cujus opera ad duos casus speciales restrictum est, si nempe adulteri in mortem defuncti conjugis aliquid machinati sint, & si vivente alterius conjugis sibi futurum matrimonium promiserint: quas restrictiones Gratianus ex male intellectis duobus canonibus, uno concilii Meldensis, quem ipse Triburiensi assignat, altero concilii Triburiensis commentus est (a). Synodus Meldensis adultero, qui spe contrahendi cum adultera conjugium, alterius conjugem occidit, sine ulla spe conjugii perpetuam irrogat poenitentiam (b): quod statutum est ex disciplina ejus aetatis, quae peccatoribus enormibus omnino denegabat nuptias: nec erat ad solas inter adulterum & adulteram nuptias restringendum: & praeterea nescio an homicidium conjugis ad ejus machinationem recte extendi poterat. Et synodus Triburiensis ex generali regula, quae inter adulterum & adulteram nullum faciebat matrimonium, peculiarum casum damnavit, matrimonium nempe cujusdam viri, qui alterius conjugis stuprum intulerat, juraveratque, se illam post mariti sui obitum uxorem ducturum (c). Fragmentum canonis, in quo species patribus proposita ejusque decisio continentur, prout apud Burchardum & Juonem existabat, omissa regula, Gratianus exscripsit: & hinc conclusit, per adulterium nullas esse nuptias in casu a.

Inst. jur. can. T. IV. M pa-

(a) *Grat. ad can. III. C. 31. q. 1.* (b) *Conc. Mel-dense an. 17CCCXLV. can. LXIX. ap. Grat. can. 5. eod.*

(c) *Conc. Triburiense an. 17CCCXCV. can. XL. ap. Grat. can. 4. eod.*

patribus Triburiensibus proposito. Inde recepto Gratiani opere ex canonibus ab eo relatis, quin & ex ipsius doctrina res canonica aestimari coepit, adeo ut ex hoc fonte etiam ipsi pontifices saperent. Ita invaluit nuptias inter adulterum & adulteram tum nullas esse, si eorum alter in mortem conjugis aliquid machinatus sit ad nefarias nuptias contrahendas, aut si matrimonium sibi promiserint demum post mortem conjugis contrahendum, secundum quam doctrinam pontifices responderunt (a).

Etiam homicidium aliquando nuptias nullas facit.

§. XXI. Item nec mulier illi nubere potest, qui maritum ejus interfecit, si & ipsa in mariti mortem conspiravit. Sane rescripsit Caelestinus III. non posse christianas mulieres iis Saracenis nubere, qui earum dolis & insidiis maritos occiderunt, etsi Saraceni viduarum studio ad fidem accesserint, quum tale damnum tali lucro ecclesia nolit compensare (b). Hoc jus ex concilii Triburiensis canone pontifex proposuit: at sub ejus concilii nomine nulla exstat regula, qua interdicator homicidae ducere mulierem, cujus maritum ipsa etiam conspirante morti dedit. Fortasse spectavit pontifex ad canonem quemdam concilii Meldensis, quem sub nomine concilii Triburiensis Gratianus retulit, ubi statuitur, ut si vir aut mulier admissio adulterio suum conjugem occiderint, sine ulla spe conjugii perpetuam agant poenitentiam (c). Quidquid vero hujus rei sit, si unius conjugis homicidium non in finem con-

con-

(a) Cap. III. & seqq. ex. de eo qui duxit in matrimon. (b) Cap. I. ex. de convers. infidel. (c) Can. V. C. 31. q. 1.

contrahendi matrimonii admittatur (a), aut quidem si in eum finem admissum sit, sed altero conjugé infcio (b), matrimonium non infirmatur.

Inter fideles & infideles nuptiae non sunt.

§. XXII. Nuptiis quoque jungi vetatur fidelis cum infideli, veluti ethnico & Judaeo: quod impedimentum *cultus disparitatem* nostri dicunt. Inde usque a primis saeculis nefas christianis fuit, nuptias cum ethnicis inire: quo nonnulli patres (c) apostoli sententiam referebant, quae viduis nuptias, sed *tantum in domino* permittit. Sane cum ethnicis nuptiae christianis officiis erant impedimento, & fidelem apostasiae obiciebant: quin ex sententia Cypriani fideles matrimonio ethnicis juncti membra Christi ethnicis prostituebant (d). Nec tantum cum ethnicis; verum etiam cum Judaeis & haereticis nuptias contrahere christiani vetabantur, nisi illi vel se christianos fieri, vel ad catholicam fidem transire promitterent (e). Ceterum si vetitas istas nuptias christiani attentarent, tantum violatae disciplinae rei erant, & poenitentiae subdebantur; at nuptiae consistebant, quod Chardonius multis probat (f). Quin in Africa Augustini aetate ethnico nubere non videbatur esse peccatum, & ipse Augustinus tenebat, nullum esse in novo testamento praeceptum, quo tales nuptiae interdiceren-

M 2

tunt

(a) *Cit. cap. I.* (b) *Cap. III. ex. de eo, qui duxit in matrim.* (c) *Tertull. de monag. cap. VII., Hieronym. ep. XI ad Ageruchiam.* (d) *Cypr. de lapsis.* (e) *Conc. Illiberit. can. XVI. seq., Agath. can. LXVII.* (f) *Chardon. histoire de mariage chap. XIII.*

tur (a). Primum edicto Valentiniani & Theodosii imperatorum nuptiae inter Judaeos & christianos irritae factae sunt (b): at nuptiae cum ethnicis & haereticis etiam sequentibus saeculis validae fuerunt. Cui sententiae non obstat lex Valentiniani & Valentis (c), qua nullum declaratur matrimonium, quod feminae provinciales cum barbaris & gentilibus contrahebant; gentiles enim in lege ista barbari sunt, qui apud Romanos militabant, quod Jac. Gothofredus demonstrat (d): atque ita imperatores tantum jus Romanum, quo inter cives & peregrinos non erant connubia, declararunt. Successu temporis apud Graecos synodus Trullana irritas decrevit inter fideles & haereticos contractas nuptias (e). Et in Occidente sensim consuetudine invaluit, ut fidelium cum infidelibus nuptiae non essent: quod jus saeculo XII jam receptum erat. At valent apud Latinos nuptiae cum haereticis, etsi illicitae & periculi plenae sint. Qui enim in individuum vitae consuetudinem possunt convenire, qui in fide erga Deum dissentiant (f).

Votum sollemne castitatis nuptias dirimit.

§. XXIII. Porro monachi & regulares omnes sollemni voto castitatis adstricti nuptias contrahere vetantur, & contractae nullae sunt. Per plura saecula matrimonia monachorum & virginum, quae se Deo dedicaverant, etsi sacrilega & nefaria essent

(a) August. de fide & operib. cap. XIX. (b) L. VI C. de Judaeis. (c) L. un. C. Th. de nupt. gentil.

(d) Jac. Gothofr. in cit. l. un. (e) Conc. Trull. can. LXXII. (f) Confer. Iuvenin de sacram. diff. X. q. 7. cap. 6. art. 3.

sent, non tamen erant invalida, quod Innocentii I., Augustini, Leonis M. aliorumque testimoniis constat (a). Et aperte Theodorus Cantuariensis, *si vir votum virginittis habens, adjungitur uxori, non dimittat uxorem, sed tribus annis poeniteat* (b). Sed sub finem saeculi sexti separari matrimonia monachorum, & monachi in monasterium ad poenitentiam revocari coeperunt: quam disciplinam Gregorius M., concilium Toletanum IV anno 1000 & Triburiense apno 1000 proponunt (c). Tandem in concilio Romano sub Innocentio II anno 1000 aperte irrita facta sunt matrimonia, quae canonici regulares & monachi contra profectam castitatem attentarent (d). Post hoc tempus distinctum est inter votum *sollemne* & *simplex castitatis*, receptumque votum sollemne irritas omnino facere nuptias contrahendas, simplex vero tantum eas impedire, non irritas facere. Cui disciplinae praecipuam causam Gratianus praebuit. Scilicet nesciens alias monachus iste loca Augustini & Theodori cum concilii Romani decreto, quae omnia in suum codicem retulerat (e), in concordiam revocare; de more suo distinxit inter votum *simplex* & *sollemne castitatis*, atque Augustinum & Theodorum intelligi debere de voto simplici, canonem vero Romanum de voto sollemni: atque ita docuit,

VQ-

(a) *Innocent. I. ep. ad Victricium Roimomag.*, *August. de bono viduitat. cap. X.* (b) *Theodor. in poenitentiali.* (c) *Gregor. M. lib. VI. ep. 9., conc. Tolet. IV can. 51., conc. Triburiense can. XXIII.* (d) *Conc. Roman. sub Innocentio II. can. VII.* (e) *Can. XII. & XLIII. & XL. C. 27. q. 1.*

votum simplex castitatis irritum non facere matrimonium, bene vero votum sollemne (a). Parum ad rem erat distinctio ista, apud antiquos enim, etiam castitas sollemni ratione Deo devota nullas nuptias non faciebat: nec unquam in veteribus monumentis vota sub epithetis *simplicis* & *sollemnis* distinguuntur. Et quae monumenta Gratiano contraria videbantur, re vera talia non erant; sed diversorum temporum sistebant disciplinam. Interim quod magni apud Latinos erat Gratianus, ab eo proposita doctrina recepta est, & secundum eam pontifices responderunt, inhabiles esse ad nuptias, qui voto sollemni castitatis, non qui simplici adfringerentur (b). Quia ex eadem doctrina in textum Theodori apud Gratianum (c) vox *simplex* irrepsit, ipso Theodoro & universa antiquitate invitis. Votum vero sollemne castitatis, quod inhabiles ad nuptias facit, illud esse intelligitur, quod sacro ordini inest, & quod in probata religione emissum est, cetera simplicia sunt, idque ad dirimendas controversias, quae hac de re frequentes erant, Bonifacius VIII. declaravit (d). Quod jus tandem Tridentini patres confirmarunt (e).

Et sacer ordo.

§. XXIV. Monachis & regularibus affines sunt sacris ordinibus initiati, qui inhabiles etiam facti sunt ad nuptias contrahendas. Antiqua est ecclesiae Latinae disciplina, quae majores clericos omnino

(a) *Gratian. ad cit. can. XLIII. & ad can. VIII. D.*
 27. (b) *Cap. IV. & seqq. ex. qui clerici vel voventes.*
 (c) *Can. III. D. 27.* (d) *Cap. un. de voto in 6.*
 (e) *Trid. sess. XXIV. de sacram. matrim. can. IX.*

no castos esse jubet, adeo ut nec eos uti permit-
tat uxoribus, quas ante ordinationem duxerint: at
in Oriente hypodiaconi, diaconi & presbyteri uxo-
ribus suis ante ordinationem ductis jungi non ve-
rantur, non vero permittuntur post susceptos ordi-
nes nuptias inire: qua de re alio loco fuse disse-
ruimus (a). Nullus interim ex veteribus cano-
nibus irritas dixit post ordinationem a sacerdo-
tibus & sacris ministris attentatas nuptias (b).
Sane antiqui canones tantum deponunt clericos,
qui nuptias ineunt, non vero separandos decernunt,
ut in conciliis Neocaesariensi, Carthaginensi V,
Arausicano I. (c) aliisque videre est, manifesto ju-
dicio nuptias sacrilegas, non irritas fuisse. Fortasse
in Occidente primum in concilio Lateranensi I. sub
Callisto II. anno CIOCCXIII irrita facta sunt a ma-
joribus clericis attentata matrimonia (d): idemque
statutum etiam est in concilio Remensi (e), quod
anno CIOCXLVIII sub Eugenio III. habitum est. Quod
si canon Lateranensis asserat, separari talia matri-
monia *juxta sacrorum canonum definitionem*, id de
jure, quod saeculo decimo & sequenti moribus in-
valuerat, Iuveninus interpretatur (f). Quoniam ve-
ro clerici majores etiam sollemni castitatis voto ad-
stringuntur; hinc dubitatum est inter theologos,
utrum ordo sacer matrimonium ex lege ecclesiasti-
ca, an ex voto nullum reddat: quae quidem quae-
stio

(a) *Part. I. cap. 34.* (b) *Confer. Iuvenin. de sacram. diff. X. q. 7. cap. 8. art. 4.* (c) *Conc. Neocaesar. can. I. Carthag. V. can. 3. Arausic. I. can. 23.* (d) *Conc. Lateran. I. can. 21.* (e) *Conc. Remense. can. VII.* (f) *Iuvenin. de sacram. differ. X. q. 7. cap. 8. art. 4.*

stio parum utilitatis habet: nec de ea finienda Tridentini patres curarunt.

Impedimenta impediencia ex nova disciplina.

§. XXV. Tandem impedimenta, quae matrimonium impediunt quidem, sed non dirimunt, paucis exponam. Ea ex praesenti disciplina sunt sponsalia, votum simplex castitatis, haeresis & ecclesiae interdictum. Et sponsalibus quidem ex sacris canonibus utrique sponso jus quaeritur ad futuras nuptias: & hinc nequit alter contra fidem datam cum altera contrahere matrimonium (a); verum si reipsa contrahatur, valet (b): prorsus eodem modo, quo ejusdem rei venditio posterior, si traditio interveniat, priore venditione potior est (c). Voto quoque simplicis castitatis impediuntur, sed non dirimuntur nuptiae (d). Est votum simplex castitatis, quod professio religionis probatae, vel sacri ordinis susceptio sollemne non fecit. Interim hujusmodi voto adstricti peccant graviter nuptias contrahentes, fidem enim Deo datam abrumpunt (e). Cum haereticis quoque vetantur catholici nuptias contrahere, contractae vero scelestae quidem sunt, sed in Occidente non dirimuntur: quae est antiqua ecclesiae disciplina. Et demum impediuntur nuptiae, si episcopus aut parochus interdicat alicui contrahere matrimonium cum aliqua ob impedimentum, quod subesse creditur, donec de impedimento constet

(a), *Can. L. C. 27. q. 2., cap. X. & XVII. ex. d. sponsalib.* (b) *Cap. XXXI. ex. de sponsalib.* (c) *L. XV. C. de rei vindicat.* (d) *Cap. III. & seqq. ex. qui clerici vel voventes.* (e) *Confer. S. Thomas in IV. sententiar. dist. 38. q. 1. art. 2.*

flet (a). Ceterum si interea matrimonium contrahatur, conjuges separantur, donec impedimenti cognitio finiatur (b). His addidit Benedictus XIV. doctrinae christianae ignorantiam; nec enim qui ignorant religionis principia, matrimonio jungendi sunt, donec ea didicerint (c). Scio passim alia numerari matrimonii impedimenta impedientia, veluti *tempus clausum*, quod appellant, denuntiationes matrimonio praemittendas, consensum parentum, atque hujus generis alia, sed nos sub alio adpectu ea recensuimus.

Olim plura alia impedimenta impedientia.

§. XXVI. In veteri disciplina erant plura alia impedimenta, quae matrimonium impedirent, veluti diversitas cultus, vitae monasticae professio, sacer ordo, publica poenitentia & spiritualis cognatio ex catechismo. Et quod spectat ad poenitentiam, apud Latinos a quarto saeculo publici poenitentes nec matrimonium contrahebant (d); nec antea contracto utebantur (e). Deliciae a nuptiis derivatae non bene cum poenitentia conveniebant. Quin eo se veritatis evasit Latinorum poenitentia, ut etiam post datam pacem reliquo vitae tempore nec ad veteres nuptias redire, nec novas contrahere li-

Inst. jur. can. T. IV. N ce-


(a) *Cap. I. & II. ex. de matrim. contrah. contrah. interd. eccles.* (b) *Cit. cap. II.* (c) *Benedict. XIV. bul. etsi minime XLII. §. 11. tom. 1. Bull.* (d) *Conc. Arelat. II. can. XXI.* (e) *Ambros. de poenit. lib. II. cap. 10.*

ceret: quod Siricius papa & Leo M. testantur (a). Quae disciplina usque ad saeculum septimum stetit: inde pro criminibus occultis desueta publica poenitentia, ne occultorum criminum rei debitis poenis eximerentur, quod publicae poenitentiae tribuebatur, in atrociora crimina transferri coepit, ut recte Morinus observat (b). Hinc parricidis, occidentibus episcopum, aut presbyterum, aut uxorem, aut maritum suum, adulteris, incestuosis, raptoribus, iisque, qui publicam poenitentiam egissent, omni vitae tempore nuptiae interdictae sunt. Qui mores usque ad seculum XII. steterunt: quo tempore quum desinere coepissent canonicae poenitentiae, sensim impedimenta canonica propter crimina desierunt, quamvis in aliquibus ecclesiis aliquid pristini moris supersit. Cognatio spiritualis ex catechismo olim nuptias impediebat, eaque contrahebatur per oblationem ad baptismi scrutinia (c), in quibus etiam competentibus symbolum & oratio dominica tradebantur: eratque sponsor catechismi a baptismi sponsore diversus, nisi necessitas urgeret (d). Sed tandem scrutiniis ipsi dationi baptismi annexis, cognatio ex catechismo desit, qua ratione ejus Tridentini patres non meminerunt.

Quoad

(a) *Siricius ep. I. cap. 5. ad Himer. Tarrac.*, *Leo M. ep. XCII. ad Rustic. Narbonens. edit. Quesnel.*

(b) *Morin. de poenit. lib. V. cap. 22.* (c) *Cap. V. ex. de cognat. spirit. cap. II. eod. in 6.* (d) *Can. C. D. 4. de consecrat.*

 Circa impedimenta matrimonii , quæ reges nostri constituerunt , hæc adnotanda sunt .

I. Jusserrat Guillelmus I. & Fridericus Imperator *Const. Reg. lib. 3. tit. 23.* „ut nullus Comes , Baro , vel Miles , vel quilibet alius , qui Baronias , Castra , vel Feuda in capite a rege tenuerat , vel ab alio quæ in quaternionibus Dohantæ inveniuntur in scriptis sine Regia permissione uxorem ducere audeat , maritare filias , sorores , aut nepotes vel quaslibet alias quas ipsi possent , vel debeant maritare , aut filias uxorare cum immobilibus , aut mobilibus . „ Sed Jacobus Rex *cap. 22.* libera reddidit matrimonia absq. licentia Regis , etiamsi in dotem dentur bona feudalia salvo servitio , quod pro ipso feudo curiæ debetur . „ hoc capitulo , ait Franciscus Testa , abrogatæ fuerunt leges Guillelmi I. & Friderici Imperatoris , quod quanta ratione factum sit ex eo intelligi potest , quod tradit Hugo Falcon- dus illius temporis scriptor in sua siciliæ historia „.

II. Federicus III. *cap. 54.* statuit „ non licere comitibus , Baronibus , feudatariis , & a Curia provisionem habentibus eorum filias in uxores dare alicui illorum , vel eorum filiis , qui fuerunt rebelles & hostes absq. licentia regis , vel mandato ; Comitatu , Baronia , Feudis , ac provisione ipsorum aliter ad Regis Curiam devolvendis „.

III. In *cap. 22.* Caroli V. Imperatoris vetitum est minoribus decem , & octo annorum nuptias contrahere sine voluntate Curatoris , aut duorum Propinquorum. Vide quæ diximus in not. ad §. 10. *cap. 26.*

IV. Regnans feliciter Ferdinandus III. die 29. Aprilis 1773. mandavit ut matrimonium inter raptorem , & raptam etiamsi consentientem tamquam clandestinum reputetur , & ambo subiciantur pœnis omnibus

constitutis per prægmaticam an. 1767. die 3. Augusti adversus matrimonium clandestinum. Vide dicta in notis ad §. 12. & 20 capitis 27.

V. Idem Rex die 26. Julii 1777. inter stuprantem, & defloratam puellam matrimonium vetuit sine Patris adsensu, sed absque violentia stuprantem ad matrimonium ineundum cogi non posse jussit alia lege sub die 15. Martii an. 1779. promulgata: cætera, quæ a Regibus nostris circa raptum, stuprum, aliaq. hujus generis crimina edita sunt adnotabimus, par. 3. hujus operis ubi de delictis, & pænis agetur.

C A P U T XXIX.

De relaxandis matrimonii impedimentis.

Impedimenta matrimonii olim principes relaxabant.

§. I. **Q**ui inhabiles ad matrimonium jure humano facti sunt, tum demum illud possunt contrahere, si legitima auctoritate venia impedimenti fiat, & lex impedimentum statuens in proposita specie relaxetur: quod jamdiu recepta voce *dispensatio* dicitur. Veteri jure impedimenta dirimentia jure humano statuta principum rescriptis relaxabantur, & vetitæ nuptiæ concedebantur, quod viri summi Jac. Gothofredus, Sirmondus & Launojus (a) docent. Sane inter tutorem & pupil-

(a) Gothofr. in *L.un.C.Th. si nuptiæ ex rescripto petantur*, Sirmond. in *ep. XXIV. lib. 5. Ennodii Ticinensis*, Launojus de *regia in matrim. potest. par. I. art. I. cap. II.*

pillam vetitae nuptiae rescripto principum concedi solebant (a): quo eodem rescripto concedebantur etiam nuptiae inter consobrinos, ut ex lege quadam Honorii & Theodosii constat (b). Idem etiam Ambrosius testatur his verbis, *sed dicis, alicui relaxatum*, hoc est rescripto principis cum consobrino concessum matrimonium: *verum hoc legi non praejudicat* (c). Similiter Symmachus (d), *per epistolam summis precibus obsecravit, ut impetrata sacri auctoritate rescripti, filia ejus fratris sui filio copuletur, quod multis esse concessum manifesta testantur exempla*. Exstant quoque apud Cassiodorum (e) binae formulae, quarum una rex Theodoricus legitimum facit conjugium cujusdam nobilis, qui contra legum statuta mulierem plebejam duxerat; altera concedit nuptias inter consobrinos. Impedimenta dirimentia tum legibus principum inducebantur, ac proinde principis erat legem prohibentem relaxare, & nuptias vetitas indulgere.

Quaer potestas inde transit ad ecclesiam.

§. II. Hac stante principum potestate, ecclesiae jus in permittendis vetitis nuptiis id profecto erat, ut poenitentias a canonibus propositas contra eos, qui vetitas nuptias contraxerant, aut in totum, aut pro parte remitteret, quod ex concilio Chalcedonensi & Gregorio M. constat (f). Sed temporis lapsu potestas conce-

(a) L. VII. C. de interdicto matrim. inter pupil.

(b) Cit. L. un. C. Th. eod. (c) Ambros. ep. LX. ad Paternum. (d) Symmach. lib. X. ep. 11. (e) Cassiodor. lib. VII. variar. cap. 6. n. 40. & 47. (f) Conc. Chalced. can. XVI., Greg. M. lib. I. ep. 33.

cedendi matrimonii inter eos, qui inhabiles jure humano sunt, ad ecclesiam transit: idque apud Latinos post saeculum XI. factum videtur, si vera observat Mariana (a): qui loquens de nuptiis Alfonsi regis Castellae cum Ultraca consanguinea sua, id habet, *nondum moribus receptum erat* (saeculo XI.); *ut pontificum Romanorum venia, lege agnationis soluta, conjugia inter cognatos coirent*. Postquam enim matrimonii sacramentum sibi subjecit contractum civilem, & veluti occupavit, sponte sua factum, ut ecclesia impedimenta relaxaret, ejusque juris fierent causae omnes matrimoniales. Exercet autem potestatem concedendi matrimonii inter inhabiles fere tantum summus pontifex: quando enim potestas ista ad ecclesiam devoluta est, negotia ferme omnia ecclesiastica in consistorio pontificis tractabantur. Interim aliquando jus est episcopo veniam concedendi super occulto impedimento dirimente, si nempe matrimonium bona fide ex facti vel juris ignorantia coram ecclesia contractum sit, & inde consummatum, & conjugum separatio sine offensione fieri non possit, nec apostolica indulgentia ob loci distantiam, aliamve causam facilis sit (b). Sed impedientia episcopi relaxant, exceptis duobus, nempe eo quod provenit ex sponsalibus, & voto simplici puroque castitatis perpetuae aut profitendi religionem (c).

Ra-

(a) Mariana lib. X. histor. cap. 8. (b) Conf. N Alexander lib. II. theol. de matrim. cap. 4. art. 13. reg. 10. (c) Confer. Bened. XIV. de synodo dioecesis lib. IX. cap. 2. n. 1.

*Rarior ex mente ecclesiae impedimentorum
relaxatio.*

§. III. Quemadmodum vero in aliis disciplinæ articulis raro admodum ecclesia a regulis patrum discedebat, ita etiam raro concedebat vetita matrimonia. Prima salus etiam a pontificibus habebatur, *rectam fidei regulam custodire*, & a constitutionibus patrum nullatenus *deviare*, ut Hormisdas summus pontifex loquitur (a). Et recte observat Christianus Lupus, primas indulgentias impedimentorum dirimentium non fuisse ab ecclesia datas ad nuptias postea contrahendas, sed potius fuisse *male contracti matrimoni toleratrices dispensationes* (b): idque secundum antiquam disciplinam, quæ facilius remittere solebat canonis jam infracti poenam, quam veniam dare ad canones intringendos. *Dispensationes prævias*, seu ad contrahendum futurum matrimonium, addit Lupus, *initiauit Alexander III, Innocentius III ac ejus successores viam ampliaverunt*. Praesertim vero invaluit facilitas relaxandi matrimonii impedimenta jure humano induta, postquam coeperant quidam jurisperiti docere, Romanum pontificem canonibus etiam conciliorum generalium non ligari. Interim Tridentini patres parce admodum impedimenta ad contrahendas nuptias relaxari voluerunt, facilius vero si jam contractae sint, modo bona fide & ignorantia, quæ omni culpa vacat, contractae sint (c): quo decreto antiquam disciplinam re-

sti-

(a) *Can. IX. C. 25. q. 1.* (b) *Lupus schol. in can. XI conc. Remensis tom. 4. oper. E. V.* (c) *Trid. sess. XXIV. de ref. matrim. cap. 5.*

stituiere voluerunt. At etiam post hoc decretum facilis etiam fuit vetitarum nuptiarum concessio. Ceterum non omnia impedimenta dirimentia jure humano inducta facile solent relaxari, sed tantum ea, quae sunt ex consanguinitate & adfinitate in remotioribus gradibus, spiritali & civili cognatione, publica honestate & crimine adulterii nulla conspiratione in mortem conjugis facta. Reliqua vero impedimenta, & praesertim ex voto sollemni castitatis aut sacri ordinis, raro admodum & ex causis gravioribus relaxantur.

Ex causa & gratis relaxanda impedimenta.

§. IV. Quò autem inter inhabiles recte nuptiae permittantur, legitima & proba causa necessaria est: nec enim sine causa permittit ecclesia patrum statuta relaxari. Et in specie de relaxandis matrimonii impedimentis Tridentini patres causam requirunt: *in contrahendis matrimoniis vel nulla omnino detur dispensatio, vel raro, idque ex causa & gratis concedatur. In secundo gradu numquam dispensetur, nisi inter magnos principes, & ob publicam causam (a).* Causae autem ad canones relaxandos ex sententia B. Bernardi (b) duae sunt, necessitas & utilitas: & utilitas quidem non privata, sed publica, quatenus majus bonum redundet in ecclesiam venia canonis concessa, quam ex ejusdem observantia. Verum pro concedendis nuptiis in remotioribus gradibus lateralis cognationis

(a) *Trid. sess. XXIV. de ref. matrim. cap. 5.* (b) *S. Bernardus lib. III. de considerat. cap. 10.*

nis & adfinitatis, in impedimentis cognationis spiritualis & publicae honestatis recte docent, non requiri publicam necessitatem aut utilitatem, sed sufficere privatam, qua bonum majus adsequuntur, vel majus malum evitant ipsi contra-hentes: quam sententiam ipsi Tridentini patres videntur confirmare. Latius enim productis cognationis & adfinitatis impedimentis, faciliores in gradibus remotioribus videntur esse debere nuptiarum concessiones. Quaecumque vero sit causa relaxationis impedimenti, ea tum recta erit, si omnia ex fide bona exponantur: nam si quid falsum expositum sit, aut si quid veri reticeatur, quo fideliter exposito venia verosimiliter aut facile data non esset, nullius momenti erit impedimenti relaxatio (a). Ceterum canonum & impedimentorum relaxationes gratis sunt concedendae. Et ubi turpis lucri suspicio subest, fatius est, nihil recipere, quam recepta in pios usus expendere.

Quibus relaxationes impedimentorum committuntur.

§. V. Jam vero matrimonii impedimenta per sedem apostolicam relaxantur vel ante vel post contractas nuptias; & quidem duplici ratione, vel palam pro utroque foro, vel clam pro foro tantum interno, quoties impedimentum occultum est, nec facile potest innotescere. Pro utroque foro impedimenta per *datariam*, sive *secretariam brevium*, ut appellantur, sed pro foro interno per *poenitentiariam* conceduntur. Et

Inst. jur. can. T. IV. O olim

(a) *Cap. XX. ex. de rescript., const. XLV. Benedicti XIV. tom. 1. Bullarii.*

olim quidem impedimentorum relaxationes in curia Romana causa cognita & causis probatis in forma gratiosa ut plurimum concedebantur, Pyrrho Corrado teste (a). At praxis ista admodum difficilis erat: quo factum, ut concilii Tridentini tempore sine ulla causarum notitia & probatione vetitas nuptias Romana curia concederet. Ergo concilii Tridentini decreto (b) nova praxis invaluit, qua impedimentorum relaxationes pro utroque foro ordinariis eorum, qui eas impetraverint, committuntur, ut auctoritate apostolica post causarum probationem vetitarum nuptiarum veniam faciant. Nomine ordinarii ex praxi Romanae curiae & episcopus & ejus vicarius generalis venit: & si vicario nominatim relaxationes demandentur, non poterit episcopus exsequi mandatum: quae praxis ex eo procul dubio invaluit, quod creditum est, jus relaxandi impedimenta matrimonium dirimentia uni tantum pontifici competere, nec posse episcopos eo jure uti. Item delegatio facta episcopo vel ejus officiali, sede vacante ad collegium ecclesiae cathedralis non devolvitur: quin nec solet Romana curia sede vacante hoc jus capituli vicario demandare; sed hoc casu episcopo viciniori, aut ejus vicario generali relaxationes committit: idque factum ajunt, quod summus pontifex vicarii capituli fidem dubiam habeat. At quae pro foro interno conceduntur relaxationes, uni sacerdoti ad confessiones

ex-

(a) *Pyrrhus Corrad. lib. VII. prax. dispensat. cap. 1. n. 1.* (b) *Trid. sess. XXII. de reform. cap. 5.*

excipiendas deputato, qui sit in theologia magister vel sacrorum canonum doctor, per oratorem eligendo committuntur (a).

C A P U T XXX.

De divortiis.

Definitio divortii.

§. I. **N**omine *divortii* jure Romano venit legitima vinculi matrimonialis solutio vivente utroque conjugē facta, qua peracta alias nuptias inire licet: dictumque est divortium vel a diversitate mentium, vel quia in diversas partes eunt, qui dirimunt matrimonium (b). Alio nomine nuptiarum solutio *repudium* dicebatur, eoque repudium distabat a divortio, quod hoc inter virum & uxorem fieri dicebatur, repudium vero & sponsae & uxori mittebatur. *Divortium*, inquit Modestinus jurisconsultus (c), *inter virum & uxorem fieri dicitur: repudium vero sponsae remitti videtur, quod in uxoris personam non absurde cadit*. Sed jure canonico amplior est divortii significatio, eo enim non solum intelligitur ipsa vinculi matrimonialis jam contracti solutio, verum etiam separatio tori & habitationis ad tempus vel in perpetuum, quae integro matrimonii vinculo contingit. Quapropter causae divortii cum causis,

O 2

qui.

(a) Confer. *Espen. par. I. tit. 23. cap. 3.* (b) *L. II. D. de divortiis.* (c) *L. CI. §. I. D. de V. S.*

quibus initio matrimonium nullum est, non confundendae: etenim ubi conjuges divertunt, matrimonium jam contractum est: contra vero si nuptiae inter inhabiles celebratae separentur, nullum divortium intercedit, sed tantum declaratur, initio nullum fuisse matrimonium. Veteres multas divortii causas, pauciora vero impedimenta habuerunt, contra quam quod praesentibus moribus receptum est.

Matrimonium jure naturae individuum.

§. II. Matrimonium origine & natura sua videtur esse societas individua inter maritum & uxorem, quae ferme sola morte alterutrius dividatur. Sane Deus dum hanc conjunctionem instituit, mulierem ex costa viri condidit, eamque virum in adiutorium dedit, & ut duo in una carne essent (a), hoc est arcta & perpetua adfinitate conjuncti. Cui institutioni natura ipsa matrimonii consonat. Contrahitur matrimonium ad liberorum generationem & educationem. Mulieres autem ferme iterum concipere solent, longe antequam jam nati filii in eo statu sint, ut propria quadra vivere possint. Quo fit, ut vir individua vitae consuetudine cum muliere vivere debeat, quousque filii omnes majores sint, nec amplius institutione & alimentis parentum indigeant. Et in hoc societas matrimonialis distat a brutorum conjunctionibus, quae vel statim post concubitum separantur, vel aliquo tempore post natos filios persistunt, prout sola mater capax vel incapax est ad natos alendos. Nec
ex

(a) Genes. II. 21. seqq.

ex principiis rectae rationis nuptiae inter homines videntur dissociari posse, postquam nati filii perfectae aetatis sint; & male profecto adfirmat Jo. Lokius (a), ex naturae institutis & fine matrimonii nihil esse, quo conjuges post perfectam filiorum aetatem simul stare debeant: etenim qui longo tempore in individua & dulci vitae consuetudine vixerunt, & reliquo tempore ad mutuam auxilium erunt individui, praesertim si familiae institutae sint, & filii apud parentes diu morentur. Porro nec audiendus Jo. Barbeyracius (b), qui docet, ex naturae scitis posse conjuges pactis conventis tempus, quo societas matrimonialis stare debeat, definire, modo quacumque ratione filiorum educationi consulant; ex institutis enim naturae est, ut ipsi parentes suos liberos instituant: quo spectat lac, quo statim a partu ubera matris turgent, & tener parentum in filios amor: quod mirum est, Barbeyracium non observasse. Ceterum si potiora & primaria capita obligationis nuptiarum violentur, posse eas jure naturali solvi, multi, in primis Pufendorffius (c), docent.

Divortia apud gentes recepta.

§. III. Quidquid vero sit de jure naturae & prima nuptiarum institutione, certe moribus & legibus populorum admissa & probata fuerunt divortia. In primis Hebraei, qua erant cordis du-

(a) Lokius *traité du gouvernement civil* chap. VII.

(b) Barbeyrac. *not. Gallic. in Pufendorff. de jure nat. & gent. lib. VI. cap. 1. §. 20.* (c) Pufendorff. *loc. cit. §. 21. seq.*

duritie & animi levitate, a Dei institutione desciverunt, & divortia ex quacumque causa etiam levissima usurparunt. Etsi enim eorum magistri in doctrina non convenirent (alii enim docebant, non licere ab uxore divertere, nisi ob *rem turpem*, alii vero tenebant, quamvis causam divortio sufficere); tamen in praxi omnes conveniebant, & ob quascumque causas divertebant, quod Jo. Clericus observat (a). Qua in re tanta pervicacia fuerunt, ut Deus eorum duritiei cesserit, & receptos mores tolerarit: nec enim verum est, Mosem edita lege Judaeis divortia concessisse, quod recte Buxtorfius (b) probat. Similiter apud Graecos in primis Athenienses divortia permessa erant. Etenim viri Athenis ex futilibus argumentis dimittebant uxores: idemque jus ob justas causas etiam uxoribus datum erat (c). Nec dissimilia fuerunt Romanorum instituta. *Dirimitur matrimonium*, inquit Julius Paulus (d), *divortio, morte, captivitate, vel alia contingente servitute utrius eorum*. Semper licuit Romae maritis ex justis causis uxorem dimittere: at quousque steterunt antiqui mores, vix divortii exemplum reperitur: primusque Sp. Carvilius Ruga an. ab V. C. 1088 uxorem ejecit religionis causa, quod apud censores juraverat, se liberorum quaerendorum gratia uxorem habiturum, ea vero, quam habebat ipsi dilectissima,

(a) Cleric. in Deuteron. XXIV. v. 1. (b) Buxtorf. de sponsal. & divortiis part. III. (c) Confer. Potter. in archaeol. lib. IV. cap. 12. (d) L. I. de divortiis.

ma, sterilis erat. Inde paulatim corruptis moribus Romani vel ex levissima aut nulla causa divortia usurparunt: qua eadem licentia mulieres donatae sunt (a). Quin sine ira & animi offensa nuptiae solvebantur, idque *bona gratia* fieri dicebatur. Adeo autem in pejus degenerarunt Romani, ut nulla femina repudio erubesceret, & quaedam nobiles & illustres feminae non consulum, sed maritorum numero annos computarent suos (b). Et mirum & incredibile videtur, quod de Thelesina Martialis (c) habet, eam spatio unius mensis decimo viro nupsisse.

Matrimonium jure evangelico individuum.

§. IV. Verum enimvero quicumque fuerint Judaeorum & aliarum gentium mores, certe jure evangelico divortia interdicta sunt. Christus enim nihil moratus libellum repudii, quem Moyses Judaeis permisit, immo addens ob cordis duritiem illis fuisse permittum; docuit origine & natura sua matrimonium esse individuum & perpetuam vitae consuetudinem; & hinc moechari eum, qui dimiserit uxorem suam, *εἰ μὴ ἐπὶ πορνείᾳ* nisi ob fornicationem (*πορνείας λόγος πορνείας* extra rationem fornicationis, ut est apud Matthaeum V. 32.), & aliam duxerit; moecharique etiam eum, qui duxerit dimissam: Ita rem Matthaeus narrat, proponitque simul regulam & exceptionem (d). Marcus autem & Lucas (e)

re-

(a) Confer. Heinec. in append. ad lib. I. antiq. Roman. cap. 1. §. 45. seq. (b) Seneca de benef. lib. III. cap. 16. (c) Martialis epigr. VI. 7. (d) Matth. XIX. v. 3. & seq. (e) Marc. X. v. 2. seq. Luc. XVI. v. 18.

regulam tantum proponunt, nulla exceptionis facta mentione. Sed novum non est, aliud exemplum per aliud declarari, & in uno tradi regulam, in alio etiam addi exceptionem. Porro Marcus videtur loqui extra casum τῆς πορνείας, ait enim, quod si quis *dimiserit uxorem suam, & aliam duxerit, adulterium committit super eam*, hoc est in illam, seu in ejus injuriam. Quod si factum esset ex causa scortationis, non sane diceretur in illam, idest in ejus injuriam factum: quandoque prius ipsa causam praebuisset, & jus super viri corpus amisisset. Magistri doctrinam inde inculcavit apostolus: qui viri morte ab ejus lege uxorem scribit liberari (a). Qua doctrina non videtur Christus novam legem condidisse, sed potius nuptias ad primam originem revocasse, ac ita docuisse, omne matrimonium esse individuum.

Notio fornicationis.

§. V. Itaque per legem evangelicam interdicta sunt divortia, tantumque ex causa τῆς πορνείας aliqua separatio conceditur. Videndum ergo, quae τῆς πορνείας notio sit, & cujus generis est a Christo concessa separatio. Et quod spectat ad primum, plerique ex patribus τῆς πορνείας fornicationis vocem stricte interpretati sunt, ut tantum veram & carnalem fornicationem, seu adulterium comprehendat: quam sententiam Tertullianus, Lactantius, Basilus, Hieronymus, Chrysostomus aliique (b) tenent. Alii vero laxius forni-

(a) *Ad Rom. VII. v. 2. seq.* (b) *Confer. Binghamus orig. eccles. lib. XXII. cap. 5. §. 1.*

nicationem accipiunt, ut etiam spirituales for-
 nicationem, hoc est idololatriam, apostasiam, &
 id genus alia crimina includat, quo sensu Her-
 mes Pastor (a) fornicationem accepit, eamque
 sententiam aliquando etiam Augustinus (b) fo-
 vit. Ex recentioribus Buxtorfius (c) opinatur,
 Christum verbis *λόγος πορνείας* spectasse verba Mo-
 sis, si in ea (uxore) deprehenderit rem nudita-
 tis, quo nomine venit & ipse impudicitiae actus
 & actiones & mores, vel gestus, ex quibus vio-
 latae pudicitiae praesumptiones petuntur. Quid-
 quid hujus rei sit, certe vox *πορνεία* generatim
 fornicationem denotat. Nec videtur Christus uni-
 ce ad adulterium spectasse; nam quum hoc cri-
 men morte apud Judaeos puniretur, nulla esse
 poterat quaestio, an ob adulterium nuptiae sol-
 verentur. Observatione quoque dignum est, non
 esse idem *πορνείαν* & *λόγον πορνείας*. Etenim *λόγος*
 pro ratione rei vel conditione accipitur. Quo
 sensu accepto vocabulo, separationem Christus
 videtur concessisse ob causam, quae similis adul-
 terio, ejusdemque cum eo naturae sit, vel, quod
 perinde est, quae cum fine matrimonii non mi-
 nus pugnet, quam adulterium. Interim eccle-
 siae patres fere ad solam adulterii causam for-
 nicationis notionem restringunt: adulterio enim
 quam maxime infringitur fides maritalis, & prae-
 terea eo tempore scripserunt, quo adulteri fere
 morte non puniebantur.

Inst. jur. can. T. IV.

P

Multi

(a) *Germ. Past. lib. II. mand. 4.* (b) *August. de
 serm. dom. in monte lib. I. cap. 16. & lib. I. retract.
 cap. 19.* (c) *Buxtorf. de sponsal. & divort. par. III.*

*Multi olim docebant, nec per fornicationem
nuptias solvi.*

§. VI. Nunc videndum, an separatio conjugum propter fornicationem a Christo concessa, tantum ex parte sit, & salvo matrimonii vinculo solam vitae consuetudinem abrumpat, an potius totalis, quae etiam concedat novas nuptias. Augustinus quaestionem de divortiis *obscurissimam & implicatissimam* dixit (a). Et cardinalis Cajetanus adserit, evangelii verba in causa fornicationis pleno divortio favere (b). Ambrosius quoque Catharinus re utrinque expensa tandem concludit, nec ex apostolo posse colligi, non licere in causa fornicationis aliud inire matrimonium (c). Certe antiqua ecclesia abiit in diversa, nec hodie ea de re inter Latinam & Graecam ecclesiam convenit. Et multi quidem docebant, conjugii christiani vinculum ne per adulterium quidem dissolvi, sed tantum vitae consuetudinem perpetuo abrumpi. Sane Origenes contra scripturam esse aiebat, ut aliqua viro priore vivente nuberet (d). Et Hieronymus similiter docet, dimissam ob fornicationem conjugem innuptam manere debere (e): quae eadem Innocentii papae doctrina fuit (f). Sino-
dus Milevitana rem promovente Augustino, qui
con.

(a) *August. de adulterin. conjugii lib. I. cap. 25.*

(b) *Cajet. in Matth. cap. V. & XIX.* (c) *Catharin. tract. de matrim.* (d) *Origen. hom. VII. in Matth.* (e) *Hieronym. ep. XXX. ad Ocean. & ep. CXLVII. ad Amandum.* (f) *Innoc. I. ep. ad Exuper. cap. VI.*

conventui intererat, individuum matrimonii nexum, nec adulterio solubilem, veluti *evangelicam & apostolicam doctrinam* proposuit, contemtores poenitentiae subjecit, & legem imperialem ea de re petendam decrevit (a). Quaesita lex est, sed non impetrata. In primis vero Augustinus individuum matrimonii nexum nec adulterio solvi multis locis propugnavit (b) & rationibus a scriptura desumptis & a conjugii sacramento, quo unitas Christum inter & ecclesiam exprimitur; sed vir sanctus sententiam suam veluti probabiliorem, non ut evangelicam proposuit. Sequentibus saeculis eandem doctrinam multi tenuerunt, eamque synodus Forojulensis anno 1000. proponit (c), & Hincmarus Remensis multis adstruit (d).

Contra alii per adulterium nuptias solvebant.

§. VII. Contra multi ex patribus & synodis particularibus existimarunt, per adulterium dirimi ipsum matrimonii vinculum, & licere sive viro, sive mulieri, aut tantum viro conjugem peccantem dimittere, & novas nuptias contrahere. Sane tempore Tertulliani christianae mulieres *divortio vel mariti excessu* secundas nuptias contrahebant (e). Et synodus Arelatensis I. de adolescentibus fidelibus, qui uxores suas in adul-

P 2

te-

(a) *Conc. Milevitan. can. XVII. in C. Afric. can. CII.* (b) *August. de adulterin. conjug. & de bono conjug. cap. VII. & lib. I. de serm. domini in monte. cap. XV.* (c) *Conc. Foroiul. can. X.* (d) *Hinc. Remensis ep. XXXVII. cap. 8.* (e) *Tertull. lib. II. ad xor. cap. I.*

terio deprehendunt, statuit, ut, in quantum potest, consilium eis detur, ne viventibus uxoribus suis, licet adulteris, alias accipiant (a). Fortasse vero patres tantum consulunt, quod ea aetate secundis nuptiis quid impuritatis inesse credebatur, non quod tenebant, per adulterium, matrimonii vinculum non solvi. Similiter synodus Venetica an. CCCCLXV ob fornicationem mulieris viro permittit novas nuptias (b). Ex patribus Lactantius, Epiphanius, Basilus (c) alii-que luculenter testantur, per adulterium solutas nuptias, & novas contrahi licuisse. Et auctor commentariorum in epistolas Pauli, qui sub nomine Ambrosii delitescit, docet, soli viro licere ducere uxorem, si dimiserit uxorem peccantem (d). Theodorus quoque Cantuariensis (e), Cujus uxor fornicatur, licet eam dimittere, & aliam ducere. Eadem praxis deinceps etiam, continuavit, aperte enim Zacharias summus pontifex (f), concilia Compendiense (g), Vermeriense (h) & regum Francorum capitularia (i) alii-que ante saeculum decimum canones post alterius conjugis adulterium novas nuptias concedunt. Quibus aliisque monumentis ductus Christianus Lupus docuit, in veteri ecclesia probabile

(a) Conc. Arelat. I. can. X. (b) Conc. Venetic. can. III. (c) Lactant. lib. VI. divin. instit. cap. 23., Epiphani. haer. LIX. n. 4., Basil. can. IX. ad Amphilo-
 ch. (d) Ambros. in 1. ad Cor. VII. (e) Theodor. capit. CXVI. (f) Can. XXIII. C. 32. q. 7. (g) Can. XIX. C. 32. q. 7. (h) Can. XXIV. eod. (i) Cap. reg. Francor. lib. V. cap. 19.

bile fuisse, per adulterium ipsum conjugii vinculum abrumpi (a).

Etiam ob alias causas olim nuptiae solutae.

§. VIII. Sed non tantum ob adulterium mediis saeculis in ecclesia Romana & multis Occidentis ecclesiis separabatur consummatum matrimonium; verum etiam si quod aliud impedimentum dirimens, aut alia causa, quae cohabitationem impediret, supervenisset. Et profecto Gregorius papa II. seu potius III. de muliere, quae infirmitate correpta non amplius viro suo commisceri poterat, respondit Bonifacio episcopo Moguntino ex tum recepta in ecclesia Romana doctrina, secundum quam Bonifacius pontificem consuluerat, bonum quidem esse, si maritus coelebs viveret, *sed quia hoc magnorum est, ille, qui se non poterit continere, nubat magis; non tamen subsidii opem subtrahat ab illa, quam infirmitas praepedit, non detestabilis culpa, excludit* (b). Similiter in concilio Compendiensi anno 1000. viro leproso permittitur dare comitum mulieri sanae, ut si ipsa velit, maritum accipiat (c). Et in concilio Vermerienti anno 1000. permittitur marito, qui se defendendo morti dedit adgressorem, cum quo in mariti mortem uxor conspiraverat, illam dimittere & aliam accipere (d). Veluti ipsius naturae legem auctor quidam magni in Europa nominis
habet.

(a) *Christ. Lupus in dissert. de opinione probabili cap. V. tom. II. oper. E. V.* (b) *Can. XVIII. C. 32. q. 7.* (c) *Conc. Compend. can. XVI.* (d) *Conc. Vermeriense can. V.*

habet Gregorii responsionem (a). At satius est dicere, multas olim ecclesias divortia & novas nuptias ob varias causas concessisse, quod putarent, ea evangelio non adversari. Nimirum de conjugii & divortii quaestionem esse obscurissimam & plane a se non posse explicari Augustinus professus est. Et si Gratianus Gregorii sententiam veluti *sacris canonibus*, immo & *evangelicae & apostolicae doctrinae penitus adversam* traduxit (b), negotium istud potius ex sui temporis doctrina, quam ex antiquis moribus videtur aestimasse.

Leges christianorum principum de divortiiis.

§. IX. Atque haec fuit de divortii antiqua ecclesiae disciplina. Quod vero spectat ad leges christianorum principum, eae passim repudia concesserunt. In primis Constantinus M. parrior fuit: etenim permisit mulieri dimittere virum homicidam, veneficum vel sepulchrorum violatorem; marito vero dimittere uxorem moecham, veneficam, vel lenam (c): qua in re Constantinus videtur cessisse corruptis moribus (videbat enim sub initium non posse omnia emendari), atque ita mulieri mittere repudium marito adultero non permisit. At sequentes imperatores divortiorum causas ampliarent, eaque ex gravibus criminibus jure fieri concesserunt: injusta vero divortia, quae nimirum fierent propter mores, vel propter leves causas ex consen-

(a) *Voltaire histoire générale chap. CXXVI.*

(b) *Grat. ad cit. can. XVIII.* (c) *L. I. C. Th. de repud.*

sensu modo poenis affecerunt, modo permiserunt impune, quod ex legibus Honorii, Theodosii junioris & Anastasii constat (a). Et Justinianus legitimis repudii causis alias novas addidit (b): quin non solum per occasionem rationabilem, veluti monachatum, captivitatem, ultra quinquennium & longam viri expeditionem; verum etiam mutuo consensu divertendi copiam fecit (c). Tandem vero anno DCXL. eliminatis divortiis ex consensu, causas divertendi ad quaedam magna crimina restrinxit (d). Post Justinianum similes gentium christianarum leges & in Oriente & Occidente latae sunt, quas Seldenus (e) enarrat. Interim leges istae, quae consensu vel ex levioribus vitiis repudia concedunt, evangelio adversantur, videnturque principes ad evitandos tristes eventus hujusmodi divortia tolerasse. Sed an etiam leges, quae ob gravia crimina mitti repudia permittunt, juri divino adversentur, non una est virorum doctissimorum sententia. Etenim Andreas Alciatus & Joannes Launojus (f) docent, imperatores nomen fornicationis, quo Christus apud Matthaeum usus est, latius pro omni gravi crimine accepisse, & ex hac sententia suas dedisse leges. Interim non defuerunt patres, qui jure fori non jure

(a) *L. II. C.Th. de repud., L.VIII. & seq. C. Just. eod.* (b) *L. X. seq. C. eod.* (c) *Novel. XXII.*

(d) *Novel. CXVII. cap. 8. & 9.* (e) *Seldenus uxor. Hebr. lib. III. cap. 29. seqq.* (f) *Alciatus lib. VI. pererg. cap. 20., Launojus de reg. in matrim. potest. par. III. art. 1. cap. 5.*

jure poli etiam ob adulterium concessa divortia statuebant, quorum numero Augustinus fuit (a). Etiam Chrysostomus (b) leges externas divortia facile concedentes damnat; sed tempore Chrysostomi tantum Constantini lex lata erat, ut proinde is leges ethnicas, quae suo tempore revixerant, damnare videatur.

Latinae ecclesiae de divortiis firmata doctrina.

§. X. Sed quae tandiu fluctuaverat divortiorum disciplina, tandem apud Latinos certior evasit; receptumque, ut vivente utroque conjugis nulla ex causa ne adulterio quidem nuptiae solvantur, & ita saeculi leges ecclesiae auctoritati cesserunt. Quae doctrina post saeculum X Augustini praecipue auctoritate videtur invaluisse: etenim Ivo Carnotensis & primi scholastici (c) uni Augustino ferme innixi veluti certum docuerunt, nec adulterio nuptias dissolvi, contra quam ipse Augustinus fecerat, qui quaestionem de divortiis difficillimam habuit. Inde pontifices in primis Alexander III. & Innocentius III. rem perfecerunt, qui in responsis suis, nec per adulterium solvi conjugium professi sunt (d): tantaeque firmitatis rationem Innocentius a conjugii sacramento arcessit, hoc est a perpetua inter Christum & ecclesiam conjunctione, cujus nuptiae sacramentum sunt.

Quin

(a) *August. lib. L. homil. 49.* (b) *Chrysost. in 1. ad Cor. VII.* (c) *Ivo Carnotens. ep. CXXV. ad Diambert., Magister Sententiar. in IV. dist. 31.*

(d) *Alexander III. in append. conc. Lateranens. par. VI. cap. 25., Innoc. III. cap. VII. ex. de divort.*

Quin idem pontifex eo etiam Christi verba traduxit, & ex Christi exceptione regulam fecit, *quicumque dimiserit uxorem suam ob fornicationem, & aliam duxerit, fornicatur* (a): quod non jure factum est. Et tandem Tridentini patres anathema iis dixere, qui asserunt, ecclesiam errare, dum docuit & docet, secundum evangelicam & apostolicam doctrinam per adulterium matrimonii vinculum non posse dissolvi (b). Interim Graeca & reliquae Orientales ecclesiae perseverant in antiquis institutis, atque ita propter adulterium & alias probatas causas divortia & novas nuptias concedunt (c). Ceterum hodierna ecclesiae Latinae doctrina ad fidem non videtur pertinere: quod Jo. Launojus (d) pluribus adstruit. Et profecto Tridentini patres non damnarunt sententiam, quae habet, per adulterium solvi matrimonium, sed potius anathema iis dixerunt, qui erroris accusabant ecclesiam, quod doceret, nec adulterio solvi matrimonium: idque fecerunt patres Venetis legatis intercedentibus, ne Orientis ecclesiae, & praesertim christiani in insulis Venetorum imperio subiectis offenderentur, quod cardinalis Pallavicinus (e) narrat.

Matrimonium legitimum, quando solvitur.

§. XI. Illud vero semper certum in ecclesia
Instit. jur. can. T. IV. Q ha-

(a) *Cap. VIII. ex. eod.* (b) *Trid. sess. XXV. de sacram. matrim. can. 7.* (c) *Confer. Renaudotius lib. VI. de la perpetuité de la foi chap. 7.* (d) *Launojus de reg. in matrim. potest. par. III. art. 1. cap. 5.*

(e) *Pallavic. hist. conc. Trid. lib. XXII. cap. 4.*

habitu est, matrimonium legitimum, hoc est inter infideles contractum, omnino dirimi per alterius conjugis ad fidem conversionem, quo casu infidelis discedat. Quod jus apostolus proposuit: *quod si infidelis discedit, discedat; non enim servituti subjectus est frater aut soror in hujusmodi (a)*. Id autem a se edicere, non a domino accepisse, apostolus profitetur, non quia in hac specie divortium jure divino non admittatur (per apostolos loquebatur spiritus sanctus); sed quod aperte eam legem in evangelio non invenisset (b). Nec tantum solvitur matrimonium, si infidelis discedat, verum etiam si ille quidem morari cum fidei velit, sed in religionis injuriam, & peccandi praebeat occasionem, quod Chrysostomus, Augustinus & pontifices (c) tenent. Minus profecto est, infidelem discedere, quam cum conjugē morari, eumque ad peccatum cogere vel invitare. Quod si conjugi ad Christum converso infidelis molestus non sit, fidei apostolus divortium non concedit, idque ad illius salutem procurandam (d). Nullus certe doctor valere tantum potest, quantum uxor vel maritus. Et si patres concilii IV. Toletani generatim decreverint, discedere christianas mulieres a maritis Judaeis, si isti admoniti ad Christum transire noluerint (e); id videtur factum

(a) 1. ad Cor. VII. 15. (b) Theodoret. in cit. apostoli loc. (c) Can. IV. & seq. C. 28. q. 1, cap. VII. ex de divort. (d) 1. ad Cor. VII. 12. seq. Confer. Franc. Florens in caus. XXVIII. q. 1. (e) Conc. Tolet. IV. can. LXII.

Etum, quod Judaei in Hispania tenaciores suae religionis evaserant, nec spes ulla suberat, ut per christianas mulieres fervarentur. Separatis autem conjugibus per alterius conversionem, si postea infidelis etiam convertatur, antequam prior novas nuptias inierit, matrimonium redintegrabitur (a). Quod si ambo conjuges ab initio fideles sint, & alter in apostasiam incidat, conjugii vinculum non solvitur, quod Innocentius III. docet (b).

Matrimonium ratum solvitur monastica professione.

§. XII. Porro matrimonium ratum, sed non consummatum etiam pleno divortio solvitur per alterius conjugis castitatis votum, etiam altero invito in aliqua probata religione emissum. Saeculo septimo doctrina ista etiam in Occidente recepta erat: *desponsatam puellam*, inquit Theodorus Cantuariensis, (c), *non licet parentibus tradere alteri, tamen ad monasterium licet*: quod capitulum apud Gratianum perperam Eusebio papae tribuitur (d). Et circumferuntur etiam antiquiora exempla, Theclae, Caeciliae, Alexii & Macarii, qui a nuptiis ad continentiam dicuntur transiisse. Inde Gratianus Alexii & Macarii exemplis & aliis auctoritatibus probavit, posse desponsos, conjuges nimirum, qui rei uxoriae nondum vacarunt, etiam altera parte inconsulta servare continentiam (e). At collectorem hunc ex adverso angebant aliae, quas congefferat,

Q 2

au-

(a) *Cap. VIII. ex. eod.* (b) *Cap. VII. ex. eod.*

(c) *Theodor. cap. CII.* (d) *Can. XXVII. C. 27.*

q. 2. (e) *Gratian post can. XXVI. C. 27. q. 2.*

auſtoritates, quibus edicitur, ſine alterius conſenſu non poſſe conjugatos continentes eſſe (d). Itaque ad conciliationem docuit, ante corporum conjunctionem non eſſe matrimonium (b): in quo turpiter erravit. Quidquid vero ſit de Gratiano, inde pontifices Alexander III. & Innocentius III. reſponderunt, matrimonium ratum etiam ratione vinculi ſolvi per alterius conjugis monaſticam profeſſionem etiam altero invito factam, & conjugis relicto novas nuptias contrahere licere (c). Obſervat autem vir doctus Carolus Blaſcus (d), ante Alexandrum III. matrimonium ratum fuiſſe diſſolutum etiam per continentiam ſponſi extra monaſterium: quae obſervatio vera eſt. At inde ad majoris caſtitaſis cuſtodiam placuit, tantum per ſollemnem caſtitaſis profeſſionem in aliqua probata religione ratum matrimonium ſolvi. Hinc quo conjuges de meliori propoſito delibarent, poſt contractas nuptias non ſtatim matrimonio uti coguntur, ſed habent duos meſes ad monaſticam vitam eligendam (e).

Conſummato matrimonio quis effectus voti caſtitaſis.

§. XII. Verum enimvero ſi matrimonium etiam conſummatum fuerit, tum per monaſticam etiam utriuſque conjugis profeſſionem vinculum non ſolvitur. Et ſi Juſtinianus edita lege ſtatuit, ut etiam altero conjugis invito poſſet conjugatus monaſticam vitam proſiteri, eaque profeſ-

(a) *Can. XIX. & ſeqq eod.* (b) *Gratian. poſt can. XXVIII.* (c) *Cap. II. & XIV. ex. de converſ. conjugator.* (d) *Blaſcus diatr. ad cap. II. ex. de converſ. conjugat.* (e) *Cap. VII. ex. eod.*

fectione ipsum matrimonii vinculum solvi (a); dum monasticae vitae impense favit, derogavit evangelio, quod Gregorius M. observat (b). Tantum in hac specie ob causam continentiae bona gratia toro & cohabitatione conjuges perpetuo separantur, si nempe eorum unus ex alterius consensu, vel ambo ex pacto continentiam voveant & religionem profiteantur, aut si vir apud Latinos bona cum conjugis venia sacris ordinibus initietur. Antiqua est ecclesiae sententia, qua licet conjugibus ex pacto continentiam profiteri: ex pacto inquam: nam semper improbatum fuit ecclesiae patribus, unum ex conjugibus altero invito continentiam vovere (c). Non recte promittitur, quod adhuc est in alterius potestate, nec est grata donatio, si unus offerat rem duorum. Et per nuptias alter conjugum in alterius corpus jus adquisivit. Itaque si altero invito conjux religionem professus sit, cogitur ad priorem statum redire, & pro conjugis voluntate rei uxoriae vacare: at ipse non videtur uti posse matrimonio, nam ejus promissio, saltem pro eo, quod sui arbitrii erat, sustinetur (d). Ceterum si ex alterius consensu conjux unus religionem ingrediatur, sollicite cavendum est, ne alter incontinentiae periculo obnoxius sit, aut ejus suspicione laboret. Hinc vel

(a) *L. LIII. §. 3. C. de episc. & cleric.* (b) *Gregor. M. lib. IX. ep. 39.* (c) *Basil. reg. major. q. XII. Paulin. ep. ad Celantiam, Augustin. ep. CCXXVII. ep. Grat. can. VI. C. 33. q. 5.* (d) *Cap. III. ex. de convers. conjug.*


vel ambo monasticam vitam debent profiteri, vel si nulla subfit incontinentiae suspicio, potest alter promissa castitate in saeculo remanere (a). At vir si legitime episcopus consecratur; uxor omnino videtur ingredi debere monasterium (b), ut ita omnis suspicio incontinentiae, quae in episcopum redundaret, tollatur.

Variis causis conjuges toro & habitatione separantur.

§. XIV. Quamvis autem matrimonium ratum & consummatum ex Latinae ecclesiae sententia, quod spectat ad vinculum, non dirimatur; tamen multae sunt causae, quibus conjuges inviti toro & cohabitatione divertunt, siue perpetuum, siue ad tempus. Praecipua divortii partialis causa est alterutrius conjugis voluntarium adulterium, nec enim jure canonico melior in hac causa est viri conditio (c): quo distamus a moribus Romanis, quibus viro licebat uxorem adulteram dimittere: at idem jus uxori non dabatur. Quin debet maritus uxorem adulteram, nisi poenitentiam egerit, dimittere (d): patronus enim turpitudinis videtur esse, qui peccantem non dimittit. Post poenitentiam vero potest maritus dimissam recipere & maritali affectu retinere, sed non cogitur (e): immo potest sine ejus consensu vitam monasticam profiteri, vel sacris ordinibus ini-

(a) *Cap. IV. & VIII. ex. eod.* (b) *Conc. VI. can. XLVIII., cap. VI. ex. eod.* (c) *Hieronym. ep. XXX. ad Ocean.* (d) *Can. IV. & VI. C. 32 q. 1.* (e) *Can. VII. eod., cap. III. ex. de adulter. & ibi glossa.*

initiari (a) : adulterio enim admissio conjux cadit jure in alterius corpus quaesito . Quod si maritus etiam adulter sit , aut ipse uxorem prosti- tuerit , nequit uxorem adulteram dimittere (b) : quemadmodum nec eam dimittet , si post adul- terium admissum & a se cognitum rei uxoriae vacaverit : censetur enim injuriam remisisse . Por- ro toro & cohabitatione conjuges separantur per alterius conjugis apostasiam aut haeresim (c) , aut saevitiam (d) , praesertim ubi insidiae ad necem deteguntur , aut conjux unus alterum ad mor- tale peccatum impellat (e) . Interest vero inter separationem ex his causis & eam , quae pro- pter adulterium contingit : etenim haec solet es- se perpetua , illa vero duntaxat ad tempus , du- rante nempe separationis causa . Quaecumque verò fuerit causa , non proprio arbitrio , sed sen- tentia judicis conjuges separantur (f) .

 Quamvis Tom. 5. Sic. Sanct. p. 450 in suppl. ad Tit. 2. Tomi I. de Tribunali M. R. C. statutum sit causas separationis eorum a thoro ad ec- clesiasticum forum pertinere , quod consonat constit. Alexandri III. in cap. 3. de divortiis , nova tamen Proregis sanctione 22. Sept. an. 1779. hujusmodi causae laicorum judicio reservatae , utpote quae ma- tri-

(a) Cap. XV. seq. ex. de convers. conjugat.

(b) Can. I. C. 32. q. 6. , cap. IV. ex. de divort.

(c) Cap. VI. ex. de divortiis , cap. ult. ex. de con- vers. conjugat. (d) Cap. VIII & XIII. ex. de restit. spoliat. (e) Cap. II. ex. de divortiis . (f) Confer. Esphen. par. II. tit. 15. cap. 2. num. 18. seqq.

*rimonium non tamquam sacramentum respiciunt ,
sed uti contractum qui civili subjacet potestati : vide
quæ dicenda sunt in tract. de judiciis .*

C A P U T XXXI.

De secundis nuptiis .

An polygamia juri naturali adversetur ?

§. I. **S**ecundae nuptiae dupliciter accipiuntur .
Etenim vel denotant eum statum conjugalem , quo vir simul plures uxores habet , qui status *polygamia* dici solet ; vel secundas aut tertias nuptias post primi aut secundi conjugis mortem aut legitimum divortium contractas . Et quod spectat ad polygamiam , utrum ea juri naturali adversetur , anceps quaestio est . Certe vero familiis & educationi liberorum convenientius est , unam habere mulierem : idque naturæ ipsa duce videtur inductum . Etenim in Europa & frigidis regionibus mares fere aequali numero feminis nascuntur : & fortasse eadem est etiam in calidis regionibus inter mares & feminas proportio . Testatur quidem Kempferus in historia Japonica , toto ferme Oriente & calidis regionibus numerum feminarum longe majorem gigni quam masculorum . Et hinc Montesquius (a), vir ingenii vere magni , existimavit , polygamiam in Asia & Africa feminarum fecundissimis climati convenire : contra vero in Europa etiam
cli-

(a) *Montesq. l' esprit des loix lib. XVI. chap. 4.*

climati adversari. At calculos Kempferianos alii non admittunt; certe vero ab aequalitate naturae multum distant, quam ista etiam in bestiis constanter servat. Porro polygamia hominum propagationem & multitudinem non promovet, quin potius est impedimento, quod Premontualius pluribus probat. In uxorum quoque numero omnes viles sunt, animus multitudine distrahitur, & nulla pro socia habetur, quod non bene familiis convenit. Cui naturali rationi vim addit institutio ipsa matrimonii, in qua Deus voluit, ut vir uxori suae adhaereret, & duo in una carne essent (a). Interim & apud Judaeos & apud plerasque gentes polygamia obtinuit (b), & nunc etiam in Asia & Africa obtinet. Numquam autem veteris testamenti iustis polygamia vitio data est: quin ecclesiae patres docent, tum Dei concessione fuisse opus religionis plures habere filios, ad Christi genus secundum carnem ab omnibus gentibus distinguendum (c). Sed apud Romanos numquam permixtum duas simul uxores habere: & infamis censebatur, qui retenta prima uxore secundas nuptias attentasset (d). Etiam apud Graecos vetita erat polygamia: tantumque in necessitate duas simul uxores Graeci videntur concessisse (e).

Inst. jur. can. T. IV:

R

Po-

(a) *Genes. II. 22. seqq.* (b) *Confer. Grotius de I. B. ac P. lib. II. cap. 5. §. 9.* (c) *Augustin. de bono conjug. cap. XIX.* (d) *L. XVIII. C. ad L. Jul. de adulter. Confer. Brisson. de jure connubior.* (e) *Confer Potter. archæol. lib. IV. cap. 11.*

§. II. Similiter Christi lege omnino interdicta est polygamia. Christus enim matrimonium revocavit ad primævam institutionem, qua homo, relictis patre & matre, adhaerebit uxori suæ, & erunt duo in carne una: & hinc moechari ait, eum, qui dimissa uxore, alteram ducat (a). Qua doctrina omnino vetita est polygamia: si enim moechatur, qui dimissa uxore, alteram ducit, multo magis & ipsa retenta. Porro docet apostolus, virum & mulierem invicem in alterius corpus jus adquisivisse, adeo ut nec vir habeat sui corporis potestatem, sed mulier, & contra (b). Nullus igitur inter christianos locus esse potest polygamiae: nam dum vir plures accipit uxores, prior plenum jus in mariti corpus non habet. Quam christianam doctrinam ecclesia semper tenuit, & patres inculcarunt. Sane patres concilii Toletani I. canonem habent, quo edicitur, ut fidelis unam mulierem sive uxorem sive concubinam, ut ei placuerit, adjunctam habeat (c): conjunctio tum licita erat concubinatus; erat enim naturale matrimonium cum femina inaequalis conditionis effectibus civilibus omnino destitutum. Nec leges civiles christianorum principum umquam polygamiam permiserunt. Et profecto mera fabella est Socratis (d) narratio, Valentinianum Severae conjugis praedicatione in Justinæ amorem pellectum, ipsa Severa

(a) *Matth. XIX. 3. seqq.* (b) *1. Cor. VII. 4.*

(c) *Conc. Tolet. I. can. XVII.* (d) *Socrat. lib. IV. cap. 31.*

vera retenta, cum Justina nuptias contraxisset; & legem porro proposuisset, ut cuius liceret duas simul uxores legitimas habere: quod post Baronium & Valesium Binghamus (a) probat.

Secundae nuptiae christianis licitae.

§. III. Altero autem sensu acceptae secundae nuptiae, quatenus scilicet denotant nuptias secundas aut posteriores legitime soluto priore aut secundo matrimonio contractas, nunquam gentium interdictae sunt. Quid enim mali est, secundam ducere uxorem, ubi nexus cum priore jam solutus est? Id jus etiam apud christianos semper obtinuit: luculenter enim docet apostolus, mulierem viri dormitione nuptiarum nexu liberari & cui vult, nubere posse (b). Et profecto vim apostolo fecerunt Montanistae, qui ex novis spiritus sancti revelationibus Montano factis secundas nuptias damnaverunt: quam haeresim etiam Novatiani amplexi sunt. Ecclesiae vero doctrinam Hermes (c) antiquissimus scriptor proponit, qui docet non peccare conjugem, qui post alterius mortem iterum nubit, ac magnum apud dominum consequi honorem, si sine conjugate permanferit. Similiter Tertullianus testatur; apud catholicos nuptias iterari, eoque nomine eos *psychicos*, hoc est carnales & incontinentiae deditos appellat: *Haeretici nuptias auferunt, psychici ingerunt; illi nec semel, isti non semel nubunt* (d). Cui doctrinae adhaerens ma-

R 2

gna

(a) Bingham. or ig. eccles. VI. cap. 11. §. 5. (b) 1. ad Cor. VII. 39. & 1. ad Timoth. V. 14. (c) Hermes past. lib. 11. mand. 4. n. 4. (d) Tert. de monog. c. 1.

qua synodus Nicaena sub ea conditione Novatianos recepit, si cum digamis, hoc est iis, qui secundas nuptias celebrassent, communicarent (a). Nec tantum secundas nuptias stricte sic dictas; verum etiam posteriores ecclesia permittit, quod Augustinus docet (b).

Secundae nuptiae patribus invisae.

§. IV. Quamvis autem secundae nuptiae jure evangelico permittantur; tamen antiqui patres eas veluti impuritatis & incontinentiae plenas traduxerunt, & quidem adeo durioribus verbis, ut eas damnare videantur; appellant enim *fornicationem* (c), *speciosum adulterium* (d), & *honestam fornicationem* (e). In trigamos vero & posteriores nuptias, quod consequens erat, Graeci patres sunt inclementiores: etenim Gregorius Nazianzenus adfirmat, quartum conjugium esse porcinam vitam (f): & Basilius M. tertias & quartas nuptias indignas esse ait, quae *mariti & uxoris nomina donent* (g). Ex qua doctrina imperator Basilius Macedo quartas nuptias per Orientem omnino irritas fecit. At apud Latinos tertiae & posteriores nuptiae irritae numquam factae sunt, etsi numerositatis & incontinentiae nota adspargerentur. Itaque synodus Neocaesariensis & Basilius M. publicae penitentiae

(a) *Conc. Nicaen. can. VIII.* (b) *August. de bono viduit. cap. XI.* (c) *Clemens Alexandr. lib. III. Stromat.* (d) *Athenagoras legat. pro christian.*

(e) *Chrysost. seu auctor operis imperfecti in Matth. hom. XXXII.* (f) *Gregor. Nazianz. orat. XXXI. cap. 3.* (g) *Basil. ep. canon. cap. IV.*

ciae digamos subjecerunt (a), non quod secundas nuptias damnarent, sed quod nota incontinentiae jejuniis & orationibus videretur expianda. Nata est detestatio ista secundarum nuptiarum a studio continentiae, quod primis saeculis inter christianos increbuerat: & hinc christiani vel coelibes omnino vivebant, vel monogamiam fervabant, quod Minucius Felix & Theophilus Antiochenus testantur (b); minus vero perfecti & incontinentes censebantur, qui ad secundas nuptias transibant. Quae incontinentiae macula digamos a canone fecit alienos: qui enim christiano dedicantur sacerdotio, omnino perfecti sint oportet: quamvis temporis lapsu ecclesia Latina ex sacramenti defectu irregularitatem digamorum metita sit (c). Ceterum quid mirum si antiquioribus christianis non adeo secundae nuptiae placuerint, quando etiam apud gentes viduitas magni fuit, quod Heineccius (d) pluribus demonstrat.

Benedictio secundarum nuptiarum.

§. V. Permissae quidem christianis erant secundae nuptiae, at ex antiquis institutis & apud Graecos & Latinos sacra benedictione non consecrabantur (e). Macula incontinentiae, quadi-

(a) Concil. Neocaesar. can. III., Basil. loc. cit.

(b) Minuc. Felix in Octavio cap. XXXI., Theoph. Antioch. lib. III. ad Autolyc. (c) Confer. Thomass. de benef. par. II. lib. I. cap. 78. (d) Heinec. ad L. Jul. & Papiam. lib. II. cap. 16. (e) Conc. Neocaesar. can. VII., Innocent. I. epist. ad Victitr. Rothomag. cap. IX., S. Caesarius serm. CCLXXXIX. in append. oper. S. Augusti.

digami ex patrum sententia adspergebantur, videretur fecisse, ut ecclesia secundo nubentibus benedictionem denegaret. Hinc si sacra benedictio nuptiis sanctitatem & gratiam conciliabat, videntur secundae nuptiae sacramenti religione caruisse. Sed lapsu temporis in utraque ecclesia secundae nuptiae benedictae sunt: idque forte coepit postquam Caroli M. & Leonis sapientis legibus inductum est, ut sacra benedictio ad vim ipsam nuptiarum pertineret. Hinc Aristenus Graecus canonum interpres Neocaesariensem canonem, quo vetatur presbytero digamorum convivio interesse, ex disciplina suae aetatis ita interpretatus est, *sacerdos, qui digamo benedixit, a mensa debet recedere, & non cum eo convivari*. Benedictio autem ista secundarum nuptiarum apud Graecos tantum differt ab ea, quae primo nubentibus datur, quod contineat orationes, quibus Deus exoratur, ut digamis parcat (a). At apud Latinos minus sollemni benedictione, extra missarum sollemnia secundae nuptiae benedici coeperunt, quando primae nuptiae in publica missa sollemni benedictione donatae sunt, & adhuc benedicuntur. Et hinc quando posteriora Latina monumenta adfirmant, secundas nuptias non esse benedicendas, de sollemni benedictione intelligenda sunt. Ceterum si Urbanus III. ideo secundo nubentes non debere benedici doceat, quod nuptialis benedictio iterari non debeat (b); id procul dubio dixit ex sui tem-

(a) Confer. Chardon. *histoire du mariage* chap. IV. art. 2. (b) Cap. III. ex. de secunda. nuptiis.

temporis disciplina, qua secundarum nuptiarum incontinentia tantum non evanuerat. Recentiores autem rituales edicunt, secundas nuptias non esse benedicendas, praesertim si sint secundae ex parte uxoris, & haec semel benedicta fuerit.

Poenae secundarum nuptiarum intra annum luctus sublatae.

§. VI. Separato per mortem viri matrimonio, licet viduae ex praesenti disciplina abque infamiae nota statim ad secundas nuptias convolare. Jure Romano vetabantur viduae intra annum luctus nubere: eratque annus iste ex antiqua Romuli lege decem mensium (a), tum Gratiani, Valentiniani & Theodosii lege duobus mensibus actus est (b). Duplici vero ratione ex Romanis institutis anni luctus religionem viduam viro praestare oportebat, ut Harmenopulus (c) explicat, *ne semen commisceatur, & propter reverentiam & honorem, quem debet marito*. Tantum viduae maritos, non mariti uxores lugere debebant (d), ac proinde statim ab uxoris morte jus erat viro aliam ducere uxorem. Luctus autem anno mulieres nubentes notabantur infamia, nihil capiebant ex testamento & mortis causa donationibus quorumcumque; amittebant quae eis mariti supremis tabulis reliquissent; nec hereditates ab intestato vel legitimas vel honorarias ultra tertium gradum vindicabant (e). Ho-

ne-

(a) Confer. Briffon. de jure connubior. (b) L. II. C. de secund. nupt. (c) Harmenop. lib. IV. tit. 6. (d) L. IX. D. de his qui notant. infam. (e) L. I. C. eod.

nestatis & pudoris plena erat ista juris civilis sanctio, eamque procul dubio christiani pudoris studiosissimi olim servarunt: quin in capitulis Theodori Cantuariensis expresse continetur, ne vidua intra annum luctus nubat (a). At jure decretalium mulierem, quae intra annum luctus nubat, nulla manet infamia: idque ex apostoli sententia esse Urbanus III. & Innocentius III. responderunt (b). Quamvis haud scio, an apostolus, dum docuit, mulierem viri dormitione nexu nuptiarum liberari, & cui vult, nubere posse (c), festinas & infames nuptias permiserit: annus enim luctus publicis legibus pudore plenis statutus erat; & deinde apostolus viduae, extincto viro, potius cui velit, quam quando velit, nubere permittit. Nec tantum infamia, verum etiam ceterae poenae, quae in odium secundarum nuptiarum decretae erant, ob eandem rationem hodie sublatae sunt, quod judicatum Antonius Faber (d) refert: at stant adhuc leges, quae in favorem liberorum primi matrimonii statuunt (e).

CA.

(a) *Theodor. Cantuariens. cap. LXXII.* (b) *Cap. IV. & seq. ex. de secund. nuptiis.* (c) *1. ad Cor. VII. 39.* (d) *Ant. Faber cod. lib. V. tit. 5. def. 1.* (e) *Confer. Gudelin. de jür. novis. lib. I. cap. 12.*

C A P U T XXXII.

De sacrosanctis ecclesiis , & altaribus .

Quo sensu ecclesia hoc loco accipitur .

§. I. **E**cclesia apud christianos proprie denotat
fidelium societatem & conventum; est
enim vi nominis concio , seu convocatio : at per
metonymiam saepe denotat locum ipsum , in quo
christiani conventus agitant suos . Hoc loco de
ecclesiis posteriori sensu agemus , ac proinde ec-
clesia est aedificium cultus divini peragendi gra-
tia *extructum* , & sollemni ritu consecratum ,
aut saltem benedictum . Scilicet proprius & ve-
rus Dei cultus est , ut eum in spiritu & veri-
tate adoremus ; at christiana religio habet etiam
cultum externum ; qui in sacramentorum admi-
nistratione , sacrificiis & communibus precibus
positus est , spectatque ad internum cultum pro-
movendum . Hinc christiani semper conventus
suos celebrarunt , ad suae religionis exercitia per-
agenda . Et specialiter divino cultui loca con-
secrarunt , ut eo fortius ad pietatem excitaren-
tur . Opinio de numinis praesentia religionem
intendit , eamque etiam promovet augetque tum
aliorum exemplum ; tum locus ipse , ubi omnia
ad pietatem composita sunt , homines enim sic
sunt comparati , ut plurimum ab objectis exter-
nis afficiantur .

Varia ecclesiarum nomina .

§. II. Pro locis cultui religionis addictis ec-
clesiae acceptae pluribus aliis nominibus in an-
Inj. jur. can. T. IV. *S.* *ti.*

aliquis monumentis designantur, idque a variis adjunctis & circumstantiis, secundum quas veteres eas spectabant. Aliquando dicuntur *concilia*, *conciliabula*, *conventicula*: quae voces, non secus ac ecclesia, ipsum conventum vi sua denotant; at ad locum ipsum, in quo concilium conveniebat, translatae sunt. Saepe dicuntur *dominica*, *domus Dei* & *nuptia*, a Deo nimirum ipso omnium rege ac domino, cui dedicabantur. Quare *dominicum aureum* ecclesia splendidissima fuit, quam Antiochiae Constantinus M. inchoavit, Constantius vero ejus filius perfecit dedicavitque (a). Porro a fine ecclesiae *oratoria* & *domus orationis* dictae sunt: quamvis in antiquis canonibus *oratorii* nomine aliquando veniant privata sacella in privatarum familiarum commodum exstructa, in quibus praeter praecipuos festos dies etiam missae celebratae sunt (b). Ecclesiae quoque nonnullae *martyria*, *apostolea* & *prophetea* audierunt, illae nempe quae sepulchro aut reliquiis aut memoria alicujus martyris, apostoli vel prophetae decoratae erant. Cujus generis fuit *martyrium salvatoris*, quod in memoriam passionis & resurrectionis Christi in Golgotha monte Constantinus M. excitavit (c). Loco martyrii *martyrum memorias* Latini dixerunt (d), quasi essent martyrum, qui eo loci passi erant, aut quorum reliquiae ibi condebantur, memoriae & monumenta. Latinis etiam paro-

roe-

(a) Hieronym. in chron. (b) Conc. Agathense can. XXI. (c) Euseb. lib. IV. de vita Constant. cap. 40. (d) August. de civit. Dei lib. XXII. cap. 10.

roeciales praesertim ecclesiae *tituli* dicuntur, si-
ve a certis signis & titulis, quibus insignieban-
tur, siue quod inde nomen suum addicti cleri-
ci ducebant, siue a nominibus sanctorum, in
quorum memoriam erant dedicatae (a). Et post
pacem christianis datam saepe ecclesiae dicun-
tur *templa* & *basilicae*, quae nomina in antiquio-
ribus monumentis hoc sensu vix occurrunt. Erant
scilicet templa apud gentes idolis sacra & ido-
latriae plena, basilicae vero aedes amplae in-
usum publicum extructae: quae longe distabant
ab ecclesiis christianorum uni Deo sacris & pau-
pere aedificio extructis. Sed inde everfa ido-
latria & multis idolorum templis & basilicis in
ecclesias christianorum conversis ecclesiastici scri-
ptores *templi* & *basilicae* nomina passim usurpa-
runt.

Primo saeculo christiani non habebant ecclesias.

§. III. Jam vero an christiani semper habue-
rint proprias ecclesias, hoc est loca cultui pro-
priae religionis addicta, & a ceteris promiscui
usus locis separata, inter doctos non convenit.
Passim tradunt theologi nostri, ecclesias ab ipsa
apostolorum aetate originem habuisse: quam sen-
tentiam edito peculiari opere Jo. Medus Anglus
pluribus probavit: cujus tractatus veluti com-
pendium Binghamus dedit, qui & propria argu-
menta in eandem sententiam addidit (b). Con-
tra Vedelius, Suicerus, Boëhmerus alique con-
tendunt, christianos primis ferme tribus saeculis

S 2

non

(a) *Canfer. Congius v. titulus.* (b) *Bingh. orig. ecclesiasti. lib. VIII. cap. 1. §. 13. seqq.*

non habuisse proprias ecclesias, quae speciali ratione Deo dicarentur, essentque commerciis aliis exemptae (a). In hac opinionum discrepantia illud magis placet, toto ferme primo saeculo christianos ecclesiis caruisse: quod Hieronymus a Costa etiam docet (b). Sane ipsi apostoli & primi christiani ex Judaeis in templo Hierosolymitano & synagogis orabant (c): & praeterea sacris propriis vacaturi conveniebant in oratoria domestica (d), quae apud Judaeos erant coenacula in parte aedium superiori ut plurimum adornata in privatum pietatis exercitium. Initio christiana religio veluti Judaismi secta reputabatur, ac proinde facile patiebantur Judaei, christianos ex sua gente in synagogas & coenacula convenire. Et qui christiani ex gentibus erant, sacra sua in privatis oratoriis & coenaculis agitant. Adde quod in scriptis apostolicis nullum apertum exstat testimonium, quo constet, christianos eo tempore proprias ecclesias habuisse: & quamvis multi ex patribus in verbis apostoli, *numquid domos non habetis ad manducandum & bibendum? aut ecclesiam, Dei contemnitis* (e), conventus locum invenerint; tamen contextus satis indicat, ecclesiae nomine apostolum christianorum coetum intellexisse.

Eas

(a) *Vedel. exerc. in Ignat. ep. ad Magnes. cap. IV., Svicer. thes. eccles. v. vads, Boëhmer. diff. II. in Plinium & Tertull.* (b) *Hieronym. a Costa histoire des revenus ecclesiastiques.* (c) *Aët. II. 46. & cap. XIII. 14. seqq.* (d) *Aët. I. 13., II. 1. seq., & V. 42.* (e) *1. ad Cor. XI. 22.*

Eas vero secundo & tertio saeculo habebant.

§. IV. Verum enimvero secundo & tertio saeculo christiani propria loca cultui religionis addicta habuerunt, vel in domibus privatis locisque abditis, saepe etiam in publicis, si per externam pacem liceret. Sane secundo saeculo ecclesias fuisse Clemens Alexandrinus testatur (a): *non enim*, inquit, *nunc locum, sed electorum congregationem appello ecclesiam*. Ex quibus verbis constat, ea aetate ecclesiam non tantum coetum, sed locum quoque denotasse. Et recte Medus observat, rem ipsam existisse, quando ejus nomen adfuit. Porro Tertullianus (b) adfirmat, libidinum furias & in corpora & in sexus ultra jura naturae non modo limine, verum omni ecclesiae tecto ejectas fuisse. In primis vero ecclesias tertio saeculo christianos habuisse, egregio Lampridii ethnici scriptoris testimonio demonstratur. Locum quemdam, qui publicus fuerat, christiani occupaverant; quem quum sibi deberi popinariis contenderent, Aelius Lampridius refert (c), Alexandrum Severum rescriptisse, *melius esse, ut quomodocumque illic Deus colatur, quam popinariis dedatur*. Quo rescripto non obscure demonstratur, tantum religionis exercitio ejusmodi locum fuisse addictum; ut adeo nulla esse possit Boëhmeri exceptio, qui rei veritate victus adfirmat, christianos quandoque certa & stabilia loca sacris suis destinasse;

at

(a) *Clemens Alexandr. Strom. VII.* (b) *Tertull. de pudicit. cap. VII.* (c) *Lamprid. vit. Alexandr. cap. XLIX.*

at ea non fuisse sacra, nec profanis usibus exempta (a). Et ut multa alia mittam, Eusebius (b) testatur, in longa illa christianorum pace a Valeriana ad Diocletianeam persecutionem eorum numerum summopere crevisse, ut prisca aedificia ipsos capere non potuerint, ac ideo novas & spatiosas ecclesias in singulis urbibus excitasse. Nec his omnibus dictum illud Origenis, Minucii Felicis, Arnobii & Lactantii obstat, christianos non habere templa nec altaria; nam id eo sensu accipiendum est, talia eos non habuisse, qualia gentes habebant, idolis nempe & idololatriae plena, quod fuisse Medus probat.

Ecclesiae auctae & splendidiore factae.

§. V. Illud autem certum est, ecclesias, si quas christiani tempore persecutionum habuerint, fuisse exiguas & simplices, quemadmodum postulare videbatur durus per ea tempora eorum status, quando non multi divites Christo nomen dederant, & christiani magis solliciti erant de vivis Dei templis, hoc est pauperibus alendis, quam de aedibus cultui religionis addictis excitandis. Sed pace christianis data in novam & angustiore formam ecclesiae coeperunt aedificari: nihil enim amplius oratoriis a publica potestate metuendum erat; & praeterea multi divites ad Christum conversi ad sacras aedes excitandas suarum divitiarum partem impendebant. Praesertim vero ad amplas & magnificas ecclesias ipsi principes christiani facti contulerunt, idque dua-

(a) Boëhm. cit. diff. §. 22. (b) Euseb. lib. VIII. cap. I.

duabus rationibus & novarum basilicarum aedificatione, & edictis de templis Deorum in ecclesias convertendis. In vulgus notum est, quot splendoras & aureas ecclesias Constantinus M. e solo excitavit, cujus exemplum deinceps omni aetate imperatores & reges imitati, augustas ecclesias ingenti sumtu aedificaverunt. Porro principum edictis deorum templa in Christi ecclesias conversa sunt: idque sub Theodosio M. fieri coepit (a): nam ab anno Christi cccxxxiii. templa deorum everti coeperunt. Una cum templis etiam Romanae basilicae (b) & aliquae Iudaeorum synagogae in ecclesias conversae sunt. Ita tandem vera religio de gentium superstitione triumphavit. Et postquam ecclesiae in augustiorem formam abierunt, iis *templi* & *basilicae* nomina frequentius tributa sunt (c).

Ecclesiae varii generis.

§. VI. Multiplex est ecclesiarum genus, aliae enim sunt *cathedrales*, aliae *collegiatae*, aliae *parochiales*, aliae *conventuales*. Ecclesia cathedralis est, in qua sedes & episcopi cathedra posita est & communis totius dioecesis parochia. Saepè in antiquis monumentis dicitur ecclesia *magna* & *matrix* (d), utpote quae tamquam mater reliquarum ecclesiarum, quae sunt in dioecesi, consideratur. Collegiata habet collegium canonicorum, sed non fixam episcopi cathedram. Pa-

ro-

(a) Confer. Jac. Gothof. in l. XXV. C. Th. de paganis. (b) Ausonius gratiar. actio pro consulatu.

(c) Confer. Bingham. orig. eccles. lib. VIII. cap. 1.

§. 6. (d) Cod. Afric. can. XXXIII. & CXXXIII.

rochialis ecclesia est, in qua cura animarum proprie sic dicta exercetur, eamque sub episcopo parochus clericis suis stipatus moderatur. Sed ecclesiae paroeciales aliae sunt matrices & baptismales, aliae paroeciales strictè sic dictae. Matrix ecclesia veluti mater inferiorum titularum habetur, & aliquando ea sola habet baptisterium, unde paroeciarum inferiorum incolae baptismum peterè debent, & hinc baptismalis dicitur. Scilicet postquam baptisterium parochiis communicari coepit, aliquae etiam sine eo remanserunt, quae proinde ecclesiam baptismalem veluti matrem agnoscunt (a): & quae proprio baptisterio donatae sunt, adhuc debent ecclesiae matri reverentiam & honorem: novae enim ecclesiae paroeciales veluti coloniae veteris ecclesiae reputantur, eique salvus honor debitus relinquitur. Ecclesiae conventuales sunt ecclesiae monachorum & regularium, ita dictae a conventu monachorum, in quorum peculiarem usum primum sunt extructae, erantque in veteri disciplina privata oratoria: tum omnibus patuerunt, & sacra paroecialia minus frequentata sunt.

Minores ecclesiae seu privata oratoria.

§. VII. Species quoque ecclesiarum sunt *privata oratoria*, minores nempe ecclesiae in agris, aut in magnatum domibus, immo etiam in civitatibus extructae, & sacris extraordinariis & privatis addictae. Saepe etiam excitatae sunt in martyrum & sanctorum memoriam & in agris & in urbibus. Hujusmodi minores ecclesiae me-
diis

(a) Confer. superius dicta cap. VI. §. 8.

diis saeculis in Latinis monumentis saepe *capellae* dictae sunt, quod nomen factum est a *capa*, seu parva veste B. Martini, quae in oratorio Francici regis servabatur, ut Cangius opinatur (a), vel potius a *capa*, hoc est theca reliquiarum. B. Martini & aliorum sanctorum, quae in illo oratorio condita erant (b). *Capella* nempe est a *cap* seu *capa*; & *cap* vox Celtica est, quod Leibnitius (c) observat, significatque origine sua capitis tegmen & generaliter quodcumque corporis tegumentum, & ampliori sensu rerum pretiosarum thecas & conditoria. Generatim vero *capellae* ordinarium populi conventum non habent; & in oratoriis rure extructis in usum familiae rusticae antiqui canones sacra liturgica permittunt celebrari, exceptis potioribus festis, quibus in ecclesiam cathedralem aut paroeciam fideles omnes oportebat convenire (d). Similiter in domesticis capellis sacra auctore episcopo celebrari canones concedunt (e). Et in martyria rure extructa quotannis cum suo episcopo aut parocho christiani continebant martyrum memorias celebraturi (f). Labentibus annis numero creverunt *capellae*, & lapsa ecclesiastica disciplina etiam in potioribus festis ibi divina officia celebrata, ad quae christiani, relicta paroecia, promiscue convenerunt: at ecclesiae do-

Instit. jur. can. T. IV. T tri-

(a) Cangius glossar. v. cappella. (b) Bignonius not. in Marculfum lib. I. cap. 38. (c) Leibnit. collect. etymolog. part. II. (d) Conc. Agath. an. ICVI. can. XXI. (e) Conc. Trullan. can. XXXI. (f) Confer. Bingham. orig. eccles. lib. XX. cap. 7. §. 3.

Strina manet immutata; etenim etiam hodie vult ecclesia, ut in diebus dominicis & potioribus festis christiani parochias suas frequentent (a). Ceterum minores istae ecclesiae sollemni ritu solent consecrari, nec confundendae cum capellis mobilibus, quae in domibus privatis conceduntur, ubi tantum est altare consecratum.

Capellae regiae.

§. VIII. Inter capellas longe eminent *capellae regiae*, quae *palatinae*, *regales*, *dominicae* & *facella regis* etiam in antiquis monumentis appellantur. Coeperunt capellae palatinae statim ac imperatores & reges christianam religionem amplexi sunt: moris enim semper iis fuit & in regiis aedibus ecclesias habere, & in expeditiones proficiscentibus tabernacula seu capellas secum deferre, ut utrobique sacris vacare possent (b). Quum vero reges varia palatia haberent, in omnibus capellae excitatae sunt; neque enim illi palatia extruebant, nisi adjunctis capellis. Quin etiam in dominicis & propriis fundis ecclesias aedificarunt, quae praerogativis regiarum capellarum saepe donatae sunt. Siculi & Neapolitani reges multas regias capellas habent, sive a se, sive a Longobardis principibus extructas. Regiae capellae in eum finem praecipue inductae, ut ibi in usum regum & fortius regiae familiae sacra celebrentur: eisque addicti clerici & presbyteri *capellani palatini* &

re-

(a) *Trid. sess. XXII. decr. de observand. in celeb. missae.* (b) *Euseb. lib. IV. hist. cap. 17. & seq.*

regii (a) dicti sunt. Principio clerici palatini ab episcopi, ad cuius dioecesim quisque eorum pertinebat, jurisdictione non eximebantur (b): & ipsae capellae sine auctoritate episcopi, in cuius paroecia erant, excitari non poterant: quod regum Francorum habent capitularia (c). Sed inde regiae capellae & clerici palatini ab episcoporum jurisdictione exempti sunt (d), iisque veluti proprius episcopus seu parochus praeest capellanus major, qui in antiquis monumentis abbas, capellanus, archicapellanus & palatii custos dicitur (e). Apud nos jurisdictione capellani majoris amplissima est; etenim non solum veluti praelatus proprius est totius regiae familiae, & clericis & cantoribus palatinis praeest; verum etiam ei subduntur ecclesiae omnes regiae & capellani castrenses. Quae jurisdictione assiduo usu quaesita a regibus & pontificibus confirmata est, novissime vero a Benedicto XIV. clarius explicata & aucta.

Capella D. Petri ab Rogerio I. Siciliae Rege intra Aulam Panormitanam post composita regni negotia, Regiamque Coronam susceptam, extructa, & Collegio Canonîcorum insignita, & privilegio Petri Archiepiscopi Panormitani anno 1132, Parochialis Regii Palatii Ecclesia constituta est. Cumque ex foundationis lege eam Rogerius

T 2
suo

(a) Confer. Cangius v. capellani. (b) Thomass. de benef. par. I. lib. 2. cap. 111. n. 5. (c) Cap. reg. Franc. lib. V. cap. 182. (d) Cap. XVI. ex. de privileg. Confer. Thomass. loc. cit. cap. 112. n. 6.

(e) Cangius in glossar. v. capellani.

suo suorumque successorum juri ac potestati penitus reservaverit, non alium a sui exordio legitimum Pastorem excluso prorsus Ordinario loci, agnovit, nisi quem Reges Capellanum majorem arbitrio illi tribuerent. Eadem fuit conditio cæterarum Regiarum Capellarum Regni, quæ natura loci juxta illorum temporum disciplinam juri Principis adscribebantur. Unde liquet, quam late patuerit Capellani Majoris dignitas & auctoritas dum ea in omnes Regias Capellas sic protenderetur, ut non alium Clerici ac Ministri illarum Præfulem & Antistitem in rebus sacris; non alium in rebus civilibus Judicem competentem haberent. Sed immutato rerum statu varias pro temporum ratione passa est vices Regni Capellania major. Primò siquidem Beneficiò S. Lucie adnexa sic fuit, ut amplissima illius Jurisdictio intra hujus Paræciæ fines coarctaretur. Quæ tempestate Episcopi omnes Diæcesani legationem potissimum Apostolicam, quam ipsis Concilium Tridentinum indulgebat, obtendentes in Regias Capellas violentas manus injecere. Deinde per concordiam Alexandrinam Regiæ Monarchiæ Tribunali constituto in Regiæ Monarchiæ Judicem Capellani majoris nonnulla jura translata sunt. Quæ causa fuit, ut Caroli Borboni diplomate Regiæ Capellæ Oppidi Calaxibetæ Ordinarius ille Præful constitueretur. Postremo cum eandem vellet in palatinam Capellam Regiæ Monarchiæ Judex exercere jurisdictionem, asperrimaque lis inter ipsum, Archiepiscopumque Panormitanum exinde efferveret; (vide scripta hac de causa edita). Rex Ferdinandus occasione petitionis sibi factæ a Magistratu & Populo S. Lucie pro Capella-

ni majoris dignitate Abbati suo tribuenda, sanxit, ut idem intra suæ Diæceseos limites istiusmodi munus obiret, reservato attamen sibi jure & auctoritate illud conferendi per totum Siciliæ Regnum, cui sibimet videretur. Quo factum est, ut res in suspenso maneret, & ab Regiæ Monarchiæ Judice forensis quidem jurisdictio in omnes Regios Capellanos utpote exemptos, non item Episcopalis, in omnes Regias Capellas, dempta Ecclesia ac Diæcesi Caluxibetæ, hodie exerceri possit.

Novae ecclesiæ aedificatio.

§. IX. Cujuscumque vero generis ecclesia sit, eam aedificare non licet sine episcopi, in cujus diœcesi extruitur, consensu & auctoritate (a). Nihil ad religionem pertinens inconsulto episcopo adgredi fas est. Ad sensum vero non præstet episcopus nisi prævia causæ cognitione constet, non ex turpi quæsiu, sed ex justa causa ecclesiæ aedificari (b). Plures novarum ecclesiarum possunt esse causæ; nova vero paroecia in primis concedenda, si fidelis populus numero auctus sit, aut si ob locorum distantiam sive difficultatem sine magno incommodo ad percipiendâ sacramenta & divinum cultum exercendum ad paroeciam non potest convenire (c). Sed aucto fidei populo non novae paroeciæ foundatione, sed adjunctis parochis aliis sacerdotibus curam animarum exercendam Tridentini

pa-

(a) Conc. Chalced. can. IV., Justinian. novel. LXVII. (b) Can. X. D. 1. de consecrat. (c) Cap. III. ex. de eccles. aedific.

patres statuunt (a). Privata vero oratoria in publico loco conceduntur facilius etiam ad custodiam reliquiarum, modo eorum causa fideles a pastore suo non multum distrahantur. Ubi vero novae ecclesiae idonea subest causa, tum episcopus adsentiatur, si satis ei donatum sit ad alendum ministerium & religionis cultum exercendum, quod Justinianus statuit & canonibus suis ecclesia confirmavit (b). Ipse aedificans tenetur congruis redditibus ecclesiam augere; novae vero paroeciae congrua portio ex antiquae proventibus est attribuenda (c). Quin etiam concilii Tridentini decreto jus est episcopis, si necesse fuerit, populum cogere ad alendum novae paroeciae rectorem; sed hoc decretum, quod imperium episcopis tribuat, nec apud nos receptum est. Et quo omnia recte fiant, ante aedificationem audiendi, quibus nuntiandi novi operis jus est. Praestito ab episcopo adsensu nova fabrica non inchoanda, nisi aut ipse aut ejus jussu alius sollemnes preces in loco faciat, & crucem humi defigat (d).

Quod antiqui Christiani Imperatores sanxerunt, Ecclesias, & Monasteria non posse noviter edificari nisi Principis adesset auctoritas, ut videre est in Codicibus Theodosiano, & Justiniano, sapientissimus olim noster Rex Carolus Borbonius ad generalium Comitiorum petitionem in nostro Regno observari praescripsit, vetans ne Con-
ven-

(a) *Trid. sess. XXI. de ref. cap. 4.* (b) *Cit. novel. LXVII., can. IX. D. 1. de consecr.* (c) *Trid. loc. cit.* (d) *Novel. CXXXI. cap. 7., cit. can. IX.*

ventus, Monasteria, Ecclesiae aliaque loca pia fundentur noviter, ac ædificentur neve jam fundata, ac ædificata & ampliuntur nisi habito Regis adsensu. Momenta vero quæ Regis animum ad prædictam constitutionem edendam, impulere, habentur in Cap. 4. Capitulum ipsius Caroli, ne scilicet aucto Ecclesiarum numero personarum Ecclesiasticarum iisdem inservientium numerus augeretur; ex quo non lævia sustineret incommoda civilis societas, vestigalibus illorum favore imminutis, publicorumque tributorum onere solis laicis reservato. Consule T. 2. Cap. Regni Siciliae p. 419. & seq.

Forma & situs ecclesiarum.

§. X. In extruendis ecclesiis curabant veteres, ut apta forma & convenienti situ ponerentur. Et forma quidem erat oblonga navi similis, situs vero ut ecclesiae frons seu præcipuus introitus Occidentem, & sanctuarium Orientem spectarent. *Aedes sit oblonga ad instar navis, ad Orientem conversa*, inquit auctor constitutionum apostolicarum (a). Et Paulinus testatur, morem fuisse usitatiorum, ut basilicae prospectus esset ad Orientem (b). Etiam gentes id sæpe servarunt, ut templorum suorum frons soli occidenti esset obversa, teste Vitruvio (c). Ideo vero Orientem versus ecclesiae poni solebant, quod christiani precaturi se vertebant ad Orientem. Verum forma & situs iste usitator quidem fuit, at non semper servatus: etc-

(a) *Const. apost. lib. II. cap. 57.* (b) *Paulin. ep. XII. ad Sever.* (c) *Vitruv. lib. IV. cap. 5.*

etenim & quavis forma & quocumque situ positas ecclesias exhibent antiqua monumenta (a). Nimirum saepe necessitas & loci opportunitas aliaque adjuncta variarum figurarum & diversis situs positas ecclesias pepererunt. Et deinde ubi templa deorum & basilicae in ecclesias versa sunt, quid situs & figurae ratio haberi poterat? Etiam nono saeculo receptior usus ecclesias Orientem versus constituerebat (b). Sed recentior disciplina retinuit quidem oblongam ecclesiarum formam, at situs vix ullam rationem habuit, desueto praesertim veteri more orandi Orientem versus.

Ecclesiae narthex.

§ XI. Jam vero ecclesiae praesertim ampliores pluribus partibus constant, quarum aliae interiores sunt & parietibus includuntur, aliae exteriores. Ex veteri disciplina partes interiores erant *ναρθηξ*, *ναὸς* & *ἑξῆς* *narthex* seu *ferula*, *templum* & *sanctuarium*. Et *ναρθηξ* quidem seu *ferula* aedificium erat oblongum & angustum e transverso ecclesiae frontis sub ingressum constitutum, a qua forma *narthecis* nomen accepit; ut enim Suicerus & Cangius observant, figura quaevis oblonga sive dromica Graecis *narthex* dicebatur. Tempore sacrarum lectionum & praedicationis in hac parte consistebant infideles portis viciniore, inde haeretici & catechumeni & poenitentes *audientes* dicti, qui omnes missae ca-

te-

(a) Confer. Bingham. orig. eccles. lib. VIII. cap. 3. §. 1. seq. (b) Walfrid. de eccles. ritib. cap. IV.

techumenorum institutioni omnium inservienti, poterant interesse (a). Quod si in veteribus monumentis plures nartheces ecclesiae aliquando tribuantur; nartheces istae ferme erant porticus exteriores ad latera & frontem ecclesiarum ad instar narthecis efformatae (b).

Ecclesiae navis ejusque usus.

§. XII. Post narthecem sequebatur altera ecclesiae pars *ναὸς templum* & *navis* dicta. Navis a narthece repagulis ligneis separata erat, patebatque aditus in navem per portas, quas recentiores Graeci scriptores *πύλας ὁράας* & *βασιλικὰς*, portas speciosas & regias appellant. In hoc loco excipiebantur primum poenitentes *substrati* dicti, inde *consistentes*, deinceps fideles, qui precum & oblationis erant participes, servata sexus & ordinis distinctione, nam viri a mulieribus, virgines a nuptis, monachi a saecularibus separati erant (c). Parietibus ligneis loca masculorum & mulierum ut plurimum distinguebantur: quod propter corruptos mores inductum Chrysostomus conqueritur (d). Et in nonnullis ecclesiis feminae excipiebantur in solariis, quae erant porticus in altum navis ecclesiae elaboratae. Hinc porticus istas Evagrius & Paulus Silentarius *ὑπερφῶν solaria*, sive *porticus superiores* appellant. Dicebantur etiam *κατηχούμενα* (e), quod

Inst. jur. can. T. IV.

V

mu-

(a) *Conc. Carthag. IV. can. 84.* (b) *Confer. Cangeius com. in Paulum Silentiar.* (c) *Confer. Cabassut. in diss. de veter. ecclesiar. situ & partib.* (d) *Chrysostom. hom. LXXIV. in Matth.* (e) *Novell. LXXIII. imper. Leonis.*

mulieres eo loci divinos sermones & hymnos auditu exciperent, quod Cangius (a) recte observat. Erat autem in navi *ambo*, alio nomine *pulpitum* & *tribunal* dictus, locus nempe editus lectoribus ad legendum, & cantoribus ad canendum & moderandam psalmodiam addictus. In veteri disciplina *chorus* ab ambone non videtur fuisse diversus: etenim in choro clerici cantores canebant (b): tantum in Gallicanis & nonnullis aliis Latinis ecclesiis chorus erat in sanctuario proxime post cancellos, quando apud Graecos *ambo* extra sanctuarium erat, quod Mabillonius observat (c). Ex ambone episcopos & presbyteros olim conciones habuisse cardinalis Bona adfirmat (d); at mos iste peculiaris quarundam ecclesiarum fuisse videtur: ut plurimum enim episcopi ex gradibus altaris concionabantur, quod Valesius (e) observat.

Pars ecclesiae sacratio sanctuarium.

§. XIII. Tertia ecclesiae pars *sanctuarium* erat, quod alias Latinis *sacrarium* & *tribunal*, Graecis vero *ἄγιον* *sanctum*, *ἱερατεῖον* *sacrarium* & *ἔθνα*; quasi locus excelsior, dicebatur. Cancellis quibusdam ab ecclesiae navi separabatur, eaque excelsius erat. Penitior & sanctior ecclesiae pars erat sanctuarium, & tempore sacrae liturgiae ad e-

pi-

(a) Cangius *com. in Paulum Silentiar.* (b) *Conc. Turonense II. can. 4. Confer. Grancolasius l'ancien. sacramentaire part. I. p. 21.* (c) *Mabillon. de liturg. Gallic. lib. I. cap. 8.* (d) *Bona lib. II. rer. liturg. cap. 6. n. 3.* (e) *Vales. in Socrat. lib. VI. cap. 5.*

piscopum, presbyteros & diaconos pertinebat (a), reliquis omnibus erat inaccessum. Etenim soli diaconi ministrabant altari, ceteri vero inferiores clerici in aliis ecclesiae partibus sua obibant officia. Et laici quarto & sequentibus saeculis ne ad eucharistiam quidem percipiendam sacramentum ingrediebantur (b). Soli imperatori ex laicis licebat eo loci intrare ad munera offerenda (c): desuevit enim mos etiam Constantino-
 poli, ut imperatores sacrae liturgiae tempore intra septa sanctuarii consisterent, postquam Ambrosius ipsum Theodosium M. inde exclusit (d). Hinc ista ecclesiae pars Graecis ἀβάτα & ἀδύτα, Latinis vero *adyta* & *inaccessa* dicta est. Tanta adytorum religio & ordinem in ecclesia necessarium fovebat, & rebus sacris sanctaeque liturgiae majorem conciliabat reverentiam. Sed non omni tempore, nec in omnibus ecclesiis eadem adytorum religio obtinuit. Nam tribus ferme primis saeculis laici ipsi ad altare eucharistiam accipiebant (e): & in ecclesiis Gallicanis etiam saeculo sexto *ad orandum & communicandum* laicis & feminis patebat sanctuarium, ut concilium Turonense II. loquitur (f). Et male post alios Espenius (g) opinatur, *ad commu-*
 V 2 ni-

(a) *Morin. de poenit. lib. VI. cap. I. n. 10.* (b) *Conc. Laodic. can. XIX., conc. Bracar. I. can. XXXI.*

(c) *Conc. Trullan. can. LXIX.* (d) *Sozomen. lib. VII. cap. 25.* (e) *Confer. Vales. in Euseb. lib. VII. cap. 9. & Grancolas l'ancien sacramentaire par. I. p. 309. seqq.* (f) *Conc. Turonense II. can. IV.*

(g) *Espen. part. II. tit. 16. cap. I. n. 37.*

nicandum laicis sanctuarium patuisse, non ut ad eucharistiam sumendam accederent, sed ut extra illud existentes eam sumerent.

Altare in medio sanctuario.

§. XIV. In medio sanctuario altare collocatum erat, quod divino sacrificio peragendo interserviebat. Altare autem in antiquis monumentis alias appellatur *ara*, *mensa sacra*, *mystica*, *tremenda* & *sanctum sanctorum*. Erant altaria primis saeculis ferme ex ligno, quarto vero saeculo lapidea esse coeperunt, ac demum cautum, ut tantum ex lapide fierent (a): quin pace ecclesiae data in magnis ecclesiis saepe auro argenteo inclusa sunt. Eorum structurae diversae fuerunt, nam vel uni vel duobus vel quatuor columnis mensa lapidea superjacebat, alia vero altaria quadro imposita aedificio tumuli formam referebant, tamquam martyrum sepulcra (b). Quaecumque vero esset structura, sic poni solebant, ut sacerdos celebrans facie ad populum, conversa staret: quo situ pleraque adhuc Romanae altaria videntur (c). Imminebat ut plurimum altari *ciborium* seu *umbraculum*, ut in ordine Romano appellatur. Erat ciborium turrita aedicula, quatuor ad minimum columnis innixa, qua totum altare tegebatur (d). Ex columnis pendeabant vela, seu cortinae, Chrysostomo *ἀμψίθωπα* dictae, quae extra tempus sacrificii altare

ope-

(a) *Conc. Epaonense can. XXVI.* (b) *Confer. cardin. Bona lib I. rer. liturg. cap. 20. n. 1.* (c) *Confer Cabassut. dissert. de veter. eccles. situ n. IX.*

(d) *Confer. Cangius com. in Paulum Silentiar.*

operiebant, tempore vero oblationis trahebantur; ut altare & sacrificium ab omnibus videretur. Quando videris, inquit Chrysostomus (a), ἀνελακόμενα τὰ ἀμφοτέρωθεν trahi vela, tunc superne caelum aperiri cogita & angelos descendere. Et miror profecto Binghamum (b) verba ista ita interpretari, quasi dicant, obducta vela ad occultandum tempore oblationis ipsum sacrificium, quum contra potius indicant, reducta & aperta vela, ut sacrificium a fidelibus videretur. In medio altari crux quinto saeculo jam erat imposita (c); & sub cruce in ecclesiis, quae eucharistiam pro infirmis in altari servabant, pyxis seu vasculum ad eam continendam erat (d). Cui usui inserviebant in aliis ecclesiis columbae aureae argenteaeve in medio altari suspensae; quod Grancolasius pluribus illustrat (e).

Numerus altarium.

§. XV. Unum autem in una ecclesia ex veteri disciplina erat altare, non plura, idque ad sacerdotii unitatem indicandam, quod Schelestratus & Habertus pluribus probant (f). Hinc unum altare, unus episcopus, notus est Ignatii martyris aphorismus (g). Una ferme missa in una ecclesia primis saeculis celebrabatur, & quidem ab episcopo, cui ceteri presbyteri concelebrant.

(a) Chrysost. hom. III. in Ephes. (b) Bingham orig. eccles. lib. VIII. cap. 6. §. 8. (c) Sozomen. lib. II. cap. 3. (d) Conc. Turonense II. can. 3. (e) Conf. Grancolas l'ancien sacramentaire part. I. p. 203 seqq.

(f) Schelestr. conc. Antioch., Habert. archierat.

(g) Ignat. marty. ep. ad Philadelph. n. IV.

brantes aderant. Et si ob populi necessitatem, iterum iterumque celebrandum esset, non multa altaria erant necessaria: nam eodem tempore in eadem ecclesia duae aut tres missae non videntur celebratae, in quibus christianus populus in duos tresve coetus distractus esset. Sub finem saeculi sexti apud Latinos in una ecclesia plura altaria esse coeperunt (c), qui usus sensim crevit, adeo ut initio saeculi noni canones Gallicani numerum altarium cohibuerint (d). Fortasse ecclesiae plura altaria habere coeperunt, postquam placuit, ne uno die duae missae in eodem altari dicerentur: quod concilium Antissiodorense anno 15LXXVIII cavit (e). Ceterum recens Latinorum disciplina altaribus abundat, eaque ad utrumque ecclesiae latus posita recitandis privatis missis, quae supra modum numero auctae sunt, inserviunt. Sed Graeci perseverant adhuc in antiquis institutis, ac in una ecclesia unum habent altare, nec fas esse putant intra septa ejusdem templi sacrum eadem die iterare; quamvis extra ecclesiam habeant oratoria, quae *parecclesiae* ab ipsis dicuntur, ubi diebus ferialibus missas faciunt, quod Goarius refert (f).

Altaria mobilia.

§. XVI. Et haec quidem spectant altaria fixa & immobilia, verum sunt alia mobilia, *tabu-*

(a) *Gregor. M. lib. V. ep. 50.* (b) *Confer. Grancolasius l'ancien sacramentaire part. I. pag. 45.* (c) *Conc. Antissiodor. can. X.* (d) *Goar. not. in Euchologium.*

bulae itinerariae in ordine Romano dicta, quae constant sola lapidea tabula de more ab episcopo consecrata. Circa octavi saeculi initium altaria ista inducta videntur, quod Thiersius (a) recte observat; eorumque institutioni causam, fortasse dedit nova tum regula, ut sacrificium nisi in altari consecrato non fieret: contingebat enim extra ecclesias, ubi erant altaria consecrata, missas debere celebrari; ante enim si talis casus eveniebat, diaconorum manus loco altaris inserviebant. Ergo nova inducta disciplina episcopi iter facientes altaria secum deferebant, eaque presbyteros suos habere Hinemarus Rhemensis inculcabat (b), ut in ecclesiis nondum consecratis, & oratoriis, quae consecrari non solebant, possent missas facere. Immo saeculis frequentibus passim presbyteri & mendicantes a sede apostolica, vel ab episcopis mobilia altaria impetrarunt: & hinc missae passim in locis privatis nec tanti mysterii dignitati convenientibus celebratae. Graeci altaria mobilia non habent, sed eorum loco usurpant *antimensia*, quae sunt panni quidam altarium ritu consecrati, quibus loco mensae seu altaris a multis saeculis ecclesia orientalis utitur, si sacram liturgiam in altari non consecrato celebrari contingat, ut Balsamon testatur (c). Ceterum in ecclesia Latina statuerunt Tridentini patres, ne episcopi patiantur extra ecclesias & ad divinum cultum dedicata

ora-

(a) Jo. Baptista Thiers. de principis altarib. cap. II. (b) Hincm in capitulis. (c) Balsamon in can. XXXI. conc. Trullani.

oratoria missas celebrari (a): quo decreto abolita esse privilegia altarium mobilium presbyteris & mendicantibus concessa passim monent canonistae.

Sedes episcopi & presbyterorum in interiore bematis parte.

§. XVII. Praeter intermedium altare in sanctuario parva alia mensa erat, quam Graeci *πρόθεσιν* appellant, in qua dona praeparabantur. Et ad interiorem apsidem seu circuitum in superiori pariete episcopi & presbyterorum throni, seu sedes conjunctim dispositae erant, semicirculum efficientes. Sedes episcopi erat in medio e regione altaris & sublimior, velamine quodam cooperta, ad denotandam episcopi dignitatem, adeo ut sedens episcopus & altare & populum recta prospiceret, sedes vero presbyterorum erant ad utrumque latus, sed depressiores. Hinc Athanasius (b) episcopi & presbyterorum sedes appellat *θρόνον καὶ συμπέλλια thronum & subsellia*. Et Nazianzenus (c) de presbyteris tamquam splendido ecclesiae senatu loquens, eorum sedes *thronos secundos* appellat. Latinis vero thronus episcopi usitatus *sedes & cathedra* dicitur. Conjunctae autem erant episcopi & presbyterorum sedes, quia ex veteri disciplina episcopi & presbyteri senatum seu presbyterium ecclesiae constituebant, in quo ecclesiastica negotia tractabantur. A forma vero & dispositione sedum ali-

(a) *Trid. sess. XXII. in decreto de observand. in missae celebrat.* (b) *Athanas. epist. ad Solitar.*

(c) *Nazianz. carm. Jambic. XXIII.*

aliquando* veteres presbyterium appellant *spiritua-*
lem coronam (a) & *ecclesiae coronam* (b): erat-
 que corona ista illustrior ecclesiae pars, in qua
 vis christiani sacerdotii residebat.

Ecclesiae atrium.

§. XVIII. Extra ecclesiam stricte sic dictam
 erant alia aedificia, quae ad ipsam ecclesiam
 pertinebant, & aliquando etiam ecclesiae nomi-
 ne veniunt; sepimento enim & intervallo quo-
 dam antiquae ecclesiae donabantur, in quo aed-
 es multae ad usum ecclesiasticum erant exstru-
 ctæ. Ante ecclesiae fores quadratum aedificium
 erat, sed inferioris situs quam ecclesia, per quod
 aditus in ipsam patebat. Hujus aedificii medium
 sub dio erat, & atrium sive impluvium efficie-
 bat a qua parte totum aedificium *atrii* nomine
 liceat appellare, interiores vero partes porticus
 habebant columnis suffultas. In medio atrio
 erant aquae salientes, seu putei & canthari, seu
 conchae, seu alia aquarum receptacula. Scili-
 cet christiani ecclesiam ingressuri manus & ora
 lavabant (c): quum eucharistiam corporis Chri-
 sti manibus exciperent (d), ad eorum officium
 certe pertinebat, ut lotis manibus accederent.
 Horum fontium loco succedere, quae in tem-
 plorum valvis exponi solent, lustrales undae,
 quod Cangius adnotat (e): nec enim ad eucha-
Inst.jur.can.T.IV. X *ri-*

(a) *Ignat. Martyr. ep. ad Magnes. n. XXIII.*

(b) *Const. apostol. lib. II. cap. 28.* (c) *Euseb. lib.*
X. cap. 4., Paulin. ep. XII. ad Sever. Confer. Can.
gius com in Paulum Silent. (d) *Confer. Morin. de*
sacr. ordinationib. part. III. exerc. 12. cap. 3. (e) *Can-*
gius loc. cit.

rīstiam excipiendam necesse est, ut manus abluantur. Ceterum in his porticibus aut atrio poenitentes *flentes* dicti stetisse videntur, ut fidelium in ecclesiam introeuntium preces ex peterent (a): eoque loci etiam stabant pauperes stipem emendicantes; vetus enim disciplina non patiebatur, ut pauperes in ipsa ecclesia eleemosynam peterent, ne sacra agentibus Deumque precantibus molesti essent (b).

Ecclesiae exedrae.

§. XIX. Cetera extra ecclesiam aedificia generaliter *exedrarum* nomine veniebant. Exedra locus erat plures habens sedes: atque hinc aedificia omnia circum ecclesiam *exedrae*, quasi loca sessionis & quietis, dicta sunt (c). Pars *exedrarum* erat baptisterium, aedificium nempe satis amplum ecclesiae adiacens, in quo erant aquarum receptacula ad dandum statim temporibus baptismum (d). Inter *exedras* erat etiam *secretarium* seu *vestiarium*, Graecis dictum *διακονικόν*, aedificium nempe vasis & indumentis sacris asservandis addictum. Alias dicebatur *salutatorium* (e) & *receptorium* (f), quia moris fuit episcopis ante missarum celebrationem in eo sedere, & salutationes fidelium excipere, qui se eorum orationibus commendabant, aut aliquod iis negotium

(a) *Basilii M. can. LVI. & LXXV. Confer. Cassut. dissert. de veter. eccles. situ n. II.* (b) *Confer. card. Bona rer. liturg. lib. I. cap. 20. n. 5.* (c) *Confer. Vales. in Euseb. de vita Constant. lib. III. cap. 51.* (d) *Confer. superius dicta cap. VI. §. 7.* (e) *Greg. M. lib. IV. ep. 54.* (f) *Sidon. Apollin. lib. V. ep. 17.*

tium aperiebant (a). *Pastophoria* etiam ecclesiae adjacentia aedificia erant, sed recte videtur Binghamus (b) observare, ea non peculiare aedificium fuisse, sed potius generale nomen, quo omnes exedrae denotabantur: auctor enim apostolicarum constitutionum *pastophoria* sic describit, quasi essent aedificia ab utroque ecclesiae latere ad Orientem exstructa (c). In exedris erant bibliothecae, quas in celebrioribus ecclesiis in usum clericorum episcopi colligebant; & scholae omnium eruditioni positae, quibus in nova disciplina *feminaria* successerunt; & domus clericorum aliaque in usum ecclesiasticum comparata aedificia.

Cura diaconici cujus erat.

§. XX. Secretario seu vestiario praeerant diaconi, qui vasorum sacrorum, utensilium & rerum pretiosarum, quae eo loci reponebantur, curam gerebant, & ab iis etiam *diaconici* nomen derivatum est. At praecipuus diaconici inspector & custos aliquis presbyter plerumque fuit, qui a Graecis *σκευοφύλαξ* & *κειμηλιάρχης* (d), a Latinis vero posterioibus *sacrista* dictus est; existatque in decretalibus titulus *de officio sacristae*. In nova disciplina Latini plerumque *thesaurarium* & *sacristiam* confundunt; at olim thesaurarii officium sacrorum vasorum custodiam non continebat: *ad thesaurarium pertinet*, inquit Isidorus,

X 2

ostia-

(a) *Confer. card. Bona rer. liturg. lib. I. cap. 24. n. 2.* (b) *Bingh. orig. eccles. lib. VIII. cap. 7. n. 11.* (c) *Const. apost. lib. II. cap. 57.* (d) *Confer. Suerus v. σκευοφύλαξ*

ostiarum basilicarum ordinatio, incensi praeparatio, cura chrisinatis conficiendi, cura baptisterii ordinandi, praeparatio luminariorum in sacrario & sacrificiis. Simplex olim gerebat officium thesaurarius; at inde institutis beneficiis ejusmodi officium in ecclesiis cathedralibus & in collegiatis abiit in beneficium aut dignitatem interdum ex primariis; alicubi vero pristinam meri officii naturam retinet, quod simplicitati vetustatis, cui officia clericorum merae erant obedientiae, magis convenit (a).

Ecclesiarum partes in nova disciplina.

§. XXI. Praesens Latinorum disciplina etiam in negotio ecclesiarum a veteri multum distat. Constant apud Latinos ecclesiae ferme duabus partibus interioribus, nave & sanctuario. In sanctuario ex veteri more etiam altare collocatur, & majus dicitur; verum adytorum religio jampridem paene nulla est, & secus altare, dum sacra mysteria celebrantur, etiam feminae accedunt (b): quod est contra ordinem in ecclesia necessarium, & divinis mysteriis detrahit. Presbyterium & chorus confunduntur, & ipsi clerici liturgiae tempore in sanctuario locum habent & ministrant. Ecclesiae navis ex utroque latere altaribus minoribus redundat contra morem vetustatis, quae unum altare in una ecclesia adgnoscebat. In navi loca virorum & mulierum parietibus ligneis non distinguuntur, quin po-

(a) *Molan. de canonicis lib. II. cap. 13.* (b) *Confer. Christi. Lupus in can. Trullan. LXIX. tom. 3. oper. E. V.*

potius in frequentioribus ecclesiis viri mulieribus commisti sacris mysteriis adstant, idque in tanta morum corruptione religionis sanctitati plane non convenit, tantumque pristinus mos quodammodo viget in pagorum ecclesiis. Etiam pulpitum in ecclesiae nave hodie est, sed tantum ex eo praedicatores verba faciunt, & raro admodum cantui inservit. In parte ecclesiae inferiori baptisterium collocatum est, quod parvum est aquarum receptaculum, ab exedris in ecclesiam translatum. Paucae sunt ecclesiae, quae habent atrium & plerumque vel omnino tectum, vel prorsus patens, nec in atrio fontes sunt. Habent vero ecclesiae diaconicum sive secretarium, in quo vasa & indumenta sacra asservantur, estque ut plurimum ipsi ecclesiae adhærens aedificium. Pars etiam nostrarum ecclesiarum est *turris campanaria*, ut vocatur, in qua campanae, quae signum praebent, sacra mox celebrari, collocatae sunt. Campanae pluribus saeculis ignotae, sed jam ante saeculi sexti finem earum sonitu apud Latinos ad divina officia fideles convocabantur, quod Martenius (a) probat. Postremo majores ecclesiae & praesertim cathedrales habent adjacentes domus, ubi episcopi alii-que clerici iisdem inservientes inhabitant.

Consecrationis ecclesiae minister episcopus.

§. XXII. In ecclesiis aedificatis divina officia ex veteri disciplina vetantur celebrari, nisi prius illae consecrentur, aut saltem benedicantur. Est autem consecratio actus sacer & sollemnis, quo
epi-

(a) *Martene de antiq. eccl. discipl. cap. II. n. 11.*

episcopi ministerio per varios ritus & caerimonias ecclesia cultui divino addicitur. Consecrationes istae Latinis etiam dicuntur *dedicationes*, Graecis etiam *ἐγκαίνια*: dum ecclesiae consecrantur, primum in usum deducuntur: & *dedicatio* & *ἐγκαίνια* initiationum & primum rerum usum designant, quod summus Mazochius pluribus demonstravit (a). Tantum episcopus proprius ecclesiam consecrat, ille nempe in cujus parocchia novus titulus eadificatus est: nec tanta potestate presbyteri donantur (b): docentque passim canonistae ecclesiarum consecrationes ordinis episcopalis, non jurisdictionis esse (c). Immo ex veteri disciplina ad ecclesiae consecrationem plures episcopi vocari & convenire solebant (d), qui praesentia & sermonibus suis augebant solemnitatem. Hinc occasione dedicationum ecclesiarum frequentes synodi celebratae, qualis est synodus Antiochena anno CCCXLI, inde in *encaeniis* dicta (e). Ex nova disciplina non amplius ad ecclesias dedicandas plures episcopi conveniunt, recteque solus proprius episcopus, aut ejus auctoritate alius hoc officium peragit. Interim quousque ecclesia consecratur, benedici potest per presbyterum ab episcopo delegatum, & ita etiam idonea evadit ad divina officia etiam ad

(a) Mazoch. de Camp. amphith. cap. III. & ep. de dedic. sub ascia. (b) Conc. Bracarenf. l. can. XXXVII.

(c) Confer. Barbosa de off. episc. allegat. XXVII.

(d) Euseb. de vit. Constantini lib. IV. cap. 43., August. ep. CCLXIX. (e) Confer. Cangius in glossar. v. encaenia.

ad divinum sacrificium, modo adfit altare ab episcopo consecratum.

Ritus, quibus ecclesia consecratur.

§. XXIII. Dedications ecclesiarum sunt antiquissimae, at non semper iisdem sollemnibus ritibus peractae. Quarto saeculo magna pompa oratoria dedicabantur, & convenientes episcopi variis sermonibus, hymnis, precibus diem festum augebant (a): ritu vero Romano etiam sanctorum reliquiae sub altari condebantur (b). Sed ex nova disciplina a pluribus saeculis apud Latinos inducta multis ritibus abundat ecclesiae consecratio. Etenim praecedit jejunium, & vigiliae coram reliquiis sub altari immittendis cantantur: ecclesia exterius ter aqua & sale benedictis adspergitur: interius in ecclesiae pavimento alphabetum Graecum & Latinum describitur: altare peculiari ritu consecratur: item ecclesia interius ter aqua, sale, cineribus & vino benedictis lustratur: reliquiae sub altari conduntur: parietes & duodecim ibi depictae cruces chrismate unguntur. Qui alique ritus varias preces & hymnos adjunctos aut interpositos habent. Ex his ritibus antiquissimus est mos sub altari martyrum reliquias recondendi, isque ab ecclesia Romana ad alias derivatus est. Et recte videtur sentire cardinalis Bona (c), in consecrandis ecclesiis adhibitas reliquias ab antiquo christianorum more, qui ecclesias excitare consueverunt super martyrum coemeteria, in quae tem-

pore

(a) *Euseb. loc. cit. cap. 45.* (b) *Ambros. ep. LIV.*

(c) *Bona rer. liturg. lib. I. cap. 19. §. 5.*

pore persecutionum ad sua mysteria celebranda saepe solebant convenire. Ceteri ritus labentibus annis inducti sunt, eorumque aliqui eo spectare videntur, ut dedicatio ecclesiae baptismum adumbret: idque secundum doctrinam patrum, & in primis Augustini, qui allegorico dicendi genere aedificationem & consecrationem ecclesiae, quasi baptismi imaginem depingit (a). Sane ex sententia Ivonis Carnotensis trina externa ecclesiae adpersio triplicis in baptismo immersionis sacramentum est, & alphabetum umbra est institutionis catechumenorum, quae baptismum antecedit (b). Altare ante saeculum quintum non peculiari consecratione, sed contactu corporis Christi consecratum censebatur, quod Thiersius observat (c); at inde peculiaris altarium consecratio recepta est. Ceterum dies consecrationis inter annua festa ecclesiarum celebratur: cujus disciplinae etiam in antiquis monumentis prostant exempla (d).

Actus profani procul ab ecclesia.

§. XXIV. Quando ecclesiae per consecrationem cultui divino sunt addictae, plane iis, ut aedibus Deo sacris, tantum ad cultum religionis aliosque actus, qui eo spectant, utendum est, ut ita vere domus orationis dici possint. Itaque profani omnes actus; etsi non illiciti, ab ecclesiis procul esse debent, quales negotiationes, judicia praesertim criminalia, placita, civiles

(a) *August. serm. CCCXXXVI.* (b) *Ivo serm. de Sacram. dedicationis.* (c) *Thiersius dissert. de praecipuis altarib. cap. II.* (d) *Sezcm. lib. II. cap. 26.*

viles conventus, convivia, ludi theatrales, choreae, cantus lascivi & profana colloquia (a). Et quamvis primis saeculis agapas suas, quae erant convivia caritatis & religionis plena, in ecclesiis christiani agitarint; tamen inde quod in comessationes & ebrietates degenerassent, canones vetuerunt, ne in dominicis fierent (b). Similiter vasa sacra & ecclesiarum utensilia nec in profanos usus possunt adhiberi, quae est antiqua ecclesiae disciplina, nisi necessitas alendi pauperes aut redimendi captivos aliud exposculet (c). Contra ut omnes profanae actiones ab ecclesiis arcentur, ita honorem & reverentiam eis fideles exhibere oportet. Ipsi imperatores ecclesiam ingressuri diadema & custodias ante fores relinquebant, tamquam qui regis regum domum intrarent. Praeterea fideles ecclesiarum januas, limina, columnas, altaria amplecti & exosculari consueverunt in amoris. & reverentiae signum.

Quando imagines & statuae sanctorum in ecclesiis receptae.

§. XXV. Quo vero omnia ad religionem & pietatem conspirent, interior ecclesiarum ornatu talis esse debet, qui fideles ad verum cultum & ad christiana officia excitare queat: quo spectant picturae, quibus Christi & sanctorum imagines & egregia scripturarum & virorum pio-

Inst. jur. can. T. IV.

Y

rum

(a) *Conc. Trullan. can. LXXVI., cap. IX. ex. de immunit. eccles., cap. II. eod. in 6.* (b) *Conc. Laodicen. can. XXVIII.* (c) *Confer. Bingham. orig. eccles., lib. VIII., cap. 10. §. 2.*

rum facinora exhibentur. Per tria priora & amplius saecula rarior vel nullus fuisse videtur in ecclesiis sacrarum imaginum usus, quod Petavius, N. Alexander, Christianus Lupus alique plures docent (a). Sacras imagines tum in ecclesiis proponere intempestivum erat, ne christiani potius mutasse simulacra, quam idololatriam reliquisse viderentur. Hinc merito Illiberitanis patribus placuit, *picturas in ecclesia esse non debere, ne quod colitur & adoratur in parietibus depingatur* (b). Coepit usus imaginum sanctorum in ecclesia quarto saeculo, & inde in dies collabente idololatria passim receptus & admissus est. Interim ignotae fuerunt in ecclesia imagines, quibus Deus & sacrosanta Trinitas corporea forma exhibentur. Deum enim utpote immensum & incorporeum figurari non posse veteres tenebant (c). Quin, ipse Christus ante synodum Trullanam potius agni typo, quam humana forma exhiberi consuevit (d). Ceterum sacrosanta Trinitas sub symbolis, quibus divinae personae apparuerunt, expressa est. Sane in templo Paulini Nolaee extructo trinitas ita depicta erat: stabat Christus agno, vox patris de caelo tonabat, & per columbam spiritus sanctus fluebat (e). Et passim in baptisteriis & super altare suspen-

sae

(a) *Petavius dogmat. theolog. lib. XV. cap. 13. N. Alexander diss. VI. in saecul. octavum §. 3. Lupus diss. de VII synodo generuli cap. 2. tom. 3. V. E.*

(b) *Conc. Illiber. can. XXXVI.* (c) *Confer. Petav. loc. cit. cap. 14.* (d) *Conc. Trullan. can. LXXXII.*

(e) *Paulin. ep. XII. ad Sever.*

fae erant columbae, quibus spiritus sanctus exprimebatur. Nulla corporea specie Deus pater exprimi posse videbatur, quod nulla visibili forma credebatur apparuisse. Inde vero invaluit, ut sub forma antiqui dierum exprimeretur, quod tempore Nicolai I. in ecclesia Romana nondum invaluerat (a). Porro non eodem tempore, quo sanctorum imagines, etiam eorum statuae receptae sunt: statuae enim utpote magis idolis gentium similes, etiam octavo saeculo minus frequentes erant: at inde assiduo usu apud Latinos receptae sunt; apud Graecos enim earum exiguus usus fuit, hodie vero nullae sunt (b). *Sacrae imagines & picturae inserviunt institutioni.*

§. XXVII. Admissis autem & probatis picturis, quibus sancti & scripturarum historiae exhibentur, ecclesiae exornantur, & earum ope christiani ad bonos mores & egregia facinora incitantur, & rudes in iis veluti legent religionis instituta. Immo praecipue ad rudium institutionem initio picturae in ecclesiis admissae videntur. Idcirco, inquit Gregorius M. (c), *pictura in ecclesiis adhibetur, ut si qui litteras nesciunt, saltem in parietibus videndo legant, quae legere in codicibus non valent.* Hinc in picturis & imaginibus nihil falsi, & quod honestatem & religionem minus doceat, exhiberi debet. Falsis enim, obscenis & lascivis picturis in errorem & morum perversitatem christiani inducuntur,

Y 2

non

(a) *Lupus cit. dissert. cap. V.* (b) *Confer. Grancolas l'ancien sacramentaire part. I. p. 72.* (c) *Gregor. M. lib. IX. ep. 105. & lib. XI. ep. 13. edit. Benedict.*

non fecus ac flagitiosus ille Terentianus adolescens pictum Jovis adulterium spectans lapsus & quasi caelesti magisterio seductus in stuprum. Et merito Tridentini patres statuerunt (a), *ut nullae falsi dogmatis imagines & rudibus periculosi erroris occasionem praebentes, statuantur*. Hinc muneris episcopalis est, fallas picturas ab ecclesiis abolere, praesertim si errorem in fide & bonis moribus instillent. Atque hac ratione plures ex recentioribus theologis tenent, rudi populo non expedire imagines trinitatis, quibus Deus pater & spiritus sanctus corporea forma exhibentur, in ecclesiis exponere: nam inde Deum esse corporeum facile sibi persuadebit. Quae sententia antiquitati convenit, nec contraria est ecclesiae decretis: nusquam enim nec in comitiis Tridentinis imagines trinitatis positivo aliquo decreto ecclesia recepit, quod Molanus docet (b).

Cultus sacrarum imaginum.

§. XXVI. Praeterea Christi & sanctorum imagines, quae institutioni & bono exemplo christianorum inserviunt, debita adoratione colendae sunt, idque contra iconoclastas synodus Nicaena II. constabilivit & Tridentina confirmavit (c). Debita autem adoratio sacrarum imaginum est externus cultus & honoraria adoratio, seu veneratio, qua Christum ipsum & sanctos

co-

(a) *Trid. sess. XXV. in decr. de invocat. sanctor.*

(b) *Molan. histor. sanctar. imagin. lib. II. cap. 3.*

(c) *Conc. Nicaen. II. act. VII., Trid. sess. XXV. in decr. de invocat. sanctor.*

coram eorum imaginibus adoramus. Et caveant profecto episcopi & parochi, ne cultus iste ultra quam par est, extendatur, & ejus occasione inducatur superstitio: nam hac in re potius freno, quam calcaribus indiget vulgi religio, constatque historiae fide in quas absurdas praxes non minus Graeci quam Latini occasione cultus imaginum inciderint. Itaque saepe inculcandum rudi populo, imaginibus religiosum cultum exhiberi, non quod iis vis aliqua divina insit, vel quod ab iis sit aliquid petendum, vel in iis fiducia collocanda, sed quod delatus honor in sanctos redundet (a). Quoniam vero vulgus in re, quae sensus percellit, vix rectis limitibus continetur, hinc multae Occidentis ecclesiae, in primis Gallicana, septimo & octavo saeculo imagines sanctorum tantum ad institutionem admittebant, eis vero aliquem cultum exhiberi non patiebantur, non quod istae ecclesiae imaginum cultum superstiosum judicarent, sed potius quod superstitionem praecavere intenderent, quod post alios viros doctos Espenius observat (b). Cui disciplinae adeo adhaeserunt Gallicani antistites, ut integra ecclesiae unitate synodum Nicaenam II, qua cultus imaginum constabilitus est, reilecerint. At deinceps etiam ecclesia Gallicana debitam imaginum sacrarum adorationem admisit. Probatum ab ecclesia sacrarum imaginum cultus nihil mali aut superstitiosi in se continet: quid enim mali est sanctos in imaginibus venerari & excu-

(a) *Trid. loc. cit.* (b) *Espen. par. II. tit. 16. cap. 1. n. 15.*

seculari (a)? Quod si sero tandem imaginum usus in templis receptus est, id earum cultui nihil officit; nam cultus iste hypotheticus est, cujus generis doctrinae & in jure naturali & in religione plures sunt.

Ecclesiae consecratio non repetenda.

§. XXVIII. Sollemni ritu ecclesia consecrata, etsi enormi crimine polluitur, iterum non debet consecrari. Quemadmodum enim semel datus baptismus non iteratur, ita nec locus Deo dicatus iterum consecrandus est: quam rationem canon quidam sub nomine concilii Nicaeni proponit (b). Non repetitur vero consecratio, si ecclesia eadem maneat, vel saltem eadem hominum iudicio reputetur. Hinc si vetus ecclesia ex integro everta sit, & nova in veteris locum aedificata, nova ecclesia consecratione indiget. Contra si ecclesia per partes renovetur: quin si illaesis parietibus lignea aedificia casu consumuntur, & de novo fiant, consecratio non repetitur (c), nam prudenti iudicio ecclesia eadem perseverat. Porro nec ecclesiam iterum oportet consecrare, quod altare motum aut violatum fuisse dicatur. Saeculo XI. si motum fuisset altare, iterum ecclesia consecrabitur: quam disciplinam promovit decretalis sub Hygini papae nomine, qua scriptum est, *si motum fuerit altare, denuo ecclesia consecratur* (d). Et deinde quod ecclesia sit propter altare, non altare propter ecclesiam; videbatur motu

(a) Confer. Nat. Alexander diff. VI. in octavum saeculum. (b) Can. XX.D.1. de consecrat. (c) Cap. VI. ex. de consecrat. eccles. (d) Can. XIX. eod.

to altari integram ecclesiam iterum consecrandam, quam rationem S. Anselmus habet (a). Verum haec disciplina diu non stetit: nam inde Alexander III. rescripsit, non esse iterum ecclesiam consecrandam, quod altare motum fuerit, licet aliqui canones aliud innuere viderentur (b). Et profecto quum diversis ritibus ecclesia & altare consecrentur, altari moto aut fracto iterum non erat ecclesia consecranda. Quod si ecclesiam consecratam fuisse dubitetur, iterum consecrabitur (c), non secus ac iterum datur baptismus, si dubium sit, utrum collatus fuerit.

Polluta ecclesia reconciliatur.

§. XIX. Quamvis autem consecrata ecclesia quousque eadem perseverat, iterum non consecratur; tamen si palam polluitur, reconcilianda est, quod thema Passerinus (d) fuisse persequitur. Polluitur autem ecclesia humani sanguinis effusione & homicidio etiam, citra sanguinis effusionem in ea admissis (e), quod de effusione & homicidio per injuriam factis merito accipiunt canonistae: item emissionem humani seminis etiam licita (f), & ethnici aut excommunicati sepultura (g). Polluta ecclesia adiacens coemeterium etiam pollutum censetur, non contra (h). In ecclesia polluta divina officia & in primis missae sacrificium

non

(a) S. Anselmus lib. III. ep. 159. (b) Cap. I. ex eod. (c) Can. XVIII. eod. (d) Passerim. de pollut. eccles. (e) Cap. IV. & ult. ex. de consecr. eccles.

(f) Can. XIX. D. 1. de consecr., cit. cap. ult. & cap. V. ex. de adulter. (g) Cap. VII. ex. de consecr. eccles. (h) Cap. un. eod. in 6.

non licet celebrare, nisi prius reconcilietur; & si pollutio per sepulturam excommunicati sit, ante omnia cadaver, ubi discerni potest, effodiendum (a). Tantum episcopus ecclesiam pollutam reconciliat, idque per aquam vino & cinere admistam, & a se prius benedictam, qua adspergillo ex hyssopi herba parato ecclesia adspergitur non sine precum accessione. Hac autem caerimonia peccatorum reconciliationem designari theologi docent: eoque spectare videtur usus cineris, qui in publica poenitentia olim sollemnis erat (b). Ita videntes christiani ecclesiam, quae non peccavit, imagine poenitentiae reconciliari, delictorum horrore concutiuntur, & facile animadvertent, quantum ipsis ad peccatorum expiationem laborandum sit. Quod si ecclesia tantum benedicta poluatur, non sollemni reconciliatione opus est, sed tantum aqua benedicta etiam a praebytero lavabitur (c).

Reparatio ecclesiarum.

§. XXX. Exstructae ecclesiae identidem instaurandae & reparandae sunt, ut perpetuum maneant ad religionis exercitium. Sarciri autem debent ex bonis earundem ecclesiarum, quod omnino iustum est. Et sane ex veteri Latinarum disciplina in multis ecclesiis proventus ecclesiastici in quatuor partes, in aliis in tres tribuebantur, quarum partium una ecclesiis sarcendis & instaurandis cedebat (d). Temporis lapsu de-

(a) *Can. XXVII. cit. D. 1.* (b) *Confer. Essen. par. II. tit. 16. cap. 4. n. 23. seqq.* (c) *Cit. cap. ult.*
 (d) *Conf. Thomass. de benef. par. III lib. 2. cap. 13. seqq.*

defuevit partitio ista bonorum, & instituta sunt ecclesiastica beneficia, quibus uni beneficiario fructus beneficii sui percipere conceditur. At natura ipsa bonorum mansit immutata: bona transferunt cum onere suo: & beneficiarii meri sunt reddituum ecclesiasticorum procuratores. Hinc beneficiarii tenentur suorum beneficiorum ecclesias reficere; eidemque oneri etiam subiiciuntur omnes, qui decimas & alia bona ecclesiarum possident, etsi beneficiarii non sint (a), nisi ecclesia peculiares suos redditus fabricis addictos habeat. Beneficiariis autem incumbit reparatio, si eis supersint bona ultra frugalem sustentationem, ut Alexander III. rescripsit (b): ex bonis nempe ecclesiasticis primum ministrorum alimenta deducenda sunt. Quod si bona ecclesiastica non sufficiant, & ecclesia paroecialis instauranda vel reficienda sit; eam in rem christiani collectas pro religione sua conferre debent (c): pertinet enim ad christianorum officium loca habere ad religionis exercitium addicta. Cui juri consonat concilii Tridentini decretum, nisi quod episcopis etiam concedit, ut patronos & ceteros bonorum ecclesiasticorum possessores, & in eorum defectum paroecianos omnibus remediis opportunis cogant ad ecclesiam paroecialem instaurandam (d). Quod decretum utpote episcopis imperium tribuens, nec in regno nostro receptum est,

Z

(a) *Cap. I. ex. de eccles. aedific., conc. Roman. sub Eugenio II. can. XXV. Confer. Gonzalez. in cit. cap. I.*
 (b) *Cap. IV ex. eod.* (c) *Cit. can. XXV. conc. Romani.* (d) *Conc. Trid. sess. XXI. de ref. cap. 7.*

est: ubi sine regio ad sensu collectas ad reparandas ecclesias christiani non conferunt.

Summopere hic commendanda est Regum nostrorum circa Ecclesiarum restorationem eximia pietas, de qua sermonem habuimus T. I. harum Instit. Cap. 4. de Principum legibus circa res Ecclesiasticas, ubi adnotavimus Ferdinandum II. Siciliae Regem ad regni supplicationem decrevisse, ut quinta pars fructuum, qui Regio Patronatui pertinent in reparationem Ecclesiarum ejusdem Patronatus Regii, ipsarumque necessariam suppellectilem quotannis erogatur. Vid. T. 4. Sæculorum Sanctiõnum p. 171. & seq. vel T. 2. cap. Regni Siciliae p. 575. & seq. ubi ex integro Ferdinandi Regis constitutio habetur.

C A P U T XXXIII.

De asylo ecclesiarum.

Asyla apud Graecos, Romanos & Judaeos.

§. I. **V**Ox asylum Graeca est denotatque locum sanctum, quo confugientes sine summo piaculo avellere non licet. Apud Graecos templa, altaria, simulacra, luci sacri securitatis & asyli loca erant, quae si non initio saltem tractu temporis etiam quibusvis sceleratis eo confugientibus securitatem praestabant. Nempe templa sollemni consecratione rerum humanarum numero eximi, ac veluti in deorum patrimonio constitui credebantur. Quo fiebat, ut eo confugientes securi essent, tamquam in locis diis sacro positi & sub eorum custodiam recepti.

Et

Et qui ad templa confugientes nocebant, sacri-
legi censebantur, sibi que illatam injuriam dii
immortales credebantur inultam non relinquere,
quod ex Justino constat (a). Sed non omnia
Graecorum templa asylo aucta erant, sed quibus
consecrationis lege concederetur. Inde tempo-
re Tiberii per Graecas urbes licentia & impu-
nitas asyla constituendi invaluerat, & hinc com-
plebantur templa pessimis servitiorum: eodem sub-
sidio obaerati adversum creditores, suspectique ca-
pitalium criminum receptabantur, quod Tacitus (b)
testatur. Quamquam in gravioribus criminibus
antiquiores Graeci asylorum sanctitatem aliquan-
do eluserint, vel igne aris admoto, vel victu
confugientibus ad mortem usque denegato. Ro-
mae praeter Romuli asylum deinceps pauca tem-
pla & sacella perfugii loca fuerunt, quod viris
doctis observatum (c). Apud Judaeos vero sa-
pienter asyla constituta sunt: nam in deserto
altare asylum iis fuit, qui inviti & inconsulto
occidissent; at qui ex insidiis proximum suum
occidebant, ab altari ad mortem abducebantur (d):
republica Judaica deinceps suis sedibus recepta,
urbes asyli constitutae, in quibus itidem securi
erant, qui inconsulto occidissent; reis vero data
opera occidentibus tantum asylum proficiebat,
ne indicta causa poenas luerent (e). Nullum
in templo asylum constitutum est, ne homici-
da-

Z 2

da-

(a) Justin. lib. XXVIII. cap. 3. (b) Tacit. lib. III.
annal. cap. 60. (c) Lipsius excurs. in lib. III. annal.
Taciti cap. 30. (d) Exod. XXI. 14. (e) Numer.
XXXV. 8. seqq. Confer. Jo. Clericus in not.

darum praesentia & irruentium forte ultorum, vi divinus cultus temeraretur.

Qui in ecclesiis asylum invaluit.

§. II. Jure quoque asylorum Christi ecclesiae donatae sunt, quod privilegium a Constantini M. conversione coepit invalescere: quarto enim saeculo multa confugarum in ecclesiam exstant exempla, quae Jac. Gothofredus (a) congestit. Nulla autem ea, de re ante Theodosium M. lex lata est, saltem non exstat, nec latam fuisse, idoneis monumentis demonstratur. Ac sane asyli sanctitas christianis ecclesiis primum usu & consuetudine quaesita videtur, scientibus & pro religione sua non repugnantibus summis imperantibus. Nimirum miseris opem ferre semper episcoporum munus fuit, iique post pacem ecclesiae datam pro reis apud magistratus intercedere coeperunt ad poenae debitae remissionem aut saltem mitigationem (b). Hinc & innocentes vi oppressi & graviorum criminum rei ad ecclesiam confugere, auxilium ab episcopis imploraturi; dabaturque interim loci religioni & intercedentis auctoritati, ut confugientes, saltem qui misericordia & patrocinio digni videbantur, ab omni molestia tuti essent. Sane de Feventio cujusdam saltus conductore, qui sibi a domino possessionis metuens, ad ecclesiam Hipponensem confugerat, inquit Augustinus (c), quod ibi erat, *ut confugientes solent, expectans, quomodo per*
in.

(a) Gothofr. in L. I. C. Th. de his qui, ad eccles. confug. (b) Conc. Sardic. can. VII., & Hieronym. ep. II. ad Nepotian. (c) August. ep. CXV.

intercessionem nostram sua negotia terminaret. Et alio loco idem Augustinus confugientem in ecclesiam summo timore perculsum & episcopi auxilium invocantem repraesentat (a). Ex quibus moribus ecclesiarum asylum invaluit: quod in dies crevit, & clericorum nimio zelo & confugientium audacia civitati noxium & ipsi ecclesiae injuriosum evasit. Hinc christiani imperatores variis legibus ejus formam, modum & limites constituerunt, quandoque etiam abrogarunt.

Cujus potestatis est asyli in ecclesiis constitutio.

§. III. Et sane asylorum etiam in ecclesiis constitutio ad civilem potius quam ad ecclesiasticam potestatem videtur pertinere. Civilis potestas merum imperium ad animadvertendum in facinorosos homines a Deo accepit: nec jure evangelico ulla loci sanctitas est, qua rei a potestate juris gladii eximantur. Justinianus quoque aperte professus est, ecclesiis ab lege civili asylum conciliari (b). Ipsi ecclesiae patres id agnoverunt: etenim sublato per Arcadium ecclesiarum asylo, ad ejus restitutionem impetrandam Africani patres anno cccxcix legatos ad principes miserunt, ut pro confugientibus ad ecclesiam quocumque reatu involutis legem de gloriosissimis principibus mererentur, ne quis eos audeat abstrahere (c). Hinc quinque primis saeculis nulli prorsus exstant canones, qui de ecclesiarum asyulis decernant (d), quod probe sciebant epi

(a) *August. serm. XVIII. de verb. domini.* (b) *Novel. XVII. cap. 7.* (c) *Can. LXI. C. Afric.* (d) *Confer. Petrus Sarpi de jur. asylor. cap. I.*

episcopi, eam potestatem ad principes, pertinere, tantumque sibi intercedendi gloriam relictam esse. Porro qui inde de asylyis prodierunt canones, jussu & auctoritate regum in conciliis conditi sunt, ut exemplo esse possunt synodi Aurelianensis I. anno 10XI & Toletana XII. anno 10CLXXXI celebratae, quae jussu & auctoritate regum Clodovei & Ervigii asylyis ecclesiarum formam dederunt. Et profecto doli mali reus est Gratianus, qui canonem Toletanum ea parte, quae regis auctoritatem continebat, detruncavit (a). Sed temporis lapsu alia multis decretalium interpretibus insedit opinio, ecclesiarum nempe asylum & quidquid ejus rei est, uni ecclesiasticae potestati deberi. Quae sententia praefertim post Gratianum coepit: hic enim multos canones sive interpolatos sive supposititios collegit, quibus constare videtur, ab ecclesiastica potestate asyla pendere: & ejus aetatis interpretes, quin & pontifices, ferme ex solo Gratiano sapiebant (b).

Jure Romano qui asylyis excluduntur.

§. IV. Sanctitas asyli ecclesiis concessi ex sententia legum Romanarum praecipue ad sublevandos miseros vi oppressos spectabat, non ad invertenda aliorum jura, multo minus in gravibus criminibus proderat reis in ecclesiam confugisse, nisi quatenus episcoporum intercessionibus ad poenae mitigationem magistratus inflecterent, *Tem-*
po-

(a) *Can. XXXV. C. 17. q. 4.* (b) *Confer. Espen. dissert. de asylo templor. cap. III.*

porum cautela, inquit Justinianus (a), *non nocentibus*, sed *laesis datur a lege*: quae sententia omnium legum antecedentium de hoc argumento verum sensum patefacit. Itaque jure civili publici debitores, immo etiam privatis rationibus impliciti, asylo ecclesiarum non juvantur: ipsique clerici debita expungere jussi, si eos occultarent, vel non exhiberent (b). Item asylo non utebantur Judaei, qui se christianos fieri simulabant, ut criminum vel debitorum pondera evitarent (c). Et servis sine telo ad ecclesiam confugisse prodebat vno die, quo exacto restituebantur dominis, qui in sacerdotis & ecclesiae honorem debitas poenas remitterent (d). Concessit quidem inde Leo imperator & publicis & privatis debitoribus asyli privilegium; at interim confugae apud judicem conveniebantur, & ex causa judicati fiebat executio more judiciorum, salvo asyli jure, ex contumacia vero decernebatur missio in possessionem bonorum (e). Porro asylo ejecti homicidae, adulteri & virginum raptores, quod Justinianus lege quadam novella statuit (f). in qua publicis debitoribus iterum asylum denegatur. Quin boni interpretes in primis Cujacius (g) ex legis ratione, quae habet, legem innocentibus non laedentibus asylum proposuisse, inferunt,

(a) *Novel XVII. cap. 7.* (b) *L. I. & III C. Th. de his qui ad eccles. confug.* (c) *L. I. C. de his qui ad eccles. confug.* (d) *L. V. C. Th. eod.* (e) *L. VI. C. eod.* (f) *Cit. novel. XVII. cap. 7.* (g) *Cujac. in cit. novel.*

runt, jure civili omnia gravia crimina asylo ecclesiarum excludi. Nec his omnibus obstat Honorii & Theodosii constitutio, qua statuitur, *nemini licere ad sacrosanctas ecclesias confugientes abducere*, perduellionis poena in abducentes injuncta (a): nam id spectavit tantum privatos abductores, qui tumultus & seditiones in ecclesiis excitabant non magistratus, ac proinde lex peculiaris fuit quae confugientes a vi privata tutos faciebat, quod Petrus Sarpus (b) observat.

Episcoporum desideria de asyli amplitudine.

§. V. Interim vel ipsi sanctissimi episcopi asylum ecclesiarum amplissimum esse cupiebant, eoque securos reddi etiam publicos debitores & quorumcumque criminum reos. Ergo sublato per Arcadium ecclesiarum asylo, Africani patres ad imperatores miserunt legatos, qui *pro confugientibus ad ecclesiam quocumque reatu involutis securitatem impetrarent* (c). Nec sane ista episcoporum vota ex fine expensa damnanda videntur. In primis antiqui christiani & maxime episcopi a poenis capitalibus abhorrebant, nec ob crimina sanguinem effundi aequum judicabant, quod egregie Arnoldus demonstravit (d). Rei quoque ad ecclesiam confugientes curis episcoporum ad bonam vitam adducebantur; nec episcopi apud magistratus intercedebant, nisi rei conversionem promitterent (e). Hinc iis publica

(a) L. II. C. eod. (b) Petr. Sarp. de jur. asylor. cap. I. (c) Can. LXI. C. Afric. (d) Arnold. represent. prim. christ. lib. V. cap. 4. (e) Confer. E. ssen. dissert. de asylo templor. cap. I.

lica indicebatur poenitentia, quae mors prolixior videri poterat, adeo antiquior poenitentia multis cruciatibus, squallore & diuturnitate reos conterebat. Et profecto nescio, an utilius exemplum delinquentes poenitentia sua quam sanguine effuso civitati praeberent. Qua in re gaudeo cum humanitate nostrorum episcoporum consentire praesentis temporis philosophiam, quae ubi rei meliores fieri possunt, sanguinis poenas minus probat. At ex forma ab episcopis expetita in Romano imperio asyla nunquam statuta videntur: forte quod delinquentium poenitentia non semper sincera erat, atque ita satius visum, reos debitis poenis punire, quam hominibus bonam vitam simulantibus implere civitatem.

In Occidente mediis saeculis asyla amplissima.

§. VI, Novis per Occidentem institutis regnis & civilis & ecclesiastica potestas ad humanitatem conspiravit, atque asyla ecclesiarum omnibus eo confugientibus etiam ad poenarum publicarum remissionem profuerunt. Sane in concilio Aurelianensi I ex consensu & jussu regis Clodovei (a) & in concilio Toletano XII. *consentiente pariter ac jubente* Ervigio rege (b) statutum est, ut criminum rei ad ecclesiam confugientes non abducantur, nisi abstrahentes sacramento suo poenae remissionem promittant; ipsi vero rei abducti privatis injuriis satisfaciant. Et capitularia regum Francorum sublato antiquo capitulo.

A a

tu-

(a) *Conc. Aurelian. I. can. III., epist. synodi ad Clodoveum 10 n. 4. concilior. general.* (b) *Conc. Tolet. XII. can. 10.*

tulo, quo rei mortis asylo excluduntur, saepe edicunt, confugientes ad ecclesiam tutos esse, nec inde ad poenam vel mortem abripi posse, sed rectorum ecclesiarum intercessionibus membra & vitam eis concedi, interim vero reos parti laesae satisfacere (a). Sic extensum in Occidente asyli privilegium moribus populorum, qui nova ista regna fundaverant, conveniebat, & praeterea reipublicae non admodum incommodo fuisse videtur. Magna erat apud barbaros ecclesiarum veneratio, adeo ut reges nefas putarent ab ecclesiis abductos morti tradere, quod de regibus Gunthramno & Childeberto Gregorius Turonensis (b) refert. Germani quoque alique septentrionales populi ex antiquis gentis suae moribus a poenis sanguinis abhorrebant, tantumque multis crimina etiam gravissima expiabant, nec ad mortem usque punire solebant, nisi quum de reorum conversione plane desperaretur. Quibus moribus accedens christiana mansuetudo & sacerdotum intercessio, quid mirum si rei ad ecclesiam confugientes remissionem poenarum publicarum impetrarent, tantumque ad privatam injuriarum satisfactionem cogerentur? Porro ad ecclesiam confugientes canonicae & rigidae subdebantur poenitentiae, qua non minus in bonos christianos, quam bonos cives proficiebant, & dum facinorosi bonam mentem induebant, nihil mali civitati timendum videbatur.

Rei

(a) *Lib. I. capit. 134., lib. V. cap. 155. & can. IX. C. 17. q. 4.* (b) *Gregor. Turonensis hist. Franc. lib. IX. cap. 3. & 38.*

Rei asylo dejecti jure decretalium.

§. VII. Post saeculum XII. ampla illa ecclesiarum sanctitas, qua facinorosi omnes asylo defendebantur. sensim pontificum decretalibus restricta est. In primis Innocentii III. ad Scotiae regem rescripto publici latrones, & nocturni agrorum depopulatores asylo exclusi sunt (a). Et a Gregorio IX. asyllum denegatur iis, qui ea spe atque consilio deliquerint, ut sacro se loco tueantur: quique in ecclesiis & earum coemeteriis occiderint, aut membra mutilarint; legis enim auxilio indigni sunt, qui in ipsam legem, quae tuetur, peccant (b). Quae ratione docent canonistae, generatim asylo non juvari, qui in loco sacro quodvis aliud etiam leve crimen admiserint (c). Nec asylo juvantur, qui ex insidiis homines interimunt, quod ex lege Mosaica in ecclesiam Gregorius IX. derivavit (d). Suis quoque rescriptis in Angliam declaravit Julius II. anno 1504 reos laesae majestatis, homicidas & depraedatores ab ecclesiis abducendos. Nimirum canonicis poenitentiis desuetis non amplius is esse coepit asylorum fructus, qui olim optatissimus, reorum per publicam & longam poenitentiam conversio, sed potius tristissimus, reorum impunitas, atque ita ecclesiae sceleratorum hominum videbantur receptacula: Hinc non solum restringenda, sed omnino abolenda pro criminibus videbantur asyla, praefer-

A 2

tim

(a) *Cap. VI. ex. de immunit. eccles.* (b) *Cap. ult. ex. eod.* (c) *Covarruv. var. resolut. lib. II. cap. 20.*

(d) *Cap. I. ex. de homicid. volunt.*

tim quando nullus erat locus episcoporum intercessionibus ; tantumque pro miseris & oppressis integra manere oportebat. Ex hac ratione permulti auctores multis delinquentibus canonum verbis non comprehensis ex regulis interpretationis asylum denegandum statuerunt , ut apud Petrum Sarpum videre est (a). Immo in Gallia asylorum sanctitas iamdiu nulla est , nisi eorum qui aere alieno gravantur , ut ad ecclesiam confugientes neque capi neque abduci queant (b) .

Loca asyli .

§. VIII. Quod vero spectat ad loca , quae confugientibus praeftabant securitatem , initio quidem solae ecclesiae ex parte interiore , & praefertim altare , videntur asylum praebuisse (c) : inde Theodosii junioris lege hoc privilegium ad ecclesiarum exedras , quae alias *septa* vocabantur , extensum est (d) , ne reis continuo in ecclesiis versari necesse esset , & ne irruentium sive confugientium vesania loci sanctitatem violaret . Deinceps concilium Toletanum XII. Ervigii regis jussu pro asylo triginta passus circum ecclesias concessit (e) : & canon quidam sub Nicolai papae nomine majori ecclesiae quadraginta , minoribus vero seu capellis triginta passus per circuitum septi loco tribuit (f) . Plures

ec-

(a) *Sarpi de jur asylor. cap. V.* (b) *Confer. Thomass. de benef. par. II. lib. 3. cap. 100 & Cabassut. theor. & prax. jur. can. lib. I cap. 19. n. 21.* (c) *Confer. Jac. Gothofr. ad lib. IV. C. Th. de iis qui ad eccles. confug.* (d) *Cit. lib. IV. C. Th.* (e) *Can. XXXV. C. 17. q. 4.* (f) *Can. VI. eod.*

ecclesiae sine exedris erant, & hinc iustum visum aliquo extra ecclesiam spatio reos tutos esse, ut naturae necessitatibus extra ecclesias satisfacerent. Formae sub nomine Nicolai praescriptae jus canonicum recentius se accommodavit: & hinc solliciti fuerunt interpretes in primis Covarruvias (a), quodnam spatium quisque passus contineret, ut ita quae esset asylo- rum amplitudo constaret. Fruebantur autem tanto privilegio etiam ecclesiae non consecratae, modo divina mysteria in iis celebrarentur, quod Gregorius IX statuit (b). Domus quoque ubi habitant episcopi & parochi, asylo auctae, praefertim si intra septorum ambitum essent. Et posteriori aetate etiam crucibus per vias defixis, coemeteriis etiam ab ecclesia se junctis, xenodochiis & aliis locis religiosis asyllum communicatum est: quin presbyter eucharistiam ad infirmos deferens asyllum conciliavit. Sed sensim extensio asyli per quadraginta aut triginta passus circum ecclesias in christianis provinciis desuevit (c), nec cruces in viis positae, nec omnes ecclesiae reos eo confugientibus sanctitatem procurant.

Quomodo rei ad asyllum confugere debent.

§. IX. Vt vero in criminibus non exceptis locus sit asyli privilegio, reos sponte sua ad ecclesiam confugere oportet, ut hoc ipso declarent, se ecclesiae patrocinium implorare. Hinc
ti-

(a) Covarruv. *resol. var. lib. II. cap. 20.* (b) *Cap. IX. ex. de immunit. eccles.* (c) *Confer. Petrus Sarp. de jur. asylor. cap. V.*

titulus utriusque codicis non est de asylo ecclesiarum, sed de his, qui ad ecclesiam confugiunt. Ex qua doctrina inferunt interpretes, asylo non juvari, qui a lictoribus capti per loca immunita ducuntur; etsi in iis existentes ecclesiae auxilium implorent; tales enim confugiendi carent potestate: nec qui alia ratione non confugii causa ad ecclesiam accesserunt (a). Confugientes quoque ad ecclesiam arma deponere debent; eorum enim securitas non a vi, quam facere possunt, sed a loci sanctitate dependet, & si arma deponere noluerint, vi armata abducendi sunt, ipsisque trihuatur, si in abstractione aliquem eorum occidi contingat, nec violata immunitas loci intelligitur: quae omnia Theodosii junioris lege comprehensa sunt (b). Et apud nos ad ecclesiam confugientes statim per superiorem ecclesiasticum, iudicis saecularis auxilio, si opus fuerit, impetrato, armis spoliantur: quae eidem iudici tradenda sunt, praemissa tamen a superiori ecclesiastico contestatione, se sanguinis effusionem non intendere (c). Qui vero in ecclesiam recepti, asylo defenduntur, illic edere, cubare & dormire vetantur: quae ratione asyli sanctitas ad septa ecclesiarum extensa est (d). Et si reus asylo tutus sponte sua a loco immunitatis egrediatur, ipso jure excidit privilegio & libere adprehendi potest (e).

Poe-

(a) Confer. Gonzalez. in cap. VI. ex. de immunit. eccles. (b) L. IV. C. Th. de his qui ad eccles. confug

(c) Concord. un. C1515CCXLI. cap. II. n. 24.

(d) Cit. l. IV., can. XXXV. C. 17. q. 4. (e) Confer. de asylo templor. cap. V. n. 1.

§. X. Quoties vero reis prodest ad ecclesiam confugisse, inde per vim abduci nequeunt, & qui eos eiecerint, violatae ecclesiarum sanctitatis rei judicantur. Jure civili ad crimen majestatis pertinebat, si quis ad sacrosanctam ecclesiam confugientes invitos abduceret (a). Et sequenti aetate quando ea de re inter principes & episcopos conveniebat, abducentes ab ecclesia reos invitos excommunicationi & publicae poenitentiae subjecti sunt (b); & praeterea multam pecuniariam & fisco principis & ecclesiae inferendam subibant (c). Scitum est, leges Germanorum & Francorum, quae per universam ferme Europam permearunt, delicta omnia compositionibus pecuniariis expiasse. Spectabant autem hac aetate excommunicatio & multae praesertim eos, qui privata vi reos ab ecclesiis abducebant ad vindictam, & reipsa multi canones aperte privatos abductores innunt (d): nam quum secundum ejus aetatis disciplinam de asylo inter civilem & ecclesiasticam potestatem conveniret, ferme nulla erat occasio, cur episcopis invitis magistratus reos ecclesiis abiicerent. Et certe fragmentum sub nomine Augustini, quo Bonifacius comes, quod hominem ab ecclesia abduxisset, excommunicatur, (e), apochryphum est

(a) *L. II. & VI. C. de his qui ad eccles. confug.*

(b) *Can. XX. & XXXV. C. 17 q. 4.* (c) *Cap. reg. Dagoberti tit. VII. cap. 4. ap. Balut. tom. I. capitul. P. 98., cit. can. XX.* (d) *Can. X. XIX. seq. C. 17. q. 4.* (e) *Can. VIII. eod.*

est: abhorret enim ab Augustini stilo, & ejus aetatis disciplina. Sed post saeculum X sensim multae cessarunt, & sola obtinuit excommunicatio, qua non minus privati, quam magistratus, qui reos ecclesiis per vim abducerent, puniti sunt. Posteriori enim aetate inter episcopos & magistratus de jure asylo coeperunt controversiae, quo factum, ut magistratus invitis episcopis confugientes ab ecclesiis abducerent. Apud nos secundum praesentem disciplinam integrum est episcopis contra magistratus (a), qui asylum violarint, censuras inferre; & qui reos inde abducunt, sive abduci praecipiunt, asylo privantur (b), nam legis beneficio gaudere non debent, qui in leges peccant.

De iudice in causa asyli & reorum abductione.

§. XI, iam vero ubi dubitatum, an ad ecclesiam confugientes asylo defendantur, cujus iudicis sit id decernere laici an ecclesiastici, a duobus ferme saeculis disputatur. Sed si res ex principiis suis expendatur, videtur constare, hoc iudicium ad iudicem laicum pertinere. Sane legibus principum asyla constituta sunt, eorumque iussionibus per plura saecula formam acceperunt, nec umquam principes hanc abiecerunt potestatem: magistratus autem de rebus civilibus iudicant. Porro Leo imperator legis, qua asylum ecclesiarum ampliavit ultra formam veterum legum, imperii magistratibus man-

(a) *Concord. an. Clj l. CCXLI. cap. II. n. 1. & 35.*

(b) *Cit. concord. cap. II. n. 21.*

mandavit executionem, excepta urbe regia, in qua ipse praesens, prout res ferret, quidquid vellet, statuere posset (a). His aliisque rationibus magistratus sibi iudicium adseruerunt, ubi dubium erat, an reus asylo uteretur: quae praxis per omnes christianas provincias recepta erat, quod episcopus Covarruvias testatur. Postquam cognitum est, reum asylo non juvari, idem magistratus eum asylo etiam absque episcopi venia abducit; siquidem exsequitur sententiam, qui illam dixit. Et deinde in specie, qua constat, confugientem asylo non gaudere, nulla ecclesiae fit injuria, si eum magistratus per vim abducatur; nam ecclesia in exceptis casibus confugientes non defendit, quod observat mox dictus Covarruvias (d), qui addit, hanc praxim moribus & praxi christiani orbis satis receptam esse. Quousque vero cognitio terminetur, satius erit, reum a loco immuni abducere & custodiae tradere, quam ad ecclesiam ponere custodiam; id enim locorum sacrorum sanctitati plane non convenit; sed abductus reus in asylum restituendus est, si asylo locum esse decernatur (b).

Bulla Gregorii XIV. non recepta.

§. XII. Qui putant de asylo cognitionem, & reorum ab ecclesiis abductionem episcoporum esse, praesertim bulla Gregorii XIV. quum alias nonnulli nituntur, cujus integram sententiam hic referre oportet. In primis summus pontifex indulta rescindit, quae praedecessores pontifices ali-

Inst. jur. can. T. IV.

B b

qui-

(a) *L. VI. C. de his qui ad eccles. confug.* (d) *Covarruvias lib. II. var. resolut. cap. 20. etc.* Confer. *Scripti de jur. asylor. cap. VI.*

quibus principibus fecerant, ut etiam in casibus quibusdam jure non comprehensis reos asylo abducerent, idque fecit ad jus uniforme in omnes provincias inducendum. Inde asylo abiecit laicos publicos latrones, viarum grassatores, depopulatores agrorum, homicidia & membrorum mutilationes in ecclesiis seu coemeteriis admittentes, homicidas ex insidiis, *assassinos*, seu qui ad caedem hominis suam locant operam, aut conducunt alienam, & rei laesae majestatis in ipsius principis personam. Quo autem casu rei asylo non juvantur, porro Gregorius decernit, ut abductio de licentia episcopi & interveniente ecclesiastica persona ab eodem episcopo deputata fiat; & abducti rei in episcopi carceres truantur, nec ante magistratui tradantur, quam ab episcopo cognitum fuerit, excepti criminis reos esse. Vides hac decretali jus omne de asyliis constituendis, moderandis & eorum causis cognoscendis uni potestati ecclesiasticae tribui, sola obsequendi gloria summis potestatibus relicta. Sed decretalis ista nullibi christianarum gentium recepta est (a).

Nova forma abducendi reos ab asylo apud nos.

§. XIII. Post editam hanc Gregorii XIV decretalem controversiae de asyliis inter magistratus & episcopos praesertim emerferunt, dum utrique propria jura tueri existimabant. Apud nos vero controversiae istae graviores & frequentiores fuerunt: nam reges nostri nihil de juri-

bus

(a) *Confer. Espen. differ. de asyl. templor. cap. IX. n. II.*

bus majestatis imminutum volebant; at interim cum pontificibus aperte concertare detractabant. disputatum est apud nos usque ad pacta conventa inter Benedictum XIV & Carolum olim regem nostrum, quibus & alia argumenta contraversa & quae erant de asylo composita sunt. Etenim modus abducendi reos ab asylo praescriptus est, data forma judicio, quo an reus asylo defendatur, decernendum est, auctus numerus criminum asylo dejectorum, & locorum immunium numerus deminutus. Ac primum quidem si laicus, qui excepti criminis reus creditur, ab asylo abstrahendus est, magistratus, ubi adsunt indicia *ad capturam*, veniam petet ab ecclesiastico superiore, qui in urbe est episcopus ejusve vicarius, in dioecesi vero qui superioris vice fungitur; & abductio fiat praesente persona ecclesiastica, quam ille elegerit. Abductus reus traditur curiae saeculari, quae jurato & in scriptis cavet, se reum nomine ecclesiae detenturum, eumque integrum restitutum, si asylo locum esse decernatur. Quod si non restituitur, integrum est episcopo poenis canonicis contra magistratum veluti reum violatae immunitatis uti. Licentia autem ab ecclesiastico superiore denegata, magistratus eadem praestita cautione reum abducit, sed ea modestia, quae domum Dei decet (a).

Et forma judicii in causa asyli.

§. XIV. Civili custodiae reo tradito, magistratus de crimine actus judiciales conficere debet

B b 2

bet

(a) *Concord. cap. II, n. 1. seqq.*

bet, eosque quatuor mensium spatio ad episcopum transmittere. Episcopus vero unius mensis spatio decernet, utrum reus asylo defendatur. Quod si praescripto quatuor mensium spatio, actus judiciales episcopo non exhibeantur, poterit hic ex formula obligationis petere a magistratu restitutionem rei in ecclesiam, quam magistratui differre non licet. Et ubi unius mensis spatio episcopus non pronuntiaverit, an reus asylo gaudeat, ipso jure cognitio ad tribunal mistum Neapoli constitutum devolvitur.

Vt vero possit episcopus pronuntiare, reum asylo non defendi, indicia ad torturam sufficiunt. Cessat autem obligatio magistratus ad reum in ecclesiam restituendum, ubi episcopus pronuntiavit, reum asylo excludi: at interim nova obligatione se adstringit magistratus de reo iterum in ecclesiam restituendo, quo casu hic se defendens indicia, quae crimen exceptum ab asylo faciebant, diluerit. Licet autem vel fisco laico vel ecclesiastico contra episcopi sententiam ad tribunal mistum provocare, cui integrum est actorum ampliationem aut novorum confessionem praecipere, si ita expedire videatur.

Episcopi, quibus haec cognitio tribuitur, veri episcopi sunt, non inferiores praelati, etsi propriam habeant dioecesim & quasi episcopalem jurisdictionem, nisi isti speciali sedis apostolicae indulto hac cognitione augeantur (*Concord. loc. cit. n. 3. seqq.*). Satis implicatum indicium: & fortasse his pactis conventis ad asylum quod spectat, id tantum profecimus, quod atrociora crimina asylo dejecta sunt, & locorum immunitium numerus deminutus.

Quae

Quae crimina apud nos asylo exclusa.

§. XV. Porro pactis conventis multa crimina asylo excluduntur, quae antea eo defendebantur. In primis asylo exclusi sunt incendiarii, quique eis opem aut consilium scienter dederint, quoties dolo malo locum sacrum, aut religiosum, seu quaecunque urbana aut rustica praedia, aut greges incenderint. II plagiarii, hoc est qui per vim aut dolum homines abducunt, secumque retinent, ut pecunia se redimant: quique nuntiis sive litteris sive alias res exposcunt, metum sive mortis sive incendii facientes. III venefici, qui scienter & dolo malo & animo nocendi componunt, vendunt, praebent venena, licet effectus secutus non fuerit. IV *assassini*, hoc est, qui mandant aut mandatum suscipiunt ad caedem hominis, quique iis opem aut consilium dant, quamvis mors secuta non fuerit, modo perventum sit ad actum proximum, nempe vulnus. V latrones & grassatores viarum sive publicarum sive vicinalium, licet semel id crimen admiserint, nec ipsas personas laeserint. VI qui noctu quovis instrumento sive arte domus, tabernae, sive alias cellas promptuarias intraverint, substulerintque tantum, unde poenam mortis mereantur. VII qui simulato curiae nomine noctu domus ingrediuntur, ibique vel furantur, aut vim mulierum honestati inferunt. VIII qui mensae publicae argentariae tabulas, sive syngraphas adulterant, sicut & qui falsa mandata conficiunt, quo depositas in iis pecunias exigant. IX mercatores, qui dolo malo decoxerunt. X quaestores, sive exigendae pecunae fiscalis praefecti, si in recep-
pris

ptis pecuniis id furtum aut fraudem admittant, ut locus sit poenae ordinariae; ut & publicis argentariis tabernis praefecti ministrique, & publicorum montium ministri, qui in pecuniis aut pignoribus fidei suae conceditis ejusmodi furtum admittunt, ut legitimam poenam mereantur: quo eodem jure censentur, qui universitatum regni pecunias solent conservare - XI. rei laesae majestatis in primo & secundo capite, sed in postrema specie continentur tantum qui ministris ab rege jurisdictionem accipientibus personalem injuriam inferunt. XII qui ab asylo reos abstrahunt aut abstrahi jubent. XIII. qui in locis asyli homicidia, aut mutilationes membrorum, aut alia crimina, quae jure communi poena sanguinis aut triremium vindicantur, ut & ii, qui asylo exeuntes eadem crimina, admittunt. XIV abutentes confugio, quoties auctoritate episcopi in aliam ecclesiam translati, nec se a maleficio abstinent (a). Postremo confugio excluduntur depopulatores agrorum, haeretici, litteras apostolicas falsantes, homicidae praemeditati & rei falsae monetae (b).

Loca, quae asylum non praestant.

§. XVI, Pactis demum conventis apud nos numerus locorum immunium deminutus est. Etenim asylum amplius non praestant ecclesiae rurales, in quibus eucharistia non servatur, modo non sint paroeciales, aut ad curam animarum addictae: item oratoria vulgo capellae in do-

(a) *Concord. loc. cit. n. 9. seqq.* (b) *Concord. loc. cit. n. 34. seq.*

domibus privatorum & nobilium exstructae ; etsi publicarum capellarum privilegio nitantur & aditum habeant ad viam publicam : tum etiam capallae arcium castrorumque clauforum , licet in iis eucharistia custodiatnr . Nec asylo donatur turris campanaria ab ecclesiis & earum parietibus sejuncta ; nec ecclesiae derelictae , sicut nec horti , viridaria & alia loca ecclesiarum & aedium religiosorum parietibus & claustro non comprehensa ; item nec tabernae & domus muris ecclesiarum & monasteriorum adnexae , licet interius cum ipsis communicent . Domus vero , in quibus habitant paroichi alique ecclesiastici , ad curam & custodiam ecclesiarum addicti , gaudent asylo , modo ecclesiis conjunctae sint , & interius in eas aditum habeant , refertque parum an etiam ad viam publicam aditus pateat . Ceterum in ecclesiis asyli spatium , quo securitas praestatur , non extenditur ultra atrium , quoties muro circumdatum est , porticus , scalas & portas tam a fronte quam a latere & ad spectum anteriorem (c) .

Quidquid seculi Principes circa Ecclesiarum asyllum sanxerunt sequentibus articulis complectemur .

I. Quamvis in regno nec publicatae , nec receptae fuerint tum Bulla Alias Gregorii XIV. tum Bulla Ex quo divina Benedicti XIII. , nec Bulla Clementis XII. In supremo iustitiae folio ; quibus permulta doctrinarum capita , circa localem immunitatem pertractantur ; nihilo tamen secius ex Regio Caroli

(a) Concord. loc. cit. n. 26. seqq.

rolè Barbonii diplomate sub die 29. Augusti an. 1750. executoria concessa est Bullæ Benedicti XIV. quæ incipit Officii nostri; simulque aliis duabus in dicta Bulla relatis nempe Bullis Benedicti XIII., & Clementis XII., quoad illos tantum articulos, qui qualitatem delictorum quæ ab Ecclesiastica immunitate excluduntur, & probationum a curiis laicalibus factarum, sive faciendarum super quibus immunitatis exclusio definiri debet, respiciunt; haud vero quoad alios articulos, qui juribus regis, regisquæ jurisdictioni, atque regis privilegiis, & moribus opponuntur, antea quomodo libet lædunt, verba sunt prælaudatæ Regiæ Constitutionis, quam una cum Bullis summorum Pontificum adeas in T. 5. Sic. Sanct. p. 170. & seq.

II. Ex prædicta Caroli Constitutione patet in examine delictorum, quæ jure asyli privari debent, nec non probationum, quæ in similibus judiciis institui necessum est, prius Regni leges inspiciendas, deinde juxta Pontificias Bullas jam regno receptas contraversiones omnes finiendas. Eam ob causam ab instituto nostro minimè alienum esse ducimus Alfonsi Regis Capitulum 71. hic exscribere, eo quod per multa disputationum capita ex eo definiri queant. „ quantum ad Ecclesias attinet, quæ hactenus in eis latitantibus fiduciam præstare solebant ob locorum reverentiam jus comune servetur: quo jure agrorum populatores, fractores itinerum (nempe grassatores) homicidæ ex proposito, quocumque in loco homicidium perpetretur, delinquentes in quavis specie delicti in Ecclesia, prope Ecclesiam, aut contra Ecclesiam, uti sacrilegi quibus in eis commorari non convenit, sed in carcere, ad Ecclesias confugientes receptari prohibentur; ideo

impunè per officiales loci capi possunt, & juxta eorum demerita puniri. Attendant igitur Ecclesiarum Prælati ut singulorum intra Ecclesiam confugientium causas inquirent, ut huic nostræ legis convenientia diligentius exequi valeant. „ *Huc usque Alfonsi lex, ex qua colligitur non solum homicidia & mutilationes in Ecclesiis, vel Cæmeteriis perpetrantes aut ex Ecclesia occidentes eos qui extra Ecclesiam sunt, jure asyli privandos esse juxta constitutionem Benedicti XIII.; verum delinquentes in quavis specie delicti in Ecclesia prope Ecclesiam aut contra Ecclesiam ad mentem legis Alfonsi.*

III. Cum vero scelesti homines asylo Ecclesiæ ad facinora perpetranda abuterentur, sapientissimè cautum est nostris legibus, ut qui ad Ecclesiam confugerint eo patrato crimine, pro quo juxta Canones, & leges potius asyli jure privari deberent, possint nomine Ecclesiæ secularibus carceribus mancipari cum advertentia Fisci Patroni Magnæ Regiæ Curiae. Idem observari præscribitur circa eos qui etsi immunitate frui debeant minis tamen pravoque animo timorem alicui injiciunt, vel qui dum sacro asylo gaudent furta patrent vel alio facinore aliquem lædant. Ad hujusmodi autem reos ab Ecclesiis extrahendos brachium Ecclesiasticæ potestatis requiritur; quod ubi ab Episcopis denegetur ad potestatem æconomicam per Fiscum M. R. C. recurratur. Absque ulla vero pecuniæ solutione prædictum brachium concedendum Confer. T. 4. Sic. Sanct. p. 271. & seq.

IV. Beneficio asyli Ecclesiastici privantur tum publici Nummuariæ mensæ officiales, tum Officiales in publica Triticorum horrea fraudem committentes, uti habetur in T. 6. Sic. Sanct. p. 494. & seq. Asylum non esse impedimento quominus reus contu-
Inst. jur. can. T. IV. C c max

max per sententiam proscribatur, declaratur in T. 5: Sic. Sanct. p. 115.

*V. Judici Regiæ Monarchiæ competit examen asyli Ecclesiastici, num scilicet confugiens ad Ecclesiam reus sit delicti excepti ab asylo quoad illas tantum Ecclesias quæ eidem immediate subjiuntur: in cæteris vero etiam regularium Ecclesiis Episcopalis potestatis est. Si vero regulares superiores renuent reum ad suas Ecclesias confugientes tradere, Judici Monarchiæ Brachium per curiam secularem implo-
ratur. Videsis T. 1. Sic. Sanct. p. 355. & T. 6. p. 209.*

VI. A sententiis Episcoporum super immunitate locali datur appellatio remedio revisionis ad Tribunal Regiæ Monarchiæ: quod si in priori instantia causa coram Pontificio, regioque Legato acta est, dabitur provocatio ad virum Ecclesiasticum Judicum Tribunalis Concistorii suffragiis accedentibus. Vid. Siculas Sanctiones in T. 5. p. 201.

VII. Ubi autem Episcopus aliquem reum ab Ecclesiæ asylo excludit, nequit in sententia clausulam adjicere, ut sub pœna censurarum teneantur laici officiales cautionem præstare, ut reum Ecclesiæ restituant, ubi in cursu processus indicia ultra torturam purgarentur. Confer hanc legem apud T. 1. Sic. Sanct. p. 530. In hoc articulo derogatum est legi Bullæ Benedicti XIV., quæ jubet Episcopos legem ponere, ut purgatis iudiciis reus Ecclesiæ restituitur.

VIII. Adversus plures ejusdem delicti reos, qui ad sacrum asylum in variis Ecclesiis diversarum diœcesium confugerunt, localis immunitatis causam in una eadem Curia Ecclesiastica peragi sancitur. Idcirco Episcopi diœcesium ad quarum Ecclesias confugerunt rei Juriconsultum uti proprium Assessorem, qui sententiam eorum pronunciet, eligere tenentur.

*IX. Tandem Ecclesiae in castris aliisque militari-
bus stationibus inclusae nulla immunitate locali gau-
dent ex Pontificio diplomate ad Regem nostrum da-
to . Vid. T. 6. Sic. Sanct. p. 295.*

C A P U T XXXIV.

*De sepulturis .**Sepultura apud gentes recepta .*

§. I. **Q**Uamquam non defuerint , qui putarent , nihil interesse , utrum hominum cada- vera supra an infra terram putrescerent , & hinc illud , *caelo tegitur , qui non habet urnam* ; tamen apud omnes ferme gentes etiam barbaras recepta & probata est mortuorum sepultura : quem gentium morem Grotius (a) pluribus illustrat . Indignum certe visum , corpus hominis , qui ceteris animantibus dignitate praestat , a feris bestiis dilaniari & in cibum absumi . Subducenda quoque erant ab hominum adspectu cadavera visu & odore foeda , ac veluti terrae debito soluto , matris operimento tegenda videbantur . Consulendum porro erat animarum quieti , quae ex ethnicorum theologia , quandiu corpora erant insepulta , incertae errare credebantur , *inops inhumataque turba* (b) . Quaecumque vero fuerit

Cc . 2

caus-

(a) Grotius de I. B. ac P. lib. II. cap. 19. (b) Virgil. Aen. VI. v. 325.

caussa inducťae sepulturae, ipsum sepeliendi officium non tam personae, quam humanitati praestari creditum est. Et hinc nec inimicis, nec hostibus invidenda videbatur sepultura; nullum enim cum victis certamen & aethere cassis, nec odia etiam cum humanitate fovenda erant (a): & si quis in insepultum cadaver incideret, saltem ei terram iniicere debebat (b).

Varii sepeliendi modi.

§. II. Varii autem apud gentes sepeliendi modi obtinuerunt. Condiebant Aegyptii mortuos, eosque domi servabant. Alii cadavera uti erant, humo obruebant: & alii inprimis Graeci & Romani cadavera cremabant & cineres sepeliebant. Humanior & antiquior mos apud gentes humatio, qua integra corpora humo tegebantur, videtur fuisse (c). Vitionem cadaverum & sepeliendorum cinerum usum militiae necessitas & putrescentium cadaverum multitudo videtur induxisse: qui mos semel usurpatus, inde moribus Graecorum & Romanorum receptus est, accedente praesertim veterum superstitione, qua credebant, igne excoqui sordes animorum, atque elementi levitate facile animos in caelum attolli (d). Per plura saecula apud Romanos ustio cadaverum stetit, etsi interim plures etiam humationem usurparent: tandem vero fortasse a Commodi imperatoris aetate sensim cadavera cremari desierunt; Commodus enim ipse

(a) Confer. Grotius loc. cit. §. 2. n. 6. & §. 3.

(b) Confer. Dempsterus paralipom. ad Rosin. lib. V. cap. ult. (c) Cicero lib. II. de legibus. (d) Gravi-
na de jure natur. & gent. cap. LXXVIII.

ipse & multi ex ejus amicis per humationem sepulti sunt (a). Vlpiani aetate frequens erat humatio, sepulcrum enim ille ita definit, *ubi corpus offave hominis condita sunt* (b). Adhuc tamen sub Theodosio M. cremationis. aliquis usus supererat (c) sed inde per omnia desit, & humatio iterum recepta est.

Christiani humatione usi.

§. III. Quod vero spectat ad christianos, in omni tempore pium & religiosum habuerunt mortuos sepelire; at rejecta crematione, humationem usurparunt: idque quia humatio benignior & humanior esset, & praesertim in spem futurae resurrectionis. Christiani enim mortuos suos omnino extinctos non credebant, sed potius usque in diem domini somno sopitos (d). Hinc quo tempore in christianos ethnici saeviebant, nihil quidquam injurius iis accidere poterat, quam si ethnici hanc ipsis decentem humationem denegarent, uti aliquando fecerunt, vel exponendo eorum cadavera immanibus belvis vel rapacibus avibus, vel ea cremando, & cineres in flumina vel ventos spargendo in futurae resurrectionis risum & contemptum (e). Saepe vero christiani prius cadavera condiebant & postea terrae mandabant. Hinc ethnicus ille apud Minucium Felicem vitio vertit christianis, quod corpora, dum vivant, odoribus non honestent, sed funeribus un-

(a) Confer. Bingham. orig. ecclesiast. lib. XXIII. cap. 2. §. 4. (b) L. II. §. 1. D. de religiof. & sumt. funer. (c) L. VI. C. Th. de sepulcr. violat. (d) Prudent. hymn. X. (e) Euseb. lib. V. cap. 1.

unguenta reservent (a). Condiendi cadaverum usus ab Judaeis in christianos videtur derivatus (Judaei enim unguentum in funeribus adhibebant (b)), eumque etiam necessarium fecit sepultura saepe data in locis, quo ad divinum cultum conveniebant, ut conditis cadaveribus omnis foetor abesset.

Sepulcra apud Romanos extra civitates.

§. IV. Apud Romanos siue corpora ipsa, siue eorum cineres urnis clausi sepelirentur, extra urbes sepulcra posita erant; qui mos praesertim posterioribus saeculis etiam apud Graecos obtinuit (c). Satis antiqua est lex XII tabularum, *hominem mortuum in urbe ne sepelito, neve urito*. Tantum qui legibus soluti erant, veluti ob virtutem clariores viri & imperatores & vestales in urbe sepeliebantur. Postea mos extra urbem mortuos sepeliendi intermitti coepit, & hinc eadem lex Duillio consule relata est, & ab Hadriano, Antonino Pio & Diocletiano confirmata, & ad reliquas Orbis Romani urbes siue municipia extensa est (d). Extra urbes vero sepulcra plerumque ponebantur ad vias publicas, cujus instituti rationem hanc Varro assignat (e); *quo praetereuntes admonerent, se fuisse & illos esse mortales*. Sepeliebant vero Romani

(a) Minuc. Felix in Octavio. (b) Joan. XIX. 29 & 40. (c) Confer. Potter. archæol. lib. IV. cap. 7.

(d) L. III. §. 5. D. de sepulcr. viol., Capitol. vit. Antonini Pii, l. XII. C. de religios. & sumtib. funer. Confer. Savaro in Sidon. lib. III. ep. 12. (e) Varro de lingua Lat. lib. V.

mani extra urbes, ne funestarentur sacra civitatibus, inquit Paulus jurisconsultus (e). Nimirum ethnicis persuasum erat, diis superis sacrata loca solo adspectu vel contactu rei funestae contaminari, polluique etiam sacerdotes, si vel funus viderent, vel funeris domum ingrederentur, quod Iac. Gothofredus observat (f). Erant autem sepulcra ista plerumque privata, perpauca publica: haec tamen necessaria erant propter pauperes, agris destitutos, quorum sepulturae locus publicus, quem *puticorum* nomine designabant, inserviebat, quod Kirchmannus (g) docet. Sepulcris istis sola cadaveris illatione religio accedebat, & locus ipse fiebat religiosus: quod ethnicorum theologia postulabat. Ethnici animabus divinos honores exhibebant, quod probat Guthenius (h), immo deorum numero adscribebant, easque ibi potissimum oberraturas credebant, ubi cadaver olim animae habitaculum conditum erat: ac ita sepulcra loca religiosa reputabantur.

Etiam christianorum sepulcra extra urbes.

§. V. Primis quoque saeculis christiani corpora suorum fratrum etiam extra urbes sepeliebant: nec enim quod leges publicae ceteris civibus denegabant, christianis poterant permittere. Hinc veteres scriptores de sepulcris & monumentis martyrum tamquam extra urbes con-

ti-

(a) *Paul. lib. I. sentent. tit. 21. §. 2.* (b) *Jacob. Gothofr. in l. VI. C. Th. de sepulcr. viol.* (c) *Kirchman. de funer. Roman. lib. II. cap. 14.* (d) *Guther. de jur. man. lib. I. cap. 18.*

stitutis in agris aut viis publicis loquuntur. Pace ecclesiae data idem institutum perseveravit, stantibus publicis legibus, quae urbanas sepulturas interdicebant. *Omnis civitas*, inquit, auctor quidam antiquus sub nomine Chrysostomi (a), *omne castellum ante ingressum sepulcra habet*. Et Theodosius M. invalescentem Constantinopoli urbanam sepulturam interdixit, & quae in urbe sive supra terram urnis clausa, sive sarcophagis corpora detinebantur, extra urbem transferri iussit, *ut humanitatis instar exhibeant, & relinquunt incolarum domicilio sanctitatem* (b). Quas rationes bona fide ab antiquis Romanorum legibus Theodosius videtur descripsisse: etenim secunda ethnicam sapit theologiam. Sexto saeculo etiam in Gallia sepulcra erant extra civitates (c). Interim longe lateque diffusa christiana religione, sensim invaluit urbana sepultura: sensim enim christianis concesso, ut prope ecclesias etiam urbanas eorum corpora quiescerent, una opera sepulturae urbanae admissae sunt: qui mores saeculo octavo & in Oriente & in Occidente iam recepti erant: eisque vim addidit Leo Sapiens, qui antiquam legem de sepeliendis extra urbem cadaveribus abrogavit (d).

Qui invaluit in ecclesiis sepultura.

§. VI. Extra urbes dum fratrum suorum corpora sepeliebant christiani, id procul dubio facie-

(a) Chrysost. hom. XVII. de fide. (b) L. VI. C. Th. de sepulcr. violatis. (c) Conc. Bracarense I. circa an. 15LXIII. can. XXXVI. (d) Leo sapiens novel. LIII.

ciebant vel in privatis sepulcris , vel in fornibus & catacumbis : quae loca dicebantur *cryptae* & *arenaria* , quod in arenarum profunda defoderentur , & *coemeteria* , quasi loca quietis & dormitionis . Incognita antiquis christianis fuit in ecclesiis sepultura , eaque post pacem ecclesiae datam sensim coepit invalescere ; quod christiani apud martyres , quorum reliquiae in ecclesiis conditae erant , post mortem quiescere pium & religiosum , & eos sibi demerendos aptum arbitrabantur . Hinc peculiari privilegio imperatoribus Constantino M. , Teodosio M. , Arcadio & Thodosio juniore datum est , ut in vestibulo ecclesiae apostolorum , in urbe regia extructae , eorum corpora quiescerent (a) . Et hoc ipso tempore in aliquibus ecclesiis praesertim Nolaë & Mediolani christiani vel in ipsis ecclesiis vel in earum exedris sepeliebantur : quod apertis argumentis Muratorius probat (b) . Id vero precipue intelligendum de ecclesiis extra urbes , quae tum plures erant : nam in urbanis ecclesiis cadavera humari tum non licebat , quod leges publicae urbanas sepulturas interdicerent . Successu temporis aucta christianorum vota , quibus post mortem martyribus sociari cupiebant : atque ita saeculis sexto & duobus sequentibus fideles laici in plerisque Occidentis ecclesiis in atrio vel porticu ecclesiarum sepeliebantur (c) ;

Inst. jur. can. T. IV. D d at

(a) *Euseb. lib. IV. de vit. Constant cap. 71. , Chrysost. hom. XXVI. in 2. ad Cor. , Nicephor. lib. XIV. cap. 58.* (b) *Murator. anecd. Latinor. diff. XVII.*

(c) *Conc. Bracar. I. can. XXXVI. , conc. Nannientense can. VI.*

at interim reges, episcopi, abbates, digni presbyteri & laici sanctitate conspicui in templis condebantur (a). Inde nono saeculo ferme episcoporum & parochorum arbitrio datum est decernere quosnam in ecclesiis sepeliri dignos putarent (b): qua ratione cuique christiano facile fuit a rectoribus ecclesiarum, tum ad rem avidioribus, sibi in templis dormitionis locum impetrare. Ita contra veterem disciplinam receptus mors cadavera in ipsis ecclesiis inhumandi, adeo ut sepulcra etiam familiaria in iis exstruerentur. Ceterum receptis in ecclesia sepulturis non bene viventibus consultum est: nam in locis conclusis aër afficitur tetrus cadaverum particulis, quibus respirationi & vitae noxius evadit.

Coemeteria loca sepeliendis christianis addicta.

§. VII. Quamvis autem a pluribus saeculis passim christianis omnibus sepultura in ecclesiis permessa sit; tamen etiam in nova disciplina fidelium dormitioni potius coemeteria quam ecclesiae videntur destinata. Sane passim cavent synodi recentiores, ut fideles in coemeteriis sepeliantur, tantumque selectis christianis, qui vel Deo sacri sunt, vel dignitate, vel virtutibus, vel nobilitate eminent, dormitionem in ecclesiis concedunt (c). Et concilia Mediolanensia sub S. Carolo (d) & rituale Romanum jussu Pauli V. editum sepeliendi in coemeteriis morem, ubi viger,

re-

(a) *Conc. Moguntin. can. LII.* (b) *Conc. Meldense can. LXXII.* (c) *Conf. Espenius part. II. tit. 38. cap. 2. n. 37. seq.* (d) *Conc. Mediolan. I. par. II. cap. 61.*

retineri jubent, restitui vero ubi intermissus est. Sunt coemeteria loca religiosa episcopali benedictione ad fidelium sepulturam addicta, & ipsis ecclesiis ut plurimum adhaerentia. Illatione cadaveris locus apud Romanos fiebat religiosus, at apud christianos diversa obtinet theologia, & coemeteria episcopali consecratione religiosa sunt, idque ex antiqua disciplina; sexto enim saeculo sepulcra solebant consecrari (a). Coemeteria ut plurimum ecclesiis adhaerent; at satius est extra urbes transferri, & in locis apertis constitui, ut relinquunt incolarum domicilio sanitatem. Non secus ac ecclesia coemeterium polluitur, praesertim per excommunicati sepulturam (b): quo casu reconciliandum est, sed prius cadaver effoditur, & foras eiicitur: quin si ecclesiae adhaereat, ea polluta illud etiam pollutum censetur, non contra (c). Ceterum in locis ubi coemeteria ab ecclesiis distincta nulla sunt, sepulcra in choro, aut majori capella, aut prope altaria concedi non debent (d).

Christiani in loco profano non sepeliendi.

§. VIII. Apud Romanos cuique licitum erat in suis privatis fundis sibi sepulcrum excitare, qui locus inde illatione cadaveris fiebat religiosus. At christiani in loco sacro seu religioso sepeliendi sunt, & si quis sibi ad dormitionem locum profanum seligat, electio ista tamquam turpis & christi-

D d 2

stia.

(a) *Gregor. Turones. de gloria confessor. cap. CVI.*

(b) *Can. XVII. D. 1. de consecr.* (c) *Cap. un. de consecr. eccles. in 6.* (d) *Confer. Ferrariensis de non sepeliendis mortuis prope aras.*

stianis moribus adversa: retpuenda est (a). Interest enim fidelium in locis sacris & religiosis sepeliri: profunt enim defunctis preces in coemeteriorum benedictione ad Deum fusae, quibus ecclesia fidelibus ibi sepeliendis peccatorum remissionem & spem beatae resurrectionis adprecatur. Sancti quoque, qui in sacris locis coluntur, & fideles, qui ad ea veniunt, pro fidelibus ibi sepultis preces fundunt (b). Quibus aliisque rationibus turpis christianis habetur in loco profano sepultura, ac ideo non permittenda. Etiam jure Romano turpes & ineptae de sepulturis testatorum voluntates remittuntur, veluti si testator jusserit, reliquias suas prolici in mare, aut sepeliri cum vestimentis sericeis, margaritis, aut variolis (c): nec enim omnis testator sapit. Quin ex decretali Innocentii II sive III tantum apud ecclesias paroeciales & monasteria, non in privatis oratoriis permittae erant sepulturae (d). Cui juri Bonifacius VIII. obrogavit, qui etiam in privatis oratoriis sepulturae electionem concessit (e): nomine enim loci *minus religiosi*, in quo electam sepulturam sustineri voluit, privatum oratorium intellexit, illudque minus religiosum dixit, quod in eo non adeo frequenter sacra mysteria celebrantur.

Se-

(a) *Cap. III ex.de sepult. & ibi Gonzalez.* (b) *Augusti. de agenda cura pro mortuis cap. ult., can. XVII. C. 13. q. 2.* (c) *L. ult. §. ult. D. de auro & argento. Confer. Donellus lib. VIII. comment. cap. 12.*

(d) *Cit. cap. III.* (e) *Cap. II. §. ult. de sepult. in 6.*

Sepultura ecclesiastica pars christianae communionis.

§. IX. Jam vero ecclesiastica sepultura quatenus loco sacro & exsequiis constat, pars est ecclesiasticae communionis, in qua defuncti decesserunt. Etenim qui vivi cum ecclesia communicabant, etiam mortui in communione perseverant. Quo illud Leonis M. spectat (a), *quibus viventibus non communicavimus, mortuis communicare non possumus*. Ecclesiastica communio in communicatione orationis & conventus & omnis sacri commercii consistit, ut loquitur Tertullianus (b), eaque quo usque christiani viverent, variis signis declarabatur, praesertim oblationis ad altare, sollemni recitatione nominum si non omnium offerentium, saltem eorum, qui pinguiora munera obtulissent, admissione ad sacratiores preces & eucharistiae perceptione. Non dissimili ratione defuncti, qui in pace ecclesiae decesserant, cum ecclesia communicabant. Sane mortui cereis accensis & sollemni psalmodia in ecclesiam deducebantur (c): inde eorum nomine ad altare fiebant oblationes, eorumdem quoque nomina in altari de more recitata, & in sacrificio peculiares preces pro defuncto factae. Tantum eucharistia defuncti non donabantur, quod ea vivis, non mortuis proderat, quamvis cum ipsis defunctis sepeliri consueverit (d).

(b).

EUCARISTIA

§. 6. (a) Leo M. ep. XCII. ad Rustic. cap. 6.
 (b). Tertull. apol. cap. XXXIX. (c) Chrysost. hom. IV. ad Hebr., constit. apostol. lib. VI. cap. 30.

Haec cum mortuis communio in nova disciplina religiose colitur, manentque deinceps in ecclesiae communione, qui in ea mortui sunt, nisi quis post mortem excommunicetur: eoque spectat celebratio exsequiarum, in quibus ecclesia preces & sacrificium pro defuncto offert, & continua mortuorum in missae sacrificio commemoratio.

Christiani in propria paroecia sepeliendi:

§. X. Quae quum ita sint, celebratio exsequiarum ad ecclesiam paroecialem pertinet, & in ea ejusve coemeterio ex generali juris canonici regula paroeciani sepeliendi (a), ut quisque defunctus cum ea ecclesia communicet, cui vivus adhaesit, & in qua caelesti pabulo refecti consuevit. Paroeciani autem in causa sepulturae sunt, qui in finibus paroeciae ita morantur, ut vivi sacramenta in ipsa percipere & parrochi ipsis administrare teneantur. Hinc peregrini in paroecia, ubi eos decedere contingit, sepeliuntur, si commode ad suam paroeciam transferri nequeant (b). Monachi autem & religiosi (c), ut & eorum oblati (d), in monasterii ecclesia vel coemeterio sepeliendi sunt: ipsis enim loco paroeciae monasterium est. Oblati monasteriis erant, qui se & sua monachis offerebant, qua oblatione etsi veri monachi non fierent; nihilominus de familia monasterii censeban-

(a) Cap. III. ex de sepult., cap. II. eod. in 6.

(b) Cap. V. eod. in 6. (c) Cap. ult. eod. in 6.

(d) Cap. IV. & X. ex de sepult.

bantur, abbati obedientiam promittebant, & a monasterio victualia conſequebantur, quod Cangius obſervat (a). Similiter canonici in eccleſia capituli habent ſepulturam, etſi in alia paroecia degant, ei enim eccleſiae vivi adhaerebant. Et generatim moribus receptum eſt, ut beneficiarii in eccleſiis ſuorum titulorum tumulentur. Quod ſi contra interdictum clerici vel monachi parochianum alienum uſurpent, & in ſua eccleſia vel coemeterio ſepeliant; humatum cadaver, ubi peritur, effodi pontifices ſtatuunt & propriae eccleſiae reſtitui (b). Et quamvis cineres non inquietandos non chriſtianorum modo, ſed & gentium ſententia fuit; tamen eorum translatio ex juſta cauſa & a iudice probata permittitur (c); quo jure etiam Romani utebantur, qui cinerum translationem pontificali decreto transferebant (d).

Niſi habeant majorum ſepulcrum:

§. XI. Paroecialis ſepultura duobus caſibus jure decretalium ceſſat, puta ſi exiſtet majorum ſepulcrum, & ſi quis ſibi vivens elegerit ſepulturam. Et ad primum quod ſpectat, ſolent ſanguine conjuncti ſepulcra optare communia (e), qua ratione apud pleraſque gentes ſepulcra familiaria obtinuerunt. Romani familiaria ſepulcra ab hereditariis diſtinguebant, illa enim quiſque ſibi & familiae, iſta vero ſibi & here-

di-

(a) Cangius in gloſſ. v. oblati. (b) Cap. V. ex. de ſepult. (c) Conſer. Gonzalez in cit. cap. V.

(d) L. ult. D. de mortuo inferendo. (e) Cic. lib. 1. de offic.

dibus constituebant (a). Sepulcra majorum eadem ac familiaria videntur esse, ac proinde in iis quiescendi quilibet de familia jus habet, hoc est agnati omnes, quin quotquot ex primo adquirente descendunt, modo ejus haec voluntas fuerit. In ecclesiis majorum sepulcra invaluerunt, statim ac in iis humatio permitti coepit, quod christiani sibi & familiae suae quiescendi locum habere apud sanctos pium & religiosum duxerint. Quoniam vero quisque apud majores suos quiescere intendit, hinc existente majorum sepulcro cessat paroecialis sepultura, & quisque de familia in eo sepeliendus est (b), quasi ex tacita sepulturae electione: idque Romani pontifices probarunt exemplo patriarcharum veteris testamenti (c), qui ad patres suos apponi cupiebant (d). Ceterum adquiruntur sepulcra familiaria vel ecclesiae fundatione, vel episcopi concessione, quod fieri solet largo auri pondere oblato.

Aut nisi sepulturam sibi selegerint.

§. XII. Cessat quoque paroecialis, quin & familiaris sepultura, si quis sibi locum dormitionis selegerit. Etenim jure canonico puberibus, etiam uxoribus (e) & filiisfamilias (f) libere licet sibi seligere extra paroeciam vel sepulcrum majorum sepulturam, modo ecclesiam, coemeterium vel saltem locum religiosum constituent: nam electio-

(a) *L.V.D. de religios. & sumtib. funer.* (b) *Can. II. C. 13. q. 2.* (c) *Cap. I. & III. ex. de sepult.*

(d) *Genes. XLVII. 30., & XLIX. 29.* (e) *Cap. VII. ex. de de sepult.* (f) *Cap. IV. de sepult. in 6.*

ctio in loco profano tamquam turpis & christia-
nis moribus adversa respuenda (a). Electio e-
nim sepulturae veluti res spiritualis censetur,
cui nec patria potestas officit. Quod si mulier
sepulturam sibi non elegerit, in mariti sepulcro
sepelitur (b): & si plures maritos habuerit, hu-
manda est in sepulcro ultimi viri, cujus domi-
cilium detinet & honorem (c). Impuberes au-
tem ob consilii inopiam, & religiosi, qui pro-
priae voluntati renuntiarunt, eligendae sepultu-
rae facultate carent: impuberi vero filio ipse
pater seliget, modo id loci consuetudo patiatur
(d). Haec autem optio sepulturae videtur es-
se species religiosi mandati post mortem imple-
ndi, non actus ultimae voluntatis proprie sic di-
ctae (e): ita vero fieri debet, ut siue scripturis
siue testibus probari queat. Frequentes esse coe-
perunt electiones sepulturae extra paroeciam post-
quam ecclesiis & coemeteriis monachorum & re-
gularium jus sepeliendi privilegiis pontificum con-
cessum est. Nimirum ad lucrandas oblationes,
quas christiani ecclesiis suae dormitionis relinque-
re consueverunt, monachi & inde mendicantes
variis artibus bonos piosque christianos coeperunt
allicere, ut in monasteriis sepulturam sibi con-
stituerent. Quam perversam praxim Clemens
IV in primis hoc epiphonemate taxavit (f):
In sil jur. can. T. IV. *E e* *Uti-*

(a) *Cap. III. ex. eod.* (b) *Can. II. & III. C. 13. q. 2.* (c) *Cap. III. §. 2. de sepult. in 6.* (d) *Cit. cap. VII.* (e) *Confer. Espen. par. II. tit. 28. cap. 3. n. 30. seq.* (f) *Ap. Martene tom. II. anecdot. p. 397.*

Utinam volucres nunquam super cadavera confedissent. Ceterum electio sepulturae omnino libera esse debet, & fraude aut quavis arte extorta nulla est: hinc vel ipsum cadaver, si petatur, effodiendum & restituendum est, & restituenda etiam intra decennium emolumenta omnia occasione sepulturae quomodolibet percepta, quod Bonifacius VIII. constituit (a).

Exsequiae fiunt in paroecia alibi sepulto cadavere.

§. XIII. Quibus vero casibus extra paroeciam, sive in sepulcro familiari, sive in electa sepultura defuncti inhumentur, exsequiae in propria ecclesia celebrandae sunt. Jure enim sepulturae extra paroeciam concesso, exsequiae ecclesiae paroeciali reservatae sunt, ut ita in precibus cum ecclesia sua defuncti communicarent. Sane summi pontifices dum jus sepeliendi mendicantibus concesserunt, ea formula usi sunt, *salva justitia ecclesiarum, a quibus mortuorum corpora adsumuntur* (b): nomine autem *justitiae* veniunt omnia Jura ecclesiae paroecialis, in primis exsequiae (c), quae *justa* Latinis dicebantur. Quae disciplina in Gallia & Belgio servatur, & ita clerus propriae paroeciae cadaver tollit, & ad paroeciam desert, ubi missa pro defuncto peracta, itidem parochus cum suo clero cadaver tollit, exhibetque superiori ejus loci, in quo vivus sibi elegit sepulturam (d). Sed in Italia cadavera ali-

(a) *Cap. I. de sepult. in 6.* (b) *Cap. IX. ex de sepult.* (c) *Confer. Gonzales in cap. VIII. eod.*

(d) *Confer. Espen. part. II. tit. 38. cap. 5. n. 15. seqq.*

alibi sepelienda ad paroeciam deferri non solent ; at antequam domo educantur , per parochum benedicenda sunt , nec sine eo ad sepulturae locum efferenda : quod S. C. decreto comprehensum est .

Vetitae pro exsequiis & sepultura exactiões .

§. XIV. Pro exsequiis & concedendo sepulturae loco ecclesiae ministris aliquid exigere non licet . Pia & religiosa officia gratis ecclesiae ministros oportet exhibere , & grave nimis visum est pro terra putredini concessa pretium quærere & de alieno luctu quaestum facere (a) : in quam sententiam quamplures canones conditi sunt (b) . Quin nec obtentu inolitae consuetudinis licet pro exsequiis & sepulturae loco aliquid exigere , quod concilium Turonense sub Alexandro III & Lateranense sub eodem decreverunt (c) ; quae recte inculcant eo graviora esse peccata , quo diuturniora . Videntur pro sepulturis exactiões . tum praecipue coepisse , quando in atriis ecclesiarum & in ipsis ecclesiis mos sepeliendi invalescebat : magni tum faciebant fideles ad martyrum sedem sepeliri : quam pietatem episcopi minus religiosi in quaestum verterunt . Quo autem exsequiae gratis fierent , nec earum occasione heredes defunctorum expensis gravarentur , Constantinopoli inde usque e. Constantino M. munificentia imperatorum certi reditus funerum expensis addicti sunt (d) . Hinc

E e 2

ec-

(a) *Gregor. M. lib. VII. ep. 56.* (b) *Confer. Christi. Lupus diss. de simonia cap. XII. tom. 4. edit. V.*

(c) *Cap. VIII. & seq. ex. de simonia .* (d) *L. XVIII. C. de sacros. eccles. , novel. LIX.*

ecclesia Constantinopolitana inter alia officia habuit *decanum* ; qui redditus funeribus addictos procurabat , funera curabat omnia , & cuique ad illa operanti portionem tribuebat suam (a) .

Utinam verò in omnibus ecclesiis essent peculiares redditus funeribus addicti ; unde exsequiae , praesertim pauperum , sine heredum sumtu fierent ! hac enim ratione nulla esset clericis occasio de alieno luctu lucrum faciendi . Quamquam si verum dicere velimus , sunt in eam rem ex ecclesiae sententia ubique redditus addicti : tantum dolendum , eos ex mente ecclesiae non procurare . Quid enim aliud sunt bona ecclesiarum , quam redditus in usus pauperum impendendi ?

Oblationes pro defunctis receptae .

§. XVI. Verum enimvero quamvis ecclesia trupe & nefarium duxerit , clericos ex exsequiis & terra putredini concessa quaestum facere ; semper tamen tanquam pias & religiosas probavit spontaneas oblationes , quas vel defuncti ipsi reliquissent , vel cognati aut amici eorum nomine facerent (c) . Oblationes istae ad altare in veteri disciplina deferrebantur , iisque declarabatur , fideles in ecclesiae communionem mortuos esse : & in sacrificio speciatim fiebant preces pro defuncto , cuius nomine oblationes ecclesia recepisset : Hinc oblationes morti vicinis commendatae , tamquam efficax remedium ad peccatorum

(a) Confer. Jac. Goar not. in: *euchologium* : (c) *Cypr. ep. LXVI. al. I. ad cler. Furnit. ; Gregor. M. lib. VII. ep. 56.*

rum expiationem : *Offerat* , inquit Salvianus (a) ,
vel moriens ad liberandam de perennibus poenis
animam suam : Sed non omnium defunctorum
 oblationes ecclesia recipiebat , sed tantum eorum ,
 qui in ejus communione decessissent . Qui vivi
 indigni habiti ecclesiastica communione , nec mor-
 tui ea donabantur , ac proinde eorum oblatio-
 nes ecclesia reiciebat . Quod si poenitentes su-
 bito morerentur reconciliationis cupidi ; eorum
 oblationes pleraeque ecclesiae post mortem reci-
 piebant ; tamquam reconciliationis testimonium .
 (b) : at ecclesia Romana Leonis M. tempore stri-
 cte regulam servabat , quibus non communicavi-
 mus vivis , nec mortuis communicare debemus (c).
Oblationes pro defunctis in consuetudinem versae .

§. XVII. Oblationes istae defunctis diu sola
 offerentium voluntate steterunt ; at post saecu-
 lum decimum in laudabiles abierunt consuetudines ,
 quibus post exsequias cogi possunt heredes ad
 consuetas oblationes . Atque haec sunt jura fu-
 neraria , quae parochis debentur propter sacra-
 mentorum administrationem & curam animarum .
 Saeculo nono & sequentibus pleraeque ecclesiae
 paroeciales nullos statos redditus habebant , quod
 earum bona , etiam ipsae decimae , vel ad mo-
 nachos , vel collegia canonicorum , vel laicos de-
 voluta erant : quo factum , ut ad alendos alra-
 ris ministros necessitas ipsa quodammodo coëge-
 rit

(a) *Salvian. lib. I. advers. avarit.* (b) *Conc. Are-
 lat. II. can. XII. , conc. Tolet. XI. can. XII.* (b) *Leo
 M. ep. XCII. ad Rustic. cap. 6.*

rit pias offerendi consuetudines constabilire. Hinc Innocentius III. in concilio generali Lateranensi vetat quidem pro sacramentis & aliis religiosis officiis clericos quidquam exigere, at simul a fidelibus servari praecipit pias oblationum consuetudines (a). Ceterum in juribus funerariis & fideles & parochi modum tenere debent suum: fideles, quoties possunt, offerant ecclesiae matri consuetae pro defunctis oblationes, cogitentque profecto iis ecclesiasticam communionem, in qua defuncti decesserunt, designari: contra parochi ne sint rigidi jurium sepulturae persecutores, sed potius exsequias & sepulturam sponte celebrent tribuantque, accepturi deinceps oblationes non tamquam laborum aut sepulturae pretium, sed veluti vitae sustinendae medium. In primis humani & liberales sint in pauperes, nec praetextu jurium non solutorum sepulturam differant, quod sapit barbariem ipsis ethnicis exosam & contenti juribus consuetis ea augere non curent. Ad evitandas lites & sordidas pactio- nes synodi aut reges hujusmodi oblationibus modum limitemque finierunt, & ubi de novo iis modus statuendus sit, id sine civilis potestatis auctoritate faciendum non est.

Quae sit quarta funeraria.

§. XVII. Quod si quis extra ecclesiam paroecialem sepeliatur, puta quia alibi habeat sepulcrum majorum, vel quia apud mendicantes sibi locum dormitionis selegerit; paroeciae *quarta funeraria* seu *canonica* debetur: certa nempe portio

(a) *Cap. XLII. ex.de simonia.*

tio oblationum & legatorum, quae ecclesiae, ubi sepelitur, occasione sepulturae defunctus reliquerit. Iustum visum fuit ex obventionibus funerariis, quae ecclesiae sepulturae adquiruntur, tribuere aliquid ecclesiae paroeciali, quae spiritalem curam defuncto, dum vixit, impendit, eique loco matris fuit (a). Ac sane jus sepulturae monasteriis pontifices concesserunt, *salva iustitia ecclesiarum, a quibus mortuorum corpora adsumantur* (b): & iustitiae nomine & exsequiae & pars relictorum ecclesiae sepulturae veniunt. Portio ista non est ubique eadem, sed alibi medietas, alibi tertia, alibi quarta integra pro locorum moribus (c), & interim semper *quarta* dicitur. Detrahitur vero ex omnibus oblationibus & relictis occasione sepulturae (d): quin in Clementinis statutum est, ut sepultura apud mendicantes electa, deducatur quarta ex obventionibus omnibus tam funeralibus, quam quibuscumque & in quomodocumque relictis etiam ad certos usus, etsi de jure portio canonica de istis obventionibus dari non deberet: item ex donatis in morte (e). At jus hoc nullibi ferme servatur, iamque locorum consuetudines aut pacta conventa passim habent, ex quibus oblationibus & relictis quarta ejusque quantitas deducenda sit. Illud certum est, in quartam non imputari ecclesiae paroeciali factas oblationes; eam enim

(a) *Cap. I. ex. de sepult.* (b) *Cap. IX. ex eod., bul. Honorii III. religiosam, bul. Sixti IV. mare magnum.* (c) *Cit. cap. IX.* (d) *Cap. I. & VIII. ex eod.*
 (e) *Clement. dudum de sepultur.*

nim paroeciae debet ecclesia, ubi defunctus sepelitur (a). Cadit vero ecclesia paroecialis sibi debita canonica portione triginta aut quadraginta annorum praescriptione cum titulo, vel inmemorabili tempore sine titulo, quod pluribus docet Barbosa (b).

De 4. funeraria vide dicta in notis ad tit. de Parochis.

Quibus denegatur ecclesiastica sepultura.

§ XVIII. Sepultura ecclesiastica soli fideles, qui in ecclesiae communione decesserunt, donantur; est enim veluti pars christianae communio- nis, quae etiam post mortem manet. Contra denegatur omnibus, quibus vivis communicare non licuit. Itaque ecclesiastica sepultura privantur infideles (c), Judaei & infantes sine baptismo denati; item apostatae, schismatici, qui hoc nomine publice convicti sint, aut palam haeresim profiteantur, aut ab ecclesia recefferint; item excommunicati, qui ex nova disciplina ut tales denunciati sint, aut palam clericum sive monachum percusserint (d); & nominatim interdicti, quippe qui & ipsi ab ecclesiae ingressu prohibiti sunt (e). Porro non donantur ecclesiastica sepultura, qui in mortali peccato decessisse, videntur, quales qui sibi mortem consciverunt (f), nisi id insania contigerit; qui praeceptum annuae confessionis & paschalis communionis non im-

(a) *typen. par II. tit. 38. cap. 5. n. 33.* (b) *Barboja de off. parochi per III. cap. 25.* (c) *Can. XXVII, seq. D. 1. de consecrat.* (d) *Extravag. Martini V. ad evitanda.* (e) *Cap. X. ex. de sepult. & cap. XVII, x. de V. S.* (f) *Can. XII, C. 23. q. 5.*

impleverunt (a), monachi mortui in peculio (b), fures & latrones in crimine occisi (c), mortui in *torneamentis* (quae erant nundinae seu feriae, in qua milites ex condicito conveniebant ad virium suarum ostentationem), e. si poenitentiam acceperint (d); pugnantes in duello eorumque *patrini*, ut appellantur (e), Item usurarii manifesti, nisi ante mortem eos usurarum poeniteat & de restituendis usuris caveant (f); raptores & violatores ecclesiarum, etsi in extremis agentes & sua peccata detestantes viaticum accipiant, nisi restituendis ablatis caverint (g); & ut paucis dicam, omnes manifesti & publici peccatores, qui sine penitentia decedunt, christiana sepultura & precum fructu carent. Quod si horum aliquis contra ecclesiae sententiam in loco sacro tumuletur, effodiendum est cadaver, ubi discerni potest, & procul ab ecclesia in loco profano sepeliendum (h): quo distamus a moribus gentium, apud quas ubi aliqui ob crimina privabantur sepultura, inhumati feris dilaniandi relinquebantur. Ultimum supplicium passi si condignam poenitentiam egerint secundum aliquos canones christiana sepultura donari possunt (i): quod intelligendum quatenus civiles

Inst. jur. can. T. IV. F f le-

(a) *Cap. XII. ex. de poenit. & remiss.* (b) *Cap. VI. ex. de statu monach.* (c) *Cap. II. ex. de furtis.*

(d) *Cap. I. ex. de torneam.* (e) *Trid. sess. XXV. de ref. cap. 19.* (f) *Cap. II. de usur. in 6.* (g) *Cap. II. ex. de raptorib.* (h) *Cit. can. XXVII., cap. XI. ex. de sepultur.* (i) *Can. XXX. C. 13. q. 2.*

leges & recepti mores eorum humationem permittant ,

Cum omnia, quæ de jure communi sepulturas spectant a Siculis nostris Synodis observari præcipiantur , nihil addendum nobis creditur , nisi quod Excel. Proregis Principis Caramanici jussu nuper editum est. Die enim 31. Augusti 1787. mortuorum omnium Cadavera quæcunque in Ecclesiis extra urbem positis tumulari præcipitur , exceptis tamen Archiepiscopis Parochis , & Monialibus ex regio indultu sub die 29. Martii 1783. nec non Cathedralis Ecclesiæ Canonicis , ac Beneficiatis , Parochiarum Capellanis , Ecclesiarum Sacramentalium Rectoribus , Professis Regularibus , Presbiteris Oratorii S. Philippi Nerii , S. Eulaliæ , S. Georgii peculiari ipsius Proregis permissione ; qua etiam facultas datur nobilibus titulo insignitis , ipsorumquæ filiis , & filiabus innuptis in eorum gentilitiis sepulturis tumulari . Die autem 25. Septembris 1787. ut pauperum Cadavera quorum aut heredes , aut cognati ceræ libras duas , & semissim , vel 4. Missarum elemosinam dictis Ecclesiis extra urbem sitis offerre minime possint in Cæmeteriis sepeliri sancium est .

C A P U T XXXV.

De monasteriis .

Monasteria primum in solitudinibus constituta :

§. I. **L**ocis religiosis accensentur etiam monasteria & hospitalia . Et monasteria quidem proprie sic dicta initio fuerunt solitaria-
riorum habitacula speluncis , potius quam habita-
ta-

tationibus similia : instituta vero per Pachomium vita coenobitica , domus , quibus coenobitae habitabant , coenobia nempe , monasteria etiam dicta sunt . Monasteria ex monasticis institutis in solitudinibus & montibus procul ab urbibus initio constituta : idque postulare videbatur perpetua poenitentia & ascesis , cui monachi se addebant : planctus enim & luctus requirunt solitudinem . Hinc illud Hieronymi de monachis , *quid desideramus urbium frequentiam , qui de singularitate censetur* (a) . Et Antonius anachoretarum illustrator dicere solebat , monachos ali solitudine , non secus ac pisces aquis (b) . Nec tantum virorum , verum etiam mulierum coenobia initio in solitudine fuerunt . Certe Chrysostomus memorat choros virginum in solitudinibus Aegyptiacis viventes (c) . Testis quoque est Hieronymus , Marcellam ejusque filiam Principiam , quod vitam monasticam amplexae essent , urbe exiisse , & suburbanum agrum illis fuisse monasterii loco , & rus electum pro solitudine (d) .

Inde etiam in urbibus .

§. II. Verum enimvero lapsu temporis etiam in civitatibus , aut prope eas monasteria constitui coeperunt , idque primum fidei & ecclesiae servandae causa factum est . Etenim Basilus M. monachos a solitudinibus eduxit & in urbibus Ponti eorum domicilia constituit , ut catholicae

F f 2

fi-

(a) *Hieronym. ep. IV. ad Rustic.* (b) *Apud Sozomen. lib. I. cap. 13.* (c) *Chrysostom. hom. VIII. in Matth.* (d) *Hieronym. ep. XVI. ad virgin. Principiam.*

fidei contra Arianos suppetias ferrent (a). Quo prodito exemplo deinceps etiam ubi nulla necessitas urgebat, monasteria nonnulla in urbibus vel prope eas excitata sunt. Interim Theodosius M iussit, monachos *deserta loca & vastas solitudines sequi atque habitare* (b); qua edita lege antiquum institutum de monasteriis in solitudine excitandis renovatum est: & praeterea cautum, ne monachi ex silvis in civitates conmearent: etenim ea tempestate monachi frequentes in civitates veniebant, & per drungos & vi armata ecclesiasticam & civilem pacem saepe turbabant. Sed constitutio ista non diu stetit; post biennium ab eodem Theodosio abrogata est, ac liber in urbes monachis ingressus factus est (c). Ceterum sequenti aetate qui in Occidente monasticam disciplinam suo nitori restituerunt, antiquiores monachos imitantes, in solitudinibus suas primas sedes collocarunt, ut ita melius poenitentiae vacarent. Mendicantes autem contra ab initio in urbibus & oppidis aut non longe sedes posuerunt suas, quod eorum instituto conveniebat: qui enim episcopis & parochis in animarum cura procuranda adiutorio sunt, procul dubio in civitate, non secus ac ipsi clerici, domicilia debebant habere.

Monasteria non aedificanda sine episcopi consensu.

§. III. Ubicumque vero constituentur nova monasteria & regularium aedes, praecedere debet

(a) *Socrat. lib. IV. cap. 26. , Sozomen. lib. VI. cap. 17.* (b) *L. I. C. Th. de monach.* (c) *L. II. C. Th. eod.*

bet episcopi, in cuius dioecesi constituuntur, consensus. Et initio quidem monasticae vitae quando monachi tantum in solitudinibus degebant, nec frequentius in civitates commigrabant, etiam inscio episcopo videntur excitata monasteria, quae nihil aliud erant quam laicorum piorum & ascetarum simul viventium habitacula. Inde quum coepissent monachi ad civitates monasteria condere, quin civilibus & ecclesiasticis rebus se immiscere easque turbare, in concilio Chalcedonensi statutum est, *nullum quidem usquam aedificare aut construere monasterium ... praeter consensum episcopi civitatis* (a): quam disciplinam sequentes canones (b) & Justinianus novella lege (c) confirmavit. Exortis mendicantibus in novis fratrum conventibus excitandis magis necessarius erat episcopi consensus: ex sua enim institutione mendicantes contra regulas & naturam monachatus episcopis & parochis in animarum cura procuranda veluti auxiliares copiae accesserunt, ac ita contra receptum in ecclesia ordinem esse videbatur, novos mendicantium conventus episcopis insciis & invitis excitare. Itaque Tridentini patres antiquam confirmarunt regulam, ne praeter episcopi veniam monasteria ulla sive virorum sive mulierum erigantur (d). Quin ex legibus & moribus provinciarum nec libet nova aedificare monasteria, nisi civilis etiam

po-

(a) *Conc. Chalced. can. IV.* (b) *Conc. Agathense can. XXVII.*, *conc. Epaonense can. X.* (c) *Novel. V. cap. 1.* (a) *Trid. sess. XXV. de regularib. cap. 3.*

potestas adfentiat: quod sane justum est: civilis enim potestatis est territorium, nec in eo aliquid invito domino licet (a).

Observanda in novi monasterii concessione.

§. IV. Novo autem monasterio seu conventui excitando sub certa forma licet episcopis consentire, quae decretalibus Clementis VIII & Gregorii XV statuta est (b). In primis constare debet, novos colonos sine veterum incommodo posse sustineri: & hinc antequam episcopus adfensum praebeat, advocandi & audiendi sunt priores seu procuratores antiquorum monasteriorum seu conventuum, quae eo loci, ubi nova domus construenda est, & in aliis vicinis locis per quadraginta passus, existunt. Audiendi quoque incolae loci, qui novo monasterio in comitiis coacti adfensum praestent: praesertim vero audire oportet parochum, in cujus paroecia novum monasterium aedificatur, maxime si novi coloni mendicantes sint: quum enim mendicantes auxilio parochorum esse censeantur, non audito parocho procul dubio non admittendi (c). Ecclesiae enim paroeciales sunt, quibus fideles communicare oportet, & receptis mendicantibus fidelis populus, quod experientia compertum est, a pastore suo multum distrahitur: ac proinde sine parochi adfensu nova mendicantium domus non concedenda. Praeterea nullius monasterii per-

(a) Confer. Paulus Sarpus in considerationib.

(b) Clementes VIII. bul. quoniam ad institutum XCIX. & Gregor. XV. bul. quum alias XXXI.

(c) Confer. Espen. par. I. tit. 24. cap. 3. n. 9. seq.

permittenda aedificatio est, nisi in eo saltem duodecim monachi seu religiosi inhabitare, ac ex redditus & consuetis eleemosynis sustentari valeant: quod ad regularem observantiam promovendam Gregorius XV (a) ex veteri Occidentalium regula constituit (b). Et demum monasteria monialium in urbibus & oppidis excitanda sunt, ne moniales malorum hominum praedae & aliis facinoribus exponantur (c).

Forma monasterii.

§. V. Novi autem monasterii fabrica ex antiquis institutis non incohabatur, nisi prius in loco episcopus preces funderet, & salutis nostrae signum, crucem nempe, humi figeret (d): qui ritus etiam in exstruendis ecclesiis obtinebat. Domus vero ita efformanda est, ut vitae communi conveniat. Et monasteria quidem in Aegypto habebant privatas cellas, quibus coenobitae philosopharentur. *Manent*, inquit de iis Hieronymus (e), *separati, sed junctis cellulis*. At deinceps in Oriente monasteria non amplius esse coeperunt cellulis distincta, sed unam, duasve domus habuerunt, in quibus coenobitae continuo simul viverent, & sua quisque exedra seu cubili dormirent (f). Postulare videbatur vita coenobitica, ut monachi sibi invicem semper essent honestatis & virtutis testes, & virtutum

com-

(a) *Gregor. XV. bul. cit.* (b) *Tomass. de benef. part. 1. lib. 3. cap. 69. n. 13. seq.* (c) *Trid. sess. XXV. de regul. cap. 5.* (d) *Justinian. novel. V. cap. 1.* (e) *Hieronym. ep. XXII. ad Eustoch. cap. 15.* (f) *Cit. novel. V. cap. 3.*

comparatione alii alios superare studerent. At circum coenobia ut plurimum aedificatae erant variae cellae, in quas ex licentia abbatis perfectiores coenobitae discederent. Cellas ista *ἡσυχαστήρια* loca quietis Justinianus appellat: locus vero cellis interspersus *laura*, quasi copiosus & multus, dictus est. Ex antiquo enim Basilii M. instituto vita coenobitica & solitaria simul adiunctae sunt (a), atque ita prope coenobia exstrui oportebat lauras, quae essent eremitarum, seu *inclusorum*, ut posteriores Latini dixerunt, habitacula. Tantum emeriti coenobitae in lauras discedebant: solitaria enim vita durissima est: quique soli vivunt, facile corrumpuntur, nisi in sanctis meditationibus occalluerint. Et merito Aristoteles observavit, hujus generis philosophos aut bestias esse, aut deos (b). Hodie Occidentis monasteria variis cellis secum invicem adjunctis constant, quibus adiacet medianum, quod omnibus euntibus commune est. Tantum Camaldulenses laurae speciem habent, sed carent communi domo.

Monasteria episcopo subiecta, nisi exempta sint.

§ VI, Monasteria autem omnia & monachi potestati episcoporum, in quorum dioecesi posita sunt, subsunt, non secus ac reliqua loca sacra & religiosa. Quapropter episcopi eadem invisere & corrigere possunt, si religiosos a sancto proposito deflectere comperiant (c), aliosque in iis

a-

(a) Confer. superius dicta par. I. cap. 36. §. II.

(b) Aristot. lib. I. politicor. (c) Cap. XIX. ex de officio jud. ordin., cap. 8. ex de relig. domib.

actus ordinis & jurisdictionis ecclesiasticae exercere (a). Sed a pluribus saeculis monachi & monasteria, & inde mendicantes a potestate episcoporum exempta sunt, & uni pontifici parere coeperunt, quod alias fufius dictum est (b). Quibus exemptionibus ruina disciplinae monasticae promota est, & ordo hierarchiae turbatus, adeo ut monstro similes visi sunt B. Bernardo ecclesiastici gradus, qui a superioribus suis subtracti capiti conjunguntur, non secus ac si digitus non proxime manui, sed capiti adnecteretur (c). Pluries de his exemptionibus abolendis tractatum, at nunquam abolitae: tantum in comitiis Tridentinis temperatae sunt, pluribus in eam rem editis decretis. Nimirum monasteria, quibus laicorum spiritualis cura adnexa est, quod spectat ad curam animarum, episcopis locorum subiecta sunt (d). Episcopis quoque tamquam apostolicae delegatis commissa monasteria monialium *αυτονομος* pontifici subiecta (e). Illis etiam jure delegato data monialium omnium exemptionum clausura (f). Episcopi quoque etiam tamquam apostolicae sedis delegati quotannis invifunt monasteria commendata, ubi neglecta jacet claustralis disciplina (g). Insuper episcopis subiecta sunt jure delegato monasteria omnia exempta, quae in congregationem cum aliis monasteriis stato

Inst. jur. can. I. IV. G g tem-

(a) *Can. X. C. 16. q. 1., can. I. XXVIII. seq. C. 18. q. 2.* (b) *Part. I cap. 41.* (c) *S. Bernard. lib. III. de consid. cap. 4.* (d) *Trid. ses. XXV. de regular. cap. 11.* (e) *Trid. loc. cit. cap. 9.* (f) *Trid. loc. cit. cap. 5.* (g) *Trid. ses. XXI. de ref. cap. 8.*

tempore non coaluerint (1). Ad haec ab Urbano VIII episcoporum potestati subiecta fuerunt monasteria tum recens erecta, vel de novo erigenda, in quibus saltem duodecim monachi seu religiosi non sint (2). Satis ampla canonum farrago, quorum copia facultas canonica laborat, at parum promota ecclesiastica disciplina.

C A P U T XXXVI.

*De hospitalibus.**Variae hospitalium species.*

§. I. **S**unt hospitalia proprie sic dicta aedes ad hospites & peregrinos excipiendos; at passim eo nomine veniunt loca quaelibet recipiendis & alendis pauperibus, infirmis aliisque miseris, qui aliena ope indigent, destinata. Hinc hospitalia sunt varii generis, quae nominibus propriis apud veteres designantur, veluti *xenodochia*, quae sunt peregrinorum hospitia; *ptochotrophia*, ubi aluntur pauperes debiles, qui proprio labore sibi victum ob corporis infirmitatem quaerere nequeunt; *orphanotrophia*, ubi pueri parentibus orbatu educantur; *brephotrophia*, quae infantium educationi inserviunt; *nosocomia*, ubi infirmi curantur, & *gerontocomia*, ubi pauperes senes aluntur. Quibus addendae *leprosariae*, ubi leprosi separatim ab aliis (quod lepra morbus contagiosus esset) curabantur, aedes ad
ex-

(a) *Trid. ses. XXV. de regular. cap. 8.* (b) *Urbanus VIII. const. XLIII. §, 14.*

excipiendos igne sacro correptos, militum valedudinaria, furiosorum claustra, viduarum hospitalia atque id genus alia. Sed non semper & ubique sejuncta hæc tam varia pauperum & miserorum hominum omnis generis receptacula habebantur; nam in unum plura sæpe erant colligata; nec quod speciale nomen habebant, inde sequitur, reliquos miseros semper exclusos fuisse. Etenim *xenodochium*, quod vi vocis denotat peregrinorum diversorium, etiam significat aedes ad infirmos, orphanos & debiles excipiendos, quod Muratorius (a) pluribus productis monumentis probavit.

Origo hospitalium apud christianos.

§. II. Summa semper fuit ecclesiae cura in fovendis & recreandis pauperibus miserisque hominibus, qui aliena ope & auxilio indigerent: quo pietatis officio pro ratione facultatum suarum christiani omnes adstringuntur. Hinc inter episcoporum officia id etiam fuit pauperes & miseros alere & fovere: in quem usum bona ecclesiastica praesertim sunt impendenda. Quamdiu imperium penes ethnicos fuit, nullae fuerunt aedes ad excipiendos & fovendos pauperes & infirmos (nec enim id per nostrae religionis hostes licuisset); sed episcopi ipsi diaconorum ministerio pauperum, aegrotantium & miserorum hominum curam gerebant. Inde data christianis pace statim ab episcopis aut aliis christianis peculiares aedes ad miseros & pauperes recipiendos exstructæ, ut eo melius hoc pietatis opus

G g 2

exer-

(a) Murator, *diff. XXXVII. antiq. Italicar.*

exerceretur. Sane Basilius M. extra urbem episcopalem admirabili magnificentia *πρωτορρεσι*, pauperum scilicet diversoria, aedificanda curavit (a). Tum Romae nosocomium Fabiola (b), alibi alii hujus generis aedes excitarunt. Praefertim vero in his locis caritatis extruendis & dotandis christiani Occidentales octavo & sequenti saeculo incluserunt. Nam ferme omnia monachorum & canonicorum monasteria aedes ad excipiendos pauperes, infirmos, peregrinos habuerunt adnexas, & praeterea christianorum pietas multa alia ejus generis diversoria fundavit. Sed de hospitalibus proprie sic dictis aliquid in specie monere oportet.

Observationes de hospitalibus in specie dictis.

§. III. Antiquis Graecorum & Romanorum moribus nulla fuerunt publica hospitalia, in quae iter facientes diverterent. Hinc apud antiquos hospitalitas maxime commendata, & hospites sub certorum deorum patrocinio esse credebantur: praecipue vero hospitibus Jupiter praeerat, cui inde *ἑνὶς hospitalis* cognomen inditum (c). Viri tamen honestiores jus hospitii apud amicos habebant, atque ita iter facientes hospitio ab eis excipiebantur, cujus rei causa tesserae hospitales erant comparatae (d). Inde Romae non ignotae fuerunt tabernae meritoriae, sed si quae fuerint, adventu barbarorum desierunt. Quum ve-

ro

(a) *Gregor. Nazianz. orat. XX.* (b) *Hieronym. epitaph. Fabiolae.* (c) *Confer. Potter. in archaeol. lib. IV. cap. 21.* (d) *Confer. Thomas. de tesserae hospitalib.*

ro christiani officia humanitatis summopere excolerent, vel a primis saeculis fuerunt hospitales, eoque officio praecipue episcopi adstringebantur. Hospitio autem excipiebantur & pauperes & divites, quod, deficientibus tabernis meritoriis, erat necessarium. Immo per leges Caroli M. omnes peregrinis hospitium praebere debebant, *ut neque dives, neque pauper peregrinis hospitium denegare audeant* (a). Frequentes jam octavo saeculo erant sacre peregrinationes, atque hinc publicis legibus videbatur peregrinorum hospitio consulendum. Excipiebant episcopi & monachi peregrinos, receptosque sive pauperes sive divites alebant: at ceteri tantum domum, focum & aquam illis praebere tenebantur. Interim in tanta peregrinorum copia plura xenodochia aedificata sunt, quibus peregrini omnes propter Deum exciperentur & alerentur. Romae quarto saeculo xenodochium Pammachius aedificavit (b). Post saeculum vero septimum monasteria ferme omnia monachorum & canonicorum etiam xenodochia ante portas, saepe etiam ab iis longe posita, habuerunt. Episcopi quoque, qui primum domo mensaque sua hospites exceperant, peculiare aedes hospitales aedificarunt. Et ut magis consuleretur peregrinis, plura xenodochia ad montium cacumina & ripas fluminum, quae pontibus carebant, excitata, quod Muratorius observat (c).

An-

(a) *Capitul. an. 17CCCII. ap. Balut.* (b) *Hieronym. ep. ad Pammach.* (c) *Murator. diff. XXXVII. antiquit. Italiae.*

Antiquiora hospitalia ferme destructa.

§. IV. Quis vero crederet? tot loca pia ab episcopis, canonicis, monachis & ceteris fidelibus liberali manu exstructa saeculo decimo & deinceps maximam partem defecerunt. Sane, quae in canonicorum monasteriis fundata erant, diffociata communi vita, sensim parum curata, & qui ad ea pertinebant, redditus alienati. Et lapsa monastica disciplina domus hospitales monasteriorum non diu steterunt, quamvis non defuerint monasteria rigidiora, quae colerent hospitalitatem. Multi quoque tam clerici quam laici importunis precibus & praesenti pecunia, aliquando etiam per litteras papales & mandata principum hospitalia occuparunt, & bona neglectis pauperibus & miseris in rem suam converterunt, quod synodus Arelatensis anno CIOCLX testatur (a). Ad haec, multae domus hospitales bellorum motibus, aliae episcoporum ignavia & rectorum rapacitate extinctae sunt. His aliisque causis saeculo decimo & sequentibus sensim evanuerunt pleraque pia loca, quae in miserorum & pauperum levamen pietas christiana induxerat. Itaque ea aetate coeperunt in Occidente tabernae meritoriae, quae sensim multiplicatae sunt: qua ratione etiam ipsa hospitalitas decrevit. Et ad miserorum levamen summi imperantes & alii divites christiani, saepe etiam insciis episcopis, novas hospitales domus aedificarunt, quod Muratorius

(a) *Conc. Arelatense can. XIII.*

rius (a) observat. Interim instituti sunt mendicantes: at isti quod emendicato pane viverent, antiquos monachos in excitandis miserorum hominum diversoriis imitari non potuerunt. Et quamvis inde eorum plerique bonis aucti sint, non tamen de excitandis domibus hospitalibus curarunt; quin (quod merito dolendum) non admodum hospitales audiunt.

Hospitalia vel religiosa vel profana sunt.

§. V. Hospitalia autem generatim sic dicta vel religiosa vel profana sunt. Religiosa episcopi auctoritate, profana injussu ejus fundata sunt. Quibus notis religiosas & profanas hospitales domus meliores interpretes distinguunt (b), idque convenienter pontificum decretalibus, quae tantum religiosas habent domus hospitales auctoritate episcopi exstructas (c). Quod si dubitetur de episcopi adsensu, eum adhibitum fuisse non probat oratorium, quod in usum hospitalis auctoritate episcopi conditum est; nam potuit hospitale sine auctoritate episcopi constitui, etsi pro facello auctoritas ejusdem fuerit necessaria. Immo nec adsensum sacrum certo demonstrant consuetudines episcopi visitationes; ei soli redditae rationes & ei soluta jura episcopalia (quamvis multi talibus argumentis religiosam qualitatem arguerint); nam quis ignorat, episcopos sollicitos fuisse ad suam jurisdictionem ampliandam? Ceterum non defuerunt, qui loca pia omnia, etsi

re-

(a) *Muratorius dissert. XXXVII. antiq. Italicar.*

(b) *Confer. Gonzalez in cap. IV. ex de religios. domib.* (c) *Cap. IV. ex de religios. domib.*

religiosa, a laicis administrata profana dixerint: contra religiosa, quae clerici procurarent (a).

Quae sententia apud nos certo jure nititur, utpote quae pactis conventis inter Benedictum XIV summum pontificem & Carolum olim regem nostrum confirmata (b), puto ut certa nota de hospitalium qualitate constaret.

Olim hospitalia omnia episcopis subiecta:

§. VI. Hospitales autem domus omnes ex veteri disciplina episcoporum potestati subsunt. Statuit enim synodus Chalcedonensis, ut clerici prothodochiis praefecti episcopo, in cujus civitate sunt, subiaceant (c). Justum profecto erat, ut qui ab initio religionis pauperum separatim viventium curam habuerant, iidem hospitalibus domibus praeficerentur. Auctoritas autem ista episcoporum origine sua ecclesiastica erat, quae sacris in usum miserorum celebrandis, & tamquam boni patresfamilias temporalibus etiam praefidebant; nam civilis & publica in hospitalia potestas politici regiminis erat. Quoniam vero episcopi industrii & navi erant in opera caritatis procuranda, christiani principes iis etiam dederunt publicam in domus hospitales inspectionem. Sane Justiniani legibus iudicio episcoporum locorum administratores eliguntur, ubi ab ipsis fundatoribus electi non sunt (d); episcopus quoque corrigere, immo & expellere potest

(a) *Constantin. Casarus peregr. quæst. lib. I. q. 18.*

(b) *Concord. cap. V.* (c) *Conc. Chalced. can. VIII. ap. Grat. can. X. C. 18. q. 2.* (d) *L. XLII. §. 9. l. XLVI. §. 3. C. de episc. & cleric.*

test officiales etsi a fundatoribus electos (a), & jus dicit in officiales, ubi administrationis suae nomine conveniuntur (b). Et in alia lege idem Justinianus bona hospitalium bonis ecclesiasticis accenset (c). Episcopos quoque legatorum ad pias causas exsecutores constituit (d). Hanc eandem in domus hospitales episcopi potestatem deinceps canones & regum Francorum capitularia confirmarunt. Nihil vero intererat, clericine, an laici domus istas procurarent, an a clericis vel laicis essent exstructae: semper enim erant in episcopi potestate, quando leges civiles id constituerant.

At inde multa exempta sunt.

§. VII. At labentibus annis multae domus hospitales episcoporum potestatem excusserunt, aliae in totum, aliae tantum in temporalibus. In primis hospitalia regum speciali protectioni subnixae ab episcoporum potestate substracta sunt. Etenim consueverunt fideles quae monasteria & hospitalia fundabant fundisque augebant, speciali regum patrocinio committere, ne eorum bona praedae laicorum cederent: quod nono saeculo iam erat inductum (e). Porro hospitalia, quae nulla episcopi auctoritate fundata sunt, veluti loca profana habita & saltem in temporalibus extra episcopi potestatem. Saeculo decimo in summa disciplinae ecclesiasticae corruptione in-

Inst. jur. can. T. IV. H h ge-

— (a) *Cit. l. XLVI. §. 3.* (b) *Novel. CXXIII. cap. 23.*
 (c) *LXXIII. C. de iacros. eccles.* (d) *L. XXVIII. C. de episc. & cleric.* (e) *Conc. Ticinense an. I. CCCCL. can. XVI.*

gens fuit hospitalium clades, nec episcopi eorum bona tamquam res pauperum procurarunt. Hinc coeperunt christiani domus hospitales insciis episcopis condere, quae tamquam loca profana & in temporalibus civili potestati subiecta habita sunt: quae doctrina ipsis pontificum decretalibus proponi videtur: respondit enim Urbanus III. loca ad excipiendos hospites & pauperes auctoritate episcopi destinata, utpote religiosa, non debere mundanis usibus deputari (a). Multa quoque hospitalia privilegiis pontificum ab episcopi potestate exempta sunt, & uni pontifici subiecta (b). Privilegia ista praecipue ambierunt hospitalium rectores, ut liberius in rem suam eorum bona converterent. Viri pii & boni haud timent leges, nec optant superiorum jugum excutere, quin potius optant, ut superiores in actiones suas majori studio invigilent. Nec defuerunt principes, qui episcopos penitus excluderunt a temporali hospitalium omnium administratione, eaque in hac parte laicis iudicibus subjecerunt, quod edictis Francisci I, Henrici II & Francisci II in Gallia factum est (c),

Decreta conciliorum de potestate episcopi in hospitalia.

§. VIII. Interim deminutam episcoporum in domus hospitales potestatem posteriora concilia curarunt reparandam. Et quidem concilium Viennense statuit, ut si hospitalium rectores si-

ve

(a) *Cap. IV. ex de religios. domib.* (b) *Clement. II. de religios.* (c) *Confer. Thomafs. part. 1. lib. 2. cap. 91. n. 8.*

ve clerici sive laici ignavius in administrationem incumbant, episcopi propria auctoritate in sibi subjectos rectores, in exemptos delegata pontificis procedant, & hospitalia reforment & integrum restituant (a). Postea concilium Tridentinum in eandem rem plura edidit decreta. Primum episcopos invigilare jussit in administratores hospitalium omnes, innovato concilii Viniensis decreto (b). Deinde potestatem fecit episcopis; ut etiam tamquam sedis apostolicae delegati in casibus ab jure concessis hospitalia omnia & collegia quaecumque laicorum inviserent, exceptis iis, quae sub regum immediata protectione sunt, sine eorum licentia (c). Et demum constituit, ut sive clerici sive laici xenodochiorum administratores quotannis ordinario reddant rationes, nisi in fundatione ipsa aliter cautum sit: si vero consuetudine vel privilegio vel loci statuto aliis ad id deputatis rationes reddendae sint, tunc etiam cum iis loci ordinarius adhibeatur (d). His decretis, quod spectat jus visitandi, ab episcopi potestate exempta relicta fuisse hospitalia profana Fagnanus fatetur (e): nam Tridentini patres in casibus ab jure expressis jus visitandi hospitalia episcopis faciunt: jure vero decretalium loca pia profana non subsunt episcoporum potestati: at in rationibus reddendis asserit, hospitalia omnia etiam profana episcopis

H h 2

fuisse

(a) *Clement. II. de religios.* (b) *Trid. sess. VII. de refor. cap. 15.* (c) *Trid. sess. XXII. de ref. cap. 8.* (d) *Trid. loc. cit. cap. 9.* (e) *Fagnan. in cap. IV. ex. de religios. domib. n. 5.*

fuisse subiecta, nisi foundationis leges aliter habeant, (a).

Jus nostrum recentius pactis conventis inducitur.

§. IX. Decreta ista Tridentina de locis piis, utpote quae jura laicorum invertebant, nec alibi nec apud nos recepta sunt. Hinc de hospitalium in re temporali regimine inter saecularem & ecclesiasticam potestatem frequentes controversiae emerferunt. Tandem vero apud nos controversiae istae pactis conventis inter Benedictum XIV. & Carolum olim regem nostrum compositae & jus certum constitutum. Tres hospitalium species distinctae sunt, una eorum, quae sub regum *immediata protectione* sunt, altera eorum, quae a laicis, & tertia eorum, quae a clericis administrantur. Ac primum quidem hospitalia, quae sub regum *immediata protectione* sunt, ab episcopi potestate & visitatione etiam in spiritualibus exempta declarantur (b). Illa vero sub *immediata protectione* regum esse dicuntur, quae regiae foundationis & dotationis sunt, vel in ipsa fundatione ex voluntate fundatoris sub eadem recepta (c). Hospitalia a laicis administrata tantum in spiritualibus ab episcopo visitantur; administrationis vero rationes quotannis reddendae coram ratiocinatoribus de more electis per eos, ad quos electio ista spectat, & persona ad id ab ordinario deputata, quae gratis interfit (d). Data quoque tribunali misto potestas est in loca pia profana exceptis iis, quae
re-

(a) *Fagnan. loc. n. 54.* (b) *Concord. cap. V. n. 1.*

(c) *Concord. loc. cit.* (d) *Concord. n. 1. loc. cit. & 2.*

regum speciali protectione muniuntur (a). Et demum hospitalia a clericis administrata in spiritualibus & temporalibus ab episcopo visitantur (b).

Officiales hospitalium saepe clerici.

§. X. Jam vero episcopi alique, quibus domus hospitales subsunt, eas per se non administrant, sed earum administrationi praesunt. Ergo creandi officiales, qui in tantae pietatis opus incumbant, infirmorum & miserabilium curam gerant, & temporalia procurent. Hujusmodi officiales a Basilio M *oeconomi pauperum* (c) ab Justiniano specialiter *xenodochi*, *nosocomi*, *ptochotropho*, *orphanotropho*, *brephotropho*, *gerontocomi* (d), & in canonibus conciliorum *rectores xenodochiorum* & *hospitalium* adpellantur. Quoniam vero hospitalium rectores res pauperum procurant, tales seligendi, qui vita, moribus atque industria inveniantur esse dignissimi. In veteri disciplina hospitalibus saepe praeponebantur diaconi, & hinc illa saepe *diaconiae* dicta sunt, (e), quales plures Romae, Neapoli & in aliis civitatibus erant. Antiquae disciplinae convenienter diaconi hospitalibus praepositi, nam illis ex sua institutione mensarum & viduarum cura competebat. Non tamen semper diaconi hospitalibus praefecti, sed saepe etiam presbyteris aliisque clericis, quin etiam laicis, ea cura demandata. Clerici autem isti perpetuo hospita-

li-

(a) *Concord. loc. cit. n. 5.* (b) *Concord. n. 6.*

(c) *Basil. ep. CCCXCII.* (d) *L. XLII. §. 9. & L. XLVI. §. 1. C. de episc. & cleric.* (e) *Confer. Can- gius v. diaconia.*

libus videntur adligati, & hinc diaconi diaconiis praefecti *diaconi cardinales* dicti sunt, quasi suis perpetuum adnexi diaconiis. Quibus non absimiles fuerunt, qui posteriori aetate hospitalia in titulum beneficii acceperunt, nisi quod isti cura pauperum posthabita, saepe in rem suam hospitalium bona verterunt. Hinc vetuit concilium Viennense hospitalia in beneficium dari, nisi in illorum foundatione secus fuerit constitutum, seu per electionem rectores creari debeant (a). Itaque ex recentiori disciplina rectores hospitalium meri administratores ut plurimum sunt, creantur aut ab episcopis, si eorum potestati illa sub sint, aut ab haeredibus fundatorum, ubi isti hanc curam illis reservaverint, aut ab aliis, quorum potestati hospitales domus commissae sunt.

Multa hospitalia a regularibus administrata.

§. XI. Porro multae hospitales domus sunt, quarum administratio regularibus competit. Optavit olim Gregorius M., ut hospitalibus viri religiosi praeficerentur, quos *judices vexandi non habent potestatem* (b). Et hospitalia in monasteriis constituta unus ex monachis aut canonicis, qui dicebatur *hospitalarius*, administrabat. Plures quoque fundatores a se fundata hospitalia per eos regi voluerunt, qui *religiosam vitam duxerint*, ut habet synodus Ticinensis anno 1000 celebrata (c). Videbatur hospitalium procuracionem rectius procedere, ubi viri, qui christianam

(a) *Clement. II. §. 2. de religios. domib.* (b) *Gregor. M. lib. III. ep. 24.* (c) *Conc. Ticinense can. XV.*

nam perfectionem amplexi erant, iis praefici-
bantur; qui mores post saeculum decimum ma-
gis invaluerunt, quando clerici & laici minus
religiosi erant in rebus pauperum procurandis.
Etenim ea tempestate quod hospitales domus in
monasteriis monachorum & canonicorum pro ma-
xima parte defecerant, institutae sunt praeser-
tim in Occidente multae regulares virorum &
mulierum congregationes unice ad miseros in ho-
spitalibus curandos & fovendos, quod Jacobus
de Vitriaco testatur (a). Vivebant hujusmodi
novi regulares in hospitalibus sub praeposito:
quin ipsi miseri in hospitalibus saepe religiosam
vitam agere debebant (b). Ejus generis religiosi
initio fuerunt hospitalarii S. Joannis Hierosolymi-
tani & S. Mariae Teutonicorum, qui postea in
equestres ordines versi sunt. Quo etiam specta-
vit ordo S. Antonii Viennensis saeculo XII in-
stitutus ad curandos igne sacro correptos. Et
demum saeculo XVI. per Joannem de Deo Lusi-
tanum institutus est *ordo caritatis* ad officia erga
pauperes & infirmos excolenda. Ceterum in Gal-
lia religiosi, qui non in titulum, sed in meram
administrationem hospitalia possident, administra-
tio temporalium ablata est, tantumque iis cura
spiritualium & pauperum relicta est, quod Joan-
nes Tornetius testatur (c).

Qui

(a) *Jac. de Vitriaco histor. Occidentis cap. XXIX.*

(b) *Confer. Thomassinus par. I. lib. 2. cap. 91.*

(c) *Joan. Tornetius collect. arrestor. litt. H. cap. XXXV.*

Qui in hospitalibus sacra administrant :

§. XII. Nec tantum hospitalibus domibus praeficiendi sunt, qui corporum necessitatibus provideant, verum etiam sacerdotes constituendi, qui spiritualia miseris administrent, eosque in religione instituunt. Jure communi pauperes & miseri in hospitalibus recipere debent sacramenta ab ecclesia paroeciali, in qua posita sunt hospitalia (a). Et passim hospitalia administrata a laicis manent sub cura parochorum, licet in gratiam pauperum in iis sint exstructa facella. Ceterum multae ex hisce domibus sunt, quae ad sacra administranda speciales presbyteros habent: quod episcopi aut pontificis privilegio primum inductum est. Sane olim Chrysostomus infirmorum receptaculis a se constructis duos sacerdotes praefecit (b), qui non minus temporalia, quam spiritualia videntur procurasse. Et in concilio Chalcedonensi memorantur clerici in prochorophis constituti (c), qui dubio procul spiritualia administrabant. Hinc in veteri disciplina domus religiosae etiam erant tituli, ad quos clerici possent ordinari (d). In nova disciplina hospitalia ordinum religiosorum, quin & nosocomia, in quibus sanctimoniales infirmis curandis vitam religiosam agunt, speciales presbyteros five privilegio five pactis conventis five consuetudine habent. Quod spirituale hospitalium regimen integrum synodus Viennensis reliquit (e),

Offi-

-
- (a) Confer. *Espen. par. II. tit. 37. cap. 3. n. 36.*
 (b) *Palladius vit. Chrysost. cap. V.* (c) *Conc. Chalced. can. VIII.* (d) Confer. *Christ. Lupus schol. in cit. can. VIII.* (e) *Clement. II. §. ult. de religios.*

Officiales quotannis reddere debent rationes.

§. XIII. Sunt autem hospitalium officiales instar tutorum & curatorum, immo sanctius tutela & cura gerunt officium, utpote qui Dei patrimonium procurant. Itaque juramento ad instar tutorum & curatorum promittere debent fidelem procurationem (a). Et singulis annis administrationis suae reddere rationes coguntur (b): quo distant a tutoribus, qui demum finita tutela ad reddendas rationes obligantur. Quod si ante redditas rationes moriantur, eorum heredes simili modo & rationibus & exactionibus subjacent, quod novella Justiniani lege cautum est (c). Ut vero rationes recte procedant, antequam rectores administrationi se immisceant, *de locorum ipsorum bonis mobilibus sive immobilibus inventaria conficiant*: quod concilium Viennense statuit (d). Reddendae sunt rationes *ordinariis seu aliis, quibus subsunt loca hujusmodi, vel deputatis ab eis*, ut habet mox laudatum concilium Viennense. At in comitiis Tridentinis cautum est, ut administratores sive clerici sive laici hospitalium aliorumve locorum piorum ordinariis locorum reddere rationes teneantur, nisi in ipsa fundatione secus cautum sit: & quo casu sive ex consuetudine sive privilegio sive peculiari loci lege aliis ad id deputatis illae reddendae sint, etiam cum iis ordinarium adhibendum (e). De-
Inst. jur. can. T. IV. l i cre-

(a) *Clement. II. §. 2. de religios. domib.* (b) *Cit. clement. II. §. 2., Trid. sess. XXII. de ref. cap. 9.* (c) *Novel. CXXXIII. cap. 23.* (d) *Cit. clement. II. §. 2.*
 (e) *Trid. loc. cit.*

cretum hoc utpote potestatem episcopi ad loca laicalia extendens apud nos receptum non est: at demum pacta conventa inter Benedictum XIV & Carolum olim regem nostrum etiam persona ab ordinario deputanda adhiberi debet, ubi rectores laici locorum piorum rationes reddunt, nisi loca illa regiae protectioni ἀμείων subiacent (b)

Qui in hospitalia excipiendi.

§. XIV. In id autem sedulo invigilare oportet hospitalibus praefectos, ut in haec infirmorum miserorumque hominum diversoria non alii admittantur, quam qui alieno publicoque auxilio indigent, eoque digni sunt, quales pauperes, debiles, infirmi & miseri omnes, qui propriis laboribus sibi alimenta parare nequeunt. Iniquum profecto est, robustos & corpore validos in hospitalia admittere, & ita tot inutilia pondera terrae alere & publico sumptu sustinere. Sane nemo pauper est, quod nihil possidet, sed quod non laborat: iamque si quis labore suo centum sibi aureos annuos parat, ferme aequales dives est, ac qui ex fundo suo tantundem percipit. Hinc synodi recentiores ab hospitalibus excludunt circulatores, aleatores, nebulones & mendicos corpore validos (c). Immo pertinet ad curam civilis potestatis validos & otiosos homines urbe expellere, aut potius operibus publicis ad laborandum addicere. Et dolendum

li-

(a) *Concordat. cap. V. n. 2.* (b) *Conc. Mediolan. I. par. III. tit. de pior. locor. administrat., conc. Bituricense an. CljLXXXIV. tit. 43. can. 4.*

profecto est, quod contra religionis principia & politicae rationes in multis regionibus corpore validi mendicare permittantur: qua ratione fovetur inertia, & crimina in dies augmentur.

Porro in excipiendis miseris leges fundationis servandae, quae qualitates recipiendorum saepe determinat: qua ratione nosocomia infirmis, gerontocomia senibus tantum patent.

Cum in hisce Canonicis Institutionibus quae ad divinum officium, Dierum Fesiorum celebrationem, & Jejunia pertinent silentio praetermiserit noster auctor, operae praetium visum est ea ex Compendio Institutionum Canonicarum ejusdem Cavallarii ad calcem hujus Tomi IV. hic subnectere.

C A P U T XII.

De Divino Officio.

§. I. **N**omine divini officii venit sollemnis oratio psalmis, hymnis, lectionibus, aliisque precibus Ecclesiae auctoritate contexta, & per statas diei horas tributa, ut laudis sacrificium continenter Deo offeratur. Dictum vero est *divinum officium*, qui veluti summa eorum est, quae christiani erga Deum quotidie debent efficere; Latini enim scriptores id vocant officium, quod quisque pro locorum, temporum, & personarum ratione debet efficere. Quod enim Christus edixit, oportere christianos *semper orare*, Luc. XVIII. v. 1., sapienter Ecclesia certis per diem intervallis publicas orationes haberi

statuit, quasi semper & sine intermissione orarent, qui statis horis alia omnia exercitia deponerent, & ad Deum se converterent. Quamvis alias quovis tempore quidquid christiani operantur, Deo auctore incipere & exsequi debent. Ad rem Augustinus *tract. IV. in Joannem*: *tota vita christiani hominis sanctum desiderium esse debet.*

§. II. Pluribus vero aliis nominibus Divinum officium a veteribus appellatur. Et quidem appellatur *cursum ecclesiasticus*, quasi divina officia orbem & cursum quemdam constituerent, singulis diebus percurrendum: *opus Dei*, opus nimirum, quod erga Deum devota mentis actione praestare debemus; *pensum servitutis*, quasi officium de servitute debita promanans. Quod vero per certas diei horas tributum est, passim dici consuevit *horae canonicae*, licet hoc nomine quatuor minora officia diei specialiter veniant. Singulae porro horae dicuntur *missae*, veluti *missae matutinae, vespertinae*. Divinum quoque officium Graecis dicitur *κανον* *regula*, quia certa regula & ordine peragitur; item *συναξίς*, *collecta, congregatio*, quia ad opus Dei persolvendum christiani simul conveniebant. Et ab aliis dicitur *psalmodia, agenda, sollemnitas*. V. Cardin. Bona *de divina psalm. cap. II. §. 1.*

§. III. Quod vero Divinum officium per certas diei horas tributum est, pluribus constat officii, quae simul adnexa cursum ecclesiasticum absolunt. Sunt autem officia ista ex jamdiu recepta disciplina, nocturnum cum laudibus, hora prima, tertia, sexta, nona, vespera, & sic dictum *completorium*. Sed ex his alia ad noctur-

sturnum, alia ad diurnum officium pertinent. Nocturnum officium ex doctiorum sententia tria nocturna & sic dictas laudes complectitur: diurnum vero constat horis prima tertia, sexta, nona, vespers, & completorio. Nocturna vero & laudes, quae quatuor distincta erant noctis officia (a), in unum apud clericos & plerosque monachos tandem coaluerunt, quod *Matutini* nomine designatur (b), & quod a clericis seculari-

(a) *Tria nocturna tribus primis noctis vigiliis seorsum celebrari solebant: quod S. Thomas in epist. I. ad Cor. cap. 14. lect. 6. & Marcellus Francolinus de horis canonicis cap. VI. recte observant. Vt quid enim tria nocturna, nisi quod tribus distinctis vigiliis persolvi soleret? Quin aliquot monachorum Occidentalium regulae aperte edicunt, nocturna seorsum celebranda. Reg. Columbani cap. VIII. Porro Laudes sic sicut dictae distinctum a nocturnis officium & apud monachos & apud clericos constituerunt. V. Card. Bona de divina psalmodia cap. V. §. 1. Primus S. Benedictus tria nocturna videtur conjuxisse: saltem secundum illius regulam cap. XVI. uno tempore tria nocturna celebrantur. Et longo post tempore in ecclesia Romana etiam laudes nocturnis adnexae unum continuum officium nocte celebrandum constituerunt, teste Hugone Victorino de divin. officiis lib. II. cap. 2.*

(b) *Matutinum dicitur a Matuta, quam Graeci Leucotheam, idest albam deam, nos vero auro-ram vocamus, teste Cicerone Tuscul. lib. I. cap. 12. Incipit tempus matutinum, ex quo sol infra horizon-*

ribus circa finem quartae vigiliae, incipiente crepusculo, (c) celebratur: licet eo nomine saepe veniant solae laudes: quae acceptio magis propria est. V. Card. Bona *de divina psalmodia cap. V. §. 1.*

§. IV. Haec autem statuta & sollemnia ad Deum precandum & laudandum officia non omnia ejusdem antiquitatis sunt, sed alia aliis antiquiora: quin eorum multa lapsu temporis novam & a veteri multum diversam formam induerunt.

Antiquiora sunt officia nocturna & vespertina: nam vel a primis seculis mos christianis fuit noctu & vespere in coetum convenire & divinas laudes celebrare. In antelucanis coetibus etiam eucharistia celebrabatur, Tertul. *de corona cap.*

III. (d): verum labentibus annis eucharistiae celebratione in diem translata, noctis tempore tantum laudis sacrificium haberi perrexit, quod deinceps in monasteriis perfectionem accepit, & in nocturna & laudes divisum est. Hora prima, quae lucis orto fidere persolvitur, Cassiani tempore in monasterio Bethlehemitico instituta est, ne monachi post laudes, quae incipiente crepusculo matutino solebant celebrari, usque ad tertiam otiosi & somnolenti in cellis jacerent, quando nulla conventus necessitas eos ad orationem

com-

horizontem existens primos lucis radios in nos spargere incipit.

(c) Crepusculum matutinum idem est ac aurora: atque ideo cum ea incipit & desinit.

(d) Eucharistia etiam vespere post agapas primitus celebrata.

compellebat , teste eodem Cassiano *init. lib. III. cap. 4. (e)* Horae vero tertia , sexta , & nona ex saniori sententia in monasteriis cum monastica vita sensim invaluerunt : quod Pearsonius *praelect. II. in acta apostol. n. 3. seq.* & Bingham. *orig. eccles. lib. XIII. cap. 9. §. 8.* docent *(f)* Et completorium a S. Benedicto institutum est , quo monachi , diei operibus finitis , in unum congregati laudes & preces complerent , & sollempni ratione absolverent . *Reg. S. Bened. cap. XLII. V. Card. Bona loc. cit. cap. XI. §. 1.*

§. V. Horae autem canonicae in monasteriis institutae , prima scilicet , tertia , sexta , nona , completorium serius ocius in ecclesiis receptae sunt vel opera monachorum , qui ad episcopatum promoti exemplo vitae monasticae divina officia in ecclesiis ordinarunt , vel opera clericorum , qui in clericatu monastica instituta ample-
xi

(e) Sunt loca apud veteres patres , quae habent, mane orandum esse. Sed de matutinis ante lucem precibus intelligenda sunt . Et qui alias possunt intelligi , quando , Cassiano teste , hora prima , quae orto iam sole persolvenda est , nondum erat instituta ?

(f) Veteres patres veluti Clemens Alexandrinus Strom. VII. Tertullianus de jejun. cap. X & Cyprianus de orat. dominica adserunt etiam tertia , sexta , & nona horis christianos orasse , sed qui loca diligentius expendit , animadvertet , potius de privatis , quam de publicis precibus esse accipienda : quod pluribus in commentariis de jure canonico exsecuti sumus .

xi sunt. In nonnullis Orientis ecclesiis seculo quarto & quinto praeter matutinas & vespertinas preces etiam in aliis horis publici conventus habiti & preces peractae. Conc. Laodic. *can. XVIII.*, *const. apost. lib. VIII. cap. 34.* Sed in Occidente horae canonicae seculo octavo & sequenti una cum clericorum vita generatim in omnibus ecclesiis receptae sunt (g): regulae enim canonicis datae ex regulis monasticis magnam partem depromptae sunt. Quin sollemnis horarum celebratio non tantum in ecclesiis cathedralibus & in aliis, ubi erant clericorum collegia: verum etiam in paroeciis invaluit, *cap. 1. ex de celebrat. missarum.*

§. VI. Iam singulae divini officii partes statis diei horis addictae sunt, ita scilicet ut per intervalla celebrentur, nec profecto licet ea tempora negligere, quo christiani continenter orent. Quod ut rite fiat, totius diei naturalis divisionem ab antiquis institutam scire oportet (i). Antiqui diem ut & noctem in quatuor aequales partes dividebant, quarum singulae ternas con-

(h) Initio seculi sexti Caesarius Arelatensis instituit, ut clerici in S. Stephani basilica tertiam, sextam, & nonam cantarent, ut Cyprianus episcopus Turonensis in illius vita testatur. Et in ecclesia Turonensi Injurius episcopus tertiam & sextam anno circiter 10xxx instituit: quod ex Gregorio Turonensi Mabillonius de cursu Gallic. probat.

(i) Dies naturalis una caeli circumvolutione, atque ideo nocte & die constat. Contra artificialis tempus complectitur, quo sol supra horizontem versatur.

tinebant horas. Quae quidem diei & noctis partes apud milites interdum *stationum*, noctu *vigiliarum* nomine veniebant, teste Vegetio *de re militari lib. III cap. 8*. Singulae porro diei & noctis partes in sphaera recta erant aequales, sed in obliqua fere erant majores & minores, prout dies & noctes longiores & breviores erant. Ternae vero horae in singulis quatuor diei artificialis partibus olim pro una hora accipiebantur, & ab ultima hora inclusa nomen accipiebant (i). Et ita quae hora tertia a priscis scriptoribus nominatur, non praecise de tertia hora, sed & de prima & secunda intelligi debet, adeo ut tertiae horae nomine totum tempus ab ortu solis per integram horam tertiam comprehendatur. V. Card. Bona *de divina psalm. cap. III. §. 4*. Cui civili horarum divisioni in tribuendis divinis officiis Ecclesia se accommodavit.

§. VII. Atque ex his facile constat, quo tempore ex Ecclesiae regulis divina officia oportet celebrari. Tria nocturna de veteri more tribus primis noctis vigiliis seorsum solebant celebrari, laudes vero quarta vigilia illucescente crepuscolo. Sed tria nocturna in unum officium coaluerunt, nocturnum officium a monachis vel

Inst. jur. can. T. IV.

K k

me.

(i) Ita horae nomine apud veteres veniebant non tantum duodecim partes, in quas tam dies, quam nox dividebantur; sed etiam singula majora diei artificialis segmenta. Hodie majorum horarum in divino officio recitando tantum usus est: & usu civili jam obtinet, ut integrum diei naturalis tempus in viginti quatuor aequales horas tribuatur.

media nocte, vel hora secunda post mediam noctem, matutinum vero illucescente aurora jure celebratur: apud clericos vero, qui laudes nocturnis adnexas habent, integrum noctis officium mane etiam illucescente crepusculo celebratur. Prima iam lucis orto fidere, tertia, sexta, & nona horis respondentibus, vesperae decima, vel undecima hora, & completorium post solis occasum persolvi debent: ita tamen ut pro more ecclesiarum tertia, sexta, & nona integro earum horarum spatio recte persolvantur. Sed hac in re quod spectat ad vespervas nova a veteri disciplina multum distat: apud veteres enim vesperae erant officium post solis occasum, & accensas in ecclesia candelas celebrari solitum (k); sed instituto & recepto in ecclesiis completorio, quo, sole occidente debet celebrari, vesperae ad decimam vel undecimam horam translatae, sunt. Porro lapsa magis magisque jejunii disciplina vesperae in quadragesima fictione canonica circa meridiem, aliis vero diebus circa horam nonam solent celebrari (l).

§. VIII.

(k) Sane Graecis hoc officium dicitur *λυχιον*, quasi eo tempore celebratum, quo lumen accendi solebat: & Latinis eodem sensu dicitur *lucernarium*,

(l) Quod in obliqua sphaerae positione horae in quibus sacra officia debent celebrari, singulis ferme diebus crescunt, vel decrescunt, Marcellus Francolinus, vir vere doctus, in fine operis de horis canonicis tabulas generales dedit, totius Europae usui accommodatas, ad cognoscendas veras horas, cui.

§. VIII Et id quidem de publica & sollemni horarum canonicarum celebratione: sed quod spectat ad privatam, etiam congruum est Ecclesiae menti, si statis horis persolvantur. Ecclesia enim in certas horas diurnas atque nocturnas totum divinum officium distribuit, ut saepe & in omnibus diei partibus Deum laudemus, & ut ad nos ipsi crebro redeuntes, ab externis tumultibus animum ad Deum revocemus. V. Bellarmin. *de bonis operib. lib. I. cap. 18.* Ex causa vero plures horae simul conjungi & recitari possunt: quo casu melius est divini officii tempus praevenire, quam differre: quia illud providentiae, hoc negligentiae est, ut S. Antoninus *par. III. tit. 13. cap. 4. §. 4.* recte observat. Curandum vero, ut vesperae & completorium nonnisi pomeridianis horis dicantur, excepta quadragesima, in qua vesperae fictione canonica meridie celebrantur. Sed & matutinum sequentis diei ex causa post solis occasum recitare licet: quae anticipatio culpa non vacat, si nulla ex causa fiat. V. S. Thom. *quodl. V. q. 14. art. 1.*

§. IX. Statis autem precum horis varia tribuerunt mysteria, quae cardinalis Bona *de divina psalmodia cap. II. §. 2 & seqq.* multis enarrat. Verum illud in primis omnium ore celebratur, quod statae horae divinis laudibus adiectae redemptionis nostrae mysteriis respondent. Hac ratione noctu oramus, quod Christus a militibus comprehensus & ligatus est: prima, quod

K k 2

in-

cuique officio celebrando additas, reductis horis inaequalibus ad aequinoctiales, sive communes.

injuriis & sputis adfectus: tertia, quod morte damnatus: sexta, quod cruci adfixus: nona, quod omnia cruci adfixo Domino commota sunt, & illius latus lancea perforavit: vespere, quod de cruce depositus: completorio demum, quod tumultu repositus est. Quae mysticae rationes Christum patientem repraesentantes ex parte in sic dictis *apostolicis constitutionibus lib. VIII. cap. 34.* referuntur. Haec & reliqua mysteria in horis canonicis expressa hominibus piis & devotis magna ex parte debentur: nam in prima earum institutione de mysteriis fortasse nihil cogitatum.

§. X. Veteri stante disciplina non modo clerici, sed etiam fideles laici ad horas canonicas celebrandas conveniebant. Basil. *ep. LXIII. ad Neocaesar., constit. apost. lib. VIII. cap. 34.* Convenientes autem ad statas horas laici cum clericis eas concelebrabant, atque ideo cum eis psallebant & canebant. Haec autem christianorum in horis canonicis celebrandis frequentia nulla necessitate, sed sola christianae vitae perfectione nitebatur; nec enim laicus homo laboribus assiduus ad sustinendam vitam occupatus, videtur necessario obstrictus fuisse, ut interruptis opificiis ad ecclesiam curreret. Chrysost. *hom. VI. de Anna*. Sed diebus dominicis & praecipuis festis laici praecepti necessitate ad horas canonicas celebrandas debebant convenire, ut ita dies festos ex Ecclesiae mente sanctificarent. V. Espen. *diff. de horis canon. par. I. cap. 3. §. 2.* Nec hodie alia est Ecclesiae sententia, quae dies festos integros pie & devote jubet transigendos. Quamvis desueta jam usu populi lingua Latina sacri-

fi.

ficium laudis , quod publice in ecclesiis offertur , exemplo potius , quam precum intelligentia ad dierum festorum sanctificationem prodesse possit .

§. XI. Quod vero spectat ad clericos & monachos , exploratum est , eos ad statas horas quotidie celebrandas ex regulis veteris disciplinae obstrictos fuisse . Clericorum enim est incessanter orare : hinc canones clericos a clero abiiciunt , qui ad quotidianum sacrificium celebrandum ad ecclesiam non accesserint . Conc. Tolet. 1. *can* 5. , *L.* 42. §. 10. *C. de episcopis & clericis* . Et monachi , utpote perpetuae orationi & contemplationi addicti , ad horas canonicas in choro recitandas vi propriae professionis tenentur . V. Nat. Alexand. *theol. dogm. & moral. lib. II. in tract. de ordine cap. 8. ar. 1. reg. 5.* Haec autem clericorum obligatio sanctior evasit , ubi in vitam communem sub episcopo vel praeposito coaeruerunt : nam ab eo tempore sollemnior inter clericos facta est horarum canonicarum celebratio utpote qui ex regulis monasticis vitam magna ex parte instituere coeperunt .

§. XII. Cursus autem ecclesiasticus , quem clerici quotidie persolvere debebant , publicus erat , sive in publico ecclesiae conventu statis horis celebrabatur , & in persona totius christiani populi per Ecclesiae ministros Deo offerebatur . Eo certe spectant sollemnes formulae in ipsis horis adhuc reliquae : *venite exultemus Domino ; premus , Dominus vobiscum , jube domne benedicere* , quae plures simul orantes supponunt . Scilicet etsi ad officium cujusque christiani pertineat privatim preces Deo offerre : tamen vel ab initio Ecclesia publicas preces induxit : quippe quae
non

non tantum aliorum exemplo valebant ad intendendam religionem: verum etiam Deo erant acceptiores, eumque veluti cogebant ad preces suorum fidelium exaudiendas. *Coimus in coetum & congregationem*, inquit Tertullianus *de anima cap. IX.*, *ut ad Deum, quasi manu facta, precationibus ambiamus orantes. Haec vis Deo grata est.*

§. XIII. Hac ratione horae canonicae apud veteres celebratae sunt, a quibus non uno nomine distamus. Et quidem hodie canonici & clerici choro addicti & monachi clerici ad horas in choro quotidie recitandas, si nulla iusta causa impediatur, tenentur, non reliqui clerici, quam disciplinam videtur confirmasse synodus Viennensis, dum statuit, ut in cathedralibus, regularibus, & collegiatis ecclesiis sacra officia statis horis devote celebrentur, *Clement. 1. de celebrat. missarum (m)*. Tanta mutatio duplici ferme ex causa videtur invaluisse. Una, quod in paroeciis horae canonicae publice celebrari desierunt, praesertim postquam patrimonii titulo recepto & institutis ecclesiasticis beneficiis, plerique clerici ex redditibus ecclesiae nihil perceperunt. Altera, quod canonici in suis ecclesiis post desertam vitam communem unum corpus componentes, in quod reliqui clerici etiam

be-

(m) *Ex Ecclesiae sententia recte faciunt clerici non canonici, si in paroeciis, quibus adscripti sunt, dominicis & festis ad minus diebus divina officia cum suis parochis in choro persolvant: quod Espenius diss. de horis canonicis par. I. cap. 2. §. 1. observat.*

beneficiarii partem non haberent, haud passi sunt, ut alii clerici in choro secum adfiderent. Tenentur vero canonici & clerici choro addicti ad horas in choro sollemniter recitandas vel omnes singulis diebus, vel in classes tributi alternatim singulis hebdomadis, vel mensibus, prout instituta moreve ecclesiarum habent. At qui in chorum non conveniunt, quolibet die privatim horas debent recitare.

§. XIV. Porro in praesenti disciplina ex reliquis clericis soli sacris ordinibus initiati & beneficiarii tenentur ad horas canonicas privatim recitandas, non item reliqui clerici minores (n). Quae disciplinae relaxatio post seculum decimum sensim invaluit, postquam beneficiis ecclesiasticis institutis, multi patrimonii titulo ordinati sunt, & nexus ecclesiam inter & clericos, saltem eos, qui nullis beneficiis aucti erant, tantum non solutus est, & perpetua ad clericatum obligatio ad solos majores clericos restricta est. Hac recepta disciplina vix erat, ut minores clerici, qui redditibus ecclesiasticis non vivebant, & cle-

ri-

(n) Non desunt ex clericis majoribus & beneficiariis, qui eo nomine se non teneri ad officium divinum privatim recitandum distant, quod officium illud plures recitantes supponat. Sed si excipias formulas ad plures spectantes, psalmi & orationes tales sunt, quae dum ex corde puro recitantur, non minus uni, quam pluribus simul orantibus conveniunt. Clericorum quoque est incessanter orare, & dum Ecclesia non alium singulis ordinem praescribit, receptas horas debent celebrare.

ricatum impune relinquebant, sacras horas quotidie persolverent; & obligatio ad horas quotidie persolvendas ad eos praesertim clericos spectare visa est, qui sacris ordinibus initiati ad perpetuum clericatum adstricti erant, vel beneficia possidentes redditibus ecclesiasticis vivebant. Primum in concilio Colonienſi an. CIOCCCLXXX. habito aliqua clericis minoribus non beneficiariis videtur facta indulgentia, ut ab horis recitandis vacarent (o). V. Espen. *diff. de horis canonicis par. I. cap. 1.* Inde magis magisque lapsa disciplina, synodus Basileensis *ses. XXII can. 5.* aperte supponit, solos clericos majores & beneficiarios ad horas canonicas recitandas teneri.

§. XV. Quicumque ad divinum officium persolvendum obligantur, sive in choro, sive privatim, id *reverenter, distincte, & devote* facere debent: quod ex recepta in Ecclesia sententia Tridentini patres *ses. XXIV. de ref. cap. 12.* inculcarunt. Nimirum qui divina officia persolvunt, cum Deo tractant, qui rex & dominus omnium est, quique corda scrutatur; & hinc qui horas canonicas recitat, etiam externo corporis habitu se componere debet, & joci & colloquiis ha-

(o) Sane haec synodus can. I. *statuit, ut nullus clericus horas canonicas & de domina nostra ulla umquam die dicere praetermittat, maxime qui est in sacris ordinibus & beneficiis constitutus. Ita conclusum, non adeo stricto jure ad horas canonicas teneri minores clericos ac majores & beneficiarios.*

abstinere. Ipsa quoque vocalis orationis ratio postulat, ut divinae laudes non cursim & festinanter, sed distincte singula verba pronuntientur. Maxime vero necessarius est devotus animus, quo divina officia recitantes se interius cum Deo jungant, & debitam religionem Deo exhibeant. Deo, inquit Hieronymus in *can. 1. D. 92.*, *non voce sed corde canendum.*

§. XVI. Iam quo Ecclesia magis magisque in ecclesiis cathedralibus & collegiatis publicam & sollemnem psalmodiam sustineret, *distributiones quotidianas* instituit, idest certas specierum & pecuniae praebitiones, quas statis horis addictas tantum canonici in choro praesentes & divina officia celebrantes lucrarentur. Ivo Carnotens. *ep. CCXIX. ad Paschal. II.*, Trident. *ses. XXI. de ref. cap. 3.* Hinc distributionum manualium hoc est ingenium, ut tantum praesentibus in choro & divina officia celebrantibus debeantur, & quidem pro illis horis, quibus praesentes sunt, non vero pro illis, quibus non interfuerunt. Trident. *ses. XXIV. de ref. cap. 12.* Cui juri adversae consuetudines & statuta ecclesiarum, quibus uni aut duabus horis praesentes integras lucrantur distributiones, non secus ac ceteri, qui horas celebrarunt, merae corruptelae reputantur. Verum pro praesentibus illi censentur, & in absentia distributiones lucrantur, quos *infirmitas, seu justa & corporalis necessitas, aut evidens Ecclesiae utilitas excusaret*, *cap. un. de clericis non residentib. in 6.*, Trident. *loc. cit.* Evidens vero ecclesiae utilitas, quae etiam absentibus canonicis distributiones tribuit, non est in *Inst. jur. can. T. IV.* L. I

ge.

genere quaelibet Ecclesiae utilitas, sed tantum utilitas particularis ecclesiae, de cujus distributionibus agitur. Qua ratione qui studiorum causa absunt, distributiones non lucrantur: contra canonicus poenitentiarius, dum confessiones in ecclesia excipit, lucratur. Trident. *ses. XXIV. de ref. cap. 8. & ses. XXII. de ref. cap. 3.* Distributiones autem, quae absentibus a choro denegantur, jure praesentibus non accrescunt, sed ecclesiae fabricae, aut alteri pio loco ordinarii arbitrio cedunt, Trident. *ses. XXII. de ref. cap. 3.*, licet regula ista in plerisque ecclesiis non vigeat, sed deficientes portiones accrescant praesentibus, si distributiones ex communi massa in eam rem tribuenda desumuntur. V. *Espen. part. I. tit. 7. cap. 11.*

§. XVII. Qui vero ad cursum ecclesiasticum quotidie persolvendum tenentur, ex legitima causa tanto onere liberantur, veluti caecitate, aut gravi infirmitate, quae officii recitatione gravior, aut longior evaderet: qua in re medici, aut superioris arbitrio, aut viri prudentis iudicio standum est. Excusatur quoque si quis sine sua culpa breviario careat (p), & in loco versetur

(p) *Nomine breviarii in re ecclesiastica venit liber, quo divinum officium singulis per annum diebus recitandum continetur, in gratiam clericorum & monachorum compositus. Sed de illius nominis ratione non idem omnibus. Alardus Gazaeus & Leonardus Lessius putant, breviarium inde dictum, quod continet omnes psalmos, qui totius scripturae com-*

tur, ubi invenire non possit, aut commodato accipere: item legitima excusationis causa censetur administratio sacramentorum, quae moram pati non potest, morientium, & infirmorum procuratio, aliaeque sacrae functiones, si forte tempus officio recitando necessarium non relinquant, praesertim, si beneficii ratione, aut episcopo mandante functiones istae sint obeundae. Ubi duo officia simul colliduntur, id obligat, quod majori obligatione nititur. Quod si concionandi munus ex officio incumbat, meminerint ecclesiastici, quod oportet istud facere, & horarum recitationem non omittere. Et qui totum officium ex causa impeditur recitare, quas potest horas recitare tenetur. V. Nat. Alexand. *theol. dogm. & mor. lib. II. de ordine cap. 8. art. 1. prop. 3.*

L I 2

CA-

pendium sunt: tum selecta quaeque complectitur ex utroque testamento, insigniorem sanctorum patrum doctrinam, praecipua sanctorum gesta, hymnos, & orationes. Contra Cardinalis Bona de divina psalmodia cap. XVIII. §. 20. docet, breviarium dici, quod in eo concise & sine musicis notis ea omnia conscripta sint, quae in antiphonariis aliisque chori libris magno charactere ad cantantium usum comprehenduntur. Addit, breviarii nomen ad officii divini brevitatem referri posse: nam hodiernum breviarium post Pium V. antiquioribus brevius est. Quidquid vero sit de nominis ratione, semel compositum breviarium multas habuit vices, quas enarrare hujus loci non est.

C A P U T XXXVIII.

De dierum festorum celebratione .

§. I. **F**esti dies in honorem deorum apud omnes ferme gentes celebrati sunt , utpote qui cultus religiosi , ubique ferme recepti , potiore partem constituiebant . Apud christianos inde usque ab apostolis festi dies instituti & celebrati sunt , quales Pasqua , Pentecoste , & quaevis dies dominica : successu vero temporis plures alii accesserunt , veluti dies natalis Christi , natales martyrum , sive dies , quibus martyrium passi sunt , festi apostolorum , B. Mariae virginis , aliique complures , quorum omnium historiam Hospinianus *de festis* , & Thomassinus *de celebratione festorum* enarrant .

§. II. Sunt festi dies alii immobiles , hoc est certis anni diebus adfixi , quales natalis Domini , Epiphania , dies festi apostolorum , & B. Mariae virginis ; alii vero mobiles , qui non iisdem anniversariis diebus celebrantur , quales Pascha , Adscensio Domini , Pentecoste . Festa mobilia a die celebrationis Paschae pendent omnia ; & hinc quolibet anno citius aut serius ordine suo recurrunt & celebrantur . Festum Paschae de veteri ecclesiae Romanae regula contra Asianas ecclesias probata in synodo Nicaena celebratur die dominica , quae post aequinoctium vernum decimam quartam lunam primi mensis proxime sequitur (a) .

§. III.

(a) *In veteri disciplina non adeo facile erat diem*
ce-

§. III. Praeterea ratione majoris minorisve observationis festi dies triplicis generis sunt. Alii summa religione & observantia transiguntur, quasi Deo omnino sacri, quales dominicae omnes & majores festi, in quibus fori causae, negotia forensia, & manuales labores cessant, tantumque Deo & religioni christiani vacare debent. Alii minori observantia celebrantur; fiunt enim sacri conventus, cessant negotia forensia, non vero secularia negotia, & corporis labores. Et demum sunt festi dies, in quibus celebrantur divina officia, non tamen strepitus fori, & manualia opera intermittuntur: qua ratione ecclesia Orientalis sabbatum inter festos dies recensabat, conc. Lao. dic. can. XIX., & Ecclesia universa celebrabat dies omnes inter Pascha & Pentecosten.

§. IV. Iam pro potestate sua licet episcopis peculiare dies festos in suis ecclesiis instituere, sed ex cleri & populi consensu. can. 1. D. 3. de con-

celebrationis Paschae definire, idque propter varias & imperfectas computandi paschae rationes: quo factum, ut ecclesiae non eadem dominica saepe pascha celebrarint. V. Bingham. orig. eccles. lib. XX. cap. 5. §. 4. Hinc. synodus Nicaena episcopo Alexandriae, ubi astronomi egregii florebant, dedit in mandatis, ut quotannis verum Paschae diem indagaret, eaque de re ecclesias certiores faceret. Successu temporis crevit confusio, eaque demum per Gregorium XIIII. pontificem, emendato, qui hactenus obtinuerat, Calendario, sublata est: iamque facile omnibus est de die Paschae decernere.

consecratione cap. 1. ex de feriis. Et reapse martyrum festi dies episcopi & fidelis populi consensu in peculiaribus ecclesiis initio instituti sunt, licet postea ab aliis ecclesiis recepti & celebrati sint. Nempe dies festi etiam feriatum sunt, hoc est a manualibus laboribus & strepitu fori vacui: & hinc si de novo instituantur, etiam populus, aut civilis potestas, quae populum repraesentat, debet consentire, quod *Espenius par. II. sect. 2. tit. 2. cap. 1.* observat.

§. V. Festi dies Deo omnino sacri, Deo & religioni integri sunt impendendi: quae est festorum sanctificatio. Quamvis enim christiani vita numquam a Deo sejungi debeat: tamen, propter plurimorum infirmitatem certos dies indicare placuit, quos christiani integros in sanctitate, tanquam Deo sacros, transigerent. Hinc in veteri disciplina fidelis populus saltem diebus dominicis & praecipuis festis divino officio intererat, & simul concelebrabat (b), ut ita di-

(b) *Certe in ecclesia Orientali christiani omnes alternatim, & veluti in duos choros distributi psalmos canebat. Quo exemplo in Ecclesia Mediolanensi Ambrosius eandem canendi rationem instituit, ne populus meororis taedio contabesceret, quod Augustinus lib. IX. confes. cap. 7. testatur. Ubi Latinae linguae usus defuevit, populus in ecclesiis Occidentis non amplius in celebratione partem habere potuit, & obligatio ad horas canonicas sollemniter recitandas sensim ad canonicos restricta est: & ex ceteris Clericis beneficiarii, & qui majoribus ordi-*
ni-

diem integrum sanctificaret. Deinceps ubi in Occidente Latina lingua popularis esse desit, non amplius christiani concelebrarunt; at Ecclesia etiam hodie exoptat, ut fideles ad horas canonicas conveniant, & divinum officium ita celebretur, ut populi religio possit intendi. Et longe profecto absunt a mente Ecclesiae, qui sola privatae missae auditione praeceptum de sanctificandis festis se implere putant, quasi sit omnino idem missam audire & diem festum sanctificare. V. Espen. *loc. cit. cap. 2.*

§. VI. Ut vero christiani soluti omnibus curis melius sanctificandis diebus dominicis & festis vacent, ab operibus servilibus cessare debent: quod jure civili & sacris canonibus cavetur, L. 3. C. de feriis (c), capit. reg. Franc. lib. 1. cap. 57. Namine operum servilium veniunt labores corporis & manualia opera omnia, quibus a sanctificandis festis & sacrorum conventuum frequentatione christiani impediuntur. Qualia opera rustica, fabrilia, sellularia, quae inde servilia dicta, quod olim apud Romanos praecipue per servos

nibus initiati sunt, privatim integrum officium quotidie debent celebrare. Espen. *diff. de horis canonic. par. I. cap. 2. §. 1.*

(c) Constantinus M. in cit. L. 3. tantum jubet, urbanas plebes & cunctarum artium opificia die solis, seu dominica conquiescere, non item rusticos, quibus labores permittit, quod frequenter eveniat, ut non aptius alio die frumenta sulcis, aut vineae scrobibus mendantur. Sed deinceps Leo Sapiens etiam rusticos die dominico cessare praecepit. Const. LIV.

vos solebant expediri. Verum necessitate aut caritate cogente christiani diebus dominicis & festis cum Dei timore possunt manibus suis operari, conc. Laodic. *can. XXIX., cap. 3. ex. de feriis*, modo praecedente superioris venia labores suscipiantur.

§. VII. Eadem quoque ratione in diebus dominicis & festis strepitus fori & causae judiciales conquiescere debent, quod legibus principum & sacris canonibus comprehensum est, *L. 2. & L. 3. C. de feriis, cap. 1. ex. de feriis*. Una cum fori exercitiis nundinae, sive mercatus, sive mercatura diebus festis haberi prohibentur, *cit. cap. 1.*, utpote quae rebus terrenis implicant, & a divino cultu distrahunt. Acta judicialia etiam ex partium consensu diebus festis explicata nulla sunt, *cap. ult. ex. eod.*, nisi necessitas urgeat, & pietas suadeat: qua ratione jure civili diebus festis emancipare, aut manumittere licet *cit. L. 2.* Sed contractus, qui diebus dominicis & festis in nundinis ineuntur, viribus constant.

§. VIII. Item diebus dominicis & festis jure civili spectacula, sive scenica, sive Circensia interdicta sunt, *L. 2. & L. nit. C. Th. de spectaculis*, quae deliciis animum adlicentia distrahunt a festis sanctificandis, & peccatis saepe sunt occasionem. Parum distarent christiani a moribus Judaicis, si dies festos in otio transigerent, operibus carnis & deliciis unice intenti. *Observa*, inquit Augustinus *enarrat. in psalm. XXXII. n. 6.*, *diem sabbati non carnaliter, non Judaicis deliciis, qui otio abutuntur ad nequitiam: melius enim tota die foderent, quam tota die saltarent.* Quae quum ita sint, parum congruit sanctitati

re-

religionis , quod presentibus moribus spectacula diebus dominicis & festis edi soleant : & res profecto est digna christianorum principum legibus , quibus saltem in alios dies spectacula differantur .

§. IX. Festi dies sensim numero creverunt : & hinc propter cessationem a laboribus erepta est pauperibus victum sibi parandi occasio , & & universa pene festa minus religiose observata sunt : quod synodi & pontifices aequè deplorant . V. Espen. *par. II. sect. 2. tit. 2. cap. 1.* Hinc synodorum auctoritate plura ex minoribus festis in dies intercisos , mane scilicet festos , non item reliquâ diei parte , aut in festa solius devotionis abierunt . Et Benedictus XIV. instantibus episcopis in multis ecclesiis minorum festorum numerum deminuit , vel potius laborandi facultatem concessit , integro tamen relicto praecepto missam audiendi : quod ipse narrat *de synodo dioec. lib. XIII. cap. 18. n. 11. seq.* Quam diminutionem , petente Carolo olim Rege nostro , etiam in regno Apuliae fecit .

C A P U T XXXIX.

De jejuniis .

§. I. **O**bservatio jejuniorum , non secus ac dierum festorum sanctificatio , inter religiosa christianorum officia censetur : jejunantes enim christiani corpus suum castigant , & in servitutem redigunt , & seipsos hostiam Deo offerunt . Jejunium proprie sic dictum differt ab abstinentia : qui jejunant , a carnibus & delicatibus .

Inst. jur. can. T. IV.

M m

tio.

tioribus cibis abstinere, simul vero cibum usque ad certam statamque horam differunt: qui abstinere, carnes non comedunt, & parsimoniam in cibis quaerunt, at cibum usque ad certam horam non differunt: & ita abstinencia, jejunii pars est. Sed non confundendi jejuni cum jejunantibus, illi enim dicuntur, qui nihil cibi aut potus sumserunt, utut jejunare, aut a prandio abstinere haud constituerint: contra jejunantes nec cibum sumserunt, & illum differre statuunt.

§. II. Jejunia religiosa apud christianos diversi generis sunt, alia enim generali canone imposita christianos obligant, alia poenitentibus in satisfactionem imponi solent, alia ex voto, aut asceti suscipiuntur. Quae omnes obligant, statis temporibus recurrunt, qualia jejunium quadragesimae, quartae & sextae feriae, quatuor temporum, & vigiliarum (a). Nec omittenda jejunia

(a) Calviniani, in primis Jo. Dallaeus, docent, veteris ecclesiae jejunia non necessitate, sed potius pro arbitrio a christianis fuisse observata. Hinc tenent, ecclesiam Romanam cum Montanistis in jejuniorum disciplina convenire, idque propter statuta jejunia, quae ex necessitate in Romana ecclesia christianos obligant, qualia erant Montanistarum jejunia. Sed apage apertas calumnias. Sane veteris Ecclesiae jejunia, praesertim quadragesimae, ex necessitate observanda erant: & si Ecclesia jejunia Montanistarum reprobarit, id ea ratione factum est, quod illi jejunia sua ex novis revelationi-

nia , quae ex aliqua sollicitudinis ecclesiasticae causa episcopi indicunt , quod seculo secundo episcopos facere consuevisse Tertullianus *de jejun. cap. XIII.* testatur .

§. III. Inter statuta & sollemnia christianae religionis jejunia maxime sacrum est jejunium ante Pascha (b) , quod vel a primis saeculis *Quadragesima* appellatur , quamvis longo tempore tantum triginta sex dies esuriales fuerunt (c) .

M m 2

Cer-

nibus per paracletum Montano factis obligare deditarent , quod tamquam merum figmentum Ecclesia explosit . V. Nat. Alexand. sec. II. hist. eccles. diff. 4.

(b) Ex veteribus patribus jejunium ante pascha Hieronymus in *Isaiam* cap. LVII. divinae institutioni tribuit , sed quatenus Jesus Christus quadraginta diebus in solitudine jejunavit , ut nobis sollemnes jejuniorum dies relinqueret . Contra idem Hieronimus epist. LIV. ad Marcellam . , Leo M. serm. V. de quadragesima alique apostolicae traditioni referunt acceptum . Utrisque vero adversari videtur Augustinus , qui ep. LXXXVI. ad Casulanum habet , jejunium quidem in evangelicis & apostolicis litteris praeceptum esse , sed quibus diebus non oporteat jejunare , & quibus oporteat , praecepto Domini vel apostolorum definitum non inveniri . Sed facile respondetur , non inveniri quidem in novo testamento dies jejunio addictos ; at eosdem praecepto verbis ore prolatis tradito ecclesiam accepisse .

(c) Quarto seculo quadragesima triginta sex diebus

Certe quadragesima in ecclesia Romana quinto & sexto seculo sex hebdomadis constabat, & ita dies jejunio consecrati erant triginta sex; nam ex singulis hebdomadis semper dies dominicus eximebatur, in quo de veteri more in memoriam dominicae resurrectionis christiani non jejunabant. Gregor. M. *hom. XVI. in evangelia*. Successu temporis in ecclesia Romana quatuor dies esuriales quadragesimae additi sunt, nimirum dies cinerum & tres sequentes: quod vel a Gregorio M. vel a Gregorio II. factum esse creditur: & ita quadragesima quadraginta dies esuriales coepit continere.

§. IV. Stati quoque jejuniorum dies in quolibet hebdomada erant quarta & sexta feria, id-

bus jejunio additis constabat: nec alia videtur trium priorum seculorum in plerisque ecclesiis fuisse disciplina: qua de re Nat. Alexander hist. eccles. sec. II. diff. 4. art. 3. Interim illa ipsa quadragesima in aliis ecclesiis sex hebdomadibus, in aliis septem celebrabatur: quod ex Cassiano collat. XXI. cap. 24. constat. Haec varietas pendebat a diversitate disciplinae, quae sabbatum solebat celebrari. Nimirum in multis ecclesiis praesertim Orientalibus sabbatum festum erat, atque ideo in eo non jejunabatur; in aliis vero & praesertim in Romana jejunio erat additum.. V. Bingham. orig. eccles. lib. XX. cap. 3. Hinc qui sabbatum inter dies festos censebant, unam hebdomadam quadragesimae adjunxerunt, quo sabbata jejunio exempta supplerent. Dicta vero est quadragesima, quod dies jejunii ad quadraginta proxime accederent.

idque vel a primis seculis observatum est. Tertull. *de jejuniis cap. XIV.* Orig. *hom. X. in Levitic.* Ea vero ratione his duobus per hebdomadam diebus jejunium ab Ecclesia indictum est, quod Judaei quarta feria consilium ad Christum occidendum inierint, sexta vero morti dederint. August. *epist. LXXXVI. ad Casulan.* Accessit in ecclesia Romana & quibusdam aliis Occidentali- bus sabbati jejunium, quod quarto seculo ob Christi sepulturam jam celebrari consueverat. August. *cit. epist.*, Innoc. I. *epist. ad Decentium cap. 4.* Verum jejunia ista omnia a die Paschae usque ad Pentecostem remittebantur: quod quin- quaginta illos dies in laetitia ob memoriam re- surrectionis Christi Ecclesia transigebat: quem- admodum etiam remittebatur jejunium, si in- ferias quartam, sextam, aut sabbatum nati- vitas Christi incideret. V. Albasp. *observat. lib. I. 17.*

§. V. Quatuor temporum jejunia singulis an- nis initio quatuor diversarum anni tempestatum recurrunt, & idcirco mensibus Martio, Junio, Septembri, & Decembri celebrantur, habent- que singula tres dies jejunio consecratos, nem- pe feriam quartam, sextam, & sabbatum. E- xemplo Judaeorum jejunia quatuor temporum seculo quinto in ecclesia Romana jam recepta erant, quamvis potius animo christiano, quam ritibus Judaicis servarentur: quod ex Leone M. *serm. IV. & V. de jejunio septimi mensis* constat. Jejunia ista instituta sunt, quod christiani quo- vis tempore ope divina & purificationibus indi- gerent, Leo M. *serm. IX. de jejunio sept. mensis*; vel quod gratias Deo agere pro beneficiis, quae in singulis anni tempestatibus accepta erant, o-
Inst. jur. can. T. IV. M m 3 por-

portebat. Leo M. *serm. VI. de jejunio decimi mensis*. Verum labentibus annis ordinationes sacrorum ministrorum his statis quatuor temporum jejniis addictae sunt, ut ita orationibus & jejniis bonos altaris ministros Ecclesia divinitus impetraret; qua de re *par. I. cap. 3.* dictum est.

§. VI. Praeterea in vigiliis festorum Christi, & multorum sanctorum per annum jejunia observantur. Vigiliae, quae etiam *pernoctationes* a Latinis dicuntur, in veteri disciplina erant nocturna officia, quibus christiani in ecclesiam convenientes, maximam noctis partem precibus & psalmis transigebant, iisque festorum Christi, Pentecostes, & sacrorum martyrum celebrationem introducebant. Jejunium diei antecedentis ipsas vigiliis praecedebat, si antecedens dies alias esset esurialis, ut videre est in vigiliis Paschae, quas sabbati magni jejunium praecedebat. Nam si antecedens dies alias jejunio non erat consecratus, vigiliae nullo praecedente jejunio videntur celebratae, excepta tamen natalis Christi vigilia, quam cum jejunio observatam fuisse ex Augustino *epist. LXV. ad Xantip. novae editionis* constat. Labentibus annis vigiliae propter abusiones fere interdictae sunt, & antecedentes dies *vigiliae* nomen retinuerunt, & esuriales facti sunt: quod Honorius Augustodunensis *lib. III. cap. 6.* observat.

§. VII. Jam ecclesiasticum jejunium, utpote quod in poenitentiam & corporis macerationem institutum est, duo tamquam praecipua & intrinseca complectitur, abstinentiam nempe a carnibus & aliis cibis delicatioribus, & unicam in die comestionem. Et abstinentia quidem a
car-

carnibus in diebus esurialibus semper ecclesiastici jejunii pars fuit, & apud veteres christianos per canones indicta: quod multis productis veterum patrum locis probat Nat. Alexander *sec. II. hist. eccl. diff. 4. art. 2.* adversus hereticos, in primis Dallaeum, qui magno conatu persuadere satagit, apud veteres christianos nullum fuisse canonem, quo abstinencia a carnibus in diebus esurialibus praeciperetur. Cibi quoque delicatiores & potus vini in diebus jejunii erant interdicti. Basil. *hom. I. de jejunio*, Cyrill. Hierosolym. *catech. IV. ad illuminat.*, Hieronym. *in cap. X. Daniel.* Quin multae ecclesiae, praesertim Orientales, etiam abstinebant ovis, caseo, & piscibus, diesque esuriales herbis, leguminibus, & fructibus transigebant. Severitas vero in majori hebdomada intendebatur, relictis enim reliquis cibis, fideles tantum panem cum sale & aquam solebant adhibere (d): & nonnulli ad biduum, vel triduum, vel quatrimum jejunia prorogabant, nec defuerunt, qui integra hebdomada cibis abstinerent. Epiphan. *exposit. fid. n. XXII. (e)*.

§. VIII.

(d) Ejusmodi vivendi ratio, qua in hebdomada magna panem dumtaxat cum sale & aquam sub vesperam christiani solebant adhibere, *Ξεροφαγία* dicebatur, aridus nempe victus. Epiphan. *exposit. fidei n. XXII. sed constitutiones sic dictae apostolicae lib. V. cap. 27. xerophagiam sic describunt, quasi pane, sale, aqua, & oleribus constaret. Quidquid vero hujus rei sit, synodus Laodicensis can. L. edicit* *Ξεροφαγίαν* etiam per integram quadragesimam.

(e) Praeter Epiphanium etiam Dionysius Alexand-

§. VIII. Pertinet quoque ad ecclesiastici jejunii constitutionem unica per diem comestio, quae ex cibis pefurialibus hora legitima frugaliter sumatur: finis enim & institutio jejunii est poenitentia & corporis maceratio, quae certe non obtinetur, si pluries in die cibum sumere liceret, aut si semel in die corpus nimia cibi copia roboretur. *Nihil prodest*, inquit Augustinus *serm. LVI. de tempore*, tota die longum traxisse jejunium, si postea ciborum suavitate vel nimietate anima obruatnr. Usque ad horam refectionis jejunium ducebatur, nec interim licebat vel aquam bibere.

xandrinus ep. canon. can. I. *testiatur*, fuisse christianos, qui in hebdomada magna jejunia intendebant, haftenus ut alii duobus, alii tribus, alii quatuor, alii omnibus sex diebus jejuni persisterent. Augustinus quoque de moribus ecclesiae catholicae cap. XXXIII. *de jejniis monachorum per annum habet*, eos continuum triduum, vel amplius saepissime sine cibo & potu ducere. Praefertim vero sacrum erat jejunium illis diebus, quibus sponsus oblatus erat, sive sextae feriae & sabbati majoris hebdomadis. Hoc genus jejuniorum Graeci scriptores υπερθεσεις jejunii superpositiones, vel επισυνανττειν την νηστειαν continuare jejunium dicebant: Latini vero jejunia conjungere & superpositiones. Mira profecto est superpositio per integros sex dies usque ad sequentis dominicae gallinicum, sed tamen vera: videturque eo contulisse robustior corporis habitus. Certe Augustinus loc. cit. vera de monachorum jejniis, sed incredibilia senarrare profitetur.

bere . Prudent. *hymn. VI.* Et manifesta profecto est posterioris aetatis relaxatio , qua tempore jejunii potus aquae & ante & post refectiorem licitus esse creditur : ut nihil dicam de illa doctrina , quae fert , factitias & nutriticias potiones non solvere jejunium .

§. IX. Hora legitima solvendi jejunii & refectiorem sumendi non in omnibus jejuniiis eadem fuit , sed varia pro jejuniorum qualitate . Et quidem in diebus quadragesimae solvebatur jejunium vespere post solis occasum . Basil. *hom. I. de jejunio* , Ambros. *serm. VIII. in psal. 118.* Contra jejunia feriae quartae & sextae solvebantur post horam nonam , hoc est tertiam pomeridianam , Epiph. *exposit. fid. n. XXII.* ubi finitis stationibus , quae erant sacra officia feria quarta & sexta in ecclesiis celebrari consueta , quisque ad capiendum cibum in domum abibat (f) . Hinc
je-

(f) *Stationes erant sacri conventus feria quarta & sexta celebrari soliti , in quibus fideles statim ab ortu solis jejuni orationibus , poenitentiae operibus , sacris lectionibus per multum diei vacabant ; hora vero nona post eucharistiam & oscula conventum , & jejunia solvebant , ut Petavius not. in Epiph. exposit. fidei eas describit . Nomen desumptum est a militaribus stationibus , quod Tertullianus de orat. in fine observat . In diebus stationum jejunium post conventum hora nona solvebatur ; atque ideo statio & jejunium concurrebant , nisi diei ratio jejunium prorogari postularet , velut in quadragesima , quando jejunium usque ad vesperam*
pro-

jejunium quadragesimae perfectum censebatur, jejunia vero quartae & sextae feriae dicebantur *semiiejunia*.

§. X. Disciplina sive perfecti, sive minus perfecti jejunii diu in ecclesia stetit invariata: tum ineunte seculo decimo tertio mutari coepta est. Etenim hac aetate solutio quadragesimalis jejunii, quae post vesperam fiebat, ad horam diei nonam transiit, de qua consuetudine veluti sua aetate vigente S. Thomas 2. 2. q. 147. art. 1. loquitur. Inde crevit relaxatio, & ad meridiem jejunia omnia soluta sunt, ac sufficere ad jejunium creditum est, si officio vespertino circa meridiem persoluto pranderetur. Quae relaxatio Ecclesiae indulgentia admissa est, sive potius tolerata, modo quae jejunii naturam constituit, refectionis unitas servaretur, & meridie pransi vespere non coenarent: qui enim bis in die reficiantur, ex Ecclesiae sententia jejunare non censentur. V: Nat. Alexandr. *sec. II. histor. eccles. diff. 4. art. 7.* Item feriae quartae jejunium, immo & ipsa a carnibus abstinentia ubique per Occidentem sensim observari desierunt, & jejunium sextae feriae & sabbati in abstinentiam a carnibus
ab-

prorogabatur; & tunc aliud erat jejunium, aliud statio, quia videlicet statio hora nona, jejunium ad vesperam solvebatur. Toto pentecostes tempore, quo jejunia erant interdicta, stationes nullae celebratae. Sed de stationibus plura habet Albaspinnaeus lib. I. obser. 16., qui forte in eo fallitur, quod adversus Pameliū ostendere satagit, stationes a jejniis differre.

abjērunt : quin in sabbato aliquorum locorum moribus carnes , aut animalium interiora , & extremas partes vesci licet . Quae vero major est relaxatio , in diebus jejēnii meridiē pransi vespere coenulam sumunt , quae *collatio* recepta voce audit (g) .

§. XI. Observatio jejunii , praesertim quadagesimae , omnibus ex mente Ecclesiae indicta est : nec aliquis in veteri disciplina sive aetate , sive conditione , sive vitae genere exemptus credebatur .

(g) *Origo collationis sive vespertinae coenulae est a monachis repetenda , quibus ob manuum-laborem ipsis jejunii diebus permittebatur , ut post sumtum legitima hora cibum , antequam cubitum irent , aquam biberent : cui potioni postea frustulum panis additum est , ne simplex aqua noceret . Sumebant verò monachi hanc refectiōem in cella ad prandium destinata ante collationem : quae erat lectio spiritalis ante completorium in claustris vel capitulis quotidie fieri consueta . Hinc ne tempus vitae regularis officiis destinatum in sumenda coenula tererent , diebus jejunii collationem in ipsa cella ad prandium addicta habere coeperunt , additumque illum ad refectiōem diebus esurialibus sumendam ea formula significabant , ire ad collationem . Ita nomen collationis a spiritali lectione ad serotinam illam refectiunculum translatum est , & a secularibus eo sensu usurpatum , quum eousque progressa est jejunii relaxatio , ut jejunantes meridiē pranderent , & vespere nihilominus coenulam sumerent . V. Nat. Alexandr. sec. II. hist. ecclēs. diff. 4. art. 7. prop. 2.*

batur. Certe Basilius *hom. II. de jejunio* docet, omnes in quadragesima ad jejunandum obligari: *ne quis semet excludat a numero jejunantium, in quo omne genus hominum, omnis aetas, omnes dignitatum ordines recensentur.* Et Leo M. *serm. XI. de quadragesima, quadragesimae jejunium observantiam sui universis fidelibus sine exceptione denuntiat.* Jejuniorum observatio indicta erat propter poenitentiam, quae christianis omnibus necessaria censebatur. Tantum ex veteris ecclesiae regulis abstinere a carnibus in quadragesima non tenebantur, qui *inevitabili necessitate, atque fragilitate, vel etiam impossibilitate aetatis* onus ferre non poterant, idque postquam veniam a sacerdote obtinuissent. Conc. Tolet. VIII. *can. 9.* Hinc novitatem sapit doctrina illa, qua multi, sive aetate, sive vitae genere jejunio eximuntur.

FINIS.

ANT 1.316.991

